




O FA'AMATALAGA O LE TUSI PA'IA

Doctrines Book in Samoan
Fa'atulagaina ma Fa'aliliuina

Tini Inu Lam Yuen

Printed by
Signs Publishing Company
Warburton, Victoria 3799, Australia
Australasian Conference Association Limited
"Incorporated in New South Wales"

Reprinted with permission from Samoa Mission of SDA

O FA'AMATALAGA O LE TUSI PA'IA

Doctrines Book in Samoan

Fa'atulagaina ma Fa'aliliuina

Tini Inu Lam Yuen

Printed by

SIGNS PUBLISHING COMPANY
WARBURTON, VICTORIA 3799, AUSTRALIA
Australasian Conference Association Limited
(Incorporated in New South Wales)

Reprinted with permission from Samoa Mission of SDA

FA'ASOLOGA O MATĀ'UPU

MATĀ'UPU

ITULAU

O SE 'UPU MO LE FAITAU TUSI

O 'UPU FA'ATOMUA

1.	O le Tusi Pa'ia o le ala ua fa'aalia mai ai le Upu Moni	1
2.	Mafua'aga o le Afioga a le Atua	3
3.	Molimau ua fa'amaonia ai le Tusi Pa'ia	5
4.	Ala ua tatou maua ai le Tusi Pa'ia - I	12
5.	Ala ua tatou maua ai le Tusi Pa'ia - II	14
6.	Ala ua tatou maua ai le Tusi Pa'ia - III	16
7.	Fa'asologa ma fa'avasegaina o Tusi	20
8.	A'oa'oga i le āla e su'esu'e ai le Tusi Pa'ia	23
9.	Keriso o le Autū o a'oa'oga fa'ale-Tusi Pa'ia	25
10.	O le Atua Tolu Tasi	27
11.	Āva ma le migao a tatau ai	29
12.	Faigā malō a le Atua ma Lona fa'avae	30
13.	Vaega e lua o le malō	32
14.	Tala Lelei o le Malō	35
15.	O le Atua Lē na faia mea uma	36
16.	O le Foafoāga	38
17.	O le taua tele ma le uiga o le toe fuata'iina	40
18.	O le Agasala	42
19.	Lusifelo le mafua'aga o le agasala	44
20.	Se fa'aopoopo iā Satani ma lana fouvalega	47
21.	O le faīga o le tagata	50
22.	O le pa'ū o le tagata	52
23.	Fua o'ona o le agasala a le tagata	54
24.	Folafolāga i le Fa'aola	56
25.	Ala o le Fa'aolataga - I	58
26.	Ala o le Fa'aolataga - II	61
27.	Ala o le Fa'aolataga - III	63
28.	Ala o le Fa'aolataga - IV	66
29.	Ata o le Tala Lelei i le Feagaiga Tuai	68
30.	A'oa'oga tāua mai le Fale Fetafa'i	71
31.	O Keriso a'o le'i fanau mai i le tino	74
32.	Liu Tino Tagata Keriso	75
33.	Soifuāga lē agasala o le Keriso	77
34.	Maliu o Keriso	79
35.	Toe soifua mai o Keriso	81
36.	Toe Afio a'e o Keriso i le lagi	83
37.	Galuega fa'a-Fautua a le Faitaulaga Sili	85
38.	Malumalu i le Lagi	87
39.	Sauniga o le Malumalu	88
40.	Fa'apa'iaina o le Malumalu	90

41.	O le 2,300 Aso ma le Fa'amamāina o le Malumalu	92
42.	Fa'amasinoga Su'esu'e	96
43.	Fe'au mo le itū aso o le Fa'amasinoga	99
44.	Tapunia le Faitoto'a o le Alofa Tunoa	101

MATĀ'UPU

ITULAU

45.	A'oa'oga ua fa'anenefu ai le Tala Lelei moni	102
46.	O le Afio Fa'alua mai o Keriso	107
47.	Fa'ailoga o le Afio Fa'alua mai o Keriso - I	109
48.	Fa'ailoga o le Afio Fa'alua mai o Keriso - II	111
49.	Faigatā ma fa'asesēga o aso e gata ai	114
50.	Mala mulimuli e fitu ma le Taua o Amaketo	116
51.	O le Meleniuma	119
52.	Vaega tetele e lua o le Fa'amasinoga	122
53.	O le Aso Tele o Ieova	123
54.	Nofoāga tumau o le 'Au Pa'ia	126
55.	Tulafono Pa'ia a le Atua	128
56.	Na fa'agataina e Iesu le Tulafono i Lona maliu?	132
57.	O Tulafono e lua	136
58.	O Sauniga ua o'o mai le Oti ma le Agaga	139
59.	O Feagaiga e lua	143
60.	Sapati i le Feagaiga Tuai	148
61.	Sapati i le Feagaiga Fou	150
62.	Fa'amatalaga fa'aopoopo i le Sapati	152
63.	Aso Sā (Sunday) i le Feagaiga Fou	154
64.	Taumafai tagata e fa'aliliuina Tulafono	158
65.	Fa'amaufa'ailoga a le Atua	161
66.	Fa'ailoga a le Manu Fe'ai	163
67.	Fe'au o le toe fuata'iina o le Sapati	167
68.	Fe'au fa'a-Elia	169
69.	Ekalesia ma le Malō	172
70.	Sefulua'i ma Taulaga	174
71.	Sauniga fa'ale-Ekalesia – I	176
72.	Sauniga fa'ale-Ekalesia - II	178
73.	Tino, o le Malumalu o le Atua	180
74.	A'oa'oga i le tausiga o le Tino	182
75.	Uiga moni o le Tagata	185
76.	Po'o le ā le Agaga?	189
77.	O fea o i ai ē ua maliliu?	192
78.	Toe tutū e lua ma le oti fa'alua	194
79.	Fa'asalaga mo ē amio leaga	196
80.	Avanoa e toe sauni ai mo le ola e fa'avavau?	198
81.	Iesu ma le faomea i le Satauro	201

82.	Fa'ata'oto i le mau'oa ma Lasalo	204
83.	Agaga i le Fale puipui	206
84.	O le Fa'ataulaitu	209
85.	Agaga Pa'ia o le Atua	213
86.	Galuega a le Agaga mo le Tagata Fa'atuatua	215
87.	Mea alofa a le Agaga	216
88.	Mea alofa a le Agaga o Valo'aga	217
	O LE FA'ASINO TUSI	219

A Word to the Reader

This reprint of the book on the fundamental beliefs of the Seventh-day Adventist Church in Samoan is presented to you in the hope that you will want to study it carefully and diligently. In 1931 Pastor R. Reye (Misi Laie) organized portions of the book that included subjects needed for training gospel workers at the church seminary. Later on Pastor Tini I. Lam Yuen (Pastor Tini) completed translating and then edited in its entirety the Doctrines Book in Samoan. When it was originally published in 1959, only a limited number of books were printed and made available, mainly to ministers of the churches and teachers at the seminary at Vailoa, Saoluafata, Samoa.

With this new edition, effort was made to correct any errors (mainly spelling), add a list of references, insert reference pages left out in the original book, or other necessary editing. The content and all material remain unchanged.

If you are to benefit from studying and understanding the principles on which this church was founded, then this work would have fulfilled its objective, - that is, to lead you to better understand then accept God's eternal love and salvation that is offered freely.

May you find in this book new ways and the key to open your heart and soul to better understanding of the Savior's desire for His children.

Lam Yuen

O Se Upu Mo Le Faitau Tusi

O lenei Lomiga fou o le tusi ua fa'a-Samoaina, "O A'oa'oga o le Tusi Pa'ia" ma talitonuga a le Ekalesia Aso Fitu o le Toe Afio Mai, ua tu'u atu ina ia maua ai e 'oe se loto naunau ma le filigā e su'esu'eina ma le fa'amaoni ma 'ia e malamalama atili ai. I le tausaga e 1931 na mua'i fa'atulagaina ma fa'amaopoopo ni vaega o lenei tusi e le ali'i faife'au o Misi Laiē (Pastor R. Reye) auā le a'oa'oina o le 'au faigaluega a le Ekalesia. Mulimuli ane na toe fa'atulagaina ma fa'aliliuina ai i lona ato'atoa lelei e le faife'au o Tini Inu Lam Yuen (Pastor Tini) o matā'upu fa'atalitonuga i le gagana Samoa. O le tausaga e 1959 sa lolomiina ai na'o ni nai tusi ina ia fa'aaogāina e le 'au faigaluega, o faife'au ta'ita'i o 'au lotu, ma faia'oga o le a'oga fa'a-faife'au i Vailoa, Saoluafata, Samoa.

Sa taumafai lava a e le'i lomina lenei tusi fou ia toe fa'asa'osa'o ni mea o sesē (i le sipelaina o upu), sa fa'aopoopoina le lisi e fa'asino ai tusi o lo'o fa'aaogāina pe o si'itia mai ai manatu (references), ma fa'anumeraina itulau o tusi na fa'aaogāina a e o lo'o misi i le tusi muamua. E leai se mea o suia i se vaega, se manatu ma fa'amalamalamaga, po'o le loloto o le tusi.

Afai e te manatu ia fa'amanuiaina 'oe e āla i lou faitau ma le su'esu'eina o fuaiupu pei ona tu'uina mai e lenei fesoasoani, ma ua e malamalama atili ai i matā'upu ma le upu moni na fa'avaeina ai lenei ekalesia, ona talitonu ai lea ua fa'ataunu'uina le fa'amoemoe na saunia ai lenei tusi. O lea le talosaga ma le mana'oga, ina ia ta'ita'iina 'oe i se olaga manuia e āla mai i lou taliaina o le fa'aolataga ua foa'iina mai e le Tamā alofa.

Ia 'avea 'upu o lenei tusi o se ta'iāla e tosina ai lou loto ma lou mafaufau ia e malamalama ai i fa'anaunaga o le Ali'i Fa'aola mo Lana fanau.

Lam Yuen

O Upu Fa'atomua

O matā'upu o lo'o aofia ai i le Tusi nei, na fa'atulagaina e le ali'i faife'au o Misi R. Laiē (R. Reye), e 'avea ma matā'upu e a'oa'oina i le Kolisi fa'amisionare a le Ekalesia Aso Fitu o le Toe Afio Mai i Vailoa, Saoluafata, Samoa i Sisifo.

O le 1931 na mua'i tu'ufa'atasia ai o ia matā'upu, peita'i, sa aofia i ai na'o se vaega, sa lē au'ili'ili fo'i ōna fa'amatalaga; ma sa fa'alagolago atu lava lona fa'amalamalamaina i le su'esu'ega a le faia'oga.

O le 1959 na 'auina mai ai mai Sini, Ausetalia, o le laumua lea o le Matāgaluega fa'a-Ausetalia ma motu o le Ātu Pasefika a le Ekalesia Aso Fitu, o le kopi ua ato'atoa lelei ona fa'atulagaina ma fa'asa'oina, mo le lolomi ina ma le fa'aaogāina, e lē gata i totonu o le kolisi, a e fa'apea fo'i ma le ekalesia.

O le ulua'i lomiga la o lenei tusi, sa faia lava lea i le ofisa o le Ekalesia i Lalovaea, ma e na'o le 100 tusi sa aofia ai.

Tini Inu Lam Yuen - Fa'atonu

FA'AFETAI FA'APITOA

E momoli le fa'afetai fa'apitoa i le tinā o Fueainaula Tagaloa Lam Yuen mo lana fesoasoani malosi i le galuega o le fa'asa'osa'oina (sipelaina o 'upu) fa'apea fa'amaoniga o mata'upu si'i mai le Afioga a le Atua ma tusi po'o manatu uma o lo'o fa'aaogāina i lenei tusi.

UA FA'AALIA MAI LE UPU MONI E LE TUSI PA'IA

- I.** Ua sili i lo nisi sa'ili'ili ona fia sa'ili'ili o tagata ina ia latou iloa le mea ua ta'ua o le 'Upu moni. E tele a'oa'oga a le 'au popoto ua fa'a'iloa mai ai o latou lava manatu fa'ale-tagata i mea e tatau ona 'avea ma 'upu moni e 'ana'ana i ai.
1. **Ioane 13:38** O le fesili a Pilato, ua fa'a'iloa mai ai le naunauta'i o le fanau a tagata i lo latou fia malamalama i le mea tonu e ta'ua o le 'upu moni.
 2. **I Kori. 3:19** E ui i nisi manatu, po o nisi fo'i a'oa'oga ua maua i le poto fa'a-lenei lalolagi, a e tele fo'i ina aliali mai i se taimi lo latou sesē.
- II.** E lē mafai e le tagata ona iloa o le 'upu moni i lona lava atamai, auā ua fa'apōuliuligia lona mafaufau e le agasala, ua nenefu ai fo'i ma lana va'ai.
1. **Iopu 11:7** E lē mafai e le tagata i lana lava su'esu'ega ona ato'atoa ai o lona malamalama i mea moni tau le Atua.
 2. **Roma 11:33** E lē masu'esu'eina e le tagata āla o le Atua.
 3. **Faila. 8:17** Ua fa'apenā le molimau a le poto o Solomona.
- III.** O lea ua tatou mautinoa ai, pe a aunoa ma le ta'ita'iga fa'a-le Atua, ma se fa'aaliga fo'i mai iā te Ia, o Lē e pogai mai ai le malamalama uma, e lē mafai e le tagata ona o'o ina pupula iā te ia o le 'upu moni.
1. **Tani. 2:28** O lo'o soifua i le lagi Lē Na te fa'aalia mea ua lilo.
 2. **Amosa 3:7** E fa'aalia e le Atua Lona finagalo.
 3. **I Kori. 2:7-10** E fa'aalia mai e le Agaga o le Atua o mea e lē mafai ona iloa e ali'i popoto o lenei lalolagi.
 4. **Mata. 11:25** Ua nanā i ē popoto, a ua fa'aalia i tama valevale, o ē ua i ai le loto fa'ale-agaga.
- IV.** Ua 'avea afioga tusia a le Atua ma āla ua tatou maua ai se fa'aaliga tonu o le 'upu moni.
1. **Tani. 10:21** Ua ta'ua o le Tusi e fa'amaoni.
 2. **Ioane 17:17** "O Lau Afioga o le 'upu moni lea."
 3. **Faaal. 1:1, 2** Ua 'avea le Tusi Pa'ia o se fa'aaliga o mea moni.
 4. **Faaal. 21:5** O 'upu e moni ma le fa'amaoni.
 5. **Sala. 119:160** E moni Lau Afioga mai le amataga.
- V.** E ā le tagata ona sa'ili ma le matuā loto naunau; a e ā le Atua ona foa'i mai o le poto ma le malamalama.
1. **Faata. 2:1-6** Ia sa'ili'ili ma le loto naunau e pei ona sa'ili'ili i le ario.
 2. **Iakopo 1:5, 6** Ia ōle atu ma le fa'atuatua, e foa'iina mai lava e le Atua le poto mai i lē ua fa'anaunau i ai.

"Ia su'esu'e i le Afioga a le Atua ma le tatalo. O le Afioga lea na te tu'uina atu i ou luma, i le tulafono a le Atua ma le soifuāga o Keriso, o fa'avae ola o le amio pa'ia, a aunoa ma lea, e

leai sē tasi na te iloa atu le Ali'i (Eperu 12:14). Na te fa'aali tino mai le agasala; na te fa'aaliali manino mai le āla o le fa'aolataga. Inā e fa'alogo atu i ai, auā o le si'ufofoga lava lenā o le Atua o lo'o fetalai mai i lou agaga." - *O La'asaga iā Keriso*, itulau e 39.

VI. O lo'o i ai ma le tasi fa'aaliga o le uiga ma le finagalo o le Atua, o galuega ia a Ōna a'ao. A e peita'i o se fa'aaliga fa'alē-atoa lea, i le e lē mafai fo'i ona tatou faitau tonu i ai, vaganā ona ua ta'ita'iina i tatou e le malamalama mai totonu o le Tusi Pa'ia.

1. **Sala. 19:1-5** Ua o'o atu i tulū'iga o le lalolagi le fa'aaliga o le mana ma le silisili 'ese o le Atua e pei ona molimau i ai galuega a Ōna a'ao.
2. **Iopu 12:7-10** E a'oa'o mai galuega a le Atua i le fanau a tagata.
3. **Isaia 40:26** O fetū o le lagi ua fa'ailoa mai ai le malosi ma le mana o le Atua.
4. **Iere. 10:10-12** E iloa le Atua moni i Āna galuega tetele ma le ōfoōfogia.

O le mafaufau atu i galuega a Lē Silisili 'Ese o lo'o tumau ai le lalolagi e mafai ona fa'atupuina ai o lō tatou fia tapua'i atu i Lē na Ia faia, a e peita'i e lē mafai ona maua mai ai o se ta'ita'iga tonu mo a tatou tapuā'iga. E ao ina tatou maua fo'i ma le fa'aaliga ato'atoa iā te Ia, ua foa'iina mai e le Atua i Āna afioga tusia.

"O galuega a Ōna a'ao ma fa'aaliga mai Lona Agaga, ua molimau fa'atasi ia, e ta'utino mai ai le alofa o le Atua. Ua noatia e le Atua o tatou loto iā te Ia i fa'ailoga e lē ma-faitaulia o i le lagi ma le lalolagi. Na te fia fa'ailoa mai fo'i o Ia iā i tatou i Āna galuega loloto o lo'o si'omia ai le lalolagi; a e lē o matuā mae'a mai ai le fa'aaliga o Lona alofa iā i tatou." - *O La'asaga iā Keriso*, itulau e 7, 8.

O LE MAFUA'AGA PA'IA O LE AFIOGA A LE ATUA

I. Ua 'ese mamao le Tusi Pa'ia i lo isi tusi uma.

1. Ua ta'utino mai e ia lava lona mafua'aga pa'ia.

E lē o se tusi mai tagata, a e peita'i o le Tusi mai le Atua.

a. **II Timo. 3:16** “O Tusi Pa'ia uma lava e mai le Agaga o le Atua.”

b. **II Pete. 1:20, 21** “O tagata pa'ia o le Atua na talatalaina mai ina ua osofia mai e le Agaga Pa'ia.” O lona uiga, e le'i tautala fua mai se tasi o nei tagata, a e peita'i sa lagaina ma ta'ita'iina o latou loto ma o latou mafaufau e le Agaga, ua latou tusia ai fo'i afioga ta'itasi uma e tusa ma le finagalo o le Atua.

c. **II Samu. 23:2, 3** Ua molimau mai Tavita i le ala na o'o ane ai le Afioga a le Atua iā te ia.

2. Ua silisili 'ese lava le pa'ia ma le maualuga o ōna tapula'a.

a. **Ne'emia 9:13** Ua fa'ailoa mai ai o tulafono ma fa'amasinoga tonu (Roma 7:12).

b. **I Pete. 2:21, 22** Ua fa'ailoa mai ai fo'i ma se fa'aa'oa'oga mo i tatou ua ato'atoa ona lelei (Ioane 13:15).

3. E fai lona mana.

O ōlaga o tagata e miliona ma miliona ua liua ma toe fuata'iina talu ai le mana o i ai i le Afioga a le Atua.

a. **Eperu 4:12** E ōla le Afioga a le Atua, e matuā galue, e fa'amasino i manatu ma filifiliga o le loto.

b. **I Pete. 1:23** E maua ai le fanaufouina o i tatou.

c. **Iakopo 1:21** E fa'aolaina ai o tatou agaga.

d. **Iere. 23:29** E pei o le āfi, e pei fo'i o le samala.

4. E matuā ōfoōfogia le fa'amatalaga o lona tusiga.

a. E lelei ona tatou mafaufau i le uiga ma le tulaga o i latou o ē na fa'aaogāina e le Atua mo le tusiga o Lana Afioga. O lo'o aofia ai i totonu o le Tusi Pa'ia o 'upu na tusia e tupu, tamāli'i, fatupese, failauga, tagata fai faiva, leoleo manu, ali'i tofia o malō, fa'amasino, o ē na a'oa'oina i le poto fa'a-Aikupito, o ē na ūlufafo mai i le a'oa'oga fa'a-Papelonia, o ē sa a'oa'oina e le 'au Rapi i Ierusalema. Sa tusia e tagata o ē sa fa'a-'aunu'ua'ina, o ē sa nonofo i mea tu'ufua, o ē sa mau i fale 'ie a e fa'apea fo'i ma maota o tupu, o ē matitiva, o ē mau'oa.

b. E tasi le āfe ma le ōno selau o tausaga na mavae atu i le fa'ato'ā mae'a ai ona tusia o lenei Tusi. O lē na ia fa'ai'uina, sa na lē maua se feso'ota'iga ma lē na ia amataina. A e ui lava i lea, ua 'avea ōna vaega e pei o ma'a o se fa'avae ua teuteuina e ni tufuga popoto o ē sa galulue i taimi ese'ese, ona 'aumai lea ma ua fa'atatauina ma le leai lava o se ma'a e tasi ua lē fetau lelei. O isi tusi, e itiiti aso o lo latou aogā ma le fīafia i ai o tagata, a e peita'i lenei Tusi, e tumau pea ma e fou pea lava i tupulaga uma (Isaia 40:8; I Peteru 1:25).

II. E aogā Tusi Pa'ia uma lava (le FeagaigaTuai ma le Feagaiga Fou), e a'oa'o ai ma fa'apoto ai i le amiotonu (II Timo. 3:16,17; Roma 15:4).

1. **Sala. 119:160** E moni Lau Afioga talū le amataga. O le Kenese lava ua tele i na fa'asagatau i ai le 'au fa'afiapopoto i nei ona pō (Salamo 10:3, 7).
2. **Gal. 26:22, 23** Ua fa'avaeina le Feagaiga Fou i luga o le Feagaiga Tuai, ma ua fepi'itai lava i la'ua.
3. **Ioa. 5:39, 45-47** Sa talitonu Iesu ma Na fa'amaonia vaega uma o le Feagaiga Tuai (Luka 24:27, 44; Mataio 24:15).
4. **Tani. 12:4, 9** O nisi vaega o le Feagaiga Tuai e fa'asino tonu i "ōna pō o le i'uga."

*"Ua iā te outou tagata e to'atele o ē ua latou fai mai, 'Ou te lē fa'atuatua i le Feagaiga Tuai; ua na o le Feagaiga Fou 'ou te fa'atuatua i ai.' O'u uso e, e lē matu'u-'ese'eseina i la'ua. E i ai le filo mūmū (le toto o Iesu), o lo'o ta'oto i le Feagaiga Tuai ma le Feagaiga Fou, ua fusia fa'atasi ai i la'ua."- Ta'utinoga a Misi Muti, faife'au ta'uta'ua a le Ekalesia o le Fa'apotopotoga. D.L. Moody, in **Sermons, Addresses, and Prayers**, p. 154.*

*"O upu si'i mai le Feagaiga Tuai e 889 o tusia i itulau o le Feagaiga Fou, ua 'avea ia ma mea ua matuā felavasa'i ai o nei vaega e lua o le Tusi Pa'ia, ua 'avea ai fo'i e pei o itū e lua o se fala ua lalaga fa'a-sau tualua. A momotu ni laufala o le Feagaiga Tuai, ua lē aogā ai fo'i ma afioga a Iesu, auā na Ia fa'amaonia le Feagaiga Tuai."-Ta'utinoga a Uilipua Kalafu, faife'au a le Ekalesia Peresepiteriana. - Wilbur F. Crafts, **Must the Old Testament Go?** p. 39.*

III. E ao lava ina tatou matuā talitonu i le mafua'aga pa'ia o le Afioga a le Atua, i le o le a 'avea fo'i lenā mautinoāga ma āla tatou te maua ai le āva tele ma le fa'autauta lelei i lo tatou vā feagai ma le Tusi Pa'ia.

1. **I Tesa. 2:13** Ia talia le Afioga a le Atua, a e lē o le 'upu a tagata.
2. **Iere. 15:16** Ia fiafia ma olioli ai o tatou loto.
3. **Isaia 66:2, 5** Ia fa'amaulalo ma gatete i le Afioga a le Atua.

"O le Tusi Pa'ia, o le si'ufofoga moni lea o le Atua o lo'o fetalai mai iā te i tatou peisea'i o lo'o fa'alogo lava i ai o tatou taliga. Pe a tatou mautinoa lenei mea, tatou te tatalaina ai le Tusi Pa'ia ma le āva tele e tatau ai, i le o le a tatou su'esu'e ai fo'i i ōna matā'upu ma le loto atoa. O le a tatou manatu i le faitauina ma le mafaufauina o Afioga a le Atua e peisea'i o se feiloa'iga, po o se talatalaga fo'i ma Lē Silisili 'Ese.'" - O Fe'au mo le Ekalesia, Tusi e VI, itulau e 393.

"E leai lava se tasi mea e tusa ona fa'amalosiina ai o le atamai fa'apei o le su'esu'e i le Tusi Pa'ia. E leai lava se isi tusi e sili i lo le Tusi Pa'ia, o lo'o aofia ai 'upu moni e lē mafa'atusaina, i lona fa'alauteleina ma fa'amalosiina o le mafaufau. Pe 'ana matuā su'esu'eina le Afioga a le Atua e pei ona tatau ai, po ua maua ai e tagata le fa'alauteleina o le atamai, ma le tapula'a maualuga o le amio, ma le matuā fa'asaga tonu o le loto ma le malosi i mea o lo'o tausisi atu i ai, o mea lava ia o lo'o seāseā va'aia i nei ōna pō." - O La'asaga iā Keriso, itulau e 99.

TAULOTO: II Timoteo 3:16, 17.

O MOLIMAU UA FA'AMAONIA AI LE TUSI PA'IA

- I.** Ua lē so'ona fīnau tele mai le Tusi Pa'ia ina ia tatou talitonu atu i āna a'oa'oga ma fa'aaliga, a ua tu'u i molimau e lē ma-fa'afitia, i le o nei fo'i molimau ua mafai ona malamalama i ai o i latou uma o ē ua sa'ili ma le naunauta'i atoa ma le loto maulalo.

Sala. 25:9, 14 E ta'ita'iina e Ia o ē agamalū i Ōna āla.

Tani. 12:10 E lagona e i latou o ē ua i ai le poto moni fa'ale-agaga.

Mata. 7:7, 8 E tauia tele le sa'ili'iliga ua faia ma le loto naunau.

Ioane 14:11 E i ai galuega po o fa'aailoga e fa'avaeina ai lo tatou talitonu

1. E lē mafai ona fetalai mai o le Atua ia tatou talitonu, a e aunoa ma Lona tu'uina mai fo'i o ni molimau ua lava e fa'avaeina a'i lo tatou fa'atuatua. O ē ua fia masalosalo, latou te maua pea lava le āla o le masalosalo; a o i latou o ē ua naunau fa'amaoni i lo latou fia iloa o le upu moni, o le a latou maua fa'amatalaga ma molimau e tele e mapu ai lo latou fa'atuatua.
2. *"Pe a lagona i o tatou loto le mana ma le poto o le Atua, ma lo tatou lē mafai ona malamalama i Lona silisili 'ese, e tataua lava ona maua ai i tatou i le loto fa'amaulalo, ma ua tataua fo'i ona tatou tatalaina Lana Afioga ma le āva tele fa'apei ua tatou o'o atu lava i Ōna luma. Pe a tatou tago atu i le Tusi Pa'ia, ia ioe o tatou mafaufau, o lo'o i ai le pule ma le poto e sili atu i lo tatou, ma ia ifo atu o tatou loto ma lo tatou poto iā te IA LENĀ."*
- O La 'asaga iā Keriso, itulau e 123.

- II.** O le tasi molimau e aupito tāua e iloa ai le fa'amaoni o le Tusi Pa'ia, o le Upu Valo'aga lea.

Isaia 46:9, 10 Ua fa'aailoa mai e le Afioga a le Atua mai le amataga o mea o le a tutupu amulī.

II Pete. 1:16 Ua 'avea le Upu Valo'aga ma fa'avae e sili atu lona mausalī i lō le va'ai ma le fa'alogo.

1. Ua valo'ia mai e le Tusi Pa'ia:
 - a. O le tutū a'e ma le pa'u'ū o malō tetele (Tanielu 2:36 - 44; 4:17, 25).
 - b. O le fa'aumatiāga o a'ai (Isaia 13: 19-22; Mataio 24:2).
 - c. O mea e tutupu i olaga o tagata ta'ito'atasi (Isaia 45:1 - 4).
 - d. O fa'aailoga i le lagi ma le lalolagi (Luka 21:10, 11).
2. Ia su'esu'e i valo'aga nei ma o latou taunu'uga:
 - a. Le a'ai oTuro (Esekielu 26:7-15; 29:17 - 20).
 - b. Iuta le Sekara (Salamo 109:8; Galuega 1:16, 20, 21).
 - c. Le Mesia (Mika 5:2; Mataio 2:1 - 6).
 - d. Le a'ai o Ieriko (Iosua 6:26; I Tupu 16:34).

- III.** O lo'o i ai ma le tasi fa'amaoni, o le Molimau lea a le Ele'ele:

Iopu 12:8 E a'oa'o mai le lau'ele'ele i tagata.

Luka 19:40 O ma'a fo'i ua fai o latou leo.

1. O a'ai e tele sa tanumia anamua ua toe 'elia nei, ma ua maua ai molimau e tele ua fa'amaonia ai tala o lo'o tusia mai i le Tusi Pa'ia. O aso anamua sa lē iloa ai e tagata ona faia o tusi e pei ona tatou masani ai nei, a e sa tusia a latou tala i pa'u ma ma'a ōmea, a o

susū pea le ōmea ma vaivai, ona fa'alāina ai lea se'ia ma'a'a, ona tumau pea lea o le tusilima se'ia o'o mai i ōna pō nei.

2. Ua mafai nei e ali'i popoto ona latou faitauina o mata'itusi uiga 'ese o gagana fa'a-anamua, e i ai le gagana Aikupito sa fa'aaogāina i ona pō o Iosefa ma le 'au Farao, fa'apea fo'i ma gagana fa'a-anamua a Peresia, Asuria, ma Papelonia.

- a. Ua fa'apenei le molimau a le ali'i a'oa'oina o *Professor A.H. Sayce*:-

"O fa'aaliga ma a'oa'oga a le 'au lē talitonu sa matuā fa'amamafaina e i latou, ua tele ina aliali mai nei o lo latou sesē ona o molimau ua maua mai nei i le ele'ele. O tala o i le Tusi Pa'ia i mea sa tutupu, atoa ma tagata ua ta'ua mai ai, sa taofi ai lenā vasega o ni tala fatu, a ua mautinoa nei le sa'o o nā tala. Ua aliali mai nei, sa sili ona mautinoa lelei e le 'au tusitala fa'a-anamua o mea sa latou molimau i ai, a ua mautinoa nei le sa'o o nā tala. Ua aliali mai nei sa sili ona mautinoa lelei e le 'au tusitala fa'a-anamua o mea sa latou molimau i ai, a 'ua lē fa'apea le 'au lē talitonu i nei ōna pō, o ē sa fai pona iā te i latou." - Monument Facts, p. 23.

- b. A e fa'apenei le ta'utinoga a le ali'i o *Professor L. Campbell*:-

"O tala tu'u fa'asolo na tusia i ōna pō o malō fa'aanamua, ua manino nei ina ua mafai ona faitauina. Ua matuā galue le suō. Ua tautala mai le ele'ele. Ua alalaga ma'a. Ua maua tusi lima, ua faitauina, ma fa'aliliuina, ma fa'atusaina ma isi fo'i tusi lima. O le mea ua maua mai, o molimau tāua e tele, ma o lo'o saga fa'ateleina pea, ua fa'amaonia ai le Afioga a le Atua." - The Bible Under Fire, pp. 105, 106.

- IV. O le tasi fo'i lenei molimau tāua, o le molimau lea a le loto. E to'a afe ma afe ua latou talitonu ona ua lagona i o latou lava loto le fa'amaoni o le Afioga a le Atua.

Ioane 7:17

O lē na te fia faia le finagalo o le Atua, o le a lagona lava e ia le matā'upu pe mai le Atua, pe leai.

I Ioane 5:10

Ua i totonu iā te ia le molimau.

Roma 8:16

E molimau mai le Agaga i o tatou agaga (Kalatia 4:6).

TAULOTO: Isaia 46:9, 10.

O LE ĀLA UA TATOU MAUA AI LE TUSI PA'IA - I

I. O le leoleoina o le tusiga tonu.

1. Tatou te fiafia tele i le Tusi Pa'ia. O le tusi silisili 'ese lea ma le matuā aogā. O lea e lē taumate ai ona fia iloa e le to'atele, pe na fa'aapefa ona tatou maua o lea Tusi tāua.
2. E silisili lava ona tāua i le Atua o Lana Afioga, i le ua Na tausia lava ma leoleoina mai le amataga ia lē manumalo i ai se fili, a ia tumau pea le ato'atoa o lona mamā ma lona pa'ia. (Fa'aaoga le Salamo 138:2; 2:6,7).
3. *"O tausaga e 2,500 mai le foafoāga o le lalolagi, sa lē maua ai e tagata se fa'aaliga tusia o le finagalo o le Atua. O i latou o ē sa a'oa'oina e le Atua, na latou talatalaina atu i nisi. Na maua e fanau le poto fa'ale-agaga mai o latou mātua, i le sa fa'aapea lava ona faia i tupulaga e tele. O le saunia o afioga tusia na fa'ato'a amataina lea i ōna pō o Mose. O ōna pō lava ia na amata ai ona fa'amauiina o fa'aaliga mai le Atua i le Tusi a le Atua. Na faia pea lenei galuega i tausaga e 1,600 e amata mai iā Mose, lē na ia fa'amalamalamaina le foafoāga ma le tulafono, se'ia o'o mai iā Ioane, lē na ia tusia nisi matā'upu aupito tāua o le tala lelei." - O le Finauga Tele, Upu Fa'atomua, itulau e 5.*
4. Na mua'i tofia e le Atua o tagata Iutaia e fai ma leoleo latou te tausia Lana Afioga, i le sa latou fa'ataunu'uina lea tiute ma le matuā fa'amaoni lava (Roma 3:2, 1; 9:4).

II. O sauāga ma ē na leoleo i tusiga a le Afioga a le Atua.

1. Mai ōna pō o le 'au aposetolo, se'ia o'o i le tele o seneturi o le pule sa'oloto ma sauāga a Roma, se'ia o'o mai fo'i i nei ōna pō, ua 'avea ai le "lafu mamoe itiiti" (Luka 12:32) ma ē ua latou tausia ma leoleoina Afioga a le Atua ia 'aua ne'i motusia, pe fa'auiga 'eseina, a ia maua pea e le lalolagi o ulua'i tusiga i lo latou mamā e pei ona tu'uina mai e le Atua. O i latou ia o ē ua taofi mau pea i "le fa'atuatua na tu'uina mai fa'atasi i le 'au pa'ia" (Iuta 3). Tatou te lē manatu i le "mea lilo a le amio leaga," o le a fa'apenā ona latou tausia lelei o le Afioga a le Atua. (Fa'aaoga le valo'aga a Tanielu 8:12).
2. O le Ekalesia moni a Iesu, sa na o ni nai tagata e to'aitiiti pe a fa'a-tusaina i le to'atele o ē na 'avea ma o latou fili. Sa tele ona sauāina o i latou se'ia o'o ina latou sosola i le vao (Fa'aal. 12:6). A e peita'i na latou 'aveina le Tusi Pa'ia sa'o, auā fai mai, "na fagaina i latou e le Atua i ia tausaga e tele" (Faaal. 12:14).
3. O le fanau moni a le Atua i nā tausaga e tele o le sauāina: - **O le 'Au Kerisiano Suria (Syrian Christians), o le 'Au Ualetenese (Waldenses), ma Alepikenesi (Albigeneses), le 'Au Uso i Poemia (Bohemian Brethren), o Hukenote i Farani (Huguenots), o Katari i Siamani (Cathares), o Lolari i Egelani,** ma nisi.
4. Sa i le 'Au Kerisiano Suria le Tusi Pa'ia sa'o e igoa o le **Textus Receptus**, o lona uiga pe a fa'a-Samoaina, **"O tusiga na tu'uina mai,"** auā na tu'uina atu iā te i latou e le 'au aposetolo.
5. Na maua e le 'Au Ualetenese le Tusi Pa'ia sa'o mai le Ekalesia i Sasa'e (le 'Au Kerisiano Suria). O le tasi lenei fa'amalamalamaga ua si'i mai le tusi e igoa **"O le Tala i le Ekalesia"** (Malua Press, itulau e 173), fai mai: "A o le taofi o Ualetenese i latou, ua fa'aapea, 'Fai mai i latou, na āfua la latou Ekalesia i le 'au aposetolo, ma ua latou taofi i matā'upu na tu'uina mai e i latou.' Ua lē mautali fo'i ē na sauā iā te i latou i lea tala; a ua fai ane nisi o i latou ua moni lava lea 'upu.'"

TAULOTO: Salamo 138:2.

O LE ĀLA UA TATOU MAUA AI LE TUSI PA'IA - II

I. O Pa'u (M.S.S.) po o āla na fa'aaogā mo le tusiga.

1. O le Feagaiga Tuai i lona fa'ato'ā tusia, na tusia i le gagana Eperu fa'a-anamua, a o le Feagaiga Fou na tusia i le gagana Eleni.
2. Sa leai ni laupepa i ōna pō ia, a e sa saunia pa'u o manu e fai ma tusi. E ui ina sa faigatā lea āla, a ua sili lava ona faigatā o le tusilima a ia tupulaga. Fai mai sa fa'aaogāina e lutaia na o pa'u manu mamā e tusia ai Afioga a le Atua.
3. Ua lē o toe maua nei ni pa'u na tusia e le 'au perofeta ma aposetolo, a ua na o pa'u e tele na si'i mai i nā ulua'i pa'u. Ua 'avea nei pa'u po o nei tusi e tele, ma ala ua mafai ai ona tatou iloa o 'upu uma o le Tusi Pa'ia, e pei ona sã tusia e i latou o ē na osofia e le Agaga Pa'ia.
4. Ua fa'aigoaina nei pa'u, o **“Manuscripts,”** o le upu Latina lea ua fa'a-Peretaniaina.
 - a. O ōna vaega e lua, o **Manus** - lima, ma **scriptus** - tusitusi. O lona uiga tonu la, “O le tusilima.” O le fa'apu'upu'uina o le upu Manuscript e fa'apea, **M.S.S.**
 - b. Ua ta'ua fo'i le M.S.S. i lenei igoa, o le **“Codex,”** po o le **koteka** pe a fa'a-Samoaina.
5. Sa masani le 'au tusi 'upu ona latou faia o āta (kopi) o tusi a le 'au perofeta ma aposetolo. Na latou faia lea galuega ma le matuā fa'aeteete tele. Na faitaulia e lē na o le aofa'i o 'upu, a e sa fa'apea fo'i ma mata'itusi ta'itasi uma, ia 'aua lava ne'i pa'ū sina iota, po o sina fasi mata'itusi e tasi. (Manatua le fetalaiga a Iesu i le Mataio 5:18). O se āta (kopi) ua lē ato'atoa ōna foliga i le ulua'i tusi na si'i mai ai, na te'ena loa ma ua lē fa'aaogāina.
6. Fai mai o 1o'o i ai M.S.S. o le Feagaiga Tuai e tusa ma le 1,700; a e i ai M.S.S. o le Feagaiga Fou e tusa ma le 4,000. Ona o le tele o nei pa'u ua mafai ona tatou iloa ai o le tusiga sa'o o le Afioga a le Atua.
7. O le tele o M.S.S. o le Feagaiga Fou (pa'u aupito leva) na tusia i le gagana Eleni i mata'itusi tetele lava. O le tusilima lea e igoa o **“uncials,”** sa leai se manavāga e tasi, a e sa fa'asolo atoa. (E fa'apea le fa'ata'ita'iga: **“OIEOVALEATUA”**).
8. I isi pa'u e pito mai ai, na tusia i mata'itusi laiti. O le tusilima lea e igoa o **“cursives.”**
9. O nisi fo'i pa'u na mua'i tusia ai Afioga a le Atua, a e mulimuli ane ua toe fia fa'aaogāina mo le tusiga o se isi tala fa'ale-lalolagi. Ona tau tineia lea o le tusilima ua i ai, a e toe tusi fa'alava i ona luga le tala fou. Ua faigatā lenei ituaiga pa'u, ona ua vaivai le tusilima muamua, o le evagelia lea, a ua so'ona malosi ma ola lelei le tusiga o isi tala lē aogā. A e peita'i ua mafai i vaila'au ona 'ave 'ese a'i le mea lē aogā, a e toe pupula lelei mai le tala iā Iesu, se manū a tineia.

II. E lē mafai ona talatalaina le mau pa'u ua maua, a o pa'u nei ua sili ona ta'uta'ua.

1. O LE KOTEKA SINAITIKUSO.

Na maua lenei M.S.S. tāua e le ali'i faife'au Siamani o Dr. Tischendorf i le fale monike i lalo o le mauga o Sinai, i le tausaga e 1844. Semanū a susunuina e le 'au monike ona ua latou lē iloa o lona tāua tele.

- a. O le Koteka Sinaitikuso ua atoa i ai le Feagaiga Fou, a e ua lē atoa le Feagaiga Tuai ina ua uma ona susunuina e monike o isi vaega. O se pa'u ua leva lenei pa'u, na tusia i lona fā o seneturi T.A. i le gagana Eleni.
- b. E tele tausaga sa teu ai lenei M.S.S. i le a'ai tele o Sana Pitapolo (St. Petersburg) i Rusia, se'ia o'o ina fa'atauina mai e le Malo Peretania i le tau e \$20,000, ma o 1o'o teu ai nei i le fale mata'aga i Lonetona e igoa o le British Museum.

2. O LE KOTEKA VATIKANA.

O le isi pa'u ta'uta'ua ma lauiloa lenei o na o le t̄ua i le talitonuga a se ekalesia. Na maua lenei M.S.S. ta'uta'ua i le a'ai o Konesetina i le tausaga e 1453, ona 'ave lea ma teu i le fale tusi o lo'o i ai i le laumua o le Pope i Roma, e igoa o le Vatikana. O lenei fo'i pa'u na tusia i le gagana Eleni i lona fā o seneturi T.A.

Ua fa'apea le manatu o nisi ali'i popoto, o le Koteka Sinaitikuso ma le Koteka Vatikana, o ni tasi ia o Tusi Pa'ia na tusia mo le tupu o Konesetino (Constantine), i le a'ai o Kaisareia i le T.A. e 331. O lē sa ta'ita'i i lea galuega, o le epikopō ta'uta'ua lea o Eusepio (Eusepius).

3. Na maua i le tausaga e 1930, e le ali'i Amerika o **Chester Beatty**, i se tasi fanua oti fa'anamua i Aikupito, nisi pa'u t̄ua e tele.

- a. Fai mai na maua uma ai tusi a Paulo, atoa ma nisi vaega e tele o le Tusi Pa'ia.
- b. Ua sili ona leva o ia pa'u i lo'o isi pa'u uma ua maua. Fai mai le taofi o ali'i popoto, na tusia i le tau fa'ai'uga o lona lua o seneturi T.A.
- c. O lenei ua tai soso'o lava ma ōna pō a o soifua mai pea le 'au aposetolo. O mātua o i latou o ē na latou tusia nei pa'u, na latou tupulaga fa'atasi ma le 'au aposetolo.

O LE ĀLA UA TATOU MAUA AI LE TUSI PA'IA - III

I. O FA'ALILIŪGA O LE TUSI PA'IA.

1. O LE SEPETUAKINA (Septuagent – “LXX”) - T.L.M. 277.

- a. O le ulua'i fa'aliliūga ua tatou maua i ai se tala, o le fa'aliliūga lea o le Feagaiga Tuai mai le gagana Eperu i le gagana Eleni.
- b. Na faia lea galuega i Alesania, Aikupito (Alexandria, Egypt), e ni ali'i popoto e to'a fitu sefulu, ona o se poloa'iga a le tupu Aikupito o Tolume Filatelefio (Ptolemy Philadelphia).
- c. Talu ai ona ua galuea'iina e lenei to'a fitu sefulu, ua ta'ua ai lenei fa'aliliūga o le Sepetuakina (“Septuagent - o le fa'aliliuga a le to'a 70”), ma ua tele ina tusia fa'apenei: **LXX**. Ua ta'ua fo'i e nisi o le **Fa'aliliūga Alesania**.

2. O LE VULUKATE (Vulgate) – T.A. 383 - 405.

- a. O le fa'aliliūga lenei o le Tusi Pa'ia atoa i le gagana Latina, na faia e Ierome, o ia sa failautusi i le Pope i Roma.
- b. Na mae'a le Feagaiga Fou i le tausaga e 385 T.A., ona ia toe punou ai lea i le Feagaiga Tuai.
- c. Ua lē sao ona lelei o le fa'aliliūga a Ierome. O ia lava fo'i ua molimau mai i lona faia fa'atelelea'i o nisi vaega o lana galuega (*“The Temple Dictionary of the Bible,” article Jerome's Version*).
- d. Sa 'ana'ana tele Ierome i a'oa'oga a le vasega ua igoa **“O le 'Au Tama Kerisiano,”** a e maise o le tama e igoa iā **Orikena (Origen)**.
- e. O le molimau a *Matini Luteru* i a'oa'oga a nei “Tama,” fai mai:
“O le Afioga a le Atua e mamā, e manino fo'i, a ua aveā le a'oa'oga a le 'Au Tama ma ala ua fa'apouliuligiaina ma fa'auiga 'eseina ai le upu moni.” - Table Talk, p. 228.
- f. Ua 'avea le Vulukate (Vulgate) ma Tusi Pa'ia a le Ekalesia Katoliko Roma.
 - i. Na mavae seneturi e tele i le fa'ato'a fa'aliliuina ai mai le gagana Latina i isi gagana Italia, i lona 13 Seneturi, a o le gagana Farani i lona 14 seneturi.
 - ii. Fai mai na ala ona faia o ia fa'aliliūga *“ina ia 'aua le saga fa'asesēina pea o tagata i fa'aliliūga sesē fa'a-heretiko (Heretical) a le itū'aiga ua igoa o Ualetenese (Waldenses).”* (Si'i mai i *Upu Fa'atomua o le Tusi Pa'ia Toue*, mo Katoliko Roma).
 - iii. O lea tatou te mautinoa ai, sa lē fa'aaogāina e le 'Au Ualetenese le Vulukate mo la latou fa'aliliūga o le Tusi Pa'ia. (Manatua sa iā i latou le **Textus Receptus** – “O tusiga na tu'uina mai”).
- g. O le T.A. 1582 na fa'ato'a fa'aliliuina ai e le Ekalesia Katoliko Roma le Vulukate i le gagana Peretania. Na faia lea galuega i le a'ai o Douai (po o Douay) i Farani, ua ala ai ona ta'ua o le Tusi Pa'ia Peretania a le Ekalesia Katoliko Roma, o le *Douay Version*, po o le fa'aliliūga Toue pe a fa'a-Samoaina.

3. O LE TUSI PA'IA PERETANIA: -

- a. **O le fa'aliliuga a Peta.**
 - i. O le ulua'i fa'aliliūga o le Tusi Pa'ia i le gagana Agelo Sakisone (Anglo-Saxon, le gagana fa'a-anamua a tagata Peretania), o le fa'aliliūga lea na faia e le ali'i o Peta (**Bede**).
 - ii. Na aofia ai na o Salamo ma Evagelia. Fai mai o le T.A. 735 na mae'a ai.

b. **O le fa'aliliuga a Afereti.**

- i. O na soso'o lea ma le fa'aliliuina i le tau fa'ai'uga o lona iva o seneturi o nisi fo'i vaega o le Tusi Pa'ia i ōna pō o le nofoa'iga a le tupu o **Afereti le Sili (Alfred the Great)**.
- ii. O lo'o i ai nei i le fale mata'aga i Lonetona, e igoa o le British Museum, se tasi M.S.S. ua fa'aigoaina, "**O Salamo a le Tupu o Afereti**." Sa naunau tele Afereti ia maua e lona nu'u le Tusi Pa'ia i la latou lava gagana.
- iii. E le'i leva ona mavae atu o Afereti le Sili, a e osofa'ia loa Egelani e le tupu Noamani (Norman), o Viliamu I (William I) ma āna 'au i le T.A. 1066.
- iv. O ōna pō ia na amata ai ona tupu malosi o le Ekalesia Katoliko Roma i Egelani, ona lē toe feiloa'i ai lea o tagata o Egelani ma le Tusi Pa'ia i tausaga e tele.

c. **O le fa'aliliuga a Uikilifi.**

- i. Ona tatou o'o mai ai lea i lona sefulu fā o seneturi, na fanau mai ai (i le T.A. 1320) lē ua fa'asuafaina, "O le Fetū Ao o le Toe Fauta'iga," o **Ioane Uikilifi lea (John Wycliff)**. O ia o se ali'i faife'au na a'oa'oina i le a'oga ta'uta'ua o Okesefoti (Oxford). Sa mafatia lava lona loto ona o le va'ai atu i le pouliuli fa'ale-agaga sa maua ai lona nu'u, i le sa manatu e tasi le ala e mafai ai ona fofōina ai o lenā leaga, o le tu'uina atu lea i tagata o le Tusi Pa'ia i la latou lava gagana.
- ii. O lea na fa'asaga atu ai Uikilifi e fa'aliliu le Tusi Pa'ia i le gagana Peretania. Na mae'a le Feagaiga Fou i le T.A. 1380, a o le Tusi Pa'ia atoa i le T.A. 1382. E le'i iloa le faiva o lomitusi i ia ōna pō, i le e 12 a na o tusiga lava na mafai ona fa'ateleina ai o ni kopi o le Tusi Pa'ia. O le tau o le Tusi e tasi sa \$80 pe a fa'atatauina i a tatou tupe, a e ui lava i lea sa fa'atauina lava e tagata mau'oa ma sa faitauina e tagata e to'atele ma le fiafia tele.
- iii. E le'i leva ni aso, a e amata loa ona aliali mai o fua tāua o le a'oa'oga moni fa'ale- Tusi Pa'ia, ina ua amata ona tete'e atu tagata i nisi faiga a le Ekalesia Katoliko Roma.
- iv. O le tausaga e 1404 na ta'usesēina ai e Roma le fa'aliliūga a Uikilifi, a o le 1408 na ta'ua ai o se soligā tulafono mamafa e matuā fa'asalaina pe a faitau se tasi i le Tusi Pa'ia a Uikilifi. E tele Tusi na aoina ma susunuina, a e sa lē maua uma. E o'o mai i ōna pō nei o i ai kopi e 170 o le Tusi Pa'ia e pei ona sa fa'aliliuina e Uikilifi.
- v. Sa fa'aaogāina e Uikilifi le Vulukate i lana fa'aliliūga ina ua lē maua e ia se isi Tusi Pa'ia. E ui ina sa i ai uma sesē o le Vulukate i le fa'aliliūga a Uikilifi, a e sa 'avea ma āla na amata ai ona suluia o Egelani i 'ave o le malamalama moni fa'ale-Tusi Paia.

Na maliu Uikilifi i le aso 31 o Tesema, 1384. Sa lē mafai ona tu'ua o ia e ōna fili ia mapu filemū i lona alalafaga tumau. Na latou toe lagaina ōna ivi, ma susunu i le afi se'ia liu lefulefu, ona lafo lea i le vaitafe e igoa o le Suife (Swift). E ui ina sa latou lē iloa, a ua 'avea lenei mea na latou faia ma fa'ailoga uigā, ina ua 'ave e le Suife lenei lefulefu tāua i le vasa tele ma ua salalau atu ai i nu'u ma atunu'u o le lalolagi.

Ua fa'apea ona lē ma-taofia o le galuega sa punou i ai Uikilifi, o le fa'asalalauina atu lea o le Afioga a le Atua i le lalolagi aoao.

d. **O le fa'aliliuga a Tinetali.**

- i. **O Viliamu Tinetali (William Tynsdale)**, o se ali'i faife'au Porotesano poto na a'oa'oina i Okesefoti (Oxford), ona toe ulufale atu lea i le a'oga i Kameperise (Cambridge), ma sa lā feiloa'i ai i lea mea ma Erasemusu (Erasmus), o le ali'i poto i le gagana Eleni i lo tagata uma i ia ōna pō. E fitu gagana sa iloa e Tinetali: Eleni, Eperu, Latina, Italia, Sepania, Peretania, Farani. Fai mai se tala sa 'avea ia gagana uma iā te ia e pei o lana lava gagana moni.
- ii. Sa lagona e Tinetali le fa'anoanoa tele ona o le pouliuli tele fa'ale-agaga na ufitia ai le nu'u, e o'o lava i fai lotu. I le sa fai lana ta'utinoga e fa'apenei: - "O le a 'ou a'oa'o atu i le tama, lē o mulimuli i le suō tosina, ina ia sili atu lona poto i le Tusi Pa'ia i 1o o nei faife'au."
- iii. O lea na fa'asaga atu loa Tinetali e fa'aliliu le Tusi Pa'ia i le gagana Peretania. Na ia lē fa'aaogāina le Vulukate e pei ona sa faia e Uikilifi, a e na ia fa'aliliuina le Afioga a le Atua mai le gagana Eperu ma le gagana Eleni. Sa aogā tele iā te ia le fesoasoani o lana uō o Erasemusu, ina ua uma ona ia fa'aputuina o M.S.S. e tele sa fa'aaogāina e le 'au fa'atuatua ua mavae.
- iv. Sa lē mafai ona toe nofo Tinetali i Egelani ona o le ita o Roma, i le sa folau atu loa o ia i Siamani i le tausaga e 1524, na ia galue ai pea ma le tigāina ma le mativa tele.
- vi. O ōna pō ia na amata ai ona i ai o fale lomitusi, i le na 'avea le fa'aliliūga a Tinetali ma ulua'i Tusi Pa'ia Peretania na lomina. E 18,000 kopi o le Feagaiga Fou na lomina i le vā o le 1525 ma le 1528, ma sa 'auina atu fa'ananā i Egelani.
- vii. Sa aliali mai ua i ai le ese'esega i le fa'aliliūga a Tinetali ma le Vulukate a Ierome, na atili ai ona lē fiafia i ai o le tupu o Enele VIII (Henry VIII) ma le 'au epikopō. Sa latou aoina ma susunuina nisi Tusi e tele, i le ua na o le lua o Tusi mai lenā lomiga o lo'o totoe mai i nei ōna pō.
- viii. O le tausaga e 1530 na amata ai ona fa'aliliuina o le Feagaiga Tuai e Tinetali.

Sa fa'alataina Tinetali ma na pu'ea o ia i le a'ai o Anetevepe (Antwerp) i Peleseuma (Belgium). Sa titinaina o ia ma maliu ai i le aso 6 o Oketopa, 1536, ona susunuina ai lea o lona tino, ua liu lefulefu lava.

e. O le fa'aliliuga a le Tupu o Semisi T.A. 1611.

- i. O le tausaga e 1603 na tonu ai i le finagalo o le tupu o **Semisi I (King James I)**, ia toe faia se isi fa'aliliūga o le Tusi Pa'ia, ma ia ato'atoa ona lelei i ōna itū uma lava. Na ia tofia ni ali'i popoto ma le amio Atua e to'a 54 ia latou faia lenei galuega tāua. Mai lenei to'a 54, e to'a 47 o ē na matuā iloga ona latou tago lima atu i lenei fe'au, i le sa mae'a lenei fa'aliliūga i le tausaga e 1611.
- ii. Sa fa'aaogāina e nei ali'i popoto i la latou galuega: -
 - (a) O le Feagaiga Tuai i le gagana Eperu.
 - (b) O le Feagaiga Fou i le gagana Eleni (*Textus Receptus*).
 - (c) O le *LXX*.
 - (d) O fa'aliliūga ese'ese i le gagana Latina.
 - (e) O fa'aliliūga ua mavae i le gagana Peretania.
- iii. Ua 'avea lenei fa'aliliūga ma fa'aliliūga ua sili ona fiafia i ai o tagata Peretania, ma ua latou fa'aaogāina i tausaga e 300 ua mavae atu. Ua ta'ua

II. O LE TUSI PA'IA I LE GAGANA SAMOA

1. O la tatou Tusi Pa'ia i Samoa nei, e lē o se fa'aliliūga o se tasi fa'aliliūga, a e peita'i na fa'aliliuina mai i le gagana Eperu ma le gagana Eleni (*Textus Receptus*) e ulua'i misionare a le Sosaiete Fa'amisionare i Lonetona (L.M.S.).
2. Na muamua ona fa'aliliuina o le Feagaiga Fou, ma sa lomia fa'asolo ōna vaega ese'ese i le fale lomitusi a le Sosaiete sa i Falelātai i ia ōna pō (ona toe si'i mai ai lea i Fasito'otai), ma sa ta'ita'i ai Misi Tea (Rev. J.B. Stair).
3. O le 1835 na amataina ai lenei galuega tāua, a o le 1849 na mae'a ai ona fa'aliliuina o le Feagaiga Fou, fai mai sa tofu le misionare ma āna Tusi e fa'asaga i ai.
4. Ona toe iloiloina lea ma fa'atonutonuina lenei fa'aliliūga ma 'auina i Lonetona, na lomia ai e le Sosaiete mo le Lomiga o le Tusi Pa'ia (British & Foreign Bible Society). Fai mai e 15,000 Tusi na lomia ma 'auina mai i Samoa. O le tau o lenā ulua'i lomiga sa \$1,388/13/6. Na uma lelei i tausaga e fitu ona fa'atauina atu.
5. O le 1885 na mae'a ai ona fa'aliliuina ma le Feagaiga Tuai, i le sa lua'i lomia fo'i ōna vaega ta'itasi i Samoa nei. Mulimuli ane ua toe teuteu ma fa'atonutonuina ma le fa'aeteete tele le fa'aliliūga o le Tusi Pa'ia atoa. Fai mai o Āvao i Matāutu, Savai'i sa fai ai lea galuega ma sa fesoasoani malosi i ai nisi ali'i Samoa. O se mea sa latou taofi ese'ese ai, sa tu'u lea e filifili i ai se fono potopoto a le 'au faigaluega.

O i latou nei ua tele ona nofo aitalafu i ai lo tatou atunu'u ona o la latou galuega fitā ua tatou maua ai nei le Afioga a le Atua i la tatou lava gagana: - Misi Parate (Rev. G. Pratt), Misi Nisapeti (Dr. H. Nisbet), Misi Tana (Dr. G. Turner), Misi Uilisone (Rev. S. Wilson), Misi Uitimē (Rev. S.J. Whitmee), ma Misi Tea (Rev. J.B. Stair). Ma ali'i fo'i nei o lo tatou lava atunuu'u, o Talavou (Maliotoa), Mala'itai (Fauatea), Leota (Penitala), Va'aelua (Petaia), ma lona mamā ato'atoa.

O FA'ASOLOGA MA LE FA'AVASEGAINA O TUSI

I. Fa'asologa o tusi o le Tusi Pa'ia.

1. E 66 Tusi o lo'o aofia ai le tino o le Tusi Pa'ia, e 39 Tusi o i le Feagaiga Tuai, a e e 27 Tusi i le Feagaiga Fou.
2. O le fa'asologa o Tusi o le Feagaiga Tuai e pei ona tatou masani ai nei, o le fa'asologa lava lea e pei ona sa fa'atunuina e le 'au fa'aliliu o le LXX. Ua matuā iloga lava le tausiga ma le leoleoga a le Atua i Lana Afioga e lē gata i lona puipuiina, a ua fa'apea fo'i ona la ta'ita'iina le fa'atunuina o le fa'asologa o ōna vaega ta'itasi.

II. Ua fa'apenei o na fa'avasegaina o la tatou Tusi Pa'ia.

1. FEAGAIGA TUAI

- | | |
|-----------------------|--|
| (1) Tulafono | Kenese, Esoto, Levitiko, Numera, ma le Teuteronome. |
| (2) Tala Tu'ufa'asolo | Iosua, Fa'amasino, Ruta, 1 & 2 Samuelu, 1 & 2 Tupu, 1 & 2 Nofoa'iga Tupu, Esera, Ne'emias, ma Eseta. |
| (3) Tusi Fatu, Pese | Iopu, Salamo, Fa'ata'oto, Failauga, ma le Pese a Solomona. |
| (4) Le 'Au Perofeta | (a) Tetele: Isaia, Ieremia, Auēga, Esekielu, ma Tanielu.
(b) Laiti: Hosea, Ioelu, Amosa, Opetia, Iona, Mika, Nauma, Sapakuka, Sefana'ia, Hakai, Sakaria, ma Malaki. |

2. FEAGAIGA FOU

- | | |
|-----------------------------|--|
| (1) O Evagelia e fā | Mataio, Mareko, Luka, Ioane. |
| (2) Tala Tu'ufa'asolo | O le Tusi o Galuega a le 'au Aposetolo. |
| (3) Tusi a le 'Au Aposetolo | 1 & 2 Korinito, Kalatia, Efeso, Filipi, Kolose, 1 & 2 Tesalonia, 1 & 2 Timoteo, Roma, Tito, Filemoni, Eperu, Iakopo, 1 & 2 Peteru, 1, 2, & 3 Ioane, ma Iuta. |
| (4) Fa'avalō'aga | O le Tusi o Fa'aaliga a Iesu Keriso. |

III. O vaega tāua e fa'asino i le Tusi.

1. O matā'upu ma vaeluāga tāua.
 - a. O lo'o aofia i totonu o le Tusi Pa'ia o matā'upu e 1,189 ma fuai'upu e 31,175.
 - b. O le matā'upu aupito umi, o le Salamo lea e 119.
 - c. O le matā'upu aupito pu'upu'u ma ua 'avea fo'i ma vaeluagalemū o matā'upu uma o le Tusi Pa'ia, o le Salamo lea e 117.
 - d. O le vaeluaga lemū o fuai'upu uma, o le fuai'upu lea e 8 o le Salamo e 118.
 - e. O le igoa aupito 'umi ua ta'ua mai lea i le Isaia 8:1, 3.
 - f. O le fuai'upu aupito umi, o le Eseta 8:9; a o le fuai'upu aupito pu'upu'u, o le Ioane 11:35.
 - g. Ua tutusa lelei upu o le matā'upu e 37 o le Isaia ma le matā'upu e 19 o le Tupu e 2.
2. E uiga i nisi autū ma tusitusiga.
 - a. **O le Penetataka (PENTATEUCH).**

- i. O le igoa lenei ua fa'aigoaina a'i tusi e lima a Mose.
- ii. O le 'upu Eleni lea, o lona uiga, **"O tusi e lima."**
- iii. Ua 'avea le Penetataka i totonu o le Feagaiga Tuai e pei o Evagelia e fā i totonu o le Feagaiga Fou.
- iv. O ē na mulimuli iā Mose na fa'avaeina a latou tusi i luga o le Penetataka; ua fa'apea fo'i tusi a le 'au aposetolo i ekalesia o na fa'avaeina i luga o Evagelia e fā.

b. O le Apokalipi (APOCALYPSE).

- i. O le igoa Eleni lenei ua fa'aigoaina a'i le Tusi o Fa'aaliga. O lona uiga pe a fa'a-Samoaina, **"o le 'ave 'eseina o le ufiufi na i se mea ina ia aliali mai ai ōna foliga moni."**
- ii. Ua fetau lelei lenei igoa mai le uiga o le Fa'aaliga, ua fa'ailoa mai ai foliga moni o le finagalo o le Atua mo nei ōna pō.

IV. O tusiga fa'ale-Tusi Pa'ia ma matā'upu ese'ese e fa'atatau i ai.

1. O le Apokarifa (APOGRYPHA).

- a. O le tasi lenei igoa fa'a-Eleni, o lona uiga, **"o se mea ua 'ave 'eseina nai se mea e teu ai mea."**
 - i. E fa'asino lenei igoa i tusi e 14 ua 'ave 'eseina mai le mea e teuina ai Tusi ua talia.
 - ii. O le taofi fa'a-Porotesano, ua lē tatau ona aofia o nei tusi i totonu o le Kanona fa'ale-Tusi Pa'ia, ua ala ai fo'i ona lē taliaina i totonu o le Tusi Pa'ia Porotesano.
- b. Ua aofia le Apokarifa i le Tusi Pa'ia a le Ekalesia Katoliko Roma, ua ala ai fo'i le taofi o lenā Ekalesia e fa'apea, ua lē o atoa le Tusi Pa'ia a Porotesano. O le pogai lenei ua ala ai ona te'ena e Porotesano o le Apokarifa.
 - i. Na mae'a le tusiga o nei tusi a o le'i o'o i ōna pō o Esera ma Ne'emias, a e peita'i sa fa'ale-amana'iaina lava e i la'ua ina ua lā fa'asaga atu e fa'apotopotoina Tusi o le Kanona fa'ale-Feagaiga Tuai.
 - ii. Sa lē taliaina lava e Iutaia nei tusi e fai ma Tusi Pa'ia. E tele mau mai le Feagaiga Tuai na si'itia e Iesu ma le 'au aposetolo, a e na latou lē fa'aaogāina lava se upu e tasi mai le Apokarifa.
 - iii. O lo'o i ai i le Apokarifa nisi a'oa'oga ua lē ō gatasi ma a'oa'oga o i ai i le Feagaiga Tuai ma le Feagaiga Fou. E lē fefa'asala'i pe fete'ena'i upu ua a'oa'oina mai e le Agaga Pa'ia.
 - iv. E le'i aofia le Apokarifa i le fa'aliliuga a le to'a fitu sefulu (LXX) na faia i le T.L.M. 277.
 - v. I la latou Fono na potopoto i Tereneta (Council of Trent) i le aso 8 o Aperila, 1546, na fa'ato'ā ta'ua ai e le Ekalesia Katoliko Roma le Apokarifa o ni tusi ua tatau ona aofia i totonu o le Kanona fa'ale-Tusi Pa'ia.

2. O le Kanona fa'ale-Tusi Pa'ia.

- a. O se upu Eleni lenei upu **"Kanona,"** o lona uiga, **"o se fua, po o se tapula'a e iloa ai le mea ua talia ma le mea ua te'ena."** O le Kanona fa'ale-Tusi Pa'ia, o le fua lea po o le tapula'a a le Atua e fa'atatau i ai le fa'atuatua ma le savaliga.
- b. O Tusi uma ua aofia i le Kanona fa'ale-Tusi Pa'ia, o Tusi ia ua finagalo i ai le Atua ia fa'atumauiina e fai ma ta'ita'i ala iā i tatou.

3. O isi tusi o lo'o ta'ua mai i le TUSI PA'IA.

- a. O 100 i ai ni isi tusi o 100 ta'ua mai i le Feagaiga Tuai, a ua lē o toe maua nei: -

- i. **Numera 21:14** O le tusi o taua a Ieova.
- ii. **Iosua 10:13** O le tusi a Iasera.
- iii. **I Tupu 11:41** O le tusi i mea na faia e Solomona.
- iv. **I Nofo. 29:29** O le tala a Samuelu le tagata vā'ai, ma le tala a Natano le perofeta, ma le tala a Kato le tagata vā'ai.
- v. **II Nofo. 9:29** O tusi a Natano, Akia, ma Itu.
- b. E lē o se mea e taumateina le mafua'aga pa'ia o nisi o ia tusi, a e peita'i nisi sa na o ni tusi fa'ale-tagata. E le'i finagalo le Atua ia aofia ai se tasi o ia tusi i totonu o le Kanona fa'ale-Tusi Pa'ia; auā pe ana fai o lea, po ua Ia lē tu'ua ia mavae atu ma fa'agaloina. Pe ana fai o se vaega i latou o le Afioga moni a le Atua, po ua tumau i latou e o'o mai i le aso nei, auā ua tusia, "O le Afioga a le Atua, lea ua ola ma ua tumau e o'o i le fa'avavau" (I Peteru 1:23, 25).
- c. O Tusi uma ua finagalo i ai le Atua ia aofia i le Kanona, e leai se tasi ua lē iloa. Ua foa'iina mai e le Atua mo i tatou o se Tusi Pa'ia ua ato'atoa lava, ma ua fa'atatauina mo le atina'e o i tatou i so'o se itu o le soifuāga fa'a-Kerisiano. (Silasila i le II Timoteo 3:16,17).

V. O le galuega a Esera ma Ne'emias.

- 1. Fai mai o lona lima o seneturi T.L.M., na fa'apotopotoina ma fa'amaopoopoina ai e Esera ma Ne'emias le Kanona fa'ale-Feagaiga Tuai. Sa iā Esera le poto ua tataua mo se galuega fa'apena (Esera 7:1-6,10). O Ne'emias fo'i o se auauna loto tele ma le loto fa'ale-agaga.
- 2. O Tusi uma lava e pei ona i ai nei i le Feagaiga Tuai, sa i ai i le Sepetuakina (LXX - T.L.M. 277), e aunoa lava ma se tusi ua fa'aopoopo i ai. Ona tatou mautinoa lea, sa atoa le Kanona o le Feagaiga Tuai a'o le'i o'o iā Iesu ma le 'au aposetolo.
- 3. Na fa'ato'ā mae'a ona tusia ma fa'apotopotoina o tusi o le Feagaiga Fou ina ua tau lata i le fa'ai'uga o le ulua'i seneturi T.A.

A'OA'OGA MO LE SU'ESU'EINA O LE AFIGA A LE ATUA

- I. Talu ai ina ua tatou mautinoa ua 'ese lava le Tusi Pa'ia i lo isi tusi uma, o lea ua tatau ai fo'i ona tatou fa'alatalata i ai i se ala e 'ese i lō su'esu'ega fa'ale-tino ua tatou masani ai. O su'esu'ega i nisi matā'upu ua mafai lava i le malosi o le mafaufau ona tatou popoto ma malamalama ai, a e lē fa'apea le Tusi Pa'ia. E ao lava ona tatou maua se fesoasoani e silisili i le malosi o le mafaufau, i le fa'ato'a mafai ai ona tatou malamalama lelei i le Afiga a le Atua.

I Kori. 1:19-21 E lē mafai i le poto fa'a-lenei lalolagi, pe a na o ia, ona tatou malamalama ai i le Afiga a le Atua.

- II. O le loto moni fa'ale-agaga e aofia ai nei mea.

1. O le matuā liua fa'amaoni.

- a. **Ioane 3:1-12** Sa lē atoa se malamalama iā Nikotemo ona o ia e le'i ato'atoa ona liua.

"Na maliliu ane Nikotemo i le Ali'i ma lona manatu ia lā fefinaua'i ma Ia, a e peita'i na fa'amalamalamaina atu loa e Iesu iā te ia o matā'upu silisili o le 'upu moni. Na Ia fetalai ane iā Nikotemo, 'E sili i lō le poto fa'ale-mafaufau ona mana'omia o le toe fuata'iga fa'ale-agaga... E ao ina e maua le ōla fou mai lugā, i le fa'ato'a mafai ai ona e fa'amasino tonu i mea fa'ale-lagi. Vaganā ona ua taunu'u iā te oe lenā fesui'iga, ma ua fa'afouina ai lou loto, e leai se lelei tau le ōla e fa'avavau o le a fua mai i lā tā talatalaga'." - O le Fa'anaunaga o Tupulaga, itulau e 171.

- b. **Luke 22:32** Vaganā ona ua liua le tagata, na te lē maua le loto moni fa'ale-agaga.

2. O le fa'apa'iaina.

- a. **I Tesa. 4:3-7** Ua vala'auina i tatou ia fa'apa'iaina lava.
b. **II Tesa. 2:13** E ō lua le fa'apa'iaina ma le talitonu i le Upu Moni.
c. **I Pete. 1:20** O le fa'apa'iaina e tupu mai ai le gau'i.

3. O le loto maulalo.

- a. **Isaia 57:16** E nonofo fa'atasi le Atua ma lē ua loto maulalo.
b. **Iakopo 4:6** Na te foa'i le alofa tunoa i ē fa'amaulalo.
c. **Salamo 25:9** Na te a'oa'oina lē ua agamalū.

4. O le loto tatalo.

- a. **Iakopo 1:5, 6** O le tatalo ua faia ma le fa'atuatua e maua ai le poto fa'ale-agaga.
b. **Sala. 119:18** O la tatou ōlega e tatau ai.

"'Aua lava ne'i o tatou su'esu'e atu i le Tusi Pa'ia e aunoa ma le mua'i tatalo. A o le'i susu'eina ōna itulau, e tatau ona tatou mua'i ōle atu lava ina ia fa'amalamalamaina i tatou e le Agaga Pa'ia, i le o le a fa'afogaina lava la tatou tatalo." - O La'asaga iā Keriso, itulau e 100.

- III. Ia talosia le fesoasoani ma le ta'ita'iga a le Agaga Pa'ia.

1. **Ioane 16:13** E ta'ita'iina i tatou e le agaga i upu moni uma.
2. **I Kori. 2:9, 10** E faaalua mai e le Agaga mea loloto a le Atua.

IV. E ao lava ina ō lua ma le loto fa'ale-agaga filigā, i le ma le to'aga i le su'esu'e. Ia matuā vilivilita'i i le su'esu'e.

1. **I Timo. 4:13** O le apoapoa'iga a Paulo iā Timoteo.
2. **Galu. 17:11** O le fa'aa'oa'oga lelei a tagata Perea.
3. **Galu. 28:23** O le tagata su'esu'e tele Paulo (Galu. 26:24).
4. **Fa'ata. 2:1-5** Ia su'esu'e ma le loto atoa.

E lē mafai ona tatou maua le poto pe a aunoa ma le vilivilita'i ma le su'esu'e ma le tatalo. O nisi vaega o le Tusi Pa'ia ua matuā malamalama lava, e lē mafai ona sesē ai se tasi. O lo'o i ai nisi vaega e lē ta'atia mai i luga lona a'ano e mafai ai ona iloa vave i le tepa tasi i ai. Ia matuā sa'ilili i ai ma le fa'aeteete, ma fa'atatau i ai ma le tatalo. O le su'esu'ega fa'apena o le a tauia tele lava.

V. Ia tatou su'esu'e i le Tusi Pa'ia, e ao lava ona tatou manatua.

1. *E fa'amatala le Tusi Pa'ia iā te ia lava.* O le ala lenei na uia e Viliamu Tinetali i āna su'esu'ega i le Tusi Pa'ia, fai mai lana ta'utinoga pe afai o lo'o 'e sa'ilia le malamalama i se tasi matā'upu, "ia e mua'i matauina mau ua manino ma ua malamalama gofie, i le o le a 'avea fo'i nā mau ma ala e fa'amalamalamaina ai ma isi mau e fa'alē manino." (Fa'aaoga le I Kori. 2:13).
2. O molimau uma, po o upu moni uma, e aofia ai le tino atoa o le malamalama, e ao lava ona si'itia ma tu'u fa'atasi, "o sina mea itiiti iinei ma sina mea itiiti i inā" (Isaia 28:10).
3. *'Aua le fa'a-uiga 'eseina afioga a le Atua* (Sala. 56:5; II Timo. 2:15). O le amio lea a le tiapolo. (Mata. 4:5, 6, ia fa'atusatusaina ma le Salamo 91:11, 12).

"Se'i vaganā ona ua a'oa'oina le mafaufau ia fiafia i matā'upu fa'ale-agaga, o le a lē pine lava ona vaivai ma tau tevateva i lea lava itū. A e peita'i, a o manatunatu pea i mea fa'a-lenei lalolagi, o le a malosi atu i lea itū, auā o lea le itū ua masani ona gaoioi atu pea i ai le mafaufau.

"O le pogai ua āla ai ona faigatā i ali'i ma tama'ita'i ona latou ōla i le olaga moni fa'ale-agaga, ona ua lē gaoioi atu o latou mafaufau aga'i i mea fa'a-le Atua, a ua masani ona aga'i atu pea i le isi itū.

"Se'i vaganā ona ua galuea'iina pea lava pea le mafaufau i le sa'iliga o le poto fa'ale-agaga ma le malamalama lelei i mea tau le Atua, o le a lē mafai lava ona maua le fiafia tumau i mea a le Atua, auā o lenei e le'i uia ni āla fa'apenā ma fa'amasani i ai. O le pogai lava lenei ua toetoe lava ina a loto gatasi ai tagata uma i le manatu e fa'a'apea, ua faigatā lava e pei o se a'oga le au'auna atu i le Atua.

"Pe afai ua vaeluaina le loto ma ua masani ona mafaufau tele i mea a le lalolagi, a e itiiti i mea a le Atua, o le a lē mafai lava ona maua o se fa'aopoopo tatau o le malosi fa'ale-agaga." - O Molimau mo le Ekalesia, Tusi XI, itulau e 189.

TAULOTO: Salamo 119:18.

O KERISO LE TOTONUGALEMŪ O LE TUSI PA'IA

I. Ua lē tu'uina mai le Tusi Pa'ia mo i tatou ina ia na o na tatou maua ai o se tala tu'u fa'asolo i mea sa tutupu anamua. O le aogā silisili o le Tusi Pa'ia, o lona fa'amalamalamaina mai lea o le fa'aolataga tele ua saunia e le Atua. E tasi lo tatou fa'amoemoe i le ola, ua na o Keriso lava, i le o lea fo'i ua 'avea ai o Ia ma totonugalemū o a'oa'oga moni uma fa'ale-Tusi Paia. "*Ua 'avea le Tusi Pa'ia atoa ma fa'aaliga o le Keriso.*" - *Le 'Au Faigaluega o le Tala Lelei*, itulau 250.

1. **I Pete. 1:10, 11** Sa tau sa'iliili le 'au perofeta i le Afioga a le Atua ina ia pupula iā te i latou matematega o le ola.
2. **Galuega 4:12** O lenei fo'i ua molimau ai Tusi Pa'ia iā Keriso.
3. **Ioane 5:39** O lea fo'i ua molimau ai Tusi Pa'ia iā Keriso.
4. **Fa'aal. 19:13** Ua fa'asuafaina Keriso, "O le Lokou o le Atua" (**Lokou - Afioga**).
5. **Ioane 1:45** Na tusia Keriso e Mose ma le 'au perofeta.
6. **Luka 24: 27, 44** Ua tumu le Tusi Pa'ia i molimau iā Keriso.

II. O Keriso i le Feagaiga Tuai se'ia o'o i le fa'ai'uga o le Feagaiga Fou.

1. O lo'o i ai suafa e tele ua fa'asuafaina ai Keriso i le Feagaiga Tuai.
 - a. **Esoto 23:23** O La'u Agelu.
 - b. **Numera 25:17** O le Fetū mai iā Iakopo; o le To'oto'o.
 - c. **Teute. 18:15, 18** O le Perofeta.
 - d. **Isaia 9:6** O Lē Silisili 'Ese; o le Faipule; o le Atua malos; etc.
 - e. **Iere. 23:5, 6** O Ieova La Tatou Amiotonu.
 - f. **Tanielu 7:13** O le Atali'i o le Tagata.
 - g. **Saka. 6:12, 13** O le Lā La'au.
2. Ua 'avea nisi o le 'au fa'atuatua o le Feagaiga Tuai ma ata o le Keriso ma Lana galuega.
 - a. **Eperu 5:6** Sa 'avea Mekisateko ma ata o le faiva o faitaulaga o le a tu'uina atu iā Iesu.
 - b. **Eperu 3:5, 6** Sa 'avea le fa'amaoni ma le auauna atu o Mose ma ata o Lē o le a pule i Lona aiga ma le fa'amaoni.
 - c. **Kene. 37:41** O Iosefa le tasi ata o Keriso. O ia o le atali'i pele o le tamā; sa āgaleagaina e ōna uso; sa fa'atauina i tupe e luafulu; sa fa'amaulaloina, a e na toe fa'aeaina; sa 'avea o le ali'i ma le fa'aola o Aikupito, fa'apea lona nu'u o Isara'elu (Mata. 3:17; Ioa. 1:11; Mata. 27:9; Filipi 2:7, 9, 10; Galu. 5:31).
3. E i ai mea sa faia, po o mea fo'i sa tutupu, i ōna pō o le Feagaiga Tuai ua 'avea ma āta o le Keriso ma Lana fa'aolataga.
 - a. **Ioane 3:14, 15** O le gata 'apa memea (Numera 21:19).
 - b. **I Kori. 10:4** O le papa na taia (Numera 20:11).
 - c. **Mata. 12:38-40** O mea na o'o iā Iona.
4. O sauniga uma fa'ale-fale fetāfa'i na fa'asino iā Keriso.
 - a. **Ioane 1:29** O le taulaga mo agasala.
 - b. **I Kori. 5:7** O le taulaga o le paseka.
 - c. **Kolo. 2:16, 17** O ata lava ia o mea atali, a o le tino e ā Keriso lava.
5. O Keriso o le Alefa ma le Omeka, o le Amataga ma le l'uga o le Tusi Pa'ia.
 - a. **Fa'aal. 21:13** O a'u o le Alefa ma le Omeka.

- b. **Kenese 3:15** O le ulua'i valo'aga, o le valo'aga iā Keriso.
- c. **Mataio 1:1** E amata le Feagaiga Fou iā Keriso.
- d. **Fa'aal. 22:20** Ua fa'ai'uina le Tusi Pa'ia i le folafolaga i Lona toe afio mai.

"O le matā'upu ua fai ma totonugalemu o le Tusi Pa'ia, o le matā'upu lava lea ua fa'ata'amilo ona fepi'ita'i i ai o isi a'oa'oga uma o i ai i le Tusi, o le matā'upu lea i le fa'aolataga tele ua saunia e le Atua iā Keriso Iesu. Mai le ulua'i folafolaga i le fa'ato'aga i Etena (Kenese 3:15), se'ia o'o i le toe folafolaga i le Tusi o Fa'aaliga (Fa'aaliga 22:17), o lea lava le a'ano ma le 'autū o tusi ma vaega uma o le Tusi Pa'ia, o le saga fa'alauteleina ma fa'amalamalamaina pea o lenei matā'upu silisili." – Si'i mai le tusi, O A'oa'oga, itulau e 125.

TAULOTO: Luka 24:27.

O LE ATUA TOLU-TASI

I. Fa'amalamalama e fa'atatau i lenei matā'upu.

1. E faigatā lenei matā'upu auā e fa'asino tonu i le Atua lava, o Lē afio i le malamalama e lē masao atu i ai se tasi (I Timo. 6:16).
2. O le tele o matā'upu o i ai i le Tusi Pa'ia, ua foa'iina mai e le Atua le malamalama ua ato'atoa, ma ua lava tatou te malilie ai. A e peita'i lenei mata'upu, ua i ai le vase, i le o lenei tuā'oi pe a sopo'ia i la tatou su'esu'ega, tatou te maua mai ai e lē o le malamalama e ola ai, a e peita'i o le pouliuli e fano ai.
 - a. **Esoto 19:10-12** E i ai le tuā'oi.
 - b. **Teute. 29:29** O mea ua fa'ailoa mai e le Atua ia gata mai ai la tatou su'esu'ega.
 - c. **Iopu 11:7-9** E lē aogā le sa'ili i tala atu o mea ua fa'ailoa mai.
 - d. **Isaia 55:9** E maualuga, tatou te lē mafaia.

"O fa'aaliga e uiga iā te Ia lava ia tatou ma'elegā ina ia tatou malamalama i ai, a e peita'i ia gata mai ai la tatou sa'iliga. O le mafaufau aupito malosī e fiu lava e taumateina o le uiga o le Atua, a e leai se aogā. E le'i tu'uina mai lenei mata'upu lilo i tagata latou te fa'amatalaina. E lē mafai i le mafaufau fa'ale-tagata ona malamalama i le uiga o le Atua." - O Fe'au o Fa'amalologa, itulau e 429.

II. E uiga i le Itū Atua.

1. E to'atolu i Latou o ē ua aofia ai le Itū-Atua.
 - a. **I Ioane 5:7** O le Tamā, ma le Lokou, atoa ma le Agaga Pa'ia.
 - b. **Ioane 1:1, 14** O le Lokou o Keriso lea.
 - c. **Kenese 1:26** Inā Tatou faia ia o le tagata (Numera tele).
 - d. **Mataio 3:16** E tino ese'ese.
 - e. **Mataio 28:19** E to'atolu.
 - f. **Galuega 2:33** O le to'atolu.
2. A e ui ina e to'atolu i Latou o ē ua aofia ai le Itū-Atua, e lē tolu ni Atua, auā o i Latou nei e to'atolu e to'atasi lava Ia.
 - a. **I Ioane 5:7** O le Atua Tolu-Tasi.
 - b. **Teute. 6:4** E tasi le Atua.
 - c. **Ioane 10:30** O Keriso ma le Tamā e tasi i La'ua.
 - d. **Ioane 17:11, 22** E ui ina ua ta'ua e tasi so'o o Iesu, a e tino ese'ese lava. E fa'apea fo'i ona tasi o Iesu ma le Tamā.
E lē o le tino e tasi ai le Tamā, ma le Ālo, ma le Agaga Pa'ia, a e peita'i o le manatu, ma galuega, ma le finagalo alofa mo le lalolagi ua pa'ū i le lua o le malaia.
3. O Lē ua sili i le Itū-Atua, o le **Tamā lea**.
 - a. **Ioane 14:28** E sili le Tamā i lō le Ālo.
 - b. **I Timo. 1:17** O Ia o le Tupu o le vavau, e soifua pea lava, e lē ma-va'aia.
 - c. **Ioane 1:18** E le'i va'aia e se tasi.
4. O Lē ua pito ane i le Tamā, o le **Ālo lea**.
 - a. **Ioane 1:1, 2** Sa i le Atua i le amataga.
 - b. **Eperu 1:8-10** Ua ta'u Atuaia e le Tamā.
 - c. **Mataio 1:23** Ua fa'asuafaina o Emanuelu, ("Ua iā te i tatou le Atua").

- d. **Fa'aal. 3:21** Ua fa'anofoina i le nofoāli'i o le Tamā.
- 5. O Lē ua tolu a'i le Itū-Atua, **o le Agaga Pa'ia lea.**
 - a. **Kenese 1:2** Sa i ai i le amataga.
 - b. **Eperu 9:14** O le Agaga e fa'avavau.
 - c. **Ioane 4:16, 17** Ua fa'asuafaina fo'i **"O le Fesoasoani,"** o le Agaga e tupu mai ai le 'upu moni.

"O se matā'upu lilo le uiga o le Agaga Pa'ia. E lē mafa'amatalaina e tagata, auā e le'i fa'aalia e le Atua iā te i tatou. Ua fa'apotopotoina e nisi o mau ese'ese mai le Tusi Pa'ia, ma ua fa'avaeina ai ni o latou taofi fa'ale-tagata; a e peita'i o le a lē manuia ai le Ekalesia i lona fa'aaogāina o ia taofi. I lo tatou vā feagai ma matā'upu lilo fa'apenei, o matā'upu ua loloto e sili atu i lo le mea e mafaia e le mafaufau o le tagata, e tāua e pei o le auro lo tatou fa'alologo pea." - O Galuega a le 'Au Aposetolo, itulau e 52.

TAULOTO: I Ioane 5:7.

O LE ĀVA MA LE MIGAO E TATAU AI

- I. Ua tele ona a'oa'o mai o le Tusi Pa'ia i le silisili 'ese ma le pa'ia o le Atua.
1. **Isaia 55:8, 9** E sili ona maualuga o le Atua i lo tagata.
 2. **Isaia 40:18, 25** E leai se tasi ua mafai ona tatou fa'atusaina i ai le Atua.
 3. **Sala. 139:1-12** Na te silafia mea uma, ua i ai fo'i o Ia i mea uma.
 4. **I Timo. 6:15** O le silisili 'ese o Lana pule.
 5. **Isaia 6:3** O Lona pa'ia.
- II. Talu ai ina ua tatou mautinoa le matuā silisili 'ese o le mana ma le pa'ia o le Atua, ua tatau ai ona maua o tatou loto i le mata'u ma le āva tele.
1. **Eperu 12:28, 29** Ia au'auna i le Atua ma le migao ma le mata'u.
 2. **Faaal. 14:7** Ia matata'u i le Atua ma avatu iā te Ia le vi'iga.
 3. **Salamo 89:6,7** E tatau ona mata'utia tele le Atua.
- III. Ia sili i lō isi taimi uma ona maua ō tatou loto i le agaga o le āva ma le migao pe a tatou fa'alatalata atu i Ōna luma.
1. **Esoto 3:1-6** O Mose i le la'au mū.
 2. **Levi. 10:1-11** O le tau i o le lē āva ma migao.
 3. **Salamo 95:8** Ia to'otuli pe a tatalo.
 4. **Tanielu 8:10** Ia pei ona faia e Tanielu.
 5. **Mataio 18:20** Ia lagona le fa'atasi mai o le Ali'i.
- IV. So'o se mea tau le Atua ma Lana galuega ia tatou āva ma fa'aeteete tele i ai.
1. O le suafa o le Atua. Salamo 111:9; Malaki 1:11.
 2. O le Tusi a le Atua. II Timoteo 3:15; Salamo 138:2.
 3. O le maota o le Atua. Levitiko 19:30; Sapakuka 2:20.
 4. O le aso o le Atua. Levitiko 27:30-33; Malaki 3:8.
 5. O le tupe a le Atua. Levitiko 27:30-33; Malaki 3:8.
 6. O mea pa'ia a le Atua. Levitiko 27:28; Tanielu 5:1-3, 22, 23.
- V. Ia lē gata i fa'ane'etaga ma tapua'iga, a 'ia pulea ma ta'ita'iina i tatou e le agaga moni o le āva ma le mata'u i taimi uma lava.
1. **Kolose 2:8** Ia tatou savavali o iā Keriso.
 2. **Kenese 5:24** O le fa'aa'oa'oga lelei a Enoka.

"E pa'ia ma le mata'utia Lona suafa, ua fa'apea le ta'utinoga a le tusi o Salamo (Sala. 119:9). O agelu pe a latou ta'ua lenā suafa, latou te ufiufi i ō latou mata. Fa'auta i le āva tele ma le fa'aeteete ua tatau ai ona tatou ta'ua o le suafa o le Atua, o i tatou o ē ua pa'u'ū ma ele'elea i le agasala." - O Perofeta ma Tupu, itulau e 49.

TAULOTO: Levitiko 19:30.

O LE FAIGĀ MALŌ A LE ATUA MA LONA FA'AVAE

I. Na faia i tatou e le Atua, o Ia o lo tatou Tupu, o Lona Malō e aofia ai le lagi ma le lalolagi.

- a. **Kenese 1:1** Na faia mea uma e le Atua.
- b. **Isaia 43:15** O lea ua 'avea ai o Ia ma o tatou Tupu.
- c. **Salamo 103:19** E pule aoao Lona malō.
- d. **Iere. 10:10** O Ia o le Tupu e fa'avavau.

II. E sa'o ma tonu le faiga Malō a le Atua e pei fo'i o Lana amio.

- a. **Teut. 32:3, 4** E tonu Ōna āla uma lava.
- b. **Salamo 97:2** O le uiga o Lana faigā malō (Sala. 89:14).

III. Ua 'avea le Tulafono a le Atua ma fa'avae o Lona malō.

- a. **Faila. 12:13, 14** O le tiute o le tagata i lona Tupu, "ia ana'ana i Āna poloa'iga."
- b. **Esoto 20:1-17** O le Tulafono, o Poloa'iga e Sefulu.
- c. **Esoto 31:18** Sa mua'i fetalai e le Atua, ona tusia lea e Lona lava A'ao.
- d. **Iakopo 2:10, 11** Ia tausii i poloa'iga uma.
- e. **I Ioane 3:4** O lē na te solia poloa'iga a le Atua, ua agasala o ia.
- f. **Iakopo 2:12** O le a fa'amasinoina i tatou e le Atua i Lana tulafono.

IV. E pei ona fa'avavau o le malō o le Atua, e fa'apea fo'i ona tumau o le tulafono e fa'avavau lava.

- a. **Mataio 6:13** E fa'avavau le malō o le Atua.
- b. **Malaki 3:6** E lē liliu le Atua.
- c. **Luka 16:17** E lē mafai ona i'u vale o le tulafono.

O malō uma fa'ale-lalolagi e tofu ma le tulafono, i le ua 'avea fo'i a latou tulafono ma fa'avae o a latou faigā malō. Pe a lepetia le tulafono a se malō, ona āfua lea i lenā taimi ona lē toe 'avea o se malō, ina ua leai se fa'avae e galuea'iina ai le pule fa'ale-malō. E fa'apea fo'i ma le Malō o le Atua, auā o le ata lava lea ua fa'atatau i ai le faiga o malō fa'a-lenei lalolagi.

"E pa'ia le tulafono a le Atua e pei o Ia lava. Ua 'avea o se fa'aaliga o Lona finagalo, o se ata ua iloa ai foliga o Lana amio, ma ua fa'ailoa mai ai fo'i le alofa ma le poto fa'ale-Atua." O Perofeta ma Tupu, itulau e 52.

V. Ua vaevaeina le Tulafono i vaega tetele e lua (Mataio 23:36-40).

- a. O le alofa i le Atua. O le papa ma'a muamua lea ua i ai le poloa'iga, se'ia o'o i le **IV**.
- b. O le alofa i lē tatou te tuā'oi. O le papa ma'a e lua lea ua i ai le poloa'iga e **V** se'ia o'o i le **X**.
Roma 13:10 O le alofa o le ato'atoa lea o le tulafono, o lona uiga ua 'avea le alofa ma a'ano, pogai, po o le autū fo'i o le tulafono.
- c. O le fa'amalamalamaga lenei a le ali'i faife'au ta'uta'ua o Supasione—*C.H. Spurgeon*:

*"Pe afai ua e alofa i le Atua ma lou loto atoa, e ao ona e tausia le papa ma'a muamua, ma afai e te alofa i le lua te tua'oi pei o oe lava ia te oe, e ao ona e tausia ma lona lua o papa ma'a."- C.H. Spurgeon, p. 5, - **The Perpetuity of the Law.***

d. Ua fa'apenei le ta'utinoga a Misi Muti, faife'au ta'uta'ua o le Ekalesia o le Fa'apotopotoga:

*"O nei poloa'iga e sefulu e lē o ni tulafono ese'ese se sefulu, a e peita'i o le tulafono lava e tasi. Pe 'afai o lo'o taofia a'u i luga i le vā nimonimo e se filifili o i ai ni so'oga se sefulu; pe a motu se tasi o nā so'oga, ou te pa'ū ifo lava i lalo, e peisea'i ua momotu so'oga uma e sefulu. Pe afai o i ai se pā puipui o lo'o si'omia ai a'u, e tusa po o le fea ogāpā 'ou te soloia i lalo i lo'u fia sao atu i tua, a ua taunu'u lava ona solo le pā iā te a'u. O sē tausi le tulafono uma, a e agasala i se mea e tasi, ua nofo sala ia i mea uma. Pe afai ua motu se tasi so'oga, ua motusia loa le filifili auro o le usita'i." – Dwight L. Moody, **Weighed and Wanting**, pp. 119-124.*

TAULOTO: Esoto 20:1-17.

O VAEGA E LUA O LE MALŌ

I. O se fa'amalamalamaga.

1. E lua vaega o le malō ua manino ona fa'ailoa mai i le Tusi Pa'ia, i le o nei fo'i vaega e lē i ai fa'atasi. E muamua le tasi, ona fa'ato'a i ai lea o lona lua pe a mavae atu lē na muamua.
 - a. O le vaega muamua ua tatou i ai nei: O le Malō o le Alofa Tunoa lea.
 - b. O lo'o lumana'i pea lona lua o vaega: O le Malō o le Mamalu lea. Pe a ta'ua mai le "malō o le Atua," e ao loa ona tatou mautinoa, e fa'asino i se tasi o vaega e lua.
2. Ua lē fa'ale-aogāina le tulafono a le Atua i le sauniga alofa e ta'ua ai le fa'atuatua iā Iesu e ola ai.
 - a. **Roma 3:31** Ua lē tineia le tulafono pe fa'alē-aogāina ina ua i ai le alofa tunoa. Sa i ai le feītaga'i i le vā ma le tulafono ona ua soli i ai, a e peita'i le agaga o le alofa tunoa e mafai ai ona tausia o le tufafono, ona tineia lea o le feitaga'i (Roma 8:1-4; Fa'aal. 14:12).

"Aua ne'i masalo se tasi e fa'aleaogāina le tulafono a le Atua i le sauniga alofa e ta'ua ai le fa'atuatua iā Iesu e ola ai, a o le sauniga lava lea e fa'atumauina ai le tulafono a le Atua, auā e fa'apea lava ona fa'aalia ai le lelei o le tulafono....O lea sauniga fo'i e atili iloa ai e tagata le leaga o le agasala, ina ua fa'apea ona faigatā o le togiola, ona inoino ai lea i ai, a e fia ana'ana i le finagalo o le Atua. E tupu ai lava le fia usiusita'i i le tulafono o i latou o ē ua fa'aolaina i le fa'atuatua, auā latou te fia fa'aa'oa'o i lo latou Fa'aola. – O le Fa'amatalaga o le Tusi a Paulo iā Roma, (Malua Press), Itulau e 50.

- b. **Mataio 5:19** E tausia le tulafono e tagata moni o le malo o le alofa tunoa (Fa'aaliga 22:14).
 - c. **Gal. 13:43** Ia tumau i le alofa tunoa o le Atua (Fa'aaliga 3:11).
 - d. **Kala. 5:4** E mafai ona pa'ū mai le alofa tunoa, ona toe fo'i lea i lalo ifo o le fa'asalaga o le tulafono (Eperu 12:15).
3. Ia mātauiina le tulaga ma le tofi o iā Keriso i le malō o le alofa tunoa.
 - a. **Faaal. 3:21** O lo'o nonofo ma le Tamā i Lona nofoāli'i.
 - b. **Eperu 8:1, 2** O Ia o le Faitaulaga Sili.
 - c. **I Timo. 2:5** O Ia o le Puluvaaga.
 - d. **I Ioane 2:1** O Ia o le Fautua.
 - e. **I Kori. 15:24** Pe a o'o i le gata'aga o le lalolagi, ona tu'uina atu lea e Keriso le malō o le alofa tunoa i Lona Tamā.

II. O faigā malō a le Atua.

1. O LE MALŌ O LE ALOFA TUNOA.

Ua fa'ailoa mai le alofa tunoa o le Atua i le fa'aolataga tele ua Ia saunia iā Keriso lea. O lea ua fa'asino tonu ai le malō o le alofa tunoa i taimi a o avanoa pea le ala e mafai ai e le fanau a tagata ona latou talia ma fa'aaogāina le alofa tunoa o le Atua.

- a. **Eperu 4:16** Ua ta'ua mai e Paulo le nofoali'i o le alofa tunoa.
- b. **Luka 17:20, 21** E fa'ale-agaga lenei vaega o le malō, e lē ma-va'aia, auā e i le loto o le tagata. O le fa'aliliuga fa'a-Peretania o le fuai'upu e 21, fai mai: "Ua i totonu iā te outou ('within you') le malō o le Atua." (Fa'aaogā ma le Roma 2:28, 29).
- c. **II Timo. 1:10** Sa i ai lenei malō "talū mai le vavau," ae na fa'ato'a iloga ona fa'avaeina i le maliu o Keriso.

- d. **Ioane 8:56** A o lumana'i pea le Satauro, sa fa'aolaina ai tagata i le fa'atuatua i le togiola o le a faia (Eperu 11:13).
 - e. **Efeso 2:5-9** I ona pō nei, o lo'o fa'aolaina ai tagata i le fa'atuatua i le togiola ua mae'a ona faia.
 - f. **Mataio 4:23** Sa tala'iina e Keriso ma Ōna so'o le malō o le alofa tunoa. (Va'ai le Mataio 10:7).
 - g. **Mataio 18:3** O le ala e 'avea ai ma tagata o le malō o le alofa tunoa, ia liua ato'atoa. (Fa'aaogā ma le Ioane 3:3, 5 - Ia fanaufouina).
 - h. **Efeso 2:3, 12** O i latou o ē ua aunoa ma le alofa tunoa o Keriso ua igoa i latou o le "fanauga a le to'asā," ma ua nonofo i lalo ifo o le fa'asalaga o le tulafono (Roma 3:9,19, 20).
 - i. **Roma 3:24, 25** O i latou o ē ua 'avea ma tagata moni o le malō o le alofa tunoa, ua fa'amagaloina a latou agasala ma latou nonofo i le alofa tunoa (Roma 6:14,15).
- 2. O LE MALŌ O LE MAMALU.**
- a. **Luka 1:31-33** Pe a uma ona tu'uina atu e Keriso le malō o le alofa tunoa i Lona Tamā, ona tu'uina atu lea iā te Ia o le nofoāli'i ma le malō o Lona tamā o Tavita. (Silasila i le Luka 19:22, 25; Tani. 7:13,14; Fa'aal. 11:15).
 - b. **Mataio 25:31** I lona afio fa'alua mai o le a fa'anofoina ai Keriso i le nofoāli'i o le malo o le mamalu.
 - c. **Mataio 25:34** Na saunia (fuafuaina e le Atua) le malō o le mamalu a o le'i fa'avaeina le lalolagi. Na 'avea lenei lalolagi ma malo o le mamalu a o le'i ofi mai le agasala. Na lē iloa le malō talu ai le pa'ū o le ulua'i Atamu, a o le ā toe fuata'iina e le Atamu mulimuli, o Keriso lea. (Faitau i mau nei: I Ioane 3:8; Galu. 3:21; Mika 4:8).
 - d. **Luka 23:42** O le malō o le mamalu sa fa'asino i ai le olēga a le faomea i le satauro.
 - e. **II Timo. 4:1** E lē mafai ona fa'atūina o lenei malo vaganā ona ua taunu'u ona toe afio mai o Iesu (II Tesa. 1:7; Mataio 25:31-34).
 - f. **Mataio 24:14** O le tala'iga o le afio fa'alua mai o Iesu ua fa'amamafaina ai le malō o le mamalu (Tani. 2:44; 7:22, 27).
 - g. **I Tesa. 2:12** Ua vala'auina i tatou i lenei malō. O i latou uma o ē latou te lē taliaina le vala'au, o le a lē 'avea i latou ma sulī o mea lelei uma ua folafolaina mai (Roma 8:16,17).
 - h. **Mata. 7:21-23** E lē mafai ona 'avea o se tasi ma tagata o le malō o le mamalu, vaganā ona ua mua'i 'avea o ia ma tagata moni o le malō o le alofa tunoa (II Timo. 2:12; Roma 8:17; Fa'aal. 21:7, 8). Ua 'avea le malō o le alofa tunoa peiseā'i o se a'oga fa'amasani tatou te sauniuni ai mo se tofi i le malō o le mamalu.
 - i. **Fa'aal. 22:14** E pei ona fa'amamaluina o le tulafono i ona pō nei o le malō o le alofa tunoa, o le a fa'apea lava fo'i ona fa'amamaluina pea i ona pō o le malō o le mamalu.
 - j. **Mata. 5:1-12** O le amio e tatau mo ē ua fia 'avea ma tagata o lenei malō.
 - k. **Fa'aal. 21:22-27** O le malō mamalu tele.
 - l. **Fa'aal. 22:3** O ōna tagata uma latou te 'au'auna atu ma le fa'amaoni i le nofoāli'i o le mamalu. E leai sē toe agasala.
 - m. **Fa'aal. 19:16** E lē toe mana'omia se Faitaulaga Sili, po o se Fautua i lea malo, a o le a fa'apaleina Iesu o le Tupu o tupu ma le Ali'i o ali'i.
 - n. **Mataio 6:10** Ia tatalo mo le o'o mai o le malō.

TAULOTO: Efeso 2:8.

O LE TALA LELEI O LE MALŌ

Ua fa'amalamalamaina mai e le Afioga o le Atua.

1. **Kene. 1:26** Na faia le tagata e le Atua ina ia 'avea o ia ma tupu e pule i Āna galuega uma.
2. **Sala. 8:4 – 6** Talu ai ina ua tofia o ia e fai ma tupu, na fa'apaleina ai le tagata i le mamalu ma le matagofie.
3. **Roma 3:23** Ua 'avea le agasala ma āla ua pa'ū ai le tagata mai lona tulaga mamalu, ma ua lē iloa ai fo'i ma le pale matagofie.
4. **I Pete. 5:4** O i latou o ē ua latou taliaina le fa'aolataga ua saunia e Iesu, o le a toe maua o latou pale pe a afio mai Iesu i Lona toe afio fa'alua mai (**II Timo. 4:8; Iakopo 1:12**).
5. **Tani. 2:44** Ua fa'amamafaina i valo'aga a le 'au perofeta le toe fuata'iga o le mamalu na lē iloa (**Tani. 7:13, 14, 27; II Samu. 7:12, 13, 16; Isaia 9:6, 7**).
6. **Gal. 3:19-21** E le'i o'o ina fa'ataunu'uina, a o le a taunu'u i le toe afio mai o Iesu (**Fa'aal. 11:15-18**).
7. **Mata. 24:14** I ōna pō e tuā'oi ma le gata'aga, o le a so'o ai le lalolagi i le tala'iga o le tala lelei o le malō (**Fa'aal. 14:6 – 14**).

TAULOTO: Mataio 24:14.

O LE ATUA LĒ NA FAIA MEA UMA

- I. O le tasi fa'ailoga tāua e iloa ai le Atua moni, o Āna galuega ia.
1. **Iere. 10:10-12** O Lē na Ia faia le lagi ma le lalolagi, o le Atua moni lava Ia (Sala. 96:5).
 2. **Salamo 19:1-3** Ua tala mai e le lagi le mamalu o le Atua (Isaia 40:26).
- II. O Lē na tofia e le Tamā ia Na fa'ataunu'uina le galuega o le foafoāga, o Keriso lava lea.
1. **Ioane 1:1-3** Na "Ia" (Keriso) faia mea uma lava.
 2. **Eperu 1:1, 2** Na "Ia" faia mea uma.
 3. **Kolose 1:16** Auā na faia e "Ia" o mea uma lava.
- III. Sa galue ai fo'i ma le Agaga Pa'ia i le foafoāga.
1. **Kenese 1:2, 26** Sa fegaoioia'i le Agaga o le Atua i le fogātai.
 2. **Iopu 33:4** Na faia a'u e le Agaga o le Atua (Salamo 104:30).
- IV. O le a'oa'oga e fa'apea, "Na faia e le Atua le lagi ma le lalolagi," o se a'oa'oga tāua lava lea fa'ale-Tusi Pa'ia e lē tataua ona fa'alē-amana'iaina e pei ona faia nei e le vasega o le 'au fa'afiapopoto.
1. **Esoto 20:8-11** Ua tu'uina mai e le Atua le Sapati ina ia manatua ai pea e tagata le Atua, Lē na faia mea uma. O le alā galue malosi fo'i lea o le ti'apolo ina ia tineia lenei fa'ailoga tāua.
 2. **Fa'aal. 14:6,7** O le fe'au mulimuli ua toe ta'ita'iina ai manatu o tagata i "Lē na faia le lagi, ma le fanua, ma le sami, atoa ma puna o vai."
- V. Ua 'avea le foafoāga o le lalolagi ma āta o le foafoāga fa'ale-agaga, o le liua lea ma le toe fa'afouina o le tagata agasala i le mana o Iesu Keriso. O le mana na fa'ataunu'uina ai le foafoāga i le amataga, o lea lava le mana e tasi o lo'o galuea'iina ai le olataga mo le fanau a tagata. Pe afai e moni e le'i faia mea uma e le Atua, ua lē mafai fo'i la ona 'avea o Ia ma o tatou Fa'aola.
1. **II Kori. 4:6** Ua fa'atusatusaina e Paulo ia nei foafoāga e lua.
 2. **Kenese 1:2** Sa galulue le Agaga ma le vai i le ulua'i foafoāga.
 3. **Ioane 3:5** E fa'apea fo'i i le foafoāga fa'ale-agaga.
 4. **Salamo 33:9** Sa galue le Afioga a le Atua i le ulua'i foafoāga.
 5. **I Pete. 1:23** E fa'apea fo'i i le foafoāga fa'ale-agaga.
 6. **Salamo 51:10** Ia e "faia" se loto mamā mo a'u. (Fa'a-Peretania, "Create in me a clean heart," – "Ia e 'foafoaina' se loto mamā mo a'u.").
 7. **Efeso 2:10** Ua ta'ua le fa'afouina o i tatou, "O Lana lava galuega."
 8. **II Kori. 5:17** O se foafoāga fa'ale-agaga le fanaufouina. (Fa'a-Peretania [English Revised Version]: "If any man is in Christ, there is a new Creation." – "Afai o iā Keriso se tasi, 'ua i ai se foafoāga fou'").

"Na fetalai atu Iesu iā Nikotemo, 'E agi le matagi i le mea e loto i ai o ia, e te fa'alogo fo'i i lona agi, a e te lē iloa le mea e alu atu i ai; e fa'apea i latou uma o ē ua fanau mai e le Agaga' (Ioane 3:8). E pei o le matagi e lē ma-va'aia lona tino, a e fa'alogoina ma va'aia lelei fua o lana galuega, e fa'apea le Agaga o le Atua ma Lana galuega i loto o tagata. O le mana lea e fa'afouina ai, e lē va'aia e mata fa'ale-tino, a e na te galuea'iina le ola fou i le agaga; na te fa'afouina le tagata ia foliga i le fa'atusa o le Atua. E ui ina e lē ma-va'aia ma e lē gaoiā le galuega a le Agaga, a e aliali mai lava ōna fua." - O La'asaga iā Keriso, itulau e 64.

O le tagata o lē ua pagātia i le agasala, ua taunu'u iā te ia le fa'amatalaga o le lalolagi ina o le a amata le galuega o le foafoāga, "Ua so'ona nunumi, ma ua gaogao, ma ua ufitia i le pouliuli" (Kenese 1:2). E fa'apea fo'i le ata o lē ua fanaufouina ona taunu'u iā te ia le fa'amatalaga o i ai i le Eperu 11:4, "Na lē faia fo'i mea ua va'aia i mea ua aliali mai."

TAULOTO: II Korinito 5:17.

O LE FOAFOĀGA

I. Na foafoaina le lalolagi ma mea uma o i ai i aso e ōno.

1. **Esoto 20:8-11** "Auā na faia e Ieova i aso e ōno o le lagi ma le lalolagi, atoa ma le sami, ma mea uma lava o i ai." Ua 'avea le Sapati ma molimau e lē ma-fa'afitia, ua tatou mautinoa ai, o "aso" ua ta'ua mai o le foafoāga, o aso lava ia e pei ona tatou maua i nei ōna pō.
2. **Kenese 1:1, 5, 8, 13, 19, 23, 31** O aso lava e pei ona tatou masani ai i le uiga o le upu "aso," e tofu ma le afiafi ma le taeao.

O lo'o fa'alauteleina i ōna pō nei se a'oa'oga sesē e fa'apea, "E lē o ni aso, a o se vaegā tausaga e tele na foafoaina ai le lalolagi." E ui lava ina tatou te lē o matuā fetō'ai ma lea a'oa'oga i lo tatou atunu'u, a e tataua ona tatou iloilo pea i ai ma tatou sauniuni mo le tali atu i ai pe a o'o i ōna pō. O se mea e fa'anoanoa tele ai ona ua talia e nisi failotu o itū'aiga lotu Porotesano lenei a'oa'oga.

II. Na mae'a lelei le foafoāga i aso e ōno. E lē o tau foafoaina pea le lalolagi e o'o mai lava i ōna pō nei.

1. **Kenese 2:1** Ua **uma lava** ona faia o le lagi ma le lalolagi.
2. **Eperu 4:3** Na malōlō le Atua **ina ua uma** ona fa'avaeina o le lalolagi.

III. Ua matuā iloga ona valo'ia mai o le mafua'aga o lenei a'oa'oga i le foafoāga o le a faia e le 'au fa'atauemu i ōna pō o le i'uga.

- II Pete. 3:5, 6** I ōna aso e gata ai o le a fa'afiti ai le 'au fa'afiapopoto e fa'apea, e leai se lolo na lōfia ai le lalolagi.

IV. O lenei a'oa'oga i le gasologa malie mai o le foafoāga se'ia o'o mai lava i lenei uiga ua i ai le lalolagi i ōna pō nei, ua fa'avaeina lea i luga o nei manatu:

1. Ua fa'afiti e leai se lolo na lōfia ai le lalolagi e pei ona talaina mai e le Tusi Pa'ia.
2. O le fa'atusatusaina ma le fa'avasegaina o tino mamago o la'au ma manu na tanumia anamua, ona tu'u lea i vaegā tausaga ese'ese e pei ona latou vaevaeina i ai le gasologa mai o le foafoāga.
3. Ua i ai taofi tetele e tolu e uiga i nei mea ua maua a'e sa tanumia i le ele'ele:-
 - a. O le taofi muamua, na ola mai nei mea a o le'i taitai faia le foafoāga ua ta'ua mai i le Kenese.
 - b. O le tasi taofi, na ola nei mea i vaega taimi ta'itasi o le foafoāga fa'aumiumi o le lalolagi i tausaga e afe ma afe, a e lē o ni aso se ono.
 - c. I le ma le a'oa'oga manino a le Tusi Pa'ia ua fa'ailoa mai ai le lolo tele na lōfia ai le lalolagi na ala ai ona tanumia o nei mea uma.

V. E fa'amalamalamaina atili.

O isi a'oa'oga muamua e lua ua ta'ua i luga, ua na o le lē mautonu ai pea o tagata talu ai le lē feagai ma le tele o isi vaega o le Tusi Pa'ia. Peita'i o le tala i le lolo ua matuā iloga mai le ō

gatasi lelei ma vaega uma o le Tusi Pa'ia ato'atoa. O lea ua ao ai ona tatou talia lelei o le a'oa'oga ato'atoa o le foafoāga e pei ona ta'ua mai i le Tusi Pa'ia.

Talu ai ina ua tele ona fa'alē-amana'iaina nei o le a'oa'oga a le Tusi Pa'ia i le foafoaina o le lalolagi i aso e ono, le pa'ū o le tagata, ma le tupu mai o le lolo, o lea ua talia ai e le vaega tele o tagata le a'oa'oga i le gasologa malie mai o le foafoāga. E lē mafai e se tasi ona talia o lenei a'oa'oga e aunoa ma le lepetia ai o fa'avae o lona talitonu i le Tusi Pa'ia. Ua feagai lelei le upu a Paulo i le **Roma 1:22**, ma lenei a'oa'oga ua matuā te'ena ai le upu moni a le Atua, "Ua valea i latou, a o fa'afiapopoto i latou," (Fa'aaogā ma le I Timo. 6:20; II Timo. 3:7).

"Ua fa'amalamalamaina mai e le Atua i le tala i le lolo o mea e lē ma-fa'amatalaina e le poto fa'ale-tagata pe a na o ia. I ōna pō o Noa na tanumia ai o tagata, manu, ma la'au, e fai ma molimau i tupulaga amulī ina ia latou talitonu ai na fano le lalolagi tuai i le lolo. Sa finagalo le Atua ia 'avea le maua a'e o ia mea ma ala e fa'atupuina ai le matuā talitonu ato'atoa i le a'oa'oga fa'ale-Tusi Pa'ia; a e peita'i talu ai o latou lava mafua'auga lē aogā, ua toe faia e tagata o lea lava sesē na faia e tupulaga a o le'i o'o le lolo - o mea na foa'iina atu e le Atua e galuea'iina ai lo latou manuia, ua liua e i latou e fai ma malaia talu ai lo latou fa'aaogāina 'ese.'" – O Pateriaka ma Perofeta, itulau e 112.

I Kori. 3:19, 20 "E maua e ia o ē popoto i ā latou lava togafitiga; i le ma lea, ua silafia e le Ali'i manatunatu o ē popoto, ua fa'atauva'a ia."

VI. O se mea e ofo tele ai i le tulaga fa'alētonuga ua i ai le 'au Kerisiano (a e maise le 'au failotu), o ē ua latou faia lenā a'oa'oga e pei ona ta'atele i nei ōna pō. Ua latou ta'u sesēina le molimau a Mose i le Kenese, a e peita'i Keriso, Lē ua latou fai mai o lo'o latou au'auna i ai, na Ia matuā fa'amaonia le a'oa'oga a Mose.

1. **Ioane 18:37** Na 'Ou sau i le lalolagi ina ia **"Ou molimau i le upu Moni."**
2. **Mataio 19:4** Na fa'amaonia e Iesu le molimau a Mose i le faiga o le tagata; auā o le tasi lea vaega o le upu moni.
3. **Ioane 5:45-47** Sa tatau ona silafia lelei e Iesu pe tonu pe sesē le molimau a Mose; auā sa i ai o Ia i le amataga. Na faia fo'i e Ia o mea uma (Ioane 1:3; Kolose 1:16).
4. **Mata. 24:37-39** Na fa'amaonia e Iesu le tala i le lolo.

VII. E ui lava ina ua mae'a lelei le galuega o le foafoāga, a e o lo'o galue pea lava le Atua mo le tausiga ma le fa'atumanuina o ia mea uma.

1. **Ioane 5:17** O lo'o galue le Tamā e o'o mai i le aso nei.
2. **Eperu 1:3** O lo'o fa'atumanuina e Keriso mea uma.
3. **Sala. 145:15** E fa'asaga i le Atua mata o mea uma lava.
4. **Sala. 147:4, 5** Ua faitaulia ma fa'aigoaina e le Atua le aofa'i o fetū. Fai mai e tusa ma le 50,000,000 fetū ua iloa ma faitauina e le 'au va'ai fetū.
5. **Isaia 40:12** Ua fuatia e le Atua le sami ma le ele'ele o le lalolagi.
6. **Iopu 26:7** O le mana o le Atua o lo'o taofia ai le lalolagi i le vā nimonimo.

TAULOTO: Eperu 11:3.

O LE TAUA TELE MA LE TOE FUATA'IINA

I. Fa'amalamalamaga.

1. Ua 'avea le vaega muamua o le Kenese ma totonugalemu ua fa'asagatau i ai 'au o lē e lē talitonu i nei ōna pō. E pei lava o le 'au fa'atuatua, ua fa'apea fo'i ona mautinoa lelei e nei fili.
2. Ua 'avea le vaega muamua o le Kenese ma fa'avae ua atina'e ai le fale aluga o le fa'atuatuāga fa'ale-Tusi Pa'ia. E **pa'ū pe tumau** le fale fa'atasi ma lona fa'avae.

II. O le taua tele fa'ale-agaga o lo'o tau nei i le lalolagi (ma totonu fo'i o Ekalesia), ua fa'a'autūina lea i lenei lava mata'upu e tasi, o le talitonu, po o le lē talitonu i le tala o le foafoāga e pei ona tusia mai i le Kenese.

1. O ē latou te taofi mau i le a'oa'oga fa'ale-Kenese ua igoa o **"Fundamentalists,"** o lona uiga pe a fa'a-Samoaina, "O ē ua latou te'ena le molimau pe a i le fa'avae tuai," (**Fundament – Fa'avae**).
2. O ē ua latou te'ena le molimau a le Kenese ua igoa o **"Modernists,"** o lona uiga, "O ē ua latou talia se a'oa'oga fou," (**Modern - Fou**).
3. Ua fa'apea ona fa'afesaga'i o nei vaega e lua. O le Ekalesia Aso Fitu o le Toe Afio Mai ua selau (100) pasene (pe ua atoatoa) ona i ai o ōna tagata ma lana 'au faigaluega i le vaega o ē o lo'o taofi pea i le fa'avae tuai fa'ale-Kenese.

III. Ua 'avea le Sapati aso fitu ma fa'amanatuga o galuega a le Atua e pei ona fa'amalamalamaina mai i le amataga o le Kenese. O lea ua tatou fa'afesaga'i ai ma lenei fa'ai'uga e tasi e lē ma'alofia: **Ua 'avea le Sapati aso fitu o lona fā o poloa'iga ma fa'ailoga tāua fa'ale-agaga** mo i latou o ē o lo'o latou talitonu pea i le a'oa'oga fa'ale-Tusi Pa'ia, e pei ona fa'ailoa mai i le Kenese.

IV. I ōna pō nei, ina ua tauau pea ina fa'ata'amilo i le 'olo o le Kenese ona tau ai o le taua tele fa'ale-agaga, ua aliali mai ai i lona manino ato'atoa le tāua tele ma le uiga o le toe fuata'iina o le Sapati.

1. **Ierem. 6:16** E pei o ōna pō o Isara'elu anamua, ua fa'apea fo'i i nei ōna pō ona lafoa'iina ai e le lalolagi o fa'avae o le vavau.
2. **Iuta 1:3** Ia fa'amalolosi ona tatou finau mo le fa'atuatuāga ua fa'atasi ona tu'uina mai i le 'au pa'ia.
3. **Faila. 3:1, 17** O le mea ma ōna lava pō i galuega uma a le Atua.
4. **Faaal. 14:6, 7** Ua fa'atatau tonu le tala'iga (po o le toe fuata'iina) o le Sapati i ōna po ua te'ena ai e le to'atele le molimau a le Kenese. "Ia matata'u i le Atua ma avatua le vi'iga i **Lē na faia le lagi, ma le fanua, ma le sami. atoa ma puna o vai.**" E fa'asino tonu i lona fā o poloa'iga o le tulafono ma le a'oa'oga fa'ale-Kenese i le foafoāga ua fa'afitia i nei ōna pō.
5. **Isaia 58:12-14** O le toe fuata'iina o le Sapati, o le āla tāua lea ua filifilia e le Atua mo le toe atina'e o fa'avae o le vavau.
 - a. E lē mafai se tasi ua tausi i le Sapati ona i ai i le vaega o le 'au lē talitonu; auā ua 'avea lona fa'amamaluina o le Sapati ma āla e fa'ailoa atu ai i le lalolagi lona matuā talitonu ato'atoa i le foafoāga na faia i aso e ono. O le fa'atuatuāga fa'a-Porotesano i nei ōna pō ua tele ona 'ati'atia i le a'oa'oga fou (**modernism**) talu ai ona ua talia e nisi e to'atele o le 'au failotu.

- b. Ua lē gata ina ‘avea le Sapati aso fitu ma fa’amanatuga o le foafoāga o le lalolagi i aso e ōno, a ‘ua ‘avea fo’i ma fa’amanatuga o le foafoāga fa’ale-agaga e fa’apa’iaina ai le fanau a le Atua.
6. **Esoto 31:13** O le fa’ailoga o le fa’apa’iaina o outou.
7. **Esek. 20:12** O le fa’ailoga ia tatou iloa ai, “*o A’u o Ieova, Lē fa’apa’iaina i latou.*”

TAULOTO: Ieremia 6:16.

O LE AGASALA

- I. Talu ai ina o le Atua o Ia o le Tupu o le lagi ma le lalolagi, ua tatau iā i latou uma o ē na Ia faia ona usiusita'i i Lana tulafono; auā o le fa'avae lava lea o Lona malō. O lē e lē usita'i ua ta'ua o le agasala. O le agasala o le fouvale lea i le malō o le Atua.

1. **Salamo 103:19** E pule aoao Lona malō.
2. **I Ioane 3:4** O le agasala o le solitulafono lea.
3. **Isa. 1:2, 19, 21** O le agasala o le fouvale lea i le pule a le Atua.

- II. Ua tu'uina mai e le Atua i Lana tulafono se tapula'a ua ato'atoa ona lelei e fa'atatau i ai la tatou amio, o lea ua lē mautali ai i latou o ē ua latou foua i Lana pule.

1. **Salamo 109:172** Ua tonu Āna poloa'iga uma lava.
2. **Salamo 19:7, 8** E sao ma fa'amaoni le tulafono a Ieova.
3. **Roma 7:12** E pa'ia le tulafono, e tonu, ma ua lelei.
4. **Roma 3:19** Ia punitia gutu uma lava. O le usita'i i le tulafono e maua ai le amiotonu (o le amio lea ua ō gatasi ma le tulafono); a o le lē usita'i e maua ai le amio e fa'afeagai ma le amiotonu, o le amiolētonu lea, po o le agasala.
5. **I Ioane 5:17** O amiolētonu uma lava, o agasala ia.

- III. Ua fa'atusaina le agasala i mea uma e inosia ma le mata'utia. O le agasala o le pogai lava lea e tutupu mai ai leaga uma ua fa'afanoia ai le lalolagi ma tineia ai le fiafia o tagata.

1. **Isaia 1:5,6** O le manu'a ma le papala 'a'ati.
2. **Luka 5:30-32** O le fa'ama'i faigatā.
3. **Ioane 8:34** O le pule sauā e pologa ai.
4. **Roma 7:18, 23** O le tulafono 'ese ua fa'asagatau mai.
5. **Roma 8:22** E ōi ma o'ono ai mea uma na faia.
6. **Roma 5:12** Ua o'o mai ai le oti.

- IV. Ua fa'apenei ona fa'amalamalamaina o le agasala e le ali'i a'oa'oina o Dr. Guthrie, fai mai:-

“O le agasala o se aitalafu, o se avega, o se gaoi, o se ma'i lepela, o se mala, o se mea o'ona e oti ai, o se gata fe'ai, o se tui ma'ama'ai; ua feoi ma o'ono mea uma na faia i lalo ifo o lenei avega mamafa tū. Se'i e ta'u mai iā te a'u se leaga ua lē tupu mai i lenei pogai. O ai na te 'elia tu'ugamau o le fanau a tagata? O ai na te faoa la latou amio mamā? O ai na te fasioti iā te i latou? O ai na te mua'i pelopelo atu, ona toe fa'asaga atu lea e fa'asala iā te i latou? O le agasala! O ai na te tineia le mamā ma le matagofie o le 'au talavou? O ai na te tu'imomomoina loto o matua? O ai na te 'aveina ifo lē ua lauulu sinā i le tu'ugamau ma le fa'anoanoa? O le agasala! O ai na te liua le fanau vaogofie ia 'avea ma gata uōgo, o tinā alolofa ma le fa'apelepeleina ia 'avea e pei o iaena (hyena) o le vao, ma tamā ia sili atu ona leaga i lō Herota, ina ua latou fasioti i ā latou lava fanau, a e lē o fanau 'ese? O le agasala! O ai na te fa'atupuina fevaevaea'iga i totonu o aiga? O ai na te tutuina le lamepa o taua ma na fe'avea'iina i nu'u o ē ua feoi ma tetemū? O ai na te saeia le 'ofu tino o Keriso e leai se su'iga i lona fa'atupuina o fevaevaea'iga i totonu o le Ekalesia? O le agasala! O ai Tilaila na te fa'a'ole'oleina Samasoni, a e mulimuli ane ua tu'uina atu o ia i lima o le 'au lē fa'atuatua; o ai

na te liua le loto alofa ma le filemū ia ma'a'a e pei o se papa? O ai na te fulisia le nofoali'i o mafaufauga tonu ma na fa'aosoina 'au a le agasala ia pei o lafu pua'a o Katara ona latou feosofi ifo i le tofē o i ai le vai lepa afi? - O le agasala!"

- V. Ua fa'apea ona 'ino'ino o le Atua i le agasala, ua 'avea ai o se pupuni i le vā ma Ia. E lē mafai ona fa'asaoina lē ua tumau pea i le agasala. O le totogi tatau mo le agasala, o le oti lea.

- | | |
|------------------|---|
| 1. Isaia 59:1, 2 | Ua 'avea le agasala ma pupuni i le vā ma le Atua. |
| 2. Esek. 18:4 | O le tagata e agasala e oti ia. |
| 3. Roma 6:23 | O le oti o le totogi lea o le agasala. |
| 4. Eperu 1:9 | E 'ino'ino Iesu i le amio leaga. |
| 5. II Timo. 2:19 | Ia fa'apenā ma le fanau moni a Iesu. |

"E lē tutusa agasala uma i le finagalo o le Atua; e ese'ese tulaga o agasala i Lana fa'atatau, e pei lava fo'i o le fa'atatau fa'ale-tagata; a e peita'i e tusa lava pe fa'atauva'a se mea sesē i le va'aiga a tagata, a e leai se agasala e fa'atauva'a i le silafaga a le Atua. O le fa'amasinoga a tagata e fa'apito ma le tonu, a e fa'atatau tonuina lava e le Atua mea uma e pei ona tatau ai."

"Ua tatou agasala a'ia'i lava, a e peita'i ua maliu Keriso ina ia fa'amagaloina i tatou. O le aogā o Lona fa'asatauroina, ua lava lea e puluvaga a'i i tatou i le vā ma le Tamā. O ē ua Ia fa'amagalo tele i ai, o le a tele fo'i ona latou alolofa atu iā te Ia, ma o le a sili i latou nei ona tutū latalata atu i Lona nofoali'i e vivi'i atu iā te Ia ona o Lona alofa tele, i le ma le taulaga ofoofogia na Ia saunia. O ōna po lava tatou te iloa tino ai le alofa o le Atua, o le a sili fo'i ona tatou mautinoa lelei ai o a tatou agasala. Pe afai tatou te va'ai atu i le umi o le filifili ua tu'utu'u ifo i lalo nei mo i tatou; pe a tatou malamalama atili fo'i i le taulaga le fai tuā'oi na saunia e Keriso mo i tatou, o le a liu suava'i ai o tatou loto i le mutimutivale ma le nutimomoina." - O La'asaga iā Keriso, itulau e 40.

TAULOTO: I Ioane 3:4.

O LE MAFUA'AGA O LE AGASALA IĀ LUSIFELO

I. Na māfua le agasala i le Ti'āpolo, po o Satani, lē o lo'o ia galuea'iina pea le leaga e o'o mai i le asō.

1. **I Ioane 3:8** Ua agasala le ti'āpolo talu le amataga.
2. **Ioane 8:44** O le fasioti tagata o ia talu le amataga. O ia fo'i o le tamā o le pepelo.
3. **I Nofo. 21:1** E fa'aosoina e Satani loto o tagata ina ia latou agasala (Luka 22:3; Mata. 4:3)
4. **Fa'aal. 12:9** Na te fa'asesē i le lalolagi uma.

II. E tele igoa ua fa'aigoaina a'i Satani i le Tusi Pa'ia, e i ai igoa nei:-

1. **Fa'aal. 20:2** O le tarako, le gata tuai, le ti'āpolo, ma Satani.
2. **Mare. 3:22, 23** O Pelesepuolo, le ali'i o temoni.
3. **II Kori. 4:4** O le atua o le lalolagi nei.
4. **Isaia 27:1** O leviatana, o le gata tele vave, o le gata ta'ata'ai.

III. Ua 'avea nisi tupu ma o latou uiga ma amio, atoa ma o latou fa'asalaga, ma fa'atusa ua fa'amalamalamaina mai a'i le uiga o Satani ma lona i'uga.

1. **Esek. 28:11-19** O le tupu o Turo.
2. **Isaia 14:4-15** O le tupu o Papelonia. Ia manatua le agaga fa'amaualuga sa iā Nepukanesa (Tanielu 4:20-33), ma Pelesara (Tani. 5:1-6,17-31).

Manatu fa'aopoopo:- O le fe'au i le tupu o Turo e pei ona fa'aalia mai i le Esekielu, matā'upu e 26-28, o le tasi lea valo'aga uiga-lua (e pei o le Mataio 24). E fa'asino i le tupu o Turo sa i ai i ia ōna pō, a e peita'i e loloto ma lautele lona a'ano ua aofia ai ma le fa'amatalaga manino o le fili, lē na mafua ai le fa'amaualuga ma le agasala a Turo ma lona tupu, o Satani lea. Ua fa'apea ona 'avea o le fe'au i le tupu o Turo ma ala ua fa'amalamalamaina mai ai le pa'ū o Lusifelo ma le mafua'aga iā te ia o le agasala.

IV. Sa le'i mua'i agasala Satani, a e sa iā te ia muamua le tulaga o se agelu mamalu e igoa iā Lusifelo.

1. **Ioane 8:44** Sa taofi muamua le ti'āpolo i le upu moni.
2. **Esek. 28:15** Sa ato'atoa ona lelei ina ua faia e le Atua.
3. **Isaia 14:12** O Satani (O le fili, po o lē tete'e mai) sa igoa muamua iā Lusifelo ("*O lē ua pupula,*" po o "*le fetu ao pupula*"). I le Tusi Pa'ia fa'a-Peretania ua ta'ua mai ai lenei suafa o Lusifelo, a e peita'i le Tusi Pa'ia fa'a-Samoa ua lē o ta'ua mai ai Lusifelo, a o lona uiga o lenā suafa, "*o lē ua pupula.*"

V. E tele le mamalu ma le pule sa iā Lusifelo a o nofo lelei pea o ia i le lagi.

1. **Esek. 28:14** O ia o le Kerupi ua fa'au'uina.
2. **Isaia 14:13** Sa fai lona nofoāli'i.

3. **Esek. 28:12** Sa ta'uta'ua ona o lona poto ma le ato'atoa o lona matagofie.
4. **Esek. 28:13** Sa iā te ia le taleni o le fatu pese mālie ma le tā la'au.
5. **Esek. 28:15** Sa ato'atoa ona lelei o lana amio.

VI. E le'i faia e le Atua se ti'āpolo. Na Ia faia o Lusifelo, le agelu ua ato'atoa ona lelei ma le matagofie. O Lusifelo lava ia, talu ai lona lē usita'i ma le filifiliga a lona lava loto, na liua ai o ia e ia lava e 'avea ma ti'āpolo.

1. **Esek. 28:17** O lona fa'amauualuga na amata ai ona agasala o Lusifelo.
2. **Isaia 14:13** Talu ai lona fa'amauualuga na fia si'itia a'e e ia lona tulaga ia sili i lō le Atua.
3. **Isaia 12:7** O lona fa'amauualuga na i'u ina fia tutusa ai Lusifelo ma Lē Silisili 'ese.
4. **Fa'aal. 12:7** Sa fa'asaga le ita o Lusifelo iā Keriso. O Mikaele o Keriso lava lea. (Ia faitau ma le fa'autauta i mau nei: Iuta 9; I Tesa. 4:16; Ioane 5:28, 29).
5. **II Peteru 2:4** Sa 'au iā Lusifelo le tasi vaega e to'atele o le 'au agelu (Faitau ma le Fa'aal. 12:3,4).

VII. Talu ai la latou agasala, na tuli 'eseina ai Satani ma āna 'au mai le lagi.

1. **Esek. 28:16** Na fa'ate'aina Lusifelo mai lona tofiga mamalu i tala ane o le nofoāli'i o le Atua. Faiupu 14, "O lē fa'amalumalu." (Silasila i le Salamo 80:1; Esoto 25:18-20).
2. **Fa'aal. 12:7, 8** Na i'u ina tau le taua i le lagi na manumalo ai Mikaele (Keriso) ma Āna agelu i le tarako (Satani) ma āna agelu. Na lē toe maua i le lagi se mea latou te nonofo ai a ua tulia 'eseina ai latou.
3. **Luka 10:18** Na silafia Satani e Iesu ua pa'ū ifo mai le lagi.
4. **II Pete. 2:4** E le'i ō ifo loa 'au a le amio leaga i le lalolagi, a e peita'i sa tu'uina atu i latou i le pogisā o seoli e taofia ai se'ia o'o i le fa'amasinoga. E lē o se finagalo o le Atua ua ala ai ona 'avea o lenei lalolagi ma nofoāga o Satani. O lenei upu "**seoli**" e maua mai le upu Eleni o "**tartarus**," o lona uiga, "**o se mea pogisā**." O le upu "seoli" e pei ona fa'aaogāina nei, e lē taumate ona fa'asino i le vā nimonimo o i ai i le vā o lalolagi na faia e le Atua. O le vā tele lea ma le pogisā sa finagalo ai le Atua ia taofia ai lenei 'au fouvale se'ia o'o ina fa'amasinoina i latou. Ai lava o lea ua ala ai ona *fa'aigoaina Satani o "le ta'ita'i o le 'au faipule i le vā nimonimo"* (Efeso 2:2. Fa'aaogā ma le Iuta 6).

Manatu fa'aopoopo:- Pe 'ana lē taliaina e o tatou ulua'i matua le galuega fa'asesē a le fili, po ua taofia pea Satani ma āna 'au i le pogisā o seoli ma le leai o se mea e fa'avaeina ai so latou malō. A e peita'i sa taumafai Satani ina ia maua sona avanoa i se tasi o lalolagi na faia e le Atua. Na te'ena āna 'ole'olega e isi lalolagi uma, a ua na o lo tatou nei lalolagi ua taliaina ai ma ua manumalō i ai le fili ma si'i loa mai i ai lana fouvalega na amataina i luga i le lagi. Ua malu mamoe e to'a ivagafulu ma le iva, a ua sē le mamoe e tasi (Mataio 18:12, 13).

5. **Kenese 3:1-6** Na o'o atu le fili i le nofoāga matagofie o o tatou ulua'i mātua ma na galuea'iina ai lo lā malaia.
6. **Luka 4:5, 6** Na ia faoa le pule sa iā Atamu (Kenese 1:28; II Pete. 2:19; Roma 6:16).

7. **Fa'aal. 12:9** Talu ai ona ua vave ona maua e Satani o le avanoa i lo tatou nei lalolagi, ua foliga ai peisea'i na lafo ifo loa le tarako ma āna agelu i le lalolagi.

VIII. O le tulaga ma le tofiga o Satani i le lalolagi.

1. **II Kori. 4:4** O ia o le atua o le lalolagi nei.
2. **Ioane 12:31** O ia o le ali'i fo'i o lenei lalolagi.
3. **Luka 4:6** Na lē fa'afiti Iesu i le pule a Satani.
4. **I Ioane 3:8** Na maliu le Ālo o le Atua ina ia toe fa'atauina mai e Ia le ulua'i pule i Lona lava toto tāua (Faitau ma le Kenese 3:15; Fa'aal. 5:9; Mika 4:8; Esek. 21:25-27).

IX. O le ā se galuega o lo'o faia e Satani?

1. **Iopu 1:7** O lo'o feālua'i ma fesāvalia'i i le lalolagi.
2. **I Pete. 5:8** Na te sa'ilia ni ē e 'ainā e ia. O le mea e tasi e galue aga'i i ai Satani, ina ia sili atu ona to'atele o ni ē o le a fano fa'atasi ma ia.

X. Ona o le ā ea ua mafai ai e Satani ona fa'asesēna o le to'atele?

1. **Faaal. 2:24** Ona ua latou lē iloa mea loloto a Satani.
2. **II Tesa. 2:10-12** Ona ua latou lē talia le upu moni, a e fiafia i le amio leaga.
3. **II Timo. 4:4** Ona ua liliu 'ese o latou taliga i le upu moni.

XI. Po o ā nisi āla e galue ai le ti'āpolo?

1. O togafiti pepelo e 'olegia ai.
 - a. O ia o le pepelo (**Ioane 8:44**).
 - b. Na ia 'olegiaina Eva (**I Timo. 2:14**).
 - c. E liua o ia e ia ma agelu o le malamalama (**II Kori. 11:14**).
 - d. Na te fa'aaogāina tagata e 'olegiaina ai nisi (**II Kori. 11:13-15**).
 - e. Na te faia fa'aailoga ma vavega pepelo (**Fa'aal. 13:14; 16:14; II Tesa. 2:8, 9**).
 - f. Na te fa'auiga 'eseina le Afioga a le Atua (**Mataio 4:6**).
2. O moliga pepelo.
 - a. Na ia molia le Atua iā Eva (**Kenese 3:1-5**).
 - b. Na ia molia Iopu i le Atua (**Iopu 1:8-11; 2:4, 5**).
 - c. Na ia molia Iosua, le faitaulaga sili (**Sakaria 3:1, 2**).
 - d. Na te molia le fanua a le Atua e lē aunoa (**Fa'aal. 12:10**).
3. O le fa'atigaina o tino o tagata.
 - a. Na ia fa'ao'o le ma'i papala iā Iopu (**Iopu 2:7, 8**).
 - b. Na ia noatia le tasi fafine mo tausaga e sefulu ma le valu (**Luka 13:11, 16**).
 - c. Na ia tu'ia le tino o Paulo (**II Kori. 12:7**).
4. O le fa'asauā.
 - a. O ia o le fasioti tagata (**Ioane 8:44**).
 - b. Na te fa'asauāina le ekalesia (fafine), (**Fa'aal. 12:13**).
 - c. Na te fa'asauā i ē tausi i poloa'iga a le Atua (**Fa'aal. 12:17**).

XII. E fa'aapefea ona tatou manumalo iā Satani?

- | | |
|-------------------------|---|
| 1. Iuta 24 | Ia tu'uina atu ato'atoa i tatou i le puipuiga a Lē na te mafai ona leoleoina i tatou ina ne'i pa'u'ū. |
| 2. I Kori. 10:13 | E lē o'o mai se tofotofoga e sili i se mea ua tatou lavātia. |
| 3. Fa'aal. 12:11 | Fa'atuatua i le toto o Iesu. |
| 4. Mataio 4:1-11 | Fa'aaogā afioga a le Atua -- "Ua tusia." |
| 5. Iakopo 4:7 | Ia tete'e malosi atu i le fili. |
| 6. Efeso 18:1 | 'Aua le tu'uina atu se mea e mautū ai o ia. |
| 7. Luka 18:1 | Ia tatalo so'o (I Tesa. 5:17). |

"E leai se tagata e malu mo se aso po o se itula e tasi pe a aunoa ma le tatalo." - O le Finauga Tele, itulau e 530.

"O ē ua fa'avaivai i le tatalo, o le a ufitia lava i latou i le pogisā o lē o lo'o leaga. E tauanauina i latou ia agasala e le fili, o lo'o lē mapu le fili i lona taumafai e pupuni le ala tatou te sao atu ai i le nofoa o le alofa tunoa, ina ia 'aua ne'i 'avea a tatou talosaga ua faia ma le fa'amaoni ma ala tatou te maua ai le alofa tunoa ma le mana e tete'e atu ai i fa'aosoosoga." - O La'asaga iā Keriso, itulau e 104-105.

TAULOTO: I Korinito 10:13.

O SE FA'AOPOPO IĀ SATANI MA LE FOUVALEGA

- I. Ua aliali mai i le a'oa'oga fa'ale-Tusi Pa'ia, e i ai ni la'asaga i le pa'ū o Satani, e āfua i le fa'ato'ā tulia 'eseina o ia mai le lagi fa'atasi ma āna agelu se'ia o'o i le lafoina o ia i le lepa afi e fa'aumatia ai e fa'avavau.
1. I le amataga ina ua matuā iloga o na aliali mai o le agaga fouvale sa iā Lusifelo ma āna 'au, na tulia 'eseina ai i latou mai le lagi ma tu'uina atu i le pogisā i seoli e nonofo ai.
 - a. O ōna pō lava ia na alu ifo ai le fili ma na faoa le pule ma le malō sa i le ulua'i Atamu. E le'i fa'afiti Iesu i le tofiga ma le pule sa iā Satani (Luka 4:6), auā sa masani ona Ia fa'aigoaina o ia, "o le ali'i o lenei lalolagi" (Ioane 12:31; 14:30; 16:11). E lē o se ali'i ua i ai le pule mai le Atua, a e peita'i o le pule faoa; i le o le ala tula'i atu fo'i lea o le Ālo o le Atua ina ia toe maua mai e Ia le malō na lē iloa (1 Ioane 3:8; Mika 4:8).
 - b. Ina ua taulata i le taimi o Lona maliu, na fetalai atu ai le Ali'i i nei upu, "O lo'o fa'asalaina nei lenei lalolagi; e tulia nei le ali'i o lenei lalolagi" (Ioane 12:31; 14:30; 16:11). E lē o se ali'i ua i ai le pule mai le Atua, a e peita'i o le pule lava a ia (Ioane 12:31). Ona tatou mautinoa lea, e ui ina sa mua'i tulia ma fa'asalaina Satani, a o lenei o le a 'avea le maliu tigā o Keriso i luga o le satauro ma āla e atili tulia ai le fili.
 - c. A o lumana'i pea le Satauro, o lo'o aliali mai sa lē vaosia le ulu atu pea o Satani i nisi fa'atasiga fa'ale-lagi (Faitau ma le fa'autauta i le Iopu 1:6,7). Sa masani Satani ona o'o atu pea i luma o le Atua ma na molia ai le fanau a le Atua, e i ai Iopu ma le faitaulaga sili o Iosua (Iopu 1:8-11; Sakaria 3:1, 2; Fa'aal. 12:10). I le sa lē vaosia lava e le Atua, a e sa tu'u se'ia pupula atili pea i ē nonofo i le lagi, atoa ma lalolagi e le'i pa'ū'ū, le uiga moni o Satani ma lana fouvalega. Sa galue ma le poto le fili i lona taumafai e fulisia fa'avae o le malō o le Atua, a e sa ufitia e ia lona uiga moni i foliga o le alofa ma le loto naunau i le fia fa'atonutonuina o mea ua ia taofi o lo'o sesē i le faiga malō a le Atua.
 - d. O nisi e to'atele o le 'au agelu i ōna po na tulia 'eseina ai Lusifelo mai le lagi, sa latou lē iloa ma sa masalomia fo'i e i latou le fua atoa o le loloto o le leaga o le fili. Pe 'ana vaosia Satani e tusa ma lona fia ulu atu pea i fa'atasiga fa'ale-lagi, po ua masalosalo vale ai nisi loto ma latou fa'apea ifo ai, pe lē sa'o ea le mataupu a Lusifero i nisi ona itū, fua ina ua matuā vaosia malosi e le Atua ia 'aia le toe iloa mai i le lagi.
 - e. A e peita'i, ina ua molimau le lagi atoa uma i le puapuagā o le Ālo pele o le Atua, i Lona uia o lenā ala faigatā mai le fanua o Ketesemane se'ia o'o i le satauro na maliu tigā ai talu ai le galuega mata'utia a le ti'āpolo, ona matuā pupula lelei ai lea iā te i latou o le uiga moni o Satani ma lana fouvalega, atoa fo'i ma le alofa lē ma-fa'atusaina o le Atua ua Ia foa'iina mai ai Lona Ālo Pele e to'atasi e maliu mo le togiolaina o i latou o ē ua fa'asesēina e le ti'āpolo.
 2. O lona lua lea o la'asaga i le pa'ū o Satani, e fa'asino tonu i ai lena fetalaiaga a Iesu, "E tulia nei le ali'i o lenei lalolagi." Ma upu fo'i ua tusia i le Fa'aaliga 12:10, "Na afua i ōna pō ia ona punitia o le lagi iā Satani, ma ua lē toe fa'atagaina e ulu atu i ai."
 3. O le la'asaga mulimuli e fa'a'ato'atoaina ai le pa'ū o Satani, o le a fa'ataunu'uina lea pe a fusifusia o ia ma lafoina i le tō e lē gata, o le lalolagi lea o le a tu'ufua ma gaogao i tausaga e afe o le Meleniuma, o le a fale puipui ai le tiapolo se'ia o'o i le taimi e lafo ai i le lepa afi ma le teiō e fa'aumatia ai e fa'avavau (Fa'aaliga 20:1, 2,10).

II. E fa'amalamalamaina atili pea le autū ma le a'ano e le fouvalega a Lusifelo ua ia fa'asagatau atu ai i le malō o le Atua.

1. E tasi le faigā malō sa iloa e 'au a le lagi, sa na o le ta'ita'iga a le Atua. I le fa'ato'a amataina o le fouvalega a Lusifelo, sa galue malie ai o ia e tau fa'aofi atu i loto o le 'au agelu lenei manatu, "Ua lē sa'o le faiga a le Atua, ua fa'a'au'au le Atua, ma o Lana tulafono fo'i o se tulafono mamafa ma le sauā." A e ma'imaui pe 'ana se'i tu'u iā te ia (Lusifelo) le pule atoa, semanū e fa'ato'a feiloa'i ai le lagi ma se faiga malō ua fa'avaeina i luga o le lē alofa moni ma le lē amiotonu.
2. Sa matuā iloga ona fa'asagatau o le fili i le tulafono pa'ia a le Atua, auā na ia iloa lelei, o le fa'avae mausali lava lea o le faigā malō a le Atua. Sa fa'aaliali lava o na te'ena e Lusifelo o le papa ma'a muamua o le tulafono, o le alofa lea i le Atua, ina ua fa'amaualuga a'e o ia e ia ia sili i lō le Atua ma ua fia 'avea o ia ma atua e ifo ma tapua'i i ai le lagi (Fa'aaoga le Isaia 14:13,14). Sa fa'apea fo'i ona fa'alē-aogāina e Lusifelo ma lona lua o papa ma'a, o le alofa lea i lē ua tatou tuā'oi, ina ua 'avea o ia ma fasioti tagata ma ua na faia se molimau pepelo i nisi e to'atele o le 'au agelu, atoa fo'i ma lo tatou tinā o Eva (Ioane 8:44). E lē gata i lea, a e sa matuā fa'afitia e le ti'āpolo le fa'asalaga na folafolaina e le Atua e tataua ona o'otia ai i latou uma o ē soli i Lana tulafono. O lona ta'utinoga iā Eva, fai mai, **"Lua te lē oti lava"** (Kenese 3:4).
3. Ona tatou mautinoa lea, o le tulafono lava a le Atua, ua sili ona ita i ai o Satani ma na fia tineia ma fa'aumatiaina, a e lē tioa fo'i, auā ua lē gata ina 'avea le tulafono ma fa'avae o le malō o le Atua a ua 'avea fo'i ma fa'aaliga ofoofogia o le alofa ma le poto o le Atua, po o se ata fo'i ua manino ona iloa atu ai o foliga o Lana amio.
4. O le galuega muamua a Satani i o tatou ulua'i matua, o le ta'ita'iina lea o i la'ua ia lā solia le tulafono a le Atua. Se'i tatou matauina poloa'iga o le tulafono na solia e Atamu ma Eva i lea lava taimi na fa'atauina atu ai i la'ua iā Satani:
 - a. O le poloa'iga muamua, ina ua talitonu Eva i le 'ole'olega a le fili e fa'apea, "Ona 'avea ai lea o ouluga e pei ni atua." Sa fia atua Eva (Kenese 3:5).
 - b. O lona lima o poloa'iga, ina ua lā lē āva i lo lā Tamā fa'ale-lagi (Fa'aaogā le Luka 3:38).
 - c. O lona ono o poloa'iga, ina ua 'avea la lā agasala ma āla ua oti ai e lē na o i la'ua, a o le fanau uma fo'i a tagata (Roma 5:12).
 - d. O lona valu o poloa'iga, ina ua lā tagovale i le fua na fa'asāina e le Atua (Kenese 3:6).
 - e. O lona sefulu o poloa'iga, ina ua mana'o Eva i le mea e lē o sana mea (Kenese 3:6).
5. E ui i nei poloa'iga e lima o le tulafono ua tatou mautinoa na solia e o tatou ulua'i mātua, a e fai mai fo'i, "o lē ua agasala i se mea e tasi, ua nofo sala ia i mea uma" (Iakopo 2:10). Ona fiasia tele ai lea o le fili ina ua aliali mai i le amio a Atamu ma Eva lo lā lē āva i le tulafono a le Atua e pei lava fo'i o ia.
6. I le ua lē uma lava le ita o Satani i le tulafono pa'ia a le Atua, a e o'o mai lava i ōna pō nei o lo'o ia taumafai pea e fa'aumatiaina i so'o se ala.
 - a. O lea ua molimau mai ai Ioane i le Fa'aaliga, **"Ua ita fo'i le tarako ma ua alu atu e tau le taua ma i latou, o ē ua tausī i poloā'iga a le Atua"** (Fa'aaliga 12:17).
 - b. A o lenei fo'i o lo'o fa'afeagai pea ma le fa'amoemoe leaga o le fili le finagalo pa'ia o le Atua, ia āva ma fa'amamalu i Lana tulafono o i latou uma o ē ua 'au iā te Ia, a e lē o le 'au fouvale ma lo latou ta'ita'i o Satani. **"'Amu'ia i latou o ē faia Āna poloa'iga, ina ia taga iā i latou le la'au o le ola, ma ia latou ūlu atu i le a'ai i ōna faitoto'a"** (Fa'aaliga 22:14).

III. Pe fa'a'apefea la ona 'avea ai ma tala lelei moni se tala'iga ua ta'u fa'atauva'aina ma ta'u lē aogāina ai le tulafono pa'ia a le Atua? E mafai fa'a'apefea ona 'avea o le 'au faigaluega a Keriso ma fesoasoani iā Satani i lo latou fia titinaina o le tulafono a le Atua? Na fa'aalia mai le Ālo o le Atua, "ina ia fa'aumatia e ia galuega a le ti'āpolo" (I Ioane 3:8). Ua ala ai fo'i ona Ia a'oa'o mai ma le leai o sina fa'alētonu, **"E mavae gofie atu le lagi ma le lalolagi, a e lē i'uvale sina fasi mata'itusi e tasi o le tulafono"** (Luka 16:17).

1. Pe ai se ā na lē fa'aumatiaina ai loa le ti'āpolo ma lana 'au ao, a ua tu'u e fai pea la latou galuega mata'utia ua fa'atumuina ai le lalolagi i le puapuagā e lē ma-fa'amatalaina?
 - a. Na tonu i le filifiliga poto a le Atua ia 'aia le vave fa'aumatia le fili, a e lelei ona tu'u pea se'i malie le silasila a le lagi ma le lalolagi i le uiga o le faigā malo a Satani. Pe 'ana vave fa'aumatia le fili, po ua lē tineia uma ai fatu o le masalosalo vale ma le agaga fouvale na lūlūina e Lusifelo. Semanū fo'i a auauna atu ai nisi e to'atele i le Atua ona o le gau mata'u, a e lē o le gau alofa e pei ona finagalo i ai le Tamā.
 - b. A e ui lava i lea, e i ai le aso ua tu'upōina i le finagalo le Atua o le a fa'aumatia ai le agasala ma i latou uma o ē ua latou pipi'i pea i ai (Malaki 4:1-3). "E lē tupu fa'alua mai le puapuagā" (Nauma 1:9).
2. O ōna po lava ia o le a 'au fa'atasi ai i latou uma o ē na Ia faia i le vi'iga lenei (talū ai lo latou mautinoa lelei o Lona alofa ma Lana amiotonu): "Le ali'i e, le Atua e Ōu le malosi uma lava, ua tetele Āu galuega e ofo ai; e tonu ma fa'amaoni Ōu ala, le Tupu o le 'au paia e. Le Alii e, o ai sē lē mata'u iā te Oe, ma vivi'i atu i Lou suafa? Auā ua na o 'Oe e lelei; auā e ō mai nu'u uma lava ma latou ifo i Ōu luma; auā ua fa'aalia Āu fa'amasinoga tonu" (Fa'aaliga 15:3, 4).

IV. Pe fai 'ea se tino a Satani? O lo'o ta'atele i nei ōna po le taofi ua fa'afiti ai e leai se ti'āpolo. Fai mai e lē fai se tino o le ti'āpolo, a e peita'i o le uiga leaga o lo'o i totonu o le tagata, o Satani lava lea. O nei igoa, o Pelesepulo, Satani, Ti'āpolo, Lusifelo, fai mai ua na o ni fa'atusa ua fa'aigoaina a'i le uiga leaga, a e lē fa'asino i se tasi o lo'o fai sona tino moni.

1. Ua manino ona fa'ailoa mai e le Tusi Pa'ia, o Lusifelo o le agelu na faia e le Atua e pei ona Ia faia o le tagata ma isi agelu. Ua fa'amatalaina mai le poto o Lusifelo ma le matagofie o lona tino mai (Esekielu 28:12, 13, 15).
2. I le fa'aosoosoga na o'o iā Iesu i le vao (Mataio 4:1-11) fai mai, na "ālu ane" le ti'āpolo iā te Ia, a e mulimuli ane ina ua lē aogā o lana galuega fa'aosooso, ona "tu'u ai lea" o Ia e le ti'āpolo.
 - a. Na fa'asino e Satani i le Ali'i o ma'a sa ta'atitia mai i luga o le fogā'ele'ele.
 - b. Na ia "'ave" iā te Ia i le tumutumu o le malumalu.
 - c. Sa "toe 'ave" iā te Ia i le mauga matuā maualuga. Po ua fetau i 'ea lenei tala i mea na faia e le ti'āpolo ma lenā a'oa'oga ua ta'ua ai Satani ua na o se "uiga" e aunoa ma se tino?
3. E lē gata i lea, a ua ta'ua mai ma le fa'asalaga o lo'o fa'atalitali mo le ti'āpolo, fai mai, "Ou te 'avea 'oe ma lefulefu i le fogā'ele'ele i luma o i latou atoa o ē va'ava'ai iā te oe" (Esek. 28:18). E mafai se tino ona fa'aumatia se'ia o'o ina ua 'avea ma lefulefu i luga o le fogā'ele'ele, a e afai ua na o se "uiga" e aunoa ma se tino, o fea o le a maua mai ai nei "lefulefu?"

TAULOTO: I Ioane 3:8.

O LE FAIGA O LE TAGATA

I. O Lana fa'atatau ma le pogai.

1. E i ai le finagalo o le Atua mo lenei lalolagi, na ala ai ona Ia faia.
Isaia 45:18 O Ieova le Tufuga na Ia faia le lalolagi, na Ia lē faia fua, a e na faia ina ia ainā.
2. O lea na faia ai e le Atua le tagata i Lona lava fa'atusa, o le fa'a-palega o ia o Āna galuega uma, ina ia pulea e ia lenei lalolagi ma mea uma o i ai.
 - a. **Kene. 1:26-28** Na faia le tagata ina ia pulea e ia galuega a le Atua.
 - b. **Kenese 2:7** O le tala i le faiga o le tāne.
 - c. **Kene. 2:18-24** O le tala i le faiga o le fafine.

"Na faia le tagata ia na tau 'aveina foliga o le Atua, e lē gata i lona tino mai, a o lona uiga fo'i. Ua na o Keriso lava ua matuā tusa lava ma le Tamā (Eperu 1:3); a e na faia le tagata i le fa'atusa o le Atua ia foliga iā te Ia. O lona uiga ma lana amio sa ō gatasi lava ma le finagalo o le Atua. Sa matala lelei lona mafaufau na mafai ona ia malamalama ai i matā'upu loloto tau le Atua. Sa ato'atoa ona mamā o lona alofa; o ōna mana'o fo'i ma ōna tu'inanau sa pulea lelei e lona mafaufau. Sa pa'ia o ia ma sa fiafia e tau 'aveina pea foliga o le Atua ma usiusita'i ato'atoa i Lona finagalo." - O Pateriaka ma Perofeta, itulau e 45.

- d. **Kenese 1:28** Sa i le finagalo o le Atua ia fanafanau tagata ina ia ainā ai le lalolagi i tupulaga o tagata pa'ia e foliga iā te Ia.

II. O le tausiga o le tagata.

Sa saunia e le Atua alofa o mea uma e ao mo le tausiga ma le matuā fa'aato'atoaina o le fiafia o le tagata.

1. **Kene. 1:29, 30** Na Ia saunia o āna mea e 'ai.
2. **Kenese 2:8** Ma lona nofoāga manaia.
3. **Kenese 2:15** Sa atofaina ma lana galuega.
4. **Kenese 2:25** E ui ina sa lē lavalavā, a e lē taumate sa “pulupulu i le malamalama” e pei o Lē na Ia faia o ia (Sala. 104:2).

III. O manatu 'ese i le amataga o le tagata.

1. O lo'o i ai se tasi a'oa'oga e uiga i le faiga o le tagata o lo'o fa'a-lauteleina i nei ōna pō, a e peita'i ua matuā lē fetau lava ma le molimau a le Tusi Pa'ia.
2. O le fa'amatalaga a lenā a'oa'oga e uiga i le tupu'aga o le tagata, fai mai, sa gasolosolo malie lava ona tupu mai o le tagata mai nisi itū'aiga o mea ola maulalo ma le fa'atauva'a. Ua lē matuā mautinoa lelei e lenei 'au fa'a-fiapopoto itū'aiga tonu o mea ola ua tupu mai ai le tagata, a e fai mai e lē taumate ai la o se itū'aiga o mea ola ua lē o toe iloa i nei aso. O lenei a'oa'oga ua matuā iloga ona fa'afitia ai le molimau a le Kenese i le faiga o le tagata i le amataga ia foliga i le Atua, ma sa ato'atoa ai ona lelei ma lē agasala.

IV. Ua manino ona fa'aailoa mai e le Tusi Pa'ia.

1. Ua lē gasolosolo malie ona si'itia a'e i luga o le tulaga o le tagata a e mai le amataga lava ona maua o lona tulaga mamalu e maulalo ane teisi i agelu (**Salamo 8:5**).
2. Ua le'i tuputupu mālie ona iloa e tagata o ni tapula'a maualuga o le amiotonu, auā "Na faia e le Atua ē amiotonu" (**Failauga 7:29**).
3. Sa lē 'avea muamua le tagata o se 'afa manukī, 'afa tagata e mau i āna o le ele'ele, a e fa'ato'ā iloa mulimuli ona nofo lelei; auā sa mau ma le Atua i le fa'ato'aga a le Atua (**Kenese 2:8, 9**).
4. E lē amataina le faitauina o le gafa o le tagata i se itū'aiga o mea ola maulalo ma le fa'atauva'a, a e amata iā Atamu, le atali'i o le Atua (**Luka 3:38**).

V. O tupulaga muamua o tagata sa lē o ni tagata fe'ai ma le valelea e pei o lenā taofi, a e peita'i sa sili atu i lo tagata i nei ōna pō ona lelei ma malolosi o o latou tino ma mafaufau.

- | | |
|-----------------------|--|
| 1. Kenese 2:9 | Sa avanoa i o tatou ulua'i matua le la'au o le ola. |
| 2. Kenese m. 5 | Sa maua e tupulaga muamua o tagata le olaga fa'afualoa ua lē ma-tāea e tupulaga i nei ōna pō. |
| 3. Kenese m. 4 | Sa iloa e i latou anamua ona faia o a'ai (F. 17); tausi i lafu manu ma fai fale 'ie (F. 20); sa popoto i le gaosiga ma le tāina o la'au pese uiga ese'ese (F. 21); sa i ai o latou tufuga o ē sa popoto e fai mea uma lava ua faia i 'apa memea ma u'amea (F. 22). |

"E ui i le mano o mea o i ai le mānava ola, a ua 'avea le tagata ma fa'apalega o galuega uma o le foafoāga, i le sa finagalo le Atua ia sili i lo ia mea uma ona fa'ailoa atu e le tagata o le finagalo alofa ma le mamalu silisili 'ese o Lē na Ia faia i latou." - O Fe'au o le Fa'amalōlōga, itulau e 415.

TAULOTO: Salamo 139:14.

O LE PA'Ū O LE TAGATA

I. O le sa'olotoga ma le fa'ato'ilaloina.

1. Na o'o loa ina ua fa'ate'a'eseina Satani mai le lagi, ona ia fa'asaga atu lea e sa'ili se avanoa ina ia mafai ona fa'atumauiina ai o lana pule ma fa'avaeina ai sona malō.

Kene. 2:16, 17 Sa puipuiina le tagata e le Atua mai iā Satani i Lona fa'atagaina na o se ala e tasi sa mafai ona fa'alatalata atu ai le fili iā te ia. O le la'au lea na fa'asāina, ua na o lea sa mafai ona iloa ai e le tagata le mea e ta'ua o le leaga.

Kene. 3:1-6 O le tala fa'anoanoa i le fa'ato'ilaloina o ō tatou ulua'i mātua.

Ioane 16:11 Na 'avea loa Satani ma ali'i o lenei lalolagi.

2. E le'i faia le tagata e le Atua ia fa'asaga tonu pea ona manatu i Lē na faia o ia ma le lē mafai lava ona toe uia e ia o se isi ala e 'ese mai ai. Sa tu'uina atu e le Atua iā te ia le sa'olotoga e filifili ai i nei manatu e lua, o le auauna atu pea i le Atua i le fa'amaoni, po o le loto atu i se isi matai.
3. E lē fiafia le Atua i lo tatou auauna atu iā te Ia ona ua leai se isi mea ua tatou mafaia, a e peita'i e malie Lona finagalo pe a tatou lagona ma mautinoa Lona alofa ma Lana amiotonu, ona tatou matuā filifili lea e pipi'i atu iā te Ia ma le fa'amaoni (Teute. 30:19).

II. Ua fa'amae'ae'a ona fa'aioa mai e le Tusi Pa'ia o le tala i le pa'ū o le tagata ina ia malamalama lelei ai iā te i tatou le āla na ōfi mai ai le agasala i le lalolagi.

1. **Kenese 2:16, 17** Na lua'i lapata'iina le tagata e le Atua ona o le agasala ma Na fa'amalamalama lelei iā te ia le ala e saogalemū ai. Na 'avea le la'au na fa'asāina ma ala e tofotofoina ai le uiga o le fa'amaoni o le tagata i lona auauna atu i le Atua.
2. **Kenese 3:1** Na fa'aaogāina e Satani le gata e ala atu ai lana fa'aosoosoga.
3. **Kene. 3:2, 3** Talu ai ona ua amataina e Eva se talanoāga ma Satani na tu'uina atu ai o ia e ia lava i le pule ma le malosi o le fili.
4. **Kene. 3:4, 5** Na fa'auiga'eseina e Satani le pogai na ala ai le poloā'iga a le Atua.
5. **Kenese 3:6** O le i'uga mata'utia na maua mai, ua pa'ū le tagata ma ua avanoa faitoto'a o le malaia mo lenei lalolagi.
6. **I Timo. 2:14** Na 'olegiaina Eva e le fili a e peita'i Atamu na ia agasala ma le mautinoa.
7. **Roma 5:17-19** Ua agasala uma iā Atamu.

"Na matuā tu'uina atu lava i le tagata i le amataga o uiga tāua ma le mafaufau sa'o. Sa malosi ato'atoa lona tino, ma sa ō gatasi ona mana'o ma le finagalo o le Atua. Sa mamā ōna mafaufauga, ma sa pa'ia mea sa fa'atatau i ai ōna manatu. Peita'i ona o le lē usita'i, ua fa'aleagaina ai ōna uiga tāua, ma ua liua ai le alofa i le manatu fa'apito o le tagata iā te ia lava. Talu ai le agasala, ua matuā vaivai ai lava le tagata i le vaivai ua lē mafai ai e ia i lona lava malosi ona tete'e atu i le malosi o lē o lo'o leaga. Ua fa'a-tagata-o-tauaina ia e Satani, i le semanū lava e tumau ai pea o ia i lea pologa e o'o i le fa'avavau pe 'ana le matuā tula'i mai le Atua." - O La'asaga iā Keriso, itulau e 16.

Manatu fa'aopoopo: O le to'ilalo o le tagata.

1. E tolu āla na uia e le ti'āpolo i lona fia galuea'iina le malaia o le tagata.
 - a. **O le tu'inaanau o le tino.** Talu ai le galuega fa'aosooso a le fili, na lagona tele ai e Eva lona fia 'ai i le fua na fa'asāina (**Kenese 3:6**).
 - b. **O le tu'inaanau o mata.** Na fa'ailoa atu e le fili iā Eva o foliga aupito matagofie ma le mana'omia o le fua ua sā (**Kenese 3:6**).
 - c. **O le fa'alialia o lenei olaga.** Ua fa'afefeteina le loto o Eva i le manatu lenei, o le a 'avea o ia ma lona to'alua e pei o ni atua o lo'o iloa le lelei ma le leaga (**Kenese 3:4, 6**).
2. Fa'amalamalamaga o āla i le to'ilalo.
 - a. Silasila i le I Ioane 2:15,17, ua fa'amalamalamaina mai ai nei āla e tolu o lo'o masani ona āla mai ai le ti'āpolo e o'o mai lava i aso nei. O le leaga uma ua ōfi mai i le lalolagi, o faitoto'a lava ia e tolu ua āla mai ai.
 - b. E pei o na 'avea nei uiga e tolu ma āla mai o le malaia, ua fa'apea fo'i le galuega toe fuata'i a le Atua o na fa'atatau tonu i nei lava uiga fa'ale-tino e tolu.
 - c. Pe a tatou mafaufau ma su'esu'e i le fa'aosoosoga na o'o iā Keriso i le vao (Mataio 4:1-11), o āla lava ia e tolu na taumafai ai e Satani ona fa'aliliu 'eseina o Iesu mai le fa'ataunu'uina o le galuega na 'auina mai ai o Ia e Lona Tamā.
3. Na manumalō Iesu i nei fa'aosoosoga uma (Ioane 16:30; 14:30). Pe 'afai tatou te taliaina Iesu i totonu o ō tatou loto, o le a 'avea Lona manumalō ma o tatou manumalō. E tumau pea i tatou i le tulaga o le vaivai ma le to'ilalo pe a tosina ma maileia i o tatou lava tu'inaanau (Iakopo 1:12-15).

TAULOTO: I Ioane 2:16.

O FUA O'ONA O LE AGASALA A LE TAGATA

I. Fa'asologa o tulaga ua o'o i ai le tagata mai le Feagaiga Tuai.

Mai lava i le amataga ina ua pa'ū le tagata na ia tofo i le o'ona o le fua o lona lē usita'i. Sa fa'atagaina e le Atua le tagata e fa'aaogāina lona mafaufau ma ia faia e ia lana lava filifiliga. Peita'i ua filifili e le tagata le ala o le agasala, ua i'u ai i se olaga puapuagātia ma le faigatā.

1. **Kenese 3:7** O le fua muamua o le agasala a le tagata, ua mavae le mamā o ōna mafaufauga. Mai i le fa'ato'ā pa'ū se'ia o'o mai i aso nei, o le tasi lenei malaia o le fanau a tagata, o mafaufauga lē mamā.
2. **Kenese 3:8** Ua fefe le tagata i le Atua. Ua ta'ita'ina e Satani manatu o tagata ina ia latou fa'apea ifo, o le Atua o se Fa'amasino faigatā, o se Ali'i sauā, ma Sē e lē mafai o na fa'amagalo atu. O le mea lea na afio mai ai Iesu e mau fa'atasi ma tagata ina ia fa'ailoa mai e Ia le uiga moni o le Tamā (Ioane 12:45, 46; 14:8, 9).
3. **Kene. 3:9-13** Talu ai le agasala ua fia lelei ai le tagata i lona tu'uina atu o le leaga i nisi.
4. **Kenese 3:7** Ua taumafai ai fo'i e le tagata i āna lava galuega ona ufiufi a'i lana amiolētonu. Ua 'avea le titi laumati ma fa'atusa o galuega fa'ale-tagata e fia ta'u amiotonuina ai. O le matuā fa'asesē o le tagata iā te ia lava pe a manatu o ia na te mafai ona nātia se mea mai le silafaga a le Atua (Eperu 4:13).
5. **Kenese 3:8** Ua lē toe mafai e le tagata ona fa'afesaga'i ma le Atua. (Fa'aaogā ma le Isaia 59:2).
6. **Kenese 3:19** Ua lē iloa ai iā te ia le ola e fa'avavau. Ua o'o mai le oti i tagata uma lava (Roma 5:12). Ua 'avea le fanau a tagata ma ē o lo'o latou sa'ilia le ola e fa'avavau; auā ua lē o iā te i latou (Roma 2:7).
7. **Kene. 3:22-24** Ua lē iloa ai ma lona nofoāga matagofie i le fa'ato'āga i Etena.
8. **Kene. 3:17-19** Ua malaia ai le lau ele'ele ma ua 'avea ai le olaga o le tagata o se olaga puapuagātia i galuega mamafa.
9. **Kenese 1:26** Ua lē iloa ai le pule sa iā te ia (Eperu 2:7, 8). Ua 'avea ai le tagata ma pologa i le agasala (II Peteru 2:19).
10. **Ierem. 27:9** Ua maua ai e le tagata le loto fa'a'ole'ole. Ua ia lē mafai i lona lava malosi ona liua o lona loto ia lelei (Iere. 2:22; 13:23).
11. **Salamo 51:5** Ua 'avea le olaga o le tagata o se tauiviga faigatā mai lona uiga agasala ua fanau mai ma ia (Sala. 58:3; Fa'ata'oto 5:22; Roma 7:18,19, 24).
12. **Iere. 13:23** Ua lē mafai e ia i lona lava malosi ona lavea'ia iā te ia mai le pule ma le malosi o le agasala (Roma 7:18,19, 24; Ierem. 2:22).
13. **Isaia 1:4-6** Ua fa'apea le galuega mata'utia a le agasala i totonu o le tagata.

II. Manatu tāua mai le agaga o valo'aga.

"O se mea 'inosia tele le agasala. Ua fa'aleagaina ai le uiga matagofie o se vaega e to'atele o le 'au agelu. Ua ofi mai fo'i i lenei lalolagi ma ua toetoe lava ina a matuā solo 'eseina ai foliga o le uiga fa'ale-Atua sa i le tagata." - O Molimau mo le Ekalesia, Tusi e IX, itulau e 21.

TAULOTO: Ieremia 17:9.

O LE FOLAFOLĀGA I LE FA'AOLA

- I.** O le fa'asalaga mo le agasala a le tagata, o le oti lava lea. A e peita'i sa lē mafai e le Atua alofa ona tu'u lafoa'iina le tagata i le malaia e aunoa ma le tu'uina atu iā te ia o se avanoa e salamō ai i lona leaga. Ua fa'ailoa mai le alofa tele o le Atua i Lona tu'uina atu o le tau aupito sili ona tele e togiolaina a'i le tagata.
1. **I Ioane 4:8** O le Atua, o le alofa lava Ia.
 2. **Ioane 3:16** O le fua o le alofa tele o le Atua.
 3. **I Ioane 4:9** O le ala ua fa'aalia ai le alofa o le Atua.
- II.** E le'i fa'a-fuase'ia le Atua i le agasala ina ua ofi mai i le lalolagi, a e sa silafia mamao atu lava e Ia ma Na faia se fa'atatau mo le feagai ai ma lea fa'alavelave.
1. **Roma 16:25** "O le mea lilo," o le sauniga lea o le tala lelei iā Iesu Keriso. E lē o se mea na fa'ato'ā mafaufauina mulimuli e le Atua ina ua tupu le fa'alavelave, a e sa nātia i Lona finagalo mai le vavau. (Faitau ma le Efeso 1:9). O le "upu lilo," o Keriso lea, le fa'amoemoe i le manuia (Kolose 1:27). A o le "upu lilo i lā le amio Atua," o le fa'aalia mai lea o le Atua i le tino tagata (I Timo. 3:16).
 2. **Fa'aal. 13:8** O Keriso o le Tama'i Mamoe na fasia talu ona fa'avaeina o le lalolagi.
 3. **Efeso 1:4** Sa filifilia mamao mai lava e le Atua le 'au fa'atuatua iā Keriso, "a o le'i fa'avaeina le lalolagi."
- III.** O le ulua'i folafolāga i le Fa'aola o le a afio mai, na faia lea i le fa'ato'āga i Etena ina ua fa'ato'ā pa'ū le tagata.
- Kenese 3:15** "Ou te (Atua) fa'atupuina le fei'taga'i iā te 'oulua (Satani) ma le fafine (fanau a tagata); o lau fanau (o ē mulimuli iā Satani) fo'i ma lana fanau (o lē mulimuli iā Keriso), Na te (Lē o le a fanau mai i le fafine – o Keriso) tu'imomomoina lou (Satani) ūlu; a o 'oe (Satani) e te tu'imomomoina Lona (Keriso) mulivae."
- IV.** Mai iā Atamu se'ia o'o i le fanau mai o le Fa'aola, sa fa'afouina ma fa'alauteleina ai pea le folafolāga i le Fa'aola, Lē o le a afio mai.
1. **Ioane 5:46** Na tusia Iesu e Mose.
 2. **Luka 1:68-70** Na tusia Iesu e le 'au Perofeta.
 3. **Luka 24:27, 44** Ua tumu le Feagaiga Tuai i fa'aaliga iā Keriso.
- V.** Ua lē mafai i se su'esu'ega pu'upu'u fa'apenei ona mae'a lelei ai se fa'amatalaga i le mau folafolāga o i ai i le Feagaiga Tuai e fa'asino tonu i le Ali'i Fa'aola. Ua lē na o ni nai fuaiupu i lea mea ma lea mea, a e peita'i ua 'avea le Tusi Pa'ia atoa ma āla tāua ua fa'aalia mai ai le Keriso ma Lona lelei.
1. Ua 'avea tagata ta'ito'atasi ma āta po o fa'atusa o Keriso, e i ai Atamu (Roma 5:14). "O Atamu o le matai o le aiga ua ala mai ai le agasala ma le oti. O Iesu, o le Atamu mulimuli, o

lē tasi lea matai, e āla mai ai le amiotonu ma le ola.” - O le tusi ua Fa’amatalaina ai le Tusi Pa’ia, Misi Parate (L.M.S.), itulau e 549.

2. Ua ‘avea nisi sauniga ma āta o Keriso, e i ai le paseka (Liliu i le I Kori. 5:7).
3. Ua ‘avea mea sa tutupu ma āta o Keriso, e i ai le vai na tafe mai le papa (I Kori. 10:4).
4. Ua i ai valo’aga i le Keriso e pei o le Isaia, matā’upu e 53.

TAULOTO: Kenese 3:15.

O LE ĀLA O LE FA'AOLATAGA - I

I. O le ofi mai o le agasala na fa'atupuina ai se fa'alavelave mata'utia, ina ua feagai 1oa le tagata ma le fa'asalaga o le tulafono ua solia, o le oti lava lea (Roma 6:23). Sa na o le tolu o āla sa fa'amata o le a mafai ona togafitia ai o lenei fa'alavelave:

- (1). Ia tineia le fa'asalaga.
- (2). Ia tatalaina le tulafono.
- (3). Ia maua mai se sui.

1. Sa matuā lē mafaia lava e le tagata se tasi o nei mea. Sa leai sona malosi e tete'e atu ai i le fa'asalaga, pe fa'asaga atu e fa'amalepeina le tulafono ua ta'usalaina ai o ia. Sa tapunia fo'i ma lona tolu o āla, ina ua fa'atau tutusa ona i ai o tagata uma i le tulaga o le malaia (Roma 3:23), ua āla ai ona lē maua o se sui mai totonu o le fanau a tagata (Sala. 49:7, 8).
2. Sa lē mafai e le Atua amiotonu ona tineia o le fa'asalaga ua tatau mo le agasala. Sa lē mafaia fo'i e le Atua ona tatalaina o le tulafono ua 'avea ma fa'avae tumau o Lona malō, ma o lo'o fa'aalia mai ai fo'i foliga o Lona uiga ma Lana amio.
3. Ona tatou mautinoa lea, e tasi pē le āla sa mafai ona uia e le Atua alofa ina ia fa'ataunu'uina ai le fa'aolataga mo le fanau agasala, o Lona su'eina mai lea o se sui e tū i le tulaga o le tagata ma na tau 'aveina le mamafa ato'atoa o le fa'asalaga.
4. Sa lē mafai i le soifua o se tasi o le 'au agelu pa'ia ona lava ai se togiola mo le tagata. Ua na o Iesu, Lē na Ia faia le tagata ma ua sili o Ia i lō le tulafono, Na te mafai ona galuea'iina lo tatou olataga. Ua na o Ia, Lē sa i le fatafata o le Tamā, Na te mafai ona fa'amanoinoina mai o le maua luga ma le loloto o le alofa fa'ale-Atua.
 - a. **Efeso 2:8** O le alofa tunoa (alofa fua) o le Atua ua togiolaina ai i tatou.
 - b. **Ioane 3:16** Ua fa'aalia le alofa tunoa o le Atua i Lona foa'iina mai o Lona Ālo pele e to'atasi, ina ia lavea'iina ai le tagata mai le malaia.
 - c. **Kalatia 1:4** Na o'fō Iesu. "O Lē na foa'iina mai o Ia e Ia." (Faitau ma le Tito 2:14; Ioane 10:15,17,18).
 - d. **I Pete. 3:18** Ua maliliu Lē na amiotonu o le sui o lē amiolētonu.
 - e. **Isaia 53:4-6** O Lē ua 'avea ma o tatou Sui, ua Ia tau'aveina a tatou agasala, atoa ma le fa'asalaga sa tatau ona i ai i o tatou luga.
 - f. **Gal. 4:12** Ua 'avea Iesu ma āla tāua ua maua ai lo tatou feso'ota'iga ma le Atua. Ua na o Ia le fa'amoemoe e tasi mo le tagata agasala (Kenese 28:12; Ioane 1:51; 14:6; Eperu 4:15,16).

"Talu ai le olataga ua Ia galuea'iina mo i tatou, ua 'avea ai Keriso ma āla ua toe soso'o a'i le avanoa na tupu talu le agasala, ma ua mafai ai e le 'au agelu fe'avea'i fe'au ona toe feso'ota'i ma tagata. O le tagata ua pa'ū, ua vaivai tele, ma ua na lē toe mafaia se mea e tasi, a ua toe fa'afeso'ota'iina nei i tatou e le Keriso ma le Pogai o le malosi uma lava." - O La'asaga iā Keriso, itulau e 21.

II. Ina ia 'avea o Ia ma o tatou Sui, sa ao ai ona tu'ua e Iesu o le lagi ma liua o Ia ia 'avea ma tagata, auā ua na o Lona tino tagata sa mafai ai ona Ia maliliu mo le tagata agasala.

1. **Epe. 2:14-17** Sa 'avea o Ia fa'apei o Ōna uso i mea uma.
2. **Filipi 2:5-8** O se fa'amaulaloga o'fōo'fōgia.
3. **Ioane 1:14** Sa mau fa'atasi ma tagata.

- | | |
|------------------------|--|
| 4. Roma 8:3 | Ua tino tagata agasala. |
| 5. II Kori. 8:9 | O le tele ma le faigatā o lea la'asaga. |
| 6. I Timo. 3:16 | Ua ta'ua le liu tino tagata o Iesu "o le mea lilo i lā le amio Atua." E loloto, e maua luga, tatou te lē mafuatia. |

"Sa uiga fa'atasi o Ia ma i tatou i mea uma lava. O Lē sa tasi ma le Atua, a ua soso'o nei o Ia ma le fanau a tagata i noataga e lē mafai ona toe motusia. E lē ma Iesu e ta'ua i latou o ōna uso (Eperu 2:11). O Ia o la tatou Taulaga, o lo tatou Puluva, ma lo tatou Uso. O lo'o Ia tau'aveina foliga o i tatou tagata i luma o le nofoāli'i o le Tamā, i le o le a lē toe tete'a 'ese lava o Ia ma le fanau a tagata o ē ua Ia lavea'iina. E o'o lava i le fa'avavau, o Ia lava o le Atali'i o le Tagata." - O La'asaga iā Keriso, itulau e 14.

III. Sa ao iā Iesu ona i ai i le tino tagata, a e ia aunoa ma se agasala, ina ia 'avatu e Ia se taulaga e ato'atoa ona mamā i le Atua.

- | | |
|------------------------|---|
| 1. Teute. 15:21 | Ia aunoa le taulaga mo le agasala ma se ponā. |
| 2. I Pete. 1:19 | O Iesu o le Tama'i Mamoe e leai se ponā. |
| 3. Eperu 9:14 | O le taulaga e lē ponā. |
| 4. I Pete. 2:22 | E leai se agasala iā Keriso. |
| 5. Eperu 4:15 | Sa fa'aosoosoina i mea uma, a ua leai se agasala. |

IV. Na totogiina e Iesu le sala a tagata uma i luga o le satauro.

- | | |
|--------------------------|--|
| 1. Eperu 2:9 | Na o'o iā te Ia le oti ona o tagata uma. |
| 2. I Timo. 2:5, 6 | O le togiola mo tagata uma lava. |
| 3. I Ioane 2:2 | Mo le lalolagi uma. |
| 4. Roma 5:7 | Mo ē fa'alē-matata'u fo'i. |
| 5. Roma 5:10 | Ua tatou lelei ma le Atua i le maliu o Lona Ālo. |

V. O le toe fa'atūina mai o Keriso nai ē ua oti, o le fa'a'ato'atoaina lea o le galuega o le fa'aolataga, ina ua 'avea nei o Ia ma o tatou Ali'i ma Fa'aola. O i latou uma fo'i o ē latou te talia o Ia ma fa'atuatua i Lona suafa, Na te avatu i ai le ola e fa'avavau.

- | | |
|---------------------------|--|
| 1. Galue. 5:30, 31 | Ua 'aveina a'e e le Atua i Lona a'ao taumatau ina ia 'avea o Ia o le Ali'i, i le ma le Fa'aola, Lē na te 'avatu le salamō ma le fa'amagaloina o agasala iā i latou uma o ē fa'atuatua iā te Ia. |
| 2. Eperu 7:25 | Ua mafai ai nei ona tatou fa'alatalata atu i le Atua ona o Ia, Lē fautua mo i tatou. |
| 3. Roma 4:25 | Na toe fa'atūina mai o Ia ina ia ta'uamiotonuina ai i tatou. O le maliu o Keriso i luga o le satauro na maua ai le leleiga i lo tatou vā ma le Tamā (Roma 5:10; Efeso 2:16), a e peita'i sa lē mafai ona ta'uamiotonuina ai i tatou. O lea sa tatau ai ona toe fa'atūina mai o Keriso ina ia 'avea le mana o Lona soifuāga amiotonu ma ala e galuea'iina ai le ola fou fa'ale-agaga i totonu iā te i tatou. O le amiotonu lea "o lo'o i le fa'atuatua iā Keriso" (Filipi 3:9; Kolo. 1:28, 29). |
| 4. Roma 5:10 | Ua tatou lelei ma le Atua i le maliu o Iesu, a ua fa'aolaina i tatou i Lona soifua. (Fa'aaoga ma le I Kori. 15:13-18). |

"Sa fa'apea fo'i ona fetalai ane o Iesu i Ōna so'o: 'Auā e lē o 'outou e tautala atu ai, a e o le Agaga o lo 'outou Tamā e tautala mai ai i totonu iā te 'outou' (Mataio 10:20). O lea, ina ua galue

Iesu i totonu iā te 'oe, o le a fa'aalia ai lea lava agaga e tasi iā te 'oe, ma o le uiga fo'i lea o galuega o le a e faia, o galuega o le amiotonu ma le usiusita'i." - **O La'asaga iā Keriso**, itulau e 68.

"O le foa'iina mai o le Agaga Pa'ia i totonu iā te i tatou, o le foa'iina mai fo'i lea iā te i tatou o le soifua amiotonu o Keriso. O lē ua iā te ia le Agaga, o le a fa'alautele ina i totonu iā te ia le uiga ma le amio matagofie a Keriso.

"Sa o'o iā Keriso le mea ua tatau iā i tatou, ina ia o'o mai ai fo'i iā i tatou le mea ua tatau iā te Ia. Na fa'asalaina o Ia mo agasala a i tatou na lē agasala ai o Ia, ina ia ta'uamiotonuina ai fo'i i tatou i Lana amiotonu tatou te le'i amiotonu ai. Sa o'o iā te Ia le oti na iā i tatou, ina ia o'o mai ai fo'i iā i tatou le ola sa iā te Ia. 'O Ōna fa'alavalava fo'i ua malōlō ai i tatou.'" - **O le Fa'anaunauga o Tupulaga**, itulau e 805, 825.

TAULOTO: Ioane 3:16.

O LE ĀLA O LE FA'AOLATAGA - II

I. E ui lava ina ua saunia e Iesu le fa'aolataga mo tagata uma lava ta'ito'atasi, a e lē aogā i se tasi vaganā ona ua ia talia. E lē fa'amalosi mai le finagalo o le Atua i se tasi.

1. **Teute. 30:19** Ia filifili i le ola.
2. **Mata. 23:37** "A e lē mafafai outou" (Isaia 30:15).
3. **Ioane 6:37** E lē te'ena se tasi e alu atu iā te Ia ma le loto fa'anaunau moni.
4. **Fa'ata. 23:26** Ia tu'uina atu o tatou loto iā Iesu (Fa'aal. 3:20).
5. **Epe. 2:1-3** Pe sao fa'aapefa pe a fa'atamala i le olataga e matuā tele?
6. **Epe. 10:26** Pe a iloa le fa'aolataga a le Atua, a e agasala pea ma le loto i ai, ua lē toe lava se taulaga.

II. O le āla e talia ai le fa'aolataga, o le fa'atuatua lea.

1. **Efeso 2:3** O le alofa tunoa ua fa'aolaina ai i tatou i le fa'atuatua.
2. **Ioane 3:16** Se tasi e fa'atuatua iā te Ia.
3. **Galu. 10:43** Fa'atuatua e ola ai 'oe ma lou aiga.
4. **Ioane 3:36** E lē maua le ola pe a lē fa'atuatua.

"O le tasi lenei mea e i'u vale ai le afe ma afe o tagata, ona ua lē talitonu i latou e fa'amagaloina i latou ta'ito'atasi e Iesu. ... Ia tu'u 'ese lea masalosalo e fa'aapea, e lē fa'asino folafolāga a le Atua iā te 'oe lava. O folafolāga e mo tagata agasala uma lava ua salamō." - O La'asaga iā Keriso, itulau e 59.

III. O le fa'atuatua iā Iesu Keriso e sili atu lona uiga tāua i lē na ona talitonu i Lana a'oa'oga. E mafai ona talitonu o le mafaufau e aunoa ma le matuā o'otia ai o le loto. O lona uiga moni o le fa'atuatua, o le matuā talia lea o Keriso i totonu o ō tatou loto ina ia 'avea o Ia ma o tatou lava Fa'aola.

1. **Iakopo 2:19** E talitonu temoni, a e lē o le talitonu lea e ola ai (Mareko 1:23, 24).
2. **Galu. 2:37** Ia lē na o le mafaufau, a o le loto fo'i.
3. **Eperu 10:22** Ia fa'alatalata iā te Ia ma le loto fa'amaoni.
4. **Ioane 1:12** Ia matuā talia o Ia ma le loto fa'atuatua.
5. **Mata. 11:28** O le vala'au alofa a Iesu: "**Ō mai iā te a'u.**"

IV. Pe afai ua tatou ō atu iā Iesu, e ao lava ona tatou salamō mai a tatou agasala ma ia fa'aali iā te Ia. E fa'aapea ona tatou ta'utino atu i Ōna luma, o i tatou o tagata agasala o ē ua mana'omia Lana fa'aolataga.

1. **Galu. 2:38** Ia salamō fa'amaoni.
2. **Roma 2:4** O le mautinoa o le agalelei o le Atua ma lo tatou lē tusa ai, e ta'ita'iina ai i tatou i le salamō (Iopu 42:5, 6).
3. **Galu. 5:31** E foa'iina mai e Iesu le agaga o le salamō fa'amaoni. E pei ona lē mafai ona fa'amagaloina o se tasi e aunoa ma Keriso, e "fa'aapea fo'i ona lē mafai ona maua o le salamō moni e aunoa ma le Agaga o Keriso e fa'ate'ia ai le loto fuatia ifo."

4. **Sala. 38:18** O le la'asaga e soso'o ma le salamō, o le fa'aali atu lea o a tatou agasala (Sala. 32:5; I Ioa. 1:9; Luka 18:13).
5. **Levi. 5:5** "Aua le ta'amilo solo, a ia fa'aali tonu a tatou soligā tulafono."
6. **Gal. 26:9-11** Sa fa'apea ona faia e Paulo.
7. **Tani. 9:5-6** Sa fa'apea fo'i ma Tanielu.
8. **I Samu. 12:19** Ma Isaraelu anamua.
9. **Iakopo 5:16** Ia fa'aali fo'i i tagata o ē ua tatou agasala i ai.

"O le fa'alogoina o lo tatou vaivai, ma le mautinoa lelei o lo tatou mativa fa'aleagaga, ma lo tatou uiga agasala, o le tulaga muamua lava lea e fa'ato'ā tataui ai ona taliaina o i tatou e le Atua." – O A'oa'oga Fa'a-fa'ata'oto a Keriso, itulau e 152. (Ia fa'atusatusaina faigā taulaga a Kaino ma Apelu, fa'apea fo'i ma talosaga a le faresaio ma le telona (Luka 18:9-14)).

"E to'atele latou te lē o malamalama i le uiga o le salamō moni. E moni nisi e to'atele ona o a latou amio sesē, se'ia o'o fo'i ina latou fa'aaliali atu nisi uiga o le fa'afouina i le va'aiga i fafo, ona o lo latou fefefe ina ne'i o'otia i latou i ni fa'alavelave talu ai a latou agasala. A e lē o le salamō moni lenei e pei o le salamō o lo'o a'oa'oina mai e le Tusi Pa'ia. E sili ona fetāgisi i latou ona o le fa'alavelave ua o'otia ai i latou, a e lē ona o le agasala ua latou faia." – O La'asaga iā Keriso, itulau e 24.

- V. Ia manatunatu i le salamō o Esau (Epe. 12:16, 17); Pala'amo (Nume. 22:31-34); Iuta le Sekara (Mata. 27:4, 5). O le tigā o ē lē fa'atuatua, e na ona matuā sui le amio, ia lafoa'i 'ese mea uma e leaga i le silafaga a le Atua.

1. **Fa'ata. 28:13** Ia lē gata ina na ona fa'aali, a ia lafoa'i fo'i a tatou agasala.
2. **Ioane 8:11** 'Aua e te toe agasala (Ioane 5:14).
3. **Isaia 1:16, 17** Soia le fai mea leaga, fa'amasani i le amio lelei (II Timo. 2:19).
4. **Mata. 5:23, 24** Pe a mafai, ia toe avatu mea a le uso lē ua e agaleaga i ai. Pe afai o ni upu ua e agasala ai, ia toe fa'afo'i mai āu upu (Luka 10:8; Esek. 33:15; Nume. 5:6-8).
5. **II Kori. 7:11** O le salamō e lē aliali mai ai se uiga fou i le amio a le tagata, e lē o se salamō moni lea (Mata. 3:8; 7:16-20).

TAULOTO: I Ioane 1:9.

O LE ĀLA O LE FA'AOLATAGA - III

I. Pe a uma ona fa'aalia ma lafoa'iina a tatou agasala, ona fa'amagalalo mai lea o le Atua iā te i tatou.

1. **I Ioane 1:9** O le fa'amagaloga ua folafolaina mai.
2. **Isaia 1:18** E matuā fa'amamāina (Esek. 36:26; Iere. 33:8; I Ioane 1:7).
3. **Sala. 103:12** E fa'amamao iā te i tatou a tatou agasala e pei o le vā o sasa'e ma sisifo.
4. **Mika 7:18, 19** E lē toe manatua e le Atua. E lafoina i mea loloto o le sami (Iere. 31:34).
5. **Mare. 11:24** O lo tatou talitonu o le a talia ai o tatou mana'o.
6. **Iako. 1:6, 7** Ia fa'atuatua, a e 'aia le masalosalo.

"Ua uma nei ona e fa'aali atu o āu agasala ma le matuā mana'o o lou loto ina ia tu'u 'eseina. Ua tonu i lou loto, o le a e tu'uina atu 'oe i le Atua, lenei, ina e alu atu ia nei iā te Ia, ma ē ole atu iā te Ia ia Na fufulu 'eseina au agasala, ma Na foa'iina mai se loto fou mo 'oe. Ma ia e matuā talitonu loa, faia lava lea mea mo 'oe, auā o le mea ua Ia folafolaina mai. O le a'oa'oga lava lenei mai le Atua, ia tatou talitonu i ai o le a tatou maua lava, ona 'avea ai lea mo i tatou." – O La'asaga iā Keriso, itulau e 56.

O le fa'atuatua ola e lē o le fa'a-fia amiotonu, pe o le o'otia gofie o le loto a e toe vave mavae; a e peita'i o le matuā talitonu lava e aunoa ma se masalosalo i le mea ua folafolaina mai, e ui lava ina e lē o va'aia e mata pe logo i tino.

II. Ona foa'iina mai ai lea e le Atua iā te i tatou le amiotonu a Keriso e 'avea ma a tatou amiotonu.

1. **II Kori. 5:21** E 'avea i tatou ma amiotonu a le Atua iā te Ia.
2. **Gal. 13:39** E ta'u amiotonuina iā te Ia i mea uma lava.
3. **Roma 3:24, 25** O le amiotonu a Keriso e ufitia ai agasala ua mavae.
4. **Roma 3:26** E foa'iina mai fo'i i aso ta'itasi i ē fa'atuatua pea iā te Ia.
5. **Isaia 61:10** Ua pei o se 'ofu matagofie (Fa'aal. 3:18; 19:8).
6. **Roma 4:8** 'Amu'ia le tagata ua lē ta'usalaina e le Atua.

Ua ōfo Keriso Na te tau 'aveina a tatou solitulafono, a e 'aumai mo i tatou Lana amiotonu. Afai o le a e tu'uina atu 'oe iā te Ia, ma talia o Ia e 'avea ma ōu Fa'aola, e ui lava ina agasala tele lou olaga, a o le a faitauina 'oe o sē ua amiotonu talu ai o Ia. O le a tū mai le amio matagofie a Keriso e sui a'i lau amio, ona talia ai lea o 'oe i luma o le Atua e pei lava e te le'i agasala.

Talu ai ina ua tu'usaunoaina i tatou mai a tatou agasala, ua tatau ai ona tatou fiasia e fai le finagalo o lō tatou Matai ma savavali i Ōna āla.

7. **Kolose 2:6** Ia savavali e pei ona tatau ai mo ē o iā te Ia.
8. **I Ioane 2:6** Ia savavali e pei ona savali o Ia.
9. **Ioane 14:15, 21** Ia tausī i Āna poloa'iga, o le fa'ailoga sili lea o le alofa moni iā Iesu (Ioane 15:10; I Ioane 5:3; 2:3, 4).
10. **Roma 8:3, 4** Na malīu Iesu ina ia maua ai se avanoa e fa'a'ato'atoaina ai le amiotonu i lā le tulafono iā i tatou.
11. **Eperu 8:10** E tusia e le Atua Lana tulafono i papa ma'a a'ano o ō tatou loto (II Kori. 3:3).

12. Ioane 8:31

Ia tumau i le mataupu (a'oa'oga) a Keriso. 'Aua le fiafia pu'upu'u. (Va'ai i le Fa'aal. 2:10; Kala. 6:9; Kolo. 1:23; Mata. 13:7, 20, 21).

Manatu Fa'aopoopo: - E leai se a'oa'oga e tusa ona fa'afitia ai o le uiga ma le a'ano moni o le togioia ua saunia e Iesu fa'apei o lenei:

O le maliu o Keriso i luga o le satauro ua tu'usaunoaina ai tagata Kerisiano mai le usiusita'i i le tulafono a le Atua. Pe na maliu ea Iesu mo le lavea'iina o tagata mai le sala o le tulafono, ma Na fa'amagaloina a latou agasala ua mavae, ina ia maua ai e i latou le sa'olotoga e soli ai ma manatu fa'atuava'a ai i le tulafono a le Atua?

1. E le'i fesili mai 'ea le aposetolo o Paulo i lenei lava fesili, "E fa'ale-aogā 'ea e i tatou le tulafono i le fa'atuatua?" Ona ia tali mai ai lea ma le leai o se fa'alētonu, "'Aua ne'i fa'apea, a 'ua tatou fa'atumauiina ai le tulafono" (Roma 3:31).
2. A e fai mai Ioane, "O lenei lava le alofa i le Atua, ia tatou tausi i Āna poloā'iga" (I Ioane 3:5).

III. E mafai se tasi na ia lē tausi muamua i le tulafono ona fa'amagalo i ai le Atua ma Na ta'u amiotonuina i Lona alofa tunoa, a e lē mafai ona tumau o lea tagata i le tulaga o le ta'u amiotonuina, vaganā ona ua ia tausi i le tulafono ma usiusita'i i ai. E lē o le tausi i le tulafono ina **ia 'avea** ma Kerisiano, a e peita'i o le āva ma tausi i ai ona **ua 'avea** ma Kerisiano. E lē maua e i tatou le fa'aolataga ona o lo tatou usiusita'i; auā o le fa'aolataga, o le mea foa'i fua a le Atua, e gata ona maua i le fa'atuatua. A e peita'i le usiusita'i, o le fua tāua lava lea o le fa'atuatua moni.

IV. O lou fa'atuatua na e maua ai le fa'amagaloga ma le ta'u amiotonuina, o le fa'atuatua lava fo'i lea o le a mafai ai ona e talia o le mana o Keriso i totonu o lou loto mo le lavea'iina o 'oe mai le pule ma le malosi o le agasala.

1. **Kalatia 2:20** Ia fa'atuatua i le Ālo o le Atua mo le ola fou fa'ale-agaga.
2. **Ioane 15:4, 5** Ia maua le feso'ota'iga ola ma Ia.
3. **Efe. 3:16-2** O le fesoasoani mai o Keriso e manumalō ai i fili uma lava (Filipi 4:13; Kolose 1:11).
4. **Kolose 1:29** E galue o Ia i totonu iā te i tatou ma le mana.
5. **II Kori. 10:3-5** Ia fa'aaogāina au'upega fa'ale-agaga.
6. **Efe. 6:10-18** Ia o'ofu i 'ofu tau ato'atoa mai le Atua.
7. **Roma 6:4** Ia savavali i le ōla toe fuata'iina.

V. O le liua o se tasi ia 'avea ma Kerisiano, o se galuega lava lea e mafai i se taimi pu'upu'u ona fa'ataunu'uina ai; a e peita'i i le fa'a'ato'atoaina o le fa'apa'iaina o le Kerisiano, o se galuega lava e faia pea lava pea i aso uma e tumau ai le ola iā te ia, ma ua tataua lava lea galuega ona aga'i atu pea i luma.

1. **I Tesa. 4:3** Ua finagalo le Atua ia fa'apa'iaina i tatou (Efe. 5:27; I Kori. 1:2).
2. **II Pete. 3:18** Ia 'oe ma le manatu lenei: "**Ua 'ou maua.**" (Silasila i le faiupu e 12). O le tasi lava lea mailei poto a le fili.
3. **Fa'aal. 3:15-17** O le manatu fa'a-Laotikaia: "Ua 'ou maua, a e peita'i e le'i maua."
4. **Filipi 3:13** Ia tutupu i le alofa tunoa ma le poto.
5. **Kolose 3:5** Ia fasiotia itū tino o i le lalolagi.
6. **Efe. 4:13, 14** Ia 'aia le "**tama nini'i**" pea, a ia maua le fua o le tagata matua.
7. **Eperu 6:1** Ia fa'ao'o atu i le fa'a'ato'atoaga.

"E pei ona fa'asaga atu o le fugāla'au i le lā na te maua mai ai le fesoasoani e fa'a'ato'atoaina ai lona matagofie, ia fa'apea fo'i ona tatou liliu atu i le Lā o le Amiotonu, ina ia susulu mai iā i tatou le pupula o le lagi, ina ia fa'alauteleina ai foliga o Keriso iā i tatou. O lo tatou fa'alagolago o le lā la'au i le pogai ina ia tupu ma ia fua mai ai. Pe a tatou tete'a ma Ia, ua leai so tatou ola. Ua leai so tatou malosi e tete'e atu ai i fa'aosoosoga, ma tatou tutupu a'e ai i le alofa tunoa ma le pa'ia. Pe a tatou tumau iā te Ia, o le a lē mafai ona tatou magumagu ai pe lē fua mai. A o le a 'avea i tatou e pei o le la'au ua totōina i tafatafa ane o vaitafe.

"E to'atele ua i ai le manatu, e mafaia e i latou lava ona fa'ataunu'uina o se tasi vaega o le galuega o le fa'aolataga. Sa latou fa'atuatua iā Keriso mo le fa'amagaloina o a latou agasala, a o lenei o le a taumafai e i latou lava ona galued'iina o se amiotonu mo i latou. A e peita'i o le taumafai uma fa'apea e lē pine lava ona i'uvale. Ua fetalai mai Iesu, 'E lē mafaia e 'outou ona fai o se mea e tasi pe a A'u lē i ai'." - O La'asaga iā Keriso, itulau e 76.

TAULOTO: Ioane 15:5.

O LE ĀLA O LE FA'AOLATAGA - IV

I. E sili i lō tagata uma ona fa'asagatau o Satani i ē ua latou taliaina Keriso. O le a sili i lō aso a o le'i 'avea i latou ma Kerisiano ona o'o iā te i latou o tofotofoga ma fa'aosoosoga a le fili, a e peita'i ua saunia e le Atua le āla latou te sao ma manumalō ai.

1. **I Pete. 5:8** Ia fa'autauta ma mataāla auā le fili.
2. **I Pete. 4:12** 'Aua le ōfo i le tofotofoga pei o le afi.
3. **I Kori. 10:13** E lē maua i se tofotofoga e sili i se mea ua tatou lavātia.
4. **I Ioane 2:1** E 'ino'ino le Kerisiano moni i le agasala. E lē agasala ma le loto i ai, a e a sesē se tasi ona o le uiga fa'ale-tagata o iā te i tatou tagata, o iā te i tatou le Fautau i luma o le Tamā o Lē na te toe fa'atūina i tatou ma fusi iā te i tatou i Ōna a'ao alofa.

II. Pe a tatou nonofo latalata pea i lo tatou Ali'i ma fa'atuatua pea i Lona malosi, o le a tatou manumalō lava i le tafa.

1. **II Pete. 2:9** E lavea'i le Atua i ē amio Atua ai le fa'aosoosoga.
2. **Iuta 24** Na te mafai ona leoleoina i tatou ina ne'i pa'ū.
3. **II Kori. 10:5** E pulea e lē gata o tatou mafaufauga ma manatunatuga lilo o tatou loto, e fa'apea fo'i o tatou laulaufaiva ma o tatou lima ma vae; a e mafaia lava e Keriso ona fa'ato'ilaloina o ia mea uma ia ana'ana iā te Ia.
4. **Isaia 59:19** A o'o mai le fili e pei o se vaitafe, ona fa'atūina lea e le Agaga o se tagāvai e tete'e atu ai iā te ia.
5. **II Nofo. 20:6,12** O le tatalo a Iosefatu ona o le vao fili sa feagai ma Iuta.
6. **II Nofo. 20:25,17** O le tali mai iā Ieova: "**E lē o lo 'outou taua, a o le Atua.**"
7. **II Nofo. 20:24** O le ato'atoa o le manumalō.

III. Ia fa'afouina le feso'ota'iga ma Iesu i aso ta'itasi uma. O lou manumalō i le asō, e lē lava lea mo le aso a taeao.

1. **Ioane 15:4** Inā tumau ia o 'outou iā te A'u (i aso uma).
2. **Salamo 16:8** Ia tu'u Ieova i ōu luma e lē aunoa. (Sala. 86:3).
3. **Luka 9:23** 'Ave le satauro i aso fai so'o. (I Kori. 15:31).

Atonu ua e fa'atuatua iā Iesu i le asō ma ua e manumalō ai i le lalolagi, ma le ti'āpolo; a e afai e lē fa'afouina i le aso a taeao le tu'uina ato'atoa o 'oe i le pulega ma le ta'ita'iga o Lona Agaga, pe a amata ona e fa'alagolago i lou lava malosi ma e fa'apea ifo i lou loto, "O lenei ua 'ou malosi, ma ua mafai ona 'ou savali na o a'u," e lē pine lava ona i'uvale o lou taumafai. "O lenei, o le manatu o lo'o tū ia, inā fa'aeteete ia ne'i pa'ū" (I Kori. 10:12).

O le olaga moni fa'a-Kerisiano, o se olaga ua fa'ato'ilaloina lava e se tasi, o Keriso lea, ma ua ato'atoa ona tu'uina atu iā te Ia. O se olaga ua ato'atoa ona tu'uina atu i a'ao o le Atua ma Lana ta'ita'iga. O se olaga e usita'i i so'o se vala'au mai iā te Ia, e ana'ana i Āna fa'atonuga, e mulimuli i Lana ta'ita'iga. O se olaga ua gātasitasi ma Lona finagalo, e pei ona fa'ailoa mai i le Tusi Pa'ia. O se olaga ua pule i ai le Ali'i o Iesu, i le pule ua ato'atoa lava. O se olaga ua i lalo ifo o le mana ma le ta'ita'iga a le Agaga Pa'ia. O se olaga ua oti lā le tino ma le agasala, a ua ola i lā le Atua.

"Ia e fa'apa'iaina oe mo le Atua i le taeao; ia 'avea lenā ma āu galuega muamua lava. Ia fa'apenei lau tatalo: 'Le Atua e, ia E avatua a'u mo 'Oe ato'atoa. Ou te fa'ata'atiaina mea uma ua ou mafaufauina i Ōu a'ao. Ia e fa'aaogāina a'u i le aso nei mo Āu fe'au. Ia tã mafuta ma 'Oe, ma ia tã galulue fa'atasi ma 'Oe i fe'au uma 'ou te faia!' Ia e faia lenei mea i aso uma lava. O taeao uma ia e fa'apa'ia ai oe mo le Atua e tusa ma ōu la'asaga i lenā aso. Ia e tu'uina atu iā te Ia mea uma ua e mafaufauina, ina ia fa'ataunu'uina po o le lē fa'ataunu'uina fo'i, e tusa ma Lona finagalo o le a fa'ailoa mai. I le a o fa'apea i aso ta'itasi ona e tu'uina atu o lou ola i Ōna a'ao, o le a tauau pea ina foliga ai lou olaga i le soifua o Keriso." – O La'asaga iā Keriso, itulau e 77.

IV. O fa'amatalaga fa'aopoopo:- O lo'o i ai le galuega ua faia e Keriso mo le tagata, ma le galuega o lo'o galuea'iina pea e Lona mana i totonu o le tagata. E lua aogā iā te i tatou o amiotonu a Keriso:

1. Ua ufitia ai a tatou agasala ua mavae ma ua lē tauia ai; ua pei ai lava i tatou e le'i agasala. O Lana galuega lea mo le tagata.
2. Tatou te savavali ai i le ola toe fuata'iina. O le amiotonu lea e foa'iina mai e Keriso i aso ta'itasi i ē fa'atuatua pea iā te Ia ma fa'alagolago i Lona mana, a e lē o lo tatou lava malosi fa'ale-tagata. O le galuega lea a Keriso i totonu o le tagata.
3. E lua mea ua mana'omia e le tagata agasala ina ia lavea'iina mai ai o ia:-
 - (a) Mai le sala o le agasala.
 - (b) Mai le pule ma le malosi o le agasala.
 - a. E pei ona ta'ua i luga, e i ai le galuega a Keriso mo le tagata. I le o lea galuega e aofia ai le lavea'iina o i tatou mai le sala o le agasala, ina ua foa'iina mai iā te i tatou o Lana amiotonu e ufitia ai a tatou agasala ua mavae, ma faitauina ai i tatou o ni ē e le'i agasala i luma o le Atua. (Faitau ma le fa'autauta i le Sakaria 3:1-4).
 - b. Ona i ai lea ma le galuega tāua a Keriso i totonu o le tagata, e aofia ai le lavea'iina o i tatou mai le pule ma le malosi o le agasala. E fa'ataunu'uina lea e Lona mana e galuea'iina ai le ola fou fa'ale-agaga i totonu iā te i tatou, o le a mafai ona tatou manumalō ai i le pule sauā ma le malosi o le agasala, ma o le a fa'alauteleina ai foliga o Keriso i o tatou olaga. E ta'ua fo'i lenei galuega "o le fa'apa'iaina" o i tatou, o le galuega lea e aga'i pea i luma i aso uma o le olaga.

V. E fā vaega o lo'o galulue fa'atasi mo le fa'a'ato'atoaina o le ta'u amiotonuina o le tagata agasala:-

1. E ta'u amiotonuina i le alofa tunoa, - o le matāvai lea (**Roma 3:24; Tito3:7**).
2. E ta'u amiotonuina i le toto o Iesu, - o le ala lea e fa'ataunu'uina ai (**Roma 5:9**).
3. E ta'u amiotonuina i le fa'atuatua, - o le ala lea e talia ai (**Roma 5:1**).
4. E ta'u amiotonuina i le galuega, - o le ala lea e fa'amaonia ai (**Iakopo 2:20-24**).

O le ta'u amiotonuina e tusa ma le Afioga a le Atua e ao lava ona aofia fa'atasi ai o nei vaega uma e fā; auā e lē ma-tu'u 'ese'eseina, a e galulue fa'atasi. E ā le Atua le alofa tunoa ma le toto, a e ā le tagata le fa'atuatua ma galuega.

TAULOTO: II Korinito 10:5.

O ĀTA O LE TALA LELEI I TAIMI O LE FEAGAIGA TUAI

- I.** O le ala tāua sa fa'amasani ai tagata i ōna pō o le Feagaiga Tuai ma le uiga o le tala lelei, o sauniga fa'a-fa'atusa ia sa fa'asino aga'i i luma i le Fa'aola o le a afio mai.
- Kolo. 2:16, 17** O tulafono ma sauniga ese'ese na 'avea ma "āta o mea atali" (Eperu 10:21).
- II.** O le āta po o le sauniga aupito uiga ma le tāua i ōna pō o le Feagaiga Tuai, o le taulaga lea na faia i manu fasia ma sa fa'asino i luma i le taulaga o le a faia e Iesu mo i tatou.
1. **Kene. 4:3-5** O le fasia o manu e fai ai taulaga na amataina lava i le amataga ina ua fa'ato'ā ofi mai le agasala.
 2. **Eperu 11:4** O le taulaga na faia i le mamoe fasia, na fa'ailoa atu ai le fa'atuatua i le Tama'i Mamoe a le Atua o le a fasia mo le agasala a le lalolagi (Ioane 1:29).
- III.** O le Taulaga mo le agasala na fa'amalamalamaina ai le āla ua saunia e le Atua e lavea'iina ai le tagata mai le sala o le agasala, ina ua maua o sona sui.
1. **Levi. 4:27, 28** Ia lē ponā le manu e fai ai le taulaga (Teute. 15:21).
 2. **I Pete. 1:19** O le Tama'i Mamoe a le Atua e aunoa ma se ponā.
 3. **Levi. 4:29** Sa fa'aali e le tagata agasala āna agasala i luga o le manu o le taulaga (Levitiko 16:21).
 4. **I Ioane 1:9** Tatou te fa'aali a tatou agasala iā Keriso.
 5. **Levi. 4:29** Na fasia e le tagata agasala lava ia lana taulaga.
 6. **Isaia 53:4-6** O ā tatou lava agasala ua mafua ai ona maliu o Keriso.
 7. **Levi. 4:26** Ona fai ai lea e le faitaulaga se togiola mo ia, ona fa'amagaloina ai lea o ia.
 8. **Efeso 1:7** O Ia ua tatou maua ai le togiola i Lona toto, o le fa'amagaloina o agasala (I Ioane 1:7,9).
- IV.** Ia manatua lona uiga tele o le taulaga na sauniuni i ai Aperamo. O le tasi lea āta tāua o le taulaga silisili ua saunia e le Atua, i Lona foa'iina mai o Lona Ālo pele e to'atasi e maliu mo i tatou. (Faitau i le Kenese 22:1-14).
- V. O Tausamiga Pa'ia.** E fitu tausamiga iā Ieova sa faia i tausaga uma, e āfua i le paseka i le ulua'i masina se'ia o'o i le tausamiga o fale apitaga i lona fitu o masina. O le Levitiko, matā'upu e 23, o lo'o tusia mai ai le fa'asologa o nei tausamiga (Levitiko 23).
1. **O le Paseka** (Levi. 23:4, 5). O le āta lea o le maliu o Keriso.
 - a. Sa fasia le mamoe o le paseka i le aso 14 o Apipa, le ulua'i masina, i le afiafi (Esoto 12:2, 6; 12:4).
Na maliu Keriso i le aso 14 o Apipa i le afiafi (Ioane 19:14,15; I Kori. 5:7).
 - b. E le'i gagauina se ivi o le mamoe o le paseka (Esoto 12:43).
E le'i gauia se ivi o le Ali'i Fa'aola (Ioane 19:31-36).
 - c. O le sausuina o le toto na ola ai Isaraelu (Esoto 12:7,13).

- E fa'apea fo'i i tatou i le toto o Iesu (Eperu 12:24; 10:22; I Pete. 1:2).
- d. Sa leai se malu, vaganā ona ua i ai le fa'ailoga o le toto (Esoto 12:22, 23).
E leai fo'i ma so tatou malu, vaganā ona ua tatou fa'atuatua moni i le mana o le toto o le Ālo o le Atua (I Pete. 11:18,19; Eperu 10:29; Roma 3:24, 25).
 2. **O le Tausamiga o Areto e lē Fa'afefeteina** (Levi. 23:6). Na a'oa'oina atu ai le lafoa'i 'eseina o le agasala.
 - a. Sa a'ai i le areto e lē fa'afefeteina (Levi. 23:6).
 - b. Ia tatou fa'ate'a 'eseina le mea fa'afefete o le agasala (I Kori. 5:7, 8).
 3. **O le Tausamiga o Mea ua Fa'apolopolo** (Levi 23:9-11). O le āta lea o le toe soifua mai o Keriso.
 - a. Na fasia le mamoe o le paseka i le aso 14 o Apipa. O le aso 15, o le aso muamua lea o le tausamiga o areto e lē fa'afefeteina (o le tasi lea sapati fa'ale-tulafono a Mose - Levi. 23:6,7). A o le aso na tuā'oi ai, le aso 16, na pa'ū tonu i ai le tausamiga o mea fa'apolopolo. O aso ia na amataina ai le seleselegā saito ina ua matua nisi itū'aiga o saito, i le sa aumai le ulua'i fusi saito aupito lelei i le faitaulaga, ma sa lūlūina ai e ia i luma o Ieova "ina ia talia" mo le nu'u (F. 11). Fai mai, "O le aso e aupito mai i le sapati" (le fa'ale-tulafono a Mose), na lūlūina ai le fusi saito. Na fa'ato'ā taga ona o'o atu o se selesaito i le saito o tū, ina ua uma ona lūlūina o le fusi saito o mea fa'apolopolo ma ua taliaina e Ieova.
 - b. Ua ma'eu lava le fa'ataunu'uina lelei iā Keriso o lenei āta. Na fa'asatauroina o Ia i le aso 14 o Apipa. O le aso 15, na malōlō ai o Ia i le tu'ugamau, a o le aso 16, le aso "e aupito mai i le sapati," na toe fa'asoifuaina mai ai o Ia ina ua "talia" e le Tamā le togiola na Ia saunia. Ua 'avea Keriso ma "fa'apolopolo o ē ua momoe" (I Kori. 15:20).
 - c. I lea tausaga (T.A. 31) na pa'ū tonu ai le tausamiga o le paseka i le Aso Faraila. O le aso muamua o le tausamiga o areto e lē fa'afefeteina (o le sapati lea fa'ale-tulafono a Mose), na pa'ū tonu i le Sapati aso fitu o le Atua, na ala ai ona ta'ua o lenā Sapati, "o le aso sili," ina ua maua sapati e lua i le aso e tasi (Ioane 19:31). A o le lūlūina o le fusi saito o le fa'apolopolo, na pa'ū tonu i le ulua'i aso o le vaisapati. O lea na toe soifua mai ai Keriso i le ulua'i aso, ina ia fa'ataunu'uina ai le āta mai ōna pō o Mose.
 4. **O le Tausamiga o Vaiaso Sā, po o le Aso Penetekoso** (Levi. 23:15-21). Sa ta'ua fo'i o le **Tausamiga o le Seleselegā Saito**; auā o aso ia na fa'aumaina ai le seleseleina o isi itū'aiga o saito e matua mulimuli (Esoto 23:16).
 - a. Mai le Tausamiga o Mea Fa'apolopolo se'ia o'o i le Aso Penetekoso, e fitu vaiaso sā (Teute. 16:9,10). O le Aso Penetekoso na afio ifo ai le Agaga Pa'ia i luga o le 'au so'o.
 - b. E lua papa areto na faia i lenā aso i le falaoa mata fou mai le saito fou na se'i seleseleina (f. 16, 17), ona 'ave lea e fai ma taulaga iā Ieova fa'atasi ma isi mea. O nei papa areto e lua, o fa'atusa lava ia o vaega e lua o le fanau a tagata, o Iutaia ma nu'u ese. O le aso Penetekoso na maua ai e le 'au so'o le mana e tala'i atu ai le tala lelei, e lē gata i Ieruselema ma Iutaia uma lava, a e o'o lava i tulu'iga o le lalolagi (Gal. 1:8; Fa'aaogā ma le Efeso 2:15-18). "O le taulaga i mea e 'ai fou" (Levitiko 23:16), sa 'avea le 'au so'o ma tagata fou i le Aso Penetekoso (Gal. 2:1; I Kori. 5:17).
 5. **O le Tausamiga o le Iligāpū** (Levi. 23:23-25). O le ata lenei o le tala'iga ua fa'aioa atu ai i le lalolagi le "itū aso o lana fa'amasinoga." (Fa'aaogā le Fa'aaliga 14:6,7).
E iva aso na vā a'i le iligā pū ma le tausamiga na pito ane i ai, o le Tausamiga lea o le Aso o le Togiola, o le āta lea o le fa'amasinoga a le Atua. Sa ilia e faitaulaga (Nume. 10:8), e fa'aioa atu ai i le fa'apotopotoga o Isaraelu le aso mamalu o le togiola ua lata mai.
 6. **O le Tausamiga o le Aso o le Togiola** (Levi. 23:27-30). O le ata lea o le fa'amasinoga. O le a fa'amae'ae'a ona fa'amatalaina i le matā'upu e XL.

7. **O le Tausamiga o Fale Apitaga** (Levi. 23:39-43). Sa tu'ua ai e le nu'u o latou nofoāga e masani ai, a e nonofo i fale na faia i lau la'au mo aso e fitu. Sa fa'amanatuina ai le fa'anonofoina o le fanauga a Isaraelu i fale apitaga i le vao.
- a. Sa ta'ua fo'i o le **Tausamiga o le Fa'aputuga** (Esoto 23:16), auā o le taulaga fa'afetai a le nu'u ina ua fa'ataunu'uina ma le manuia le aoina mai o fua o le 'ele'ele. Sa oli'oli tele ai le nu'u. Sa fa'asino i luma i le fiafia ma le oli'oli tele o le a lagona e le fanau uma a le Atua, pe a mae'a le fe'au ma ua malu le saito o le lalolagi i le fale teu saito a le Atua.
 - b. Sa fa'amanatu mai ai fo'i, e leai so tatou nofoāga tumau i lalo nei, a ua 'avea i tatou ma "tagata 'ese ma āumau i le lalolagi," o lo'o sa'ili e i tatou lo tatou lava nu'u moni (Epe. 11:13, 14).

TAULOTO: Roma 15:4.

O A'OA'OGA TĀUA MAI LE FALE FETĀFA'I

I. Fa'amalamalamanaga.

Ina ia fa'amalamalamaina atili pea le fanauga a Isara'elu i matā'upu fa'avae o le Tala Lelei, na ala ai ona tu'uina atu iā te i latou e le Atua o le fale fetāfa'i (Po o le malumalu), ma ōna sauniga fa'a-fa'atusa.

1. **Esoto 25:8** *"Ia latou faia fo'i mo a'u se malumalu."* Mai le mata'upu e 25 o le Esoto se'ia o'o i le mata'upu e 29, o lo'o fa'amatalaina mai ai le faiga o le malumalu ma ana meāfale ese'ese sa i ai (Esoto 25-29).
2. **Eso. 40:27-33** Na faia e Mose mea uma e tusa ma le poloa'iga a le Atua.
3. **Eso. 40:17-33** Faitau ma le fa'autauta i nei fuaiupu, ina ia malamalama lelei ai iā te 'oe le tino mai o le malumalu ma le tulaga o āna meāfale o ta'ua mai. (Ia tusi se fa'afanua o le malumalu. Ia 'avea le 1/10 o le inisi, tusa ma le (equal) 1 Kupita. O le lotoā, 100 kupita x 50 kupita; mea pa'ia, 20 kupita x 10 kupita; mea e sili ona pa'ia, 10 kupita x 10 kupita).

II. O le āta ma le fa'a-fa'atusaina.

1. **O le Tino o le Fale Fetāfa'i:** O le fa'atusa lea o le tino tagata o Iesu na ufitia ai Lona mamalu fa'ale-Atua.
 - a. **Esoto 25:8** Na fa'ato'ā mafai ona afio fa'atasi le Atua ma le fanauga a Isara'elu ina ua faia le fale fetāfa'i e ufiufi a'i le pupula o Lona pa'ia, semanū a latou fano ai. Sa i le vā i kerupi auro i le mea e sili ona pa'ia le malamalama fa'amanamana, o le fa'ailoga lea o le fa'atasi ai o le Atua (Esoto 25:22; Numera 7:89).
 - b. **Ioane 1:14** Sa fa'apea ona 'avea le tino tagata o Iesu ma ufiufi o Lona mamalu fa'ale-Atua ma mafai ai ona ia mau fa'atasi ma tagata (Eperu 10:20).
 - c. **Mataio 1:23** Sa fa'asuafaina Iesu o "**Emanuel,**" o lona uiga, "**Ua iā te i tatou le Atua.**"
 - d. **Esoto 25:16** Sa i ai le tulafono i le mea e sili ona pa'ia i totonu o le malumalu.
 - e. **Salamo 40:8** O lo'o i ai le tulafono i totonu o le finagalo o Iesu.
2. **O le Lotoā o le Fale Fetāfa'i:** O le mea lea sa fasia ai taulaga, i le sa 'avea ma fa'atusa o lenei lalolagi na fasia ai le Tama'i Mamoe a le Atua. Sa 'avea le fale fetāfa'i lava ia ma āta o le fale fetāfa'i moni o lo'o i lugā i le lagi.
 - a. **Levi. 4:29** "I le mea e fai ai le taulaga mū," o le lotoā lea sa i ai le fata faitaulaga (Esoto 40:6).
 - b. **Eperu 9:11** O le fale fetāfa'i e sili ona lelei ma le ato'atoa, e fa'ale-lagi lea (Epe. 8:1, 2).
3. **O le Fata sa fai ai taulaga mū:** Sa fa'asino lea i le taulaga o le a faia e Iesu mo a tatou agasala. Sa fa'asino fo'i i le fa'aumatiāga o ē amio leaga.
 - a. **Ioane 1:29** O mamoe uma na fasia, o fa'atusa ia o Keriso.
 - b. **Levi. 1:6-9** O le afi i luga o le fata faitaulaga, o le fa'atusa lea o le afi o le a fa'aumatia ai le 'au agasala (Fa'aal. 20:9,14).

- c. **Levi. 6:10, 11** O le 'aveina o le lefulefu o taulaga i tua o le to'agalauapi ma tu'u ai i se mea mamā, o le āta lea e fa'asino i ōna pō o le a 'avea ai tagata amio leaga ma lefulefu i luga o le fogā'ele'ele ua uma ona fa'amamāina i le afi o le to'asā o le Atua (Malaki 4:1-3).
- d. **Levi. 4:31** Na ave 'eseina e le tagata agasala le ga'o uma mai le taulaga mo lē agasala, auā o le fa'atusa lea o le agasala.
- e. **Isaia 1:16** Ia fa'ate'a 'eseina a tatou amio leaga i luma o le Atua.
- f. **Levi. 4:31** Sa susunuina le ga'o o le taulaga.
- g. **Salamo 37:20** O le a fa'apenā le i'uga o ē amio leaga. *"O le mea sili o i tama'i mamoe, o le mea lololo ma le ga'o e susunu pe a fai le taulaga"- (Parate/Pratt).*
4. **O le Tanoa sa mulumulu ai:** O le tasi lea āta o le fufulu 'eseina o a tatou agasala i le toto o Iesu.
- a. **Eso. 30:17-21** Sa mulumulu ai le 'au osi taulaga "ne'i latou oti." E oti i tatou pe a lē fa'alanu i le toto o Iesu.
- b. **Tito 3:5** O le "fa'ata'eleina" i le toe fuata'iina ma le fa'afouina.
- c. **Fa'aal. 7:14** E fa'asinasinaina i le toto o le Tama'i Mamoe.
5. **O Potoi Areto e sefulu ma le lua sa laulauina i luga o le la'oai auro, sa tofu le itū'aiga ma le potoi:** O le fa'atusa lea e fa'asino iā Iesu, o Ia o le areto o le ola mo itū'aiga uma o le lalolagi.
- a. **Ioa. 6:35,48-51** O le areto moni mai le lagi.
- b. **Levi. 24:8** Sa fa'afouina i lea Sapati ma lea Sapati. O le a'oa'oga mo au'auna a le Atua ia latou fafagaina pea a latou 'au lotu i le areto fou.
6. **O le Tu'ugāamepa Auro:** O le tasi fo'i lenei fa'atusa e fa'asino iā Iesu. Lē ua 'avea ma malamalama o le lalolagi.
- a. **Ioane 8:12** "O a'u nei o le malamalama o le lalolagi."
- b. **Ioane 1:9** Na te fa'amalamalamaina tagata uma.
7. **O le Fata e fa'amū ai mea manogi:** O le a'oa'oga tāua lea, ia i ai pea i a tatou talosaga le manogi ma le mana o le fautuāga a Iesu ma le Agaga Pa'ia.
- a. **Esoto 30:7, 8** Sa fa'amūina mea manogi i taeao ma afiafi uma i le taimi o faigā lotu.
- b. **Fa'aal. 8:3, 4** O le "asu o mea manogi," o le fa'atusa lea o le fa'atuatua ma le fa'alagolago i le fautuāga a Iesu ma Lana amiotonu. O le fa'atuatua lea pe a i ai i a tatou talosaga, o le a mālīe ai i le fa'afofoga a le Atua.
- c. **Roma 8:26** O le Agaga Pa'ia fo'i e fautua i a tatou talosaga.
8. **O le Atola'au o le Feagaiga ma le Nofoa o le Alofa:** Ua fa'ailoa mai ai, o le a alofagia e le Atua le tagata soli tulafono, lea ua sulufa'i atu iā te Ia.
- a. **Esoto 40:20** Sa teuina le tufafono i totonu o le atola'au i lalo ifo o le nofoa o le alofa.
- b. **I Ioane 3:4** O le agasala, o le soli tulafono lava lea.
- c. **Levi. 36:15** Na sausuina le toto o taulaga i luga o le nofoa o le Alofa, (i luga a'e o le tulafono ua solia).
- d. **Kalatia 3:13** O le toto o Iesu, ua fa'atauina mai ai i tatou ai le fa'afanoga o le tulafono.
- e. **Esoto 34:5-7** O le Atua alofa mutimutivale ma le alofa fua.

Manatu Fa'aopoopo: - E ma'eu le loloto ma le lautele o lenei matā'upu, auā o lo'o aofia ai le tele o a'oa'oga fa'avae o le Tala Lelei, e i ai le Togiola, Fautuāga a Iesu, Fa'amasinoga, Fa'amagaloga o agasala, ma nisi fo'i matā'upu tāua fa'ale-Tala Lelei. Na su'esu'e i ai Tavita, ona ia iloa ai lea o le malosi ma le mamalu o le Atua (Salamo 63:2).

Ua fa'amamafaina e Paulo lenei matā'upu i lana tusi iā Eperu. Ua toetoe lava ina a aofia ai le tusi 'atoa uma i le fa'amatalaga o lenei lava matā'upu e tasi, le malumalu ma ōna sauniga, ma ua aofia ai fo'i ma le fa'amatalaga o le faiva o faitaulaga o lo'o iā Iesu. Sa ma'elegā tele Paulo e su'esu'e i lenei matā'upu, auā sa mautinoa e ia, o lo'o "i ai le āta o mea lelei atalī" (Eperu 10:1). Ua tele o na fa'amamafaina e le Tusi Pa'ia o lenei a'oa'oga tāua, a ua tele o na fa'alē-amana'iaina e le Ekalesia Kerisiano i nei ōna pō.

TAULOTO: Esoto 25:8.

O KERISO A O LE'I FANAU MAI I LE TINO TAGATA

I. O Iesu, le Ālo o le Atua, sa fa'atasi ma Lona Tamā mai le vavau.

1. **Ioane 1:1, 2** Sa i le Atua le Lokou mai le amataga.
2. **Ioane 1:14** O le Lokou, o le Ālo lava lea o le Atua.
3. **Mika 5:2** O Lona tupu mai e "talu mai anamua lea, talu mai ōna pō o le vavau lava."

II. Sa i ai Keriso a o le'i fa'avaeina le lalolagi, auā o Ia lava na Ia foafoaina.

1. **Ioane 1:3** Na Ia faia mea uma lava.
2. **Kolose 1:16** O mea uma lava i le lagi ma le lalolagi, na faia lava e Ia (I Kori.8:6).
3. **Efeso 3:9** Na faia mea uma e le Atua i Lona Ālo.
4. **Eperu 1:2** "O Lē (Keriso) ua tofia e Ia (le Tamā) e fai mea uma lava."

III. A o i ai Keriso i lenei lalolagi, sa Ia molimau pea i Lona soifuāga fa'atasi ma le Tamā a o le'i liu tino tagata o Ia.

1. **Ioane 17:5** Sa fetalai Iesu i le mamafa sa iā te Ia fa'atasi ma le Tamā.
2. **Ioa. 17:23, 24** Na Ia molimau i le auina mai o Ia i lenei lalolagi ma le alofa o le Tamā iā te Ia, a o le'i fa'avaeina le lalolagi.
3. **Ioa. 6:38, 51** Na afio mai o Ia mai le lagi.
4. **Ioane 16:28** Na afio mai o Ia i le lalolagi mai le Tamā (Ioane 8:42).
5. **Ioane 13:3** Na silafia e Iesu o le a Ia toe maliu atu i le Tamā.

IV. Sa fa'aali mai Iesu i tagata i ōna pō o le Feagaiga Tuai a o le'i fanau mai o Ia i lenei lalolagi.

1. **Kene. 18:1, 2, 13,17** Sa fa'aali o Ia iā Aperā'amo i le tino o se tagata. *"Le Ali'i. Ua fa'asaga lana upu i le Matai o le Malaga."* -(Parate). O fa'aaliga uma o le Atua i tagata, o fa'aaliga o le Atua le Ālo; auā e le'i va'aia lava e sē tasi le Atua le Tamā (I Timoteo 6:15, 16; I Ioane 4:12; Ioane 1:18).
2. **Eso. 23:20-23** Sa fa'atasi ai Iesu i le malaga a le fanauga a Isaraelu. "O lo'o iā te Ia lo'u nei igoa." (Fa'aaogā le Isaia 9:6). **"Le Agelu. O le Mesia lea."** *O le Tusi ua Fa'amatalaina ai le Tusi Pa'ia, itulau e 29, Misi Parate (L.M.S.).*
3. **I Kori. 10:4** Ua fa'amaonia e Paulo sa fa'atasi ai Iesu i le malaga a Isara'elu.
4. **Iosua 5:13-15** Sa fa'aali o Ia iā Iosua i le tino o se tagata tau. O le "'Ave 'au a Ieova." - Keriso. O Lē sa fa'aali iā Mose i le afi mumū i totonu o le la'au talatala, o Ia fo'i lea na fa'aali iā Iosua. (Ia fa'atusatusaina le F. e 15 ma le Esoto 3:1-5). O Ia o le "Agelu a Ieova," a ua fa'asuafaina fo'i o Ieova i le ma le Atua (Ieremia 23:5; Eperu 1:8).
5. **Fa'ama. 13:15-20** Sa fa'aali o Ia iā Manoa i le tino o se Agelu, "o le Agelu a Ieova." Ia mātauina le fetalaiaga a lenei Agelu e uiga i Lona suafa, fai mai, "E silisili 'ese o Ia". O le tasi lea suafa o le Mesia (Isaia 9:6).

TAULOTO: Ioane 17:5.

UA LIU TINO TAGATA KERISO

- I.** Ina ua fanau mai Iesu i Petele'ema, a e lē o Lona fa'ato'ā soifua mai lea e pei ona 'avea o se pepe ma tagata fou ua fa'ato'ā maua mai, a e peita'i o se fesuia'iga lea ua o'o i le uiga ma le soifuāga o le Ālo o le Atua.
1. **Ioane 1:14** Ua liu tino tagata le Lokou.
 2. **Fili. 2:5-7** Sa uiga fa'atasi ma le Atua, a ua faia o Ia fa'apei o se tagata.
- II.** O le liu tino tagata o Iesu, o se vavega lava, o se "mea lilo" ma le loloto e lē mafuatia e le mafaufau fa'ale-tagata. Ua na o le mana o le Atua na mafai ai.
1. **I Timo. 3:16** O le "mea lilo": "Ua fa'aali mai le Atua i le tino tagata."
 2. **Luka 1:36** O le galuega o le mana o Lē Silisili 'Ese ua faia e le Agaga Pa'ia (Mata. 1:18-20).
- III.** Sa ao lava ona liu tino tagata le Ālo o le Atua, auā o le tasi lea vaega tāua o le galuega o le fa'aolataga.
1. **Eperu 2:14** Ina ia 'avea Lona maliu ma āta e fa'aumatia ai Satani.
 2. **Eperu 2:15** Ina ia tu'usaunoaina ai tatou.
 3. **I Pete. 3:18** Ina ia maliu o Ia mo a tatou agasala.
- IV.** Na fa'asino atu e le Feagaiga Tuai i le 'au fa'atuatua le āla o le a fa'aalia mai ai le Mesia, o le liu tino tagata lava lea.
1. **Kenese 3:15** O le ulua'i folafolaga i le Fa'aola, Lē o le a fanau mai i le fafine.
 2. **Kenese 12:7** Na folafola e le Atua iā Aperā'amo, o le a tupu mai iā te ia le manuia o atunu'u uma o le lalolagi.
 3. **Kalatia 3:16** "O so lau fanau, o Keriso lava lea."
 4. **Isaia 7:14** Na mua'i folafolaina mai le ala fa'avavega o le a fanau mai ai le Mesia.
- V.** Ina ua o'o i le taimi na atofaina e le Atua, ona fa'ataunu'uina ai lea o le vavega ua aupito sili ona tele, ua liu tino tagata le Ālo o le Atua ma ua fanau mai i le lalolagi e tusa ma le folafolaga.
1. **Kalatia 4:4** Ua o'o atu i le fa'a'atoāga o tausaga, ona 'auina mai ai lea e le Atua o Lona Ālo, na fanau i le fafine.
 2. **Mata. 1:18-22** O le molimau i le fanau mai o Iesu i le tino tagata. (Fa'aaogā ma le Luka 1:26-35; 2:1-12).
- VI.** Ina o i ai Iesu i le lalolagi nei, sa 'avea o Ia e pei lava o se tagata.
1. **Eperu 2:17** Sa 'avea fa'apei o Ōna uso i mea uma lava.
 2. **Eperu 4:15** Sa fa'aosoosoina i mea uma e pei o i tatou.
 3. **Ioane 4:6** Sa lagona e Ia le vaivai fa'ale-tino e pei lava o i tatou.
 4. **Ioane 11:35** Sa fa'anoanoa e pei o i tatou.

VII. E ui lava i Lona itū tagata, a o Ia fo'i o le Atua.

1. **Mata. 16:13-17** Sa mautinoa e Peteru o Iesu o le Ālo o le Atua.
2. **Mataio 1:23** O Emanuelu – “Ua iā te i tatou le Atua.”
3. **Ioane 9:35-37** Na fa'aaogāina e Iesu lenei suafa, o le Ālo o le Atua, i Āna fetalaiga e uiga iā te Ia lava.

VIII. E ui lava ina ua toe afio a'e Iesu i le lagi, a e o lo'o tumau pea ia i Lona itū tagata. O Ia o le Atali'i o le Tagata, i le ma le Ālo fo'i o le Atua.

1. **Galue. 7:56** O lo'o tū o Ia i luma o le Atua, o le Atali'i o le Tagata.
2. **I Timo. 2:5** O lo tatou Puluva, o le Tagata o Keriso Iesu.
3. **Mataio 24:30** O le a Ia toe afio mai, o le Atali'i o le Tagata.

“O Lona itū tagata ua maua ai e Keriso le feso'ota'iga ma le fanau a tagata e lē toe motusia; a o Lona itū Atua ua Ia fa'afeso'ota'i ai pea ma le nofoāli'i o le Atua. I Lona soifuāga fa'ale-Atali'i o le Tagata, ua Ia tu'uina mai ai mo i tatou se fa'aa'oa'oga ato'atoa, o le usiusita'i; a o Lona tulaga fa'ale-Ālo o le Atua, Na te foa'iina mai ai le mana tatou te mafai ona usiusita'i ai.” - O le Fa'anaunaga o Tupulaga, itulau e 24.

TAULOTO: Kalatia 4:4.

O LE SOIFUĀGA LĒ AGASALA O KERISO

- I.** Ina ua afio mai Keriso i lenei lalolagi, na Ia tu'u 'eseina ai Lona mana fa'ale-Atua, a e sa fa'afeagai o Ia ma fa'aosoosoga fa'a-lenei olaga e pei lava ona tatou feagai ai. E le'i fa'aaogāina lava e Iesu Lona mana fa'ale- Atua ina ia mafai ai e Ia ona soifua i se soifuāga e aunoa ma le agasala.

1. **Eperu 4:1** Na fa'aosoosoina Iesu i mea uma e pei o i tatou.
2. **Iakopo 1:13** E lē mafai ona fa'aosoosoina o le Atua. Ona tatou mautinoa lea, e lē o Iesu le Atua sa tau ma le agasala, a e peita'i o Iesu le tagata.
3. **Roma 8:3** Sa "tino tagata agasala" (Sa iā te Ia le uiga fa'atagata agasala e pei lava o i tatou).

Manatu Fa'aopoopo:- O nisi e to'atele latou te mafaufau ifo e fa'apea, "Sa tatau lava iā Iesu ona manumalō i le agasala; auā o Ia o le Ālo o le Atua, sa iā te Ia fo'i le malosi e lē maua e i tatou tagata." A ua lē se'i latou mafaufau i lenei itū, sa atili ai ona faigatā iā Iesu o le tafa ina ua Ia mautinoa le mana fa'ale-Atua o iā te Ia, a ua lē tatau ona Ia fa'aaogāina i Lona feagai ai ma le agasala.

"Pe 'ana i ai se itū tatou te mafatia ai i le tauiviga ma le agasala, a e le'i mafatia ai fo'i ma Iesu i lea lava itū, se manū a 'avea ai lenā mea ma ala e finau mai ai Satani e fa'apea, 'Ua lē lava le fesoasoani o le Atua tatou te manumalō ai.' O lea na fa'aosoosoina ai Iesu, 'i mea uma pei o i tatou.' Sa o'o iā te Ia tofotofoga uma e maua ai i tatou, a e sa lē fa'aaogāina lava e Ia mo Ia lava se malosi e 'ese i lo lea ua folafolaina mai iā te i tatou. Sa fa'afesaga'i o Ia ma fa'aosoosoga, o Ia lava o le tagata e pei o i tatou, i le sa manumalō o Ia i le malosi na foa'iina atu iā te Ia e le Atua." - O le Fa'anaunauga o Tupulaga, itulau e 24.

- II.** O le pogai na ala ai ona manumalō o Iesu, ona o Lona tu'uina atu ato'atoa o Ia i le Atua ma Lona fa'alagolago pea lava pea i Lona Tamā, a e lē o se malosi mai iā te Ia lava.

1. Sa Ia fa'alagolago ato'atoa i le Tamā (Ioane 5:19, 30).
2. Sa fa'ato'ilaloina Ōna mana'o uma i le finagalo o Lona Tamā (Salamo 40:8; Ioane 5:30; Mataio 26:39, 42, 44).
3. Sa fa'atumauiina o Ia i le Agaga o le Atua (Luka 4:14).
4. Sa Ia fa'aavanoaina Lona loto mo le Tamā ia afio i totonu iā te Ia (Ioane 14:10).
5. Na fa'amalosia Lona vaivai fa'ale-tagata ona o le tatalo (Luka 6:12; Mataio 14:23). Pe afai na lagona le fia tatalo e le Fa'aola o tagata ma le Ālo o le Atua, e lē sili ai 'ea ona tatau ona tatou fia tatalo fa'atauana ma tatalo so'o i tatou tagata vaivai ma le tumu i le agasala?

- III.** O Lona fa'alagolago e lē aunoa i le Tamā na mafai ai e Iesu ona soifua i le soifuāga lē agasala.

1. **I Pete. 2:22** "O Lē na lē agasala lava."
2. **Ioane 8:46** Sa fa'aali e Iesu i Ōna fili, o Ia ua lē agasala.
3. **Eperu 14:30** Ua leai se agasala iā te Ia.
4. **Ioane 14:30** E le'i maua e Satani se agasala iā Iesu. (Mataio 4:11).

IV. Pe a tatou talia Keriso, o le a Ia foa'iina mai Lona soifuāga lē agasala e sui a'i o tatou olaga agasala.

1. **Ierem. 23:8** O Ia o "**Ieova la tatou amiotonu.**"
2. **I Kori. 1:30** Ua 'avea o Ia ma a tatou amiotonu.
3. **II Kori. 5:21** E 'avea i tatou ma amiotonu a le Atua iā te Ia.

V. Talu ai ina ua tatou maua le fa'amagaloga mo a tatou agasala ua mavae, ua tatau loa ona tatou manumalō i le agasala i le ala ua fa'asino mai e Iesu.

I Pete. 2:21 Ua tu'uina mai e Ia le fa'aa'oa'o.

TAULOTO: Eperu 4:15.

O LE MALIU O KERISO

I. Sa tataua lava ona maliu o lo tatou Fa'aola.

1. **Roma 6:23** O le totogi o le agasala, o le oti lava lea.
2. **I Pete. 2:24** Sa tau'aveina e Keriso a tatou agasala, talu ai ona o'o iā te Ia o le fa'asalaga o le oti.

II. O le oti mo le agasala, e lē o le oti lea e masani ai tagata, a e peita'i o le oti fa'alua e lē toe ala mai ai.

Fa'amatalaga Fa'aopoopo: Ina ua maliu Iesu mo le tagata agasala, na Ia maliu i le maliu e ta'ua o le "totogi o le agasala." E lē o le oti lea e masani ai le fanau a tagata talu ai ona ua iā i latou le uiga i'u vale. O le oti ua tatou masani ai, ua mafua lea ona o le agasala a Atamu, a e lē o le fa'asalaga lea mo agasala a le tagata lava ia. E le'i o'o lava se tagata i le oti e totogi a'i le agasala. O lea ua fa'aigoaina e le Tusi Pa'ia, "o le oti fa'alua," ma o le a o'o mai e 'avea ma fa'asalaga. O le maliu na o'o iā Iesu e tutusa lona faigatā ma le faigatā o le oti fa'alua.

1. **I Kori. 15:22** E oti tagata uma i le oti muamua ona o lo latou feso'ota'iga ma Atamu.
2. **Roma 5:14** E ui ina ua tatou lē agasala e pei o le solitulafono a Atamu, a ua manumalō mai lava le oti muamua iā te i tatou uma.
3. **Roma 5:17** Ua manumalō le oti ona o le to'atasi, o Atamu lea.
4. **Fa'aal. 21:8** O le oti fa'alua, o le fa'asalaga lea i le lepa afi mo tagata agasala uma ta'ito'atasi. O le totogi lea o le agasala. Na maliu Iesu ina ia lavea'iina mai lē ua fa'atuatua mai le oti fa'alua.
5. **Fa'aal. 2:11** Ua fa'aavanoaina le āla tatou te sao ai mai le oti fa'alua.

III. O le oti fa'alua, o se oti faigatā lava ma le mata'utia. (Faitau ma le fa'autauta i mau nei: Mata. 8:11, 12; 22:11,13; 24:48-51). Ia e matauina lelei nei mea e lua:-

1. "E tulia i le pouliuli i fafo," (O le matuā fa'ate'a 'eseina lea ma le Ali'i. Ia fa'atusatusaina ma le **II Tesa. 1:9**).
2. "O le taufai tagi auē ma le lilivau o nifo," (o le puapuagā fa'ale-mafaufau lea e lē ma-fa'amatalaina).

IV. Na vave ona i'u o le soifua o Iesu, e lē ona o tigā o le satauro, a e peita'i ona o le finagalo momomo na mafua i le puapuagā tele fa'ale-mafaufau na o'otia ai o Ia ina ua 'alo fofoga o Lona Tamā iā te Ia.

1. **II Kori. 5:21** Na faia o Ia ma agasala, o le Sui o i tatou.
2. **Isaia 53:6** O lo tatou Sui, Lē ua fa'ao'o i ai e Ieova le amio leaga a i tatou uma.
3. **Mata. 27:46** O le 'alaga mai le finagalo ua momomo. "**Lo'u Atua e, lo'u Atua e, se ā le mea ua E tu'ulafoa'i mai ai a'u?**"

"Sa faitauina o Ia fa'atasi ma ē solitulafono. Sa fa'ae'eina atu iā te Ia le sala a le lalolagi ua pa'ū. Sa ao lava ona lafo atu i luga o Lē sa aunoa ma le agasala le solitulafono a i tatou uma. Sa fa'apea ona mata'utia o le uiga o le sala na fa'ae'eina atu iā te Ia, na tauau ai ina ōfi atu i Lona

finagalo le mata'u ina ne'i 'avea le ta'ufa'atasia o Ia ma lenā vaega inosia ma āla e fa'ate'a'eseina ai o Ia e fa'avavau mai le alofa o Lona Tamā. Talu ai ina ua fa'afogaina e Ia le mata'utia e lē maf'amatalaina o le to'asā o le Atua i lenei mea o le solitulafono, na Ia 'alaga ai, 'Ua matuā tigā lo'u loto e o'o i le oti.'

"Sa lagona e Ia ua fa'ate'a 'eseina o Ia e le agasala mai Lona Tamā. O le vanu sa i Ōna luma ua fa'apea ona vā tele, ma le pogisā, ma le loloto, ua gatete ai Lona agaga. O lenei puapuagā sa lē tatau lava ona fa'aaogāina ai e Ia e Lona mana fa'ale-Atua e fa'asaoina mai ai o Ia. Talu ai ona ua 'avea o Ia ma tagata, sa ao ai lava ona Ia tau'aveina o le avega 'atoa o fua o le agasala a le lalolagi. Sa ao iā te Ia, Lē ua 'avea ma tagata, ona ia fa'afesāga'i ma le mata'utia o le to'asā o le Atua i le soli tulafono." - O le Fa'anaunauga o Tupulaga, itulau e 685,686.

4. **Mata. 27:45, 46** Sa si'omia Iesu i le pouliuli māfiafia, na Ia lagona ai le fa'apuapuagāina o Lona mafaufau ina ua vavae 'eseina o Ia mai le Atua.

"I lenā itūaso faigatā na lē maua ai e Iesu le fa'amafanafanaga o le fa'atasi mai o le Tamā. Na Ia solia to'atasi le tu'ugāuaina (winepress), a o le nu'u sa leai so latou e fa'atasi ma Ia" (Isaia 63:3).

"O le 'alo 'ese iā te Ia o foliga pa'ia o fofoga o le Tamā i lenā itūaso o Lona puapuagā aupito tele, na tu'ia ai Lona finagalo i le fa'anoanoa, o lona fua 'atoa e lē mafai e se tagata ona malamalama i ai. Sa fa'apea ona tele o Lona puapuagā fa'ale-maufaufau, na tau lē lagona ai e Ia o mea na o'o i Lona tino." - O le Fa'anaunauga o Tupulaga, itulau e 753,752.

5. **Ioa. 19:30-37** Na ala ona maliliu Iesu ona o le finagalo momomo. Na pā'ia le fatu o le Ali'i Fa'aola e le tao a le tagata tau, ona sisina lea mai, "**o le toto ma le vai.**" O le fa'ailoga lea o se loto ua nuti momomoina i se puapuagā tele.

"Sa lagona e Iesu le puapuagā e pei lava o le puapuagā o le a lagona e le tagata agasala pe a o'o ina fa'ai'uina le galuega o le alofa tunoa mo tagata. O le 'avega inosia o le agasala na o'o atu ai le to'asā o le Atua iā te Ia, Lē ua 'avea ma sui o le tagata, na ala ai ona o'ona tele o le ipu na Ia inu ai, ma na i'u ina momomo ai le finagalo o le Ālo o le Atua." - O le Fa'anaunauga o Tupulaga, itulau e 753.

TAULOTO: Roma 6:23

"O le taulaga na saunia e Keriso mo le togiolaina o i tatou mai le agasala, o le 'autū tāua lava lea e tau atu i ai upu moni uma lava." - O le 'Au Faigaluega o le Tala Lelei, itulau e 315.

O LE TOE SOIFUA MAI O KERISO

- I.** Ua lē gata i le maliu o Iesu ona valo'ia mai i le Feagaiga Tuai, a ua fa'apea fo'i ma Lona toe soifua mai.

Sala. 16:9, 10 Ua folafolaina mai e Tavita le toe soifua mai o Iesu mai le tu'ugamau. (Ia fa'atusatusaina ma le Galu. 2:24-27).

- II.** Na folafolaina e Iesu lava Lona toe soifua mai.

1. **Ioane 2:19-21** I nā lepeti ia, ona 'Ou toe faia lea (o lo'u tino) i aso e tolu.
2. **Mataio 16:21** E fa'atūina mai o Ia i le aso tolu.
3. **Mata. 27:62, 63** Na fai mai lenā tagata, "**A mavae aso e tolu, 'ou te toe tū mai ai.**"

- III.** E tele molimau e lē ma-fa'afitia o le toe fa'a-soifuaina mai e Iesu mai ē ua oti.

1. O le molimau a le tu'ugamau ua tu'ufua (Mata. 28:1-8; Luka 24:1-12; Ioane 20:1-13).
2. O le molimau a i latou o ē na latou va'aia o Ia ina ua mavae o Lona toe soifua mai (Mata. 28:16,17; Galu. 1:3; I Kori. 15:4-8).
3. Ua 'avea le i ai o le Ekalesia Kerisiano na molimau tāua. Na 'avea le toe soifua mai o Keriso ma āla na toe fa'a-lototeteleina ai le 'au so'o, ma latou ō atu ai e tala'iina le tala lelei ma le mana tele (Luka 24:30-48). Na fa'avaeina ai le Ekalesia talu ai la latou molimau. O le talitonuga i le toe soifua mai o Keriso, o le tasi lea poutū o le fa'atuatūāga fa'ale-Ekalesia Kerisiano.
4. O le molimau e lagona i le loto. E to'atele ua latou talitonu o lo'o soifua Keriso ona o le molimau ua lagona i o latou lava loto, e pei o Paulo (II Timo. 1:12).

- IV.** O le toe soifua mai o Keriso, o le tasi lea matā'upu sa matuā iloga ona fa'amamafaina e le 'au aposetolo i la latou tala'iga. O se matā'upu fa'avae lava lea o le tala lelei (Liliu i mau nei: Galue. 2:32; 3:15; 4:10; 10:39, 40; 17:18, 31; 25:18,19).

- V.** O le fa'amoemoega o le Kerisiano ua i le Keriso ua toe soifua mai. A o le tagata e lē o i ai o se Fa'aola, a o le Fa'aola (Keriso) na maliu mo Ia.

1. **I Kori. 15:14** E leai so tatou fa'amoemoe vaganā ona ua toe soifua mai Keriso.
2. **I Kori. 15:17** E leai se fa'amagaloga o agasala.
3. **I Kori. 15:18** E leai se toe tutū o ē ua oti.
4. **I Kori. 15:19** E fa'agataina i lenei olaga mea tatou te fa'amoemoe i ai.

- VI.** E i ai le sauniga tāua fa'ale-tala lelei ua fa'atonuina e Iesu e fai ma ala e fa'amanatuina ai Lona toe soifua mai, o le papatisoga lea i lona faiga fa'ale-Tusi Pa'ia, o le fa'atofu.

1. **Roma 6:3-5** E toe alu a'e nai le tu'ugamau suāvai e "pei ona toe fa'atūina mai o Keriso mai ē ua oti."
2. **Kolose 2:12** E toe tutū fa'atasi ma Ia i le papatisoga. (Kolose 3:1).

TAULOTO: I Korinito 15:14.

"O le ola na lē iloa ona o le agasala, ua toe fuata'iina lea e lo tatou Fa'aola, auā o lo'o i totonu iā te Ia le ola Na te fa'aolaina ai i latou ua ia finagalo i ai."- *O le Fa'anaunauga o Tupulaga*, itulau e 786.

O LE TOE AFIO A'E O KERISO I LE LAGI

- I. Sa ao lava mo lo tatou lelei ona 'ia tu'ua ai e Iesu o lenei lalolagi, a e toe afio a'e i le Tamā. E le'i toe afio a'e Iesu i le lagi ona o se lelei mo Ia lava, a e peita'i ona o le sa'iliga o le manuia mo i tatou.

Ioane 16:7 Na Ia toe afio a'e i le lagi ina ia maua ai e Ōna tagata uma lava le feso'ota'iga ola ma Ia i le Agaga.

“Talu ai le tino tagata ua iā te Ia, ua lē mafai ai e Iesu ona fa'atasi atu i mea uma. O lea sa tatou ai ma aogā mo Lana fanau Lona afio atu i le Tamā, ua Ia auina mai ai le Agaga e 'avea Mona sui i le lalolagi. O le fa'atatau lea ua lē fa'apito ona ta'u'amuiaina ai o se tasi vaega ona ua latou nonofo latalata i le mea e afio ai le Ali'i; a ua 'avea le afio mai o le Agaga Pa'ia ma āla ua fa'atau tutusa ona maua ai e tagata uma o le mafutaga fa'atasi ma le Fa'aola. Ua fa'apea ona 'avea o Lona toe afio a'e i le lagi ma āla ua Ia fa'alatalata mai ai iā te i tatou e sili i lo Lona nofo pea i lalo nei.” - *O le Fa'anaunauga o Tupulaga, itulau e 669.*

- II. A o i ai pea o Ia i lenei lalolagi, na folafolaina atu lava e Iesu Lona toe afio a'e i le lagi.

1. **Ioane 6:62** A o lumana'i pea Lona maliu, na Ia fetalai ai i Lona toe fo'i atu i le Tamā.
2. **Ioane 20:17** Sa faapea foi ina ua mavae o Lona toe soifua mai.

- III. Na molimau le to'asefulu ma le to'atasi i Lona afio a'e.

1. **Luka 24:50, 51** Na Ia afio a'e mai Petania a o fa'amanuia atu i Lona 'au so'o.
2. **Gal. 1:9-11** Na 'aveina a'e o Ia i le ao nai o latou luma.

*"Ina ua latou o'o atu i le Mauga o Olive, sa ta'ita'iina loa i latou e Iesu i le ala e ui ane i le tumutumu mauga aga'i i Petania. Ua fa'alatalata atu i le a'ai, ona Ia tū ai lea, a ua fa'apotopoto ane iā te Ia le 'au so'o. Sa 'ese le pupula o Ōna fofoga ina o silasila atu o Ia iā te i latou ma le alofa. Sa lē molia i latou e Ia ona o o latou pona ma o latou vaivai, a e peita'i o toe upu na latou fa'alogoaina mai le fofoga o lo latou Ali'i, o upu ua tumu i manatu alofa mo i latou. Na fa'alooa atu Ōna a'ao iā te i latou i le fa'amanuiāga, peised'i o se fa'amaoni o Lana puipuiga iā te i latou, ona afio a'e ai lea o Ia mai iā te i latou. Ua si'itia a'e aga'i i le lagi e le mana ua sili atu i so'o se malosia fa'alalo nei. Sa o'otia le 'au so'o i le mata'u tele, i le a o afio a'e o Ia, sa tulumata'i a'e i latou i le lagi ona o le fia pu'eina o foliga o totoo o lo latou Matai. Mulimuli ane, ua liloia ma ufitia o Ia i le ao pupula, ma ua talia e kariota a le 'au agelu; a e fa'alogoaina e le 'au so'o o Lana toe fetalai, 'Fa'auta, ou te iā te outou i aso uma lava, e o'o lava i le gata'aga o le lalolagi'.” - *O le Fa'anaunauga o Tupulaga, itulau e 830.**

3. **Gal. 9:3-5** Na fa'aali Iesu iā Saulo ina ua mavae o Lona afio a'e.
4. **Gal. 7:55** Na va'aia Iesu e Setafano o i lugā i le lagi.

- IV. O lo'o afio nei Keriso i le itū taumatau o le Atua.

1. **Sala. 24:7-10** Na talia Iesu i 'au uma o le lagi i Lona toe afio a'e.
2. **Mare. 16:19** O lo'o i ai nei o Ia i le itū taumatau o le Atua le Tamā.

3. **Eperu 8:1, 2** "I le itū taumatau o le nofoāli'i o Lē Silisili 'ese."
4. **Fa'aal. 3:21** "Ma lo'u Tamā i Lona nofoāli'i."

V. Ona o le fa'atuatua iā Keriso ua mafai ai nei ona tatou fa'alatalata atu i le Atua e peisea'i o lo'o tatou fa'afesaga'i lava ma Ia.

1. **Efeso 1:6** Ua agalelei fua mai le Atua ona o "Lē ua alofagia."
2. **Epe. 10:19, 20** Ua tatou sa'oloto e ūlu atu i le mea e sili ona pa'ia ona o le fa'atuatua i le toto o Iesu.
3. **Epe. 4:11-16** Ua mafai ona tatou fa'alatalata atu i le nofoa o le alofa tunoa ma le fa'amalosi ona o Ia.
4. **Epe. 6:19, 20** O le fa'atuatua moni e o'o i totonu i tala atu o le 'ie puipui.

TAULOTO: Ioane 16:7.

"Na afio a'e Iesu i le lagi ma Lona uiga fa'ale-tagata ua fa'apa'iaina. O i latou uma o ē latou te talia o Ia, Na te 'avatu i ai o lea manuia ia 'avea i latou ma fanau a le Atua, ina ia i'u ina talia ai i latou e le Atua e fai Mona, ma ia latou nonofo fa'atasi ai ma Ia e fa'avavau lava." - O Fe'au o le Fa'amalōlōga, itulau e 421.

O LE GALUEGA FA'AFAUTUA A LE FAITAILAGA SILI

- I.** Talu ai ina ua fa'ate'a 'eseina e le agasala le tagata mai le Atua, ua ao ai ona i ai o se fautua (puluva) ina ia mafai ona toe maua ai o se feso'ota'iga i le vā o le tagata ma le Atua.

1. **Isaia 59:2** O le agasala ua ala ai ona i ai o le pupuni i le vā o le tagata ma le Atua. **O le Fautua**, o ia lea e tū i le vā o ni vaega se lua ma ua 'avea o Ia ma ala o le a mafai ona feso'ota'i ai o ia vaega.

Ua lē mafai lava se feso'ota'iga i lo tatou vā ma le Atua, vaganā ona ua i ai o so tatou fautua. Ua ao lava mo le fa'aolaina o le tagata ona i ai o se tasi na te toe fa'asoso'oina le avanoa ua i ai i le vā o le tagata agasala ma le Atua.

2. **Kene. 28:10-12** Sa a'oa'oa atu le Atua i tagata, o lo'o i ai le ala e mafai ona feso'ota'i ai o le tagata agasala ma le Atua.

"O le afe'fa'i, o Keriso lava lea (Ioane 1:51). Pe 'ana lē fa'asoso'oina e Iesu le avanoa na mafua ona o le agasala, po ua lē mafai e le 'au agelu ona faia o la latou galuega fesoasoani mo tagata agasala. O le tagata ua vaivai, ma ua lē mafaia e ia i lona lava malosī ona faia o se mea, a ua fa'afeso'ota'iina nei o ia e Keriso ma le Pogai o le malosī uma lava." – O Pateriaka ma Perofeta, itulau e 184.

- II.** E to'atasi lava le Puluva i le vā o le Atua ma tagata.

1. **I Timo. 2:5** O le Tagata o Keriso Iesu.
2. **Mata. 16:13, 16** O Lona itū tagata (Atali'i o le Tagata) ua maua ai e Keriso le feso'ota'iga ma le fanau a tagata; a o Lona itū Atua (Ālo o le Atua) ua Ia fa'afeso'ota'i ai ma le nofoāli'i o le Atua.
3. **Ioane 14:6** E tasi le āla e ui atu ai i le Tamā, ua na o Keriso lava.
4. **Efeso 2:18** O Ia ua tatou maua ai le ta'ita'iga i le Tamā.

- III.** Ua ōno ma tataua ona 'avea o Keriso ma puluva i lo tatou vā ma le Atua, ona o le tofi ua iā te Ia, o Ia o lo tatou Faitailaga Sili.

1. **Eperu 5:1** O le galuega a le faitailaga sili e pei ona fa'amalamalamaina mai i sauniga fa'a-fa'atua i ōna pō o Isaraelu, o ia lava o se fautua (puluva) i le vā o le Atua ma tagata. "Ua tofia i latou mo tagata i mea a le Atua."
2. **Eperu 3:1** O Keriso o le Aposetolo ma le Faitailaga Sili ua ta'uta'uina e i tatou.
3. **Eperu 7:24, 25** Talu ai ona ua 'avea Keriso ma o tatou Faitailaga Sili, ua mafai ai ona tatou "fa'alatalata atu i le Atua ona o Ia."

- IV.** Na amataina e Keriso Lana galuega fa'a-Faitailaga ina ua mavae o Lona toe afio a'e i le lagi. A o lumana'i pea Lona liu tino tagata ma Lana galuega i le lalolagi, sa lē tataua ona 'avea ai o Ia ma a tatou Faitailaga Sili. Sa ao lava ona mua'i liu tino tagata Iesu i le fa'ato'ā mafai ai ona 'avea o Ia ma a tatou Faitailaga Sili; auā:-

1. O faitailaga sili uma na "filifilia mai i tagata" (Epe. 5:1, 2). Sa lē mafai se agelu ona 'avea ma faitailaga mo le fanau a tagata. O lea ua 'avea ai Keriso ma Tagata e pei lava o i tatou, ina ia mafai ai ona 'avea o Ia ma o tatou Faitailaga Sili (Epe. 2:16,17).

2. O faitaulaga sili uma sa tatau ona avatu mea alofa ma taulaga, ina ia maua ai se ala e mafai ona feiloa'i ai ma le Atua (Epe. 5:1). O le mea lea sa ao ai iā Iesu ona mua'i fa'ataunu'uina o Lana taulaga i luga o le Satauro i le fa'ato'a mafai ai ona amataina e Ia o Lana galuega lelei. Sa nofo o Ia i le itū taumatau o le Atua ina ua mae'a ona Ia avatu o le taulaga mo agasala.
3. O faitaulaga sili uma e ao ona "filifilia e le Atua" (Epe. 5:4). O le mea lea na vala'auina ai Keriso e le Atua ina ia 'avea o Ia ma o tatou Faitaulaga Sili (Epe. 5:5-10; 3:2). Ua fa'amaoni i Lē na tofia o Ia.

V. Ua apoapoa'iina i tatou ia tatou "mafaufau i le aposetolo ma Faitaulaga Sili, o Keriso Iesu lea" (Epe. 3:1). O lea se'i tatou mafaufau ai i Lona uiga.

1. **Eperu 2:17** O le Faitaulaga Sili e alofa ma fa'amaoni.
2. **Eperu 2:18** Ua mafai ona fesoasoani i ē ua tofotofoina.
3. **Eperu 4:15** E mafai ona tigā alofa fa'atasi ma i tatou i o tatou vaivai.
4. **Eperu 7:25** E mafai ona fa'aola pea lava.
5. **Eperu 7:26** "E pa'ia, e agamalū, e leai sona leaga, e taumamāo ma ē agasala, e silisili fo'i ia i luga o le lagi."

VI. A o tatou o mafaufau i le uiga o lo tatou Faitaulaga Sili, ia tatou manatunatu fo'i i Lana galuega.

1. **Eperu 7:27** Ua atu tasi lava ona faia e Ia o le taulaga ua ato'atoa ona lavā (Epe. 10:10-14).
2. **Eperu 10:19-22** Ua Ia saunia mo i tatou le ala fou i le Tamā.
3. **Eperu 9:24** O lo'o iloa nei o Ia i luma o le Atua mo i tatou.
4. **Eperu 7:25** E fautua o Ia mo i tatou.
5. **Eperu 12:24** O Ia o le Puluva o le Feagaiga Fou.

TAULOTO: Eperu 3:1.

O LE MALUMALU I LE LAGI

- I.** O sauniga fa'a-fa'atusa i ōna pō o le Feagaiga Tuai, o ata lava ia o le galuega fa'a-fautua a le Ali'i Fa'aola, ma sa fa'a-'autūina lava i le fale fetāfa'i (malumalu), auā o le mea tonu lea sa fai ai e le faitaulaga sili lana galuega mo tagata agasala.

1. **Esoto 25:8** O le fa'atonuga a le Atua na āla ai ona faia o le malumalu fa'ale-lalolagi.
2. **Levi. 19:30** Ia āva ma matata'u le fanau a le Atua i le malumalu.
3. **Eperu 9:1-5** O le fa'amatalaga o le malumalu, ma ōna potu, atoa ma ana meāfale sa i ai.

- II.** O le malumalu fa'ale-lalolagi ma ōna potu e lua, o ana meāfale, a e maise ōna sauniga ese'ese, o āta lava ia o le malumalu e sili ona lelei, o le fa'ale-lagi lea, o lo'o fai ai le galuega fa'a-Fautua a Iesu mo i tatou.

1. **Eso. 25:8, 9, 40** Sa fa'aali iā Mose le āta o le malumalu.
2. **Eperu 9:23** O mea sa fa'aali iā Mose, o "fa'atusa ia o mea o i le lagi."

"A o i ai Mose i le mauga, sa fofolaina ai e le Atua i ōna luma se ata o le malumalu fa'ale-lagi, ma Na poloa'iina o ia ia na faia mea uma e tusa ma le ata na ia va'aia. O nei fa'atonuga uma na fa'amauiina e Mose ma le fa'aeteete lava ma na fa'ao'oina atu i ta'ita'i o le nu'u." - O Pateriaka ma Perofeta, itulau e 343.

3. **Eperu 9:8, 9** Sa 'avea le malumalu muamua o se fa'atusa.
4. **Eperu 8:5** O sauniga o le malumalu fa'ale-lalolagi, o mea fa'aa'oa'o ia ma ata o mea fa'ale-lagi.

Manatu Fa'aopoopo:- O nei mau ua manino ona fa'ailoa mai ai, o lo'o i ai ma se isi malumalu, ma o lo'o fai ai fo'i ma se isi galuega fa'a-fautua, ua ala ai ona 'avea o le malumalu fa'ale-lalolagi ma mea fa'aa'oa'o po o se ata. Talu ai o na ua 'avea mea fa'ale-lalolagi ma "fa'atusa o mea o i le lagi," ua tatau ai ona tatou talitonu, o lo'o i ai i le lagi le malumalu ma le galuega fa'a-fautua o lo'o fai ai.

- III.** O le fale fetāfa'i po o le malumalu moni, ua i le lagi lea.

1. **Eperu 8:1, 2** O lo'o au'auna Keriso i le malumalu ua faia e le Atua i le lagi.
2. **Salamo 11:4** Sa iloa e i latou o ē na latou tusia le Feagaiga Tuai, e i ai le malumalu i le lagi. (Sapakuka 2:20).
3. **Eperu 9:24** E foliga le malumalu i le lagi i le malumalu fa'ale-lalolagi ina ua i ai o mea (potu) pa'ia.
4. **Fa'aal. 4:1, 5** Na iloa e Ioane le potu muamua o le malumalu i le lagi, o i ai le tu'ugālamēpa ma le fata o fa'amū ai mea manogi. (Fa'aal. 8:3). Na ia iloa atu Iesu o au'auna ai. (Fa'aaliga 1:11-13).
5. **Fa'aal. 11:19** Na ia iloa foi ma le mea e sili ona pa'ia. (Faitau ma le Fa'aaliga 15:5, 8).
6. **Eperu 9:11** O le fale fetāfa'i i le lagi, o se fale fetāfa'i e sili ona lelei ma le ato'atoa.

TAULOTO: Eperu 8:1, 2.

"O le malumalu i le lagi, o le 'autū lava lea ma le totonugalemū o le galuega a Keriso mo tagata."- O le Finauga Tele, itulau e 488.

O SAUNIGA O LE MALUMALU

I. O sauniga o le malumalu fa'ale-lalolagi, o ata lava ia o sauniga o le malumalu fa'ale-lagi. O le mea lea ua tatau ai lava ona tatou ma'elegā a su'esu'e i sauniga fa'a-fa'atusa ina ia manino lelei ai iā te i tatou le tino fa'ale-lagi e fa'asino i ai.

1. **Roma 15:4** "O mea uma fo'i na tusia anamua," (e aofia ai ma mea uma ua tusia e uiga i le malumalu ma ona sauniga), na tusia ia e a'oa'o mai ai iā te i tatou.
2. **Eperu 8:5** O sauniga o le malumalu, o ata lava ia.

II. E ui i le tele o sauniga ese'ese ma taulaga o le malumalu, a e sa iloga ona vaevaeina i vaega tetele e lua:-

1. **O sauniga sa faia i aso faiso'o** i le potu muamua o le malumalu (Eperu 9:6).
2. Ma sauniga sa faia fa'atasi i le tausaga i lona lua o potu, o le mea lea e sili ona pa'ia. Sa ta'ua "o sauniga o le Aso o le Togiola" (Eperu 9:7).

Manatu Fa'aopoopo:- Talu ai ona ua tatau ona fa'afeagai lelei o le ata ma lona tino e fa'asino i ai, ua tatau ai ona tatou talia o lenei fa'ai'uga e lē ma-'alofia. O lo'o fa'apenā lava fo'i ona vaevaeina o le galuega a lo tatou Faitaulaga Sili i le malumalu fa'ale-lagi (Epe. 8:1, 2) i vaega muamua e fa'asino i le potu muamua, a o lona lua e fa'asino i lona lua o potu o le malumalu i le lagi.

III. O le a'ano o sauniga sa faia i aso faiso'o, o le 'ave'eseina lea o le agasala a le tagata agasala ua salamō mai iā te ia ma tu'uina atu i totonu o le malumalu. E lua ala fa'a-fa'atusa na fa'ataunu'uina ai lea mea:-

1. **O le sausuina o nisi toto o le taulaga i totonu o le malumalu**, (e pei ona faia pe a agasala se faitaulaga po o le fa'apotopotoga 'atoa uma). (Faitau ma le fa'autauta i le Levitiko 4:1-21). Mai le tagata agasala, na tu'uina atu ai le agasala i le manu o le taulaga ina ua fa'ae'eina ai ōna lima ma fa'aali i ona luga lana agasala (Levi 16:21). O na 'avea ai lea o le toto o le taulaga ma āla e fa'ao'oina atu ai le agasala i totonu o le malumalu. O le ga'o o le taulaga, na 'ave 'eseina ma susunuina i luga o le fata e fai ma taulaga mū (F. 8-10, 19). A e peita'i le tino o le manu na 'ave i tua o le to'āgalauapi i se mea mamā ma susunuina ai i le afi (F. 12, 21).
2. **O le 'aiina o le a'ano e le faitaulaga i le lotoā o le malumalu**. (Faitau i le Levitiko 4:22-35). Ua fa'amatalaina mai ai le fa'asologa o le sauniga pe a agasala se ali'i po o se tasi o le nu'u. Matau lelei, ua lē 'ave se toto i totonu o le malumalu, ua lē 'ave fo'i le tino i tua o le to'āgalauapi e susunu ai. Sa fa'apenei le faiga:-
 - a. **Levi. 6:30** Pe a 'ave nisi toto o le taulaga ma sausuina i totonu o le malumalu, ua lē 'aina lona a'ano.
 - b. **Levi. 6:24-26** A e a lē o'o le toto i totonu o le malumalu ma ua lē 'ave fo'i le tino i tua o le to'āgalauapi e susunu ai, ona 'aiina lea e le faitaulaga i le lotoā o le fale fetāfa'i.
 - c. **Levi. 10:16-19** O le 'aina o le a'ano o le taulaga mo agasala, o le tasi lea ala fa'a-fa'atusa na fa'ao'oina atu ai agasala i le malumalu, ina ua tau'aveina e le faitaulaga i lona lava tino ma na ulu atu ai i totonu o le malumalu.

(Ia fa'atusatusaina ma le I Pete. 2:24; "I lona lava tino ... ina ia tete'a outou ma agasala").

- d. **Levi. 4:20, 26, 31** Sa fa'apea ona fa'amagaloina o le tagata agasala ina ua ato'atoa ona 'ave 'eseina o āna agasala mai iā te ia. Sa 'avea le taulaga na fasia ma togiola e lavea'iina ai o ia mai lana agasala ma na maua ai le leleiga ma le Atua.

IV. O nei sauniga sa faia i aso faiso'o, na fa'amalamalamaina ai le vā o le tagata agasala ma lona Fa'aola o Iesu Keriso.

1. **Gal. 2:38** Ia salamō le tagata agasala.
2. **I Ioane 1:9** Ia fa'aali ana agasala.
3. **Ioane 1:29** E tau'aveina ana agasala e Iesu.
4. **Eperu 8:1, 2** Ona o Keriso ua fa'ao'oina atu i ana agasala i le malumalu fa'ale-lagi (Eperu 9:12).

Ia manatua lelei:- O le Levitiko mataupu e 4, ua fa'ailoa mai ai sauniga o aso faiso'o; a o le Levitiko matā'upu e 16, ua fa'amatalaina mai ai sauniga o le Aso o le Togiola.

"O le fautuāga a Keriso mo le tagata i le malumalu i le lagi, ua ao lava lea mo le fa'aolataga fa'apei lava fo'i o Lona maliu i luga o le satauro." - O le Finauga Tele, itulau e 489.

TAULOTO: Eperu 8:5.

UA FA'APA'IAINA PO O LE FA'AMAMĀINA O LE MALUMALU

- I. Talu ai ona sa tu'uina atu pea agasala a le nu'u i totonu o le malumalu i aso faiso'o, o lea sa ao ai i le fa'ai'uga o le tausaga fa'ale-malumalu ona i ai o se sauniga mo le toe 'ave 'eseina atoa o ia agasala. Sa ta'ua lea sauniga o le **Aso o le Togiola**, auā o lona a'ano moni lea, o le matuā tineia ma 'ave 'eseina o agasala. O le aso sefulu o le masina e fitu na pa'ū tonu i ai.
1. **Levi. 23:28-26** "Auā o le aso lea o le togiola, e fai ai se togiola mo outou i luma o Ieova."
 2. **Levi. 23:29-30** O le aso pa'ia ma le faigatā. O se tasi na lē fa'apupuagātia o ia e ia, na vavae 'eseina o ia i lona nu'u. Sa fa'aigoaina e Iutaia lenā aso o le "**Yom-ha-din-the**," o le upu Eperu lea, o lona uiga pe a fa'a-Samoaina, "o le **Aso o le Fa'amasinoga**."
 3. **Eperu 9:7** Ua na o lea le aso e tasi i le tausaga sa taga ai ona ulufale atu o le faitaulaga sili i le potu i tua e fai taulaga ai "mo agasala a le nu'u."
 4. **Levi. 16:16, 19** O le aso lea na fa'amamāina ma fa'apa'iaina ai le malumalu "ai le leaga o le fanauga a Isaraelu" sa tu'uina atu i ai.
 5. **Levi. 16:33** Na fai ai le togiola mo le malumalu, le fata faitaulaga, le 'au faitaulaga, 'atoa ma tagata uma o le fa'apotopotoga.
- II. I sauniga o le malumalu fa'ale-lalolagi sa ao ai i le faitaulaga sili ona mua'i faia o se togiola mo āna lava agasala, i le fa'ato'ā taga ai ona ia fa'asaga atu e fai se togiola mo le nu'u. O le a'oa'oga lea iā Isaraelu ina ia latou mautinoa ai, ua na o se tasi ua aunoa ma le agasala na te mafai ona au'auna mo le nu'u i le mea e sili ona pa'ia. Ua le ao iā Keriso, le au'auna o le fale fetāfa'i moni i le lagi, ona mua'i faia o se togiola mo Ia lava, auā e lē o iā te Ia se agasala.
1. **Levi. 16:1-16** O le taulaga a le faitaulaga sili mo āna lava agasala, o le povi po'a ta'anoa.
 2. **Levi. 16:11-14** O le faiga o le togiola mo agasala a le faitaulaga sili.
 3. **Eperu 7:26, 27** Ua lē ao iā Iesu ona muamua fai o se togiola mo Āna lava agasala, auā e leai Sona leaga.
- III. I sauniga fa'a-fa'atusa o le aso o le togiola, e lua 'oti sa fa'aaogāina. O le tasi 'oti o le fa'atusa o Keriso, a o le tasi o le fa'atusa o Satani.
- Levi. 16:7-10** O le 'oti na fa'asaga i ai le vili a Ieova, o le sui lea na fasia mo agasala a le nu'u sa fa'aputuina i le malumalu i lea tausaga (F. 9). O lona lua o 'oti, o le 'oti lea sa tu'u atu e alu i le vao, o "**Azezel**" lea po o "**Asesela**" pe a fa'a-Samoaina. (Fa'aaogā le Tusi Pa'ia Peretania, silasila i le pito e fa'atatau i le upu "**scapegoat**" Levi. 16:8). O Asesela o le igoa fa'a-Eperu lea e fa'atatau tonu iā Satani.
- IV. Na ala ai ona sausuina i luga o le nofoa o le alofa, i luga a'e tonu o papa ma'a e lua o le tulafono sa i totonu o le atola'au (Levi.16:15; Esoto 25:16).
1. Na fasia le 'oti a Ieova ina ia 'avea ma taulaga mo agasala a le nu'u (Lev. 16:15). Ua fa'apea ona 'avea Keriso ma o tatou Sui, "o le Taulaga ma le Togiola i le Atua" (Efeso 5:2).
 2. Na 'aveina le toto o le taulaga ('Oti a Ieova) e le faitaulaga sili i totonu o le mea e sili ona pa'ia ina ia togiolaina a'i soligā tulafono a le nu'u.

O le tino tāua fa'ale-lagi e fa'asino tonu i ai lenei ata, o le ulufale atu lea o Keriso, lo tatou Faitaulaga Sili, i le mea e sili ona pa'ia i le malumalu o i luga i le taimi e amataina ai le fa'amasinoga. Na te 'aveina e lē o le toto o se manu, a e peita'i o Lona lava toto pa'ia, o le togiola lea ua lava ato'atoa mo le fa'amamāina o lē ua fa'atuatua moni ai mea uma ua ia 'aleu ai i le vā feagai ma le tulafono pa'ia a le Atua.

- a. **Fa'aal. 11:19** Na iloa atu e Ioane le mea e sili ona pa'ia i le lagi, ua fa'aavanoaina. O ōna pō tonu ia o le iliga o lona fitu o pū i le T.A. 1844, e amata ai le fa'amasinoga (F. 15).
- b. **Tani. 7:9, 10** O ōna pō tonu fo'i ia e fa'asino i ai le fa'aaliga na va'aia e Tanielu, na ia iloa atu ai le fa'amasinoga ua nofoia ma tusi ua fofolaina, o le a su'esu'eina mea o tusia ai.
- c. **Tani. 7:13** O Keriso, lo tatou Faitaulaga Sili, ua ulufale atu i le mea e sili ona pa'ia o lo'o afio ai le Tamā.
- d. **Kala. 3:13** Ua fa'atauina mai i tatou (o ē ua fa'atuatua) e Keriso ai le fa'afanoga o le tulafono, o le a lē o'otia ai i tatou i lona fa'asalaga i le fa'amasinoga.
- e. **I Ioa. 1:7** O le toto o Iesu e fa'amamāina ai i tatou i agasala uma lava.
- f. **Mata. 10:32** E ta'uta'uina e Iesu igoa o Ōna tagata fa'atuatua i le fa'amasinoga.
- g. **Fa'aal. 3:5** Ona lē soloi 'esea lea o o latou igoa i le tusi o le ola.
- h. **Gal. 3:9, 10** A o le a soloi 'esea a latou agasala.
3. Sa 'avea le toto o le taulaga ma ala na fa'amamāina ai e le faitaulaga sili le malumalu mai agasala uma na tu'uina atu i ai (Levi. 16:18-19). E fa'apea ona 'avea o le toto pa'ia o Iesu ma ala o tineia ai a tatou agasala o lo'o tusia i luma o le Atua i le lagi (Jerem. 2:22), ma fa'amamāina ai le malumalu fa'ale-lagi.
4. Pe a uma ona faia o le togiola mo agasala a le nu'u i le toto o le 'oti a Ieova, ona fa'ae'eina atu ai lea o agasala uma i luga o le ūlu o le 'oti e tu'uina atu e alu i le vao, o Asesela lea (Levi. 16:20, 21). O le a fa'apea fo'i pe a uma ona tineia o agasala a le fanau a le Atua ona fa'ae'eina atu lea o agasala uma i luga o le ūlu o lē na mafua ai, o Satani lea. (Fa'aaogā le Salamo 7:15).
5. Na 'ave 'eseina lona lua o 'oti, o Asesela lea, mai luma o le Atua ma fa'aālu i le vao (le nu'u e lē ainā), na i'u ina fano ai o ia (Levi. 16:22). Sa fa'apea ona fa'a-āunu'uaina o Asesela mai luma o le Atua ma le fa'apotopotoga pa'ia o Lana fanau ua fa'amamāina. I le o le a fa'apea fo'i pe a fa'ai'uina le galuega fa'a-faitaulaga a Iesu i le lagi ona fa'a-āunu'uaina ai o Satani ina o le a fusifusia ma taofia i lenei lalolagi ua tu'ufua ma gaogao i tausaga e afe o le meleniuma (Fa'aal. 20:1-3). O le lalolagi nei fo'i o le a i'u ina fa'a'umatia ai Satani (Fa'aal. 20:10).
6. Pe a o'o ina ua fa'ai'uina sauniga o le aso o le togiola, ona sui ai lea o 'ofu o le faitaulaga sili (Levi. 16:23). O le a fa'apea fo'i Keriso pe a i'u le fa'amasinoga ona Ia tu'u 'eseina lea o Āna teuga fa'a-faitaulaga sili a e la'ei i teuga Fa'a-Tupu ina o le a toe afio mai i lenei lalolagi e talia Lana fanau o ē sa fa'atalitali iā te Ia (Fa'aal. 19:11-16).
7. O vaega uma sa totoe o le taulaga mo agasala ua 'ave i tua o le to'āgalauapi ma susunu ai i le afi ina se'ia toe ai na o lefulefu pe a o'o ina ua pō le aso o le togiola (Levi. 16:17). O le a fa'apea lava fo'i ona fa'apotopotoina mai e Keriso mai Lona malō o mea uma e tausuai Ia ma ē amio leaga uma ma Na fa'a'umatiaina. E fai i latou ma efuefu i luga o le fogā'ele'ele pe a i'u le aso o le to'asā o le Atua (Mata. 13:41-43; Mala. 4:1-3).

“Ua tatau i le fanau a le Atua ona latou malamalama lelei i le matā'upu o le malumalu ma le fa'amasinoga. Ua ao lava i tagata uma ta'ito'atasi ona latou sa'ilia o lenei atamai o le a mafai ona latou mautinoa lelei ai le tulaga ma le galuega a lo latou Faitaulaga Sili.”-O le Finauga Tele, itulau e 488.

TAULOTO: Fa'aaliga 11:19.

O ASO E 2,300 MA LE MALUMALU FA'ALE-LAGI

I. E galue le Atua e tusa ma Lana fa'atatauga ua mae'a ona Ia fuafuaina.

1. **Faila. 3:1** O le mea ma lona tausaga i mea uma.
2. **Kala. 4:4** Na fanau mai Keriso i le taimi tonu na atofaina e le Atua.
3. **Mare. 1:15** Na amataina le tala'iga a Iesu i le taimi tonu e tatau ai.
4. **Galue. 17:31** Ua atofaina le aso mo le fa'amasinoga.

II. Ua fa'ailoa mai e le Atua le taimi tonu e tatau ona amataina ai e Keriso Lana galuega i lona lua o potu o le malumalu fa'ale-lagi, o le vaega mulimuli lea o Lana galuega fa'a-Faitaulaga Sili, ona soso'o lea ma Lona afio fa'alua mai i le lalolagi.

1. **Tani. 8:14** "Se'ia atoa afiafi ma taeao e 2,300 ona fa'apa'iaina ai lea o le malumalu." (Fa'apa'iaina = Fa'amamāina. Levi. 16:19).
2. **Esek. 4:6** O le aso e tasi fa'avalō'aga, o le fa'atatau lea o le tausaga e tasi. Ona tatou mautinoa lea, o aso e 2,300, o tausaga lava ia e 2,300 (Nume. 14:34).

I lana tusi e igoa O le Tusi ua Fa'amatalaina ai le Tusi Pa'ia, ua fa'amaonia ai e Misi Parate (L.M.S). lenei ala fa'ale-Tusi Pa'ia mo le faitauina o aso fa'avalō'aga. O lana fa'amatalaga o tausaga e 1,260, o le pule sa'oloto o Pope Roma (Tani. 7:25), ua ia fai mai ai (itulau e 388), "Le tausaga ma Tausaga, .. e fa'atatau le aso e tasi i le tausaga e tasi; ua 1,260 tausaga ia e tumau ai lana pule."

Manatu fa'aopoopo:- O le valo'aga i le Tanielu 8:14, sa tu'uina mai lea i lona tolu o tausaga o le nofoā'iga a Pelesara (Belshaser), o le T.L.M. lea e 538. O le mea lea e lē mafai ona fa'atatauina ai lenei valo'aga i le malumalu fa'ale-lalolagi; auā o nei tausaga e 2,300 pe a amata ona faitauina mai i aso o Tanielu, e tatau ona aulia atu ai o se taimi e sili ona mamao atu i luma i lo le taimi na fa'agataina mai ai sauniga o le malumalu fa'ale-lalolagi, ina ua fa'atafunā'iina e 'au a Roma i le T.A. 70. E lē gata i lea, a e sa fa'amamāina le malumalu fa'ale-lalolagi i tausaga ta'itasi uma, a e peita'i lenei malumalu ua ta'ua mai, e fa'atasi ona fa'amamāina i le fa'ai'uga o tausaga e 2,300. Ona tatou mautinoa lea, e leai lava se isi malumalu e fa'asino i ai le Tanielu 8:14, ua na o le malumalu o lo'o i lugā i le lagi (Epe. 8:1, 2).

III. O lenei valo'aga i tausaga e 2,300 ua fa'amalamalamaina mai lea i matā'upu e iva o le Tusi a Tanielu.

1. **Tani. 8:14-26** E le'i o'o ina fa'amalamalamaina lenei vaega tausaga i le taimi na maua ai e Tanielu le fa'aaliga, ona ua lē lava le malosi o le perofeta la te fa'afesaga'i ai pea ma agelu. Na manumalō le vaivai ma le ma'i iā Tanielu a o le'i o'o le fa'amatalaga a le agelu i tausaga e 2,300, a o le vaega fo'i lea sa tele ona malamalama i ai o le perofeta (F. 27).
2. **Tani. 9:1-9** Ina ua mavae atu ni nai vaiaso talu ona ia maua o le fa'aaliga, na fa'asaga atu ai loa Tanielu e su'esu'e ma le tatalo ma le anapogi, ona o le naunau tele o lona loto i le fia malamalama i lona uiga. Sa na ona iloa e Tanielu o lo'o i ai se vaega tausaga umi ua valo'ia mai, a e na te le'i iloa ona vaevaeina ma fa'atatauina. Sa manatu ifo Tanielu i lona loto, pe lē o i ai


‘ea se feso’ota’iga i le vā o lenei fa’aaliga ma tausaga e 70 o le valo’aga a Ieremia, a e peita’i ua lē fetau lava (Tani. 9:2; Ierem. 25:11). Sa lagona fo’i e Tanielu, o le malumalu lava e fa’asino i ai lenei vaega tausaga, na ala ai fo’i ona fa’asaga o lana talosaga i lenei lava matā’upu o le malumalu, ina ia fa’amalamalamaina mai iā te ia (Tani. 9:17).

3. **Tani. 9:21** Na fa’afogaina e le Atua talosaga a Lana au’auna, ma Na toe ‘auina atu le agelu mamalu o Kapelielu e a’oa’o atu iā te ia, o ia lava lea na va’aia e Tanielu i le fa’aaliga muamua.

4. **Tani. 9:22, 23** Sa fa’aali e Kapelielu iā Tanielu le āla na ‘auina mai ai o ia, o le fa’amalamalamaina lea o vaega o totoe o le fa’aaliga e le’i o’o i ai le mua’i fa’amatalaga.

5. **Tani. 9:24** O le amataga o le fa’amatalaga a Kapelielu ua manino ona aliali mai ai, o tausaga lava e 2,300 o lo’o ia tautala mai ai.

IV. O le fa’amatalaga o aso (tausaga) e 2,300.



Fa'afanua o Afiafi ma Taeao e 2,300

1. O ŌNA VAEGA UA VAEVAEINA I AI

- a. Ua muamua ona vaevaeina i vaega tetele e lua: O vaiaso sã e 70 (490) na ‘atofaina mo tagata Iutaia, ma le vaega e totoe, o tausaga ia e 1810 (Tan. 9:24).

“Ua ‘atofaina vaiaso sã e fitugafulu i lou nu’u.” O le upu “atofaina,” fa’aliliu mai i le upu Eperu o “**Nehtak**,” i le o le tasi uiga o lenei upu, o le “**cut off**” i le fa’a-Peritania, po o le “**vavae 'ese**” i le fa’a-Samoa. O lea ua tatou malamalama atili ai i le uiga o le soafuaiupu lenei, “Ua ‘atofaina, po ua vavae 'eseina, vaiaso sã e fitugafulu i lou nu’u.” Ua vavae 'eseina mai fea? Mai tausaga e 2,300. E i ai la ona tatou maua o nei vaega tetele e lua: o Vaiaso sã e 70 (tausaga e 490), e fa’asino tonu i le nu’u o Iutaia, i le ma tausaga e 1810 e totoe mai pe a uma ona vavae 'eseina o le 490 mai le 2,300.

- b. Ua toe vaevaeina vaiaso sã e fitugafulu i le vaega e tolu: 7 vaiaso sã (tausaga e 49); 62 vaiaso sã (tausaga e 434); ma le vaiaso sã e tasi (tausaga e 7) o totoe mo le fa'aatoaina o le 70 (Tanielu 9:25, 27).

2. O LE TAIMI TONU E AMATA MAI AI LE FAITAU

- a. E amata le faitauina o vaiaso sã e 70 i le taimi na o'o atu ai le poloa'iga ia toe faia ma atiina a'e Ierusalem (Tani. 9:25). Talu ai ina ua 'avea vaiaso sã e 70 ma vaega muamua o tausaga e 2,300, ua tatou mautinoa ai, o le amataga fo'i lea mo le faitauina o le valo'aga atoa.
- b. E tolu poloa'iga sa fa'ataui i le toe atiina a'e o Ierusalem:
- O le poloa'iga a Kuresa (Esera 1:1-3 i le T.L.M. 536).
 - O le poloa'iga a Tariu (Esera 7:8-12 i le T.L.M. 519).
 - O le poloa'iga a Aretaseta (Esera matã'upu e 7 i le T.L.M. 457).
- c. E ui i poloa'iga a Kuresa ma Tariu, a e peita'i i le poloa'iga lava a le tupu o Aretaseta na fa'ato'ã iloga ona una'iina malosi ai i luma le galuega o le toe atiina a'e o Ierusalem ina ua o a'e i ai Esera ma Ne'emias ma nisi ali'i loto tetele fa'apei o i la'ua. O le mea lea ua 'avea ai le T.L.M. 457 ma tausaga e amata mai ai le faitauina o vaiaso sã e 70. (Silasila i le Esera 6:14). Ua aofia fa'atasi poloa'iga e tolu peisea'i o se poloa'iga e tasi.

3. O LA'ASAGA O LE VALO'AGA MA MEA E TUTUPU AI

- a. E ãu le vaega muamua, o vaiaso sã ia e 7 po o tausaga e 49, i le T.L.M. 408 na mae'a ai le galuega o le toe atiina a'e o Ierusalem (F. 25).
- b. O lona lua o vaega, o vaiaso sã ia e 62 po o tausaga e 434, e o'o atu i le Mesia, le Ali'i (F. 25).

O lona uiga o lenei suafa Mesia, "o le Keriso" po o "Lē ua Fa'au'uina" (Ioane 1:41). Silasila i le pito o lau Tusi Pa'ia. Na fa'au'uina Keriso i le Agaga Pa'ia (Gal. 10:38) i le taimi o Lona papatisoga (Mata. 3:16).

- c. O lona tolu o vaega, o le vaiaso sã lea e tasi po o tausaga e 7. Fai mai, o le vaeluagalemū o lenei vaiaso sã o le a fasiotia ai le Mesia ma Na fa'agataina ai taulaga fa'ale-tulafono a Mose ina o le a fetui le āta ma lona tino i luga o le satauro (F. 26, 27).
- d. O le vaega mulimuli, o tausaga ia e 1810 o lo'o totoe mai le 2,300 pe a uma ona faitauina o tausaga e 490 na vavae 'eseina mo le nu'u o Iutaia. O lenei vaega tausaga e 1810, e ãu atu i le taimi tonu e amataina ai le galuega ua ta'ua o le fa'apa'iaina, po o le fa'amamāina o le malumalu.

4. O LE GALUEA'IINA O FUAINUMERA O LE VALO'AGA

- a. Mai le T.L.M. 457 se'ia o'o i le Mesia, fai mai e 69 vaiaso sã, o tausaga ia e 483. Pe a amataina le faitauina o nei tausaga e 483 i le aso muamua o le T.L.M. 457, ona o'o atu ai lea i le aso mulimuli o le T.A. 26. A e peita'i na o'o atu le poloa'iga a Aretaseta i le tau fa'ai'uga o le T.L.M. 457, i le pe a faitau mai ai tausaga e 483 ona aulia mai ai lea o le T.A. 27, o le tausaga tonu lea o le papatisoga o Iesu, na fa'au'uina ai o Ia i le Agaga Pa'ia ma Na amataina ai Lana galuega fa'a-Mesia. O aso lava ia na maliu atu ai Iesu i Kalilaia ma na Ia tala'i atu ai e fa'apea: "Ua o'o mai òna pō, ua latalata mai le malō o le Atua, inā salamō ia ma talitonu i le tala lelei" (Mare. 1:14, 15). Na silafia e Iesu ua o'o i le taimi tonu e amataina ai le tala'iga a le Mesia, e pei ona valo'ia mai e le perofeta o Tanielu.
- b. O lo'o totoe pea le vaiaso sã e tasi ai vaiaso sã e fitugafulu (70) na 'atofaina mo tagata Iutaia. O vaiaso sã e onosefulu-iva (69) e ãu mai i le T.A. 27. Pe a fa'aopoopo i ai le vaiaso sã e tasi, o tausaga ia e fitu; ona aulia mai ai lea o le T.A. 34, i le o le tausaga tonu lava lea na fa'ai'uina ai aso na tu'uina atu o le Atua i le nu'u o Iutaia e fai ma avanoa mulimuli latou te salamō ai ma liliu atu iā te Ia.
- c. O le vaeluaga-lemū o le vaiaso sã e tasi fa'avalō'aga, o tausaga ia e tolu ma le 'afa. O aso o le tala'iga a Iesu e tolu ma le 'afa tausaga mai le T.A. 27 se'ia o'o i le T.A. 31, o le vaeluaga-lemū lea o le vaiaso sã na fa'asatauroina ai Ia, ma na fa'agataina mai ai taulaga

fa'ale-tulafono a Mose ina ua taunu'u ona fasia o le Tama'i Mamoe a le Atua, Lē sa fa'asino i ai sauniga fa'a-fa'atusa sa faia i le malumalu i ia tausaga e tele. O le itulā na i'u ai le soifua o Keriso i luga o le satauro, na saeluaina ai le 'ie puipui o le malumalu i Ierusalema e fai ma fa'aailoga o le mavae atu o lona aogā ma lona mamalu (Mataio 27:51). O lenei valo'aga ua matuā fa'amaonia ai, o Iesu o Ia lava o le Mesia moni.

- d. Mai le fa'asatauroina i le T.A. 31 se'ia o'o i le fa'a'atoāga o tausaga e 490 i le T.A. 34, e tolu ma le 'afa tausaga. O le T.A. 34 na fasia ai Setefano ma amata ai le sauāina o le 'au Kerisiano e Iutaia. O ōna pō lava ia na tu'ua ai Iutaia e le 'au aposetolo, a ua liliu atu i tagata o nu'u 'ese. (Fa'aaogā le Galuega 13:46-49; 18:16; 28:28).
- e. Ua mae'a nei ona fa'amalamalamaina o le vaega muamua o le valo'aga, o tausaga ia e 490 e āu mai i le T.A. 34, a o lo'o totoe pea lona lua o vaega, o tausaga ia e 1810. Pe a fa'aopoopo tausaga e 1810 i le T.A. 34, ona maua tonu ai lea o le T.A. 1844. O le tausaga lea e fa'asino tonu i ai e valo'aga a le perofeta o Tanielu, "se'ia 'atoa afiafi ma taeao e lua afe ma le tolu selau, ona fa'apa'iaina lea o le malumalu."
- f. O lea ua tatou mautinoa ai, na amataina le fa'amamāina po o le fa'apa'iaina o le malumalu fa'ale-lagi i lenā lava tausaga ua valo'ia mai, o le T. A. lea e 1844. O lenā le tausaga na amataina ai e Iesu ona faia o le vaega mulimuli o Lana galuega fa'a-Faitaulaga Sili i le mea e sili ona pa'ia i le malumalu fa'ale-lagi.

TAULOTO: Tanielu 8:14.

O LE FA'AMASINOFA SU'ESU'E

- I.** Talu ai ona sa 'avea le aso o le togiola na fa'amamāina ai le malumalu ma aso fa'amasino iā Isaraelu, ua tatou mautinoa ai, na amataina le fa'amasinoga i le lagi i le fa'ai'uga o tausaga e 2,300, o le taimi tonu lea ua valo'ia mai o le a fa'amamāina ai le malumalu fa'ale-lagi.
1. **Levi. 23:27-29** O le aso fa'amasino iā Isaraelu na ta'itasi ma su'esu'e ifo ai i lona lava loto po o fa'a'pefea lona vā ma le Atua.
 2. **Tanielu 8:14** Na amataina le fa'amasinoga i le lagi i le tausaga e 1844. O lea ua tatou aulia mai ai le Aso Tele o le Togiola.
 3. **Fa'aal. 11:18** E feagai tonu le amataina o le fa'amasinoga ma le iliga o lona fitu o pū (F. 15), ma o lo'o faia lenei galuega i lona lua o potu o le malumalu fa'ale-lagi (F. 19).
- II.** Ua manino ona a'oa'o mai o le Tusi Pa'ia, o le a nofoia se fa'amasinoga a o lumana'i pea le toe afio mai o Iesu i le lalolagi. O lona uiga, o se fa'amasinoga su'esu'e.
1. **Tani. 7:9-12** A o faia lenei fa'amasinoga su'esu'e i luga i le lagi, o lo'o faia pea i le lalolagi le fete'ena'iga o pule ese'ese, atoa ma malō.
 2. **Fa'aal. 14:6,7** A o le'i o'o ina afio mai Iesu, o le a tala'iina atu ai i le lalolagi aoao le fe'au e fa'ailoa atu ai le itū aso o Lana fa'amasinoga. "Ua o'o mai" taimi tuana'i. E soso'o fe'au a agelu e to'atolu ma le toe afio mai o Iesu (F. 14).
 3. **Luka 10:14** Sa lumana'i le fa'amasinoga i ōna pō o Iesu.
 4. **Galu. 24:25** O Paulo fo'i sa va'ai aga'i i luma i le fa'amasinoga atali.
 5. **Fa'aal. 22:12** E lua vaega e masani ona i ai i se fa'amasinoga:
 - (1). O le iloiloga po o le su'esu'ega.
 - (2). O le fa'aalia o le i'uga po o le tau. O le a afio mai Iesu ma tau, ona tatou mautinoa lea, e mua'i fai le fa'amasinoga su'esu'e ina ia iloa ai le tau ua tatau mo tagata ta'ito'atasi.
- III.** O le a lē fa'atasi ai tagata o le lalolagi i le fa'amasinoga su'esu'e, a e peita'i o le a su'esu'eina ma fa'amasinoina i latou e tusa ma le molimau ua tusia i tusi. O le a fautua Iesu mo i latou uma o ē ua fa'atuatua iā te Ia.
1. **I Ioane 2:1** O iā te i tatou le fautua i luma o le Tamā.
 2. **Tani. 7:13** Na va'aia e Tanielu le Atali'i o le Tagata o afio ane i le fa'amasinoga.
 3. **Galu. 17:31** O le a fa'amasinoina e le Atua tagata uma lava iā Keriso.
 4. **Tani. 7:9, 10** E ta'ita'i le Tamā i le fa'amasinoga.
 5. **Ioane 5:22** Ua tu'uina atu e le Tamā le fa'amasinoga uma lava i Lona Ālo. O le i'uga e faia e le Ālo, o lea lava le i'uga o le a talia ma fa'amaonia e le fa'amasinoga.
 6. **Galu. 10:42** E ui la ina o lo'o ta'ita'i le Tamā i le fa'amasinoga, a o Iesu lava le Fa'amasino.
 7. **Tani. 7:10** O i latou o ē latou te fa'amaonia tala uma ua tusia i tusi, o le 'au agelu pa'ia lea e afe ma mano ni mano o lo'o laulaututū i luma o le nofoa fa'amasino.

"O lea aso ma lea aso ina ua tuana'i atu, o lo'o i ai le faula'iga agasala e ao ina fa'amauina i tusi o le lagi. O upu ua tautala ai ma mea uma ua faia, e lē mafai ona toe fa'afo'isia pe fa'afitia se mea. O agelu mai le lagi ua uma ona latou fa'amauina o le lelei, atoa ma le leaga. Pe ana mafai ona se'i tafi 'eseina le puao o lo'o vā a'i tatou ma mea e lē mava'aia, a e se'i tatou iloa atu ai se agelu o lo'o ia tusia a tatou upu ma galuega uma, o mea lava ia o le a toe feagai ma i tatou i le fa'amasinoga, e lē taumate ona taofia ai lea o le tele o a tatou upu e masani ona tautala ai pea, ma nisi fo'i amio e tele o le a tu'ua e lē toe faia."- O le Finauga Tele, itulau e 486,487.

IV. Ua tusia ma fa'amauina i tusi o le lagi le molimau ato'atoa ma le fa'amaoni i le uiga o o tatou olaga.

Tani. 7:9, 10 "Ua nofoia le fa'amasinoga ma ua fofola tusi."

1. **O le Tusi o le Ola** o lo'o tusia ai igoa o i latou uma o ē ua ta'ua o le fanau a le Atua.
 - a. **Fa'aal. 20:12** O le tusi o le ola.
 - b. **Filipi 5:3** O lo'o tusia ai igoa o le 'au fa'atuatua.
 - c. **Luka 10:20** O se mea e oli'oli tele ai ina ua tusia o tatou igoa i le lagi.
 - d. **Tani. 12:1** O le a lavea'iina i latou uma o ē o le a tumau pea o latou igoa i le tusi o le ola.
 - e. **Fa'aal. 3:5** "E mafai ona toe soloi'eseina se igoa mai lenei tusi".
 - f. **Fa'aal. 21:27** E lē sao atu lava se tasi i le lagi, a ua na o i latou lava o ē ua tusia o latou igoa i le tusi o le ola.
2. **O le Tusi e Fa'amanatu ai** o lo'o tusia ai galuega lelei uma a i latou o ē "matata'u iā Ieova, ma mafaufau i lona suafa."
 - a. **Malaki 3:16** O fa'amanatuina ai galuega lelei a ē amiotonu.
 - b. **Salamo 56:8** O lo'o tusia ai le salamō fa'amaoni.
 - c. **Ne'emias 13:14** E mafai ona toe soloi'eseina se galuega lelei ua uma ona tusia ai.
3. E i ai ma le tasi tusi e lelei pe a fa'aigoaina **o le Tusi o le Oti**, auā o lo'o tusia ai agasala.
 - a. **Isaia 65:6,7** O lo'o tusia amio leaga uma i luma o le Atua.
 - b. **Ierem. 2:22** "Ua tusia lau agasala i o'u luma."
 - c. **Faila. 12:14** O galuega uma ma mea lilo uma.
 - d. **Mata. 12:36, 37** O upu fa'atauva'a uma e tautala ai.
 - e. **I Kori. 4:5** O mea lilo o i le pouliuli, ma filifiliga o loto.

V. O le fa'amamāina i le Aso o le Togiola ma le fa'amagaloga i le fa'amasinoga.

"I le sauniga fa'a-fa'atusa o le aso o le togiola, sa tali ma fa'amagaloina na o i latou o ē sa fa'alatalata atu i le Atua ma le fa'aalia o a latou agasala, atoa ma le salamō fa'amaoni. O i latou ia o ē sa latou uia le ala na fa'atonuina e le Atua ina ua 'avea le toto o a latou taulaga ma ala na tu'uina atu ai a latou agasala i totonu o le malumalu, ina ia fa'amamāina mai ai i latou i le aso o le togiola. I le ua fa'apea fo'i i le Aso Tele o le Togiola ua tatou aulia mai, o le Fa'amasinoga Su'esu'e lea, ona talia ai na o i latou o ē ua 'avea ma fanau a le Atua talu ai ona ua latou salamō fa'amaoni, ma ua iā te i latou le fa'atuatua ola i le mana o le toto o Iesu e mafai ona fa'amamāina ai a latou agasala uma."- O le Finauga Tele, itulau e 480.

1. **I Pete. 4:17** E amata le fa'amasinoga i le aiga o le Atua, e fa'ato'a fa'amasinoina le 'au amio leaga i ōna pō o le meleniuma. (Fa'aal. 20:4. Silasila i le Mata'upu e II).
2. **Esoto 32:33** O lē ua iā te ia se agasala e le'i fa'amagaloina, o le a soloi 'eseina lona igoa mai le tusi o le ola.

3. **Esek. 18:24** E toe soloi 'eseina galuega lelei a le tagata agasala sa tusia i le tusi e fa'amanatu ai.
4. **Fa'aal. 3:5** O lē ua manumalō o le a tumau pea lona igoa i le tusi o le ola.
5. **Galu. 3:19** E soloi 'eseina agasala a ē amiotonu.

Manatu Fa'aopoopo:- A o faia pea e le faitaulaga sili lana galuega i totonu o le malumalu i le aso o le togiola, sa avanoa ai pea i so'o se tasi na ia lagona e tatau ai (Nume. 29:7-11). A e peita'i i le tagata e le'i salamō ma fa'aali lana agasala i le taimi na ulufafo mai ai le faitaulaga sili ina ua mae'a ona saunia e ia o le togiola mo le nu'u, sa leai lava se toe avanoa mo lea tagata, a e sa vavae 'eseina o ia mai le nu'u (Levi. 23:29).

O ōna pō nei, a o faia pea e Iesu Lana galuega tāua fa'a-Faitaulaga Sili i le malumalu fa'alelagi, o lo'o maua tele ai pea lo tatou avanoa tatou te salamō ai ma fa'aali a tatou agasala ina ia fa'amagaloina. A e pe a o'o ina ua fa'ai'uina e Iesu Lana galuega, ona tapunia ai lea ma le faitoto'a o le alofa tunoa, ma o le a fa'alogoina ai e le lalolagi lenei ta'utinoga faigatā ma le mata'utia, "O lē amiolētonu ia amiolētonu pea o ia; o lē ele'elea ia ele'elea pea o ia" (Fa'aal. 22:11). O lea ia tatou liliu atu ai nei i le Atua ma le salamō, manū o avanoa pea le ala i le nofoa o le alofa tunoa, ina ne'i ta'u fa'atasia i tatou ma i latou o ē o le a "mulimuli atu" a latou agasala, a ua siliga ina ua tapunia le faitoto'a (I Timo. 5:24).

VI. O le Tulafono Pa'ia a le Atua, o le tapula'a lava lea o le a fa'amasinoina ai i tatou.

Iakopo 2:10, 12 E fa'amasinoina i tatou i Poloā'iga e Sefulu.

TAULOTO: Failauga 12:13, 14.

O LE FE'AU MO LE ITŪ ASO O LE FA'AMASINOGA

I. E lē fa'afuase'i ona fa'ao'oina mai e le Atua o se fa'a-fanoga i tagata e aunoa ma le mua'i tu'uina atu iā te i latou o se avanoa e salamō ai, ma sao 'ese mai le tau'i o Lona to'asā.

1. **Amosa 3:7** E fa'aalia e le Atua Lona finagalo i Āna au'auna o perofeta.
2. **Kene. 6:1-3** A o lumana'i pea le fa'a'umatiāga na o'otia ai le lalolagi tuai, na muamua ona 'auina atu e le Atua o se fe'au o le lapata'iga (II Pete. 2:5).
3. **Kene. 19:1, 12, 13** Sa fa'apea fo'i a o lumana'i le fa'a'umatiāga o Sotoma, ona mua'i 'auina i ai o se fe'au o le lapata'iga.

II. Po ua lē tatau 'ea se galuega mamalu ma le tāua tele fa'apei o le Fa'amasinoga Su'esu'e ona mua'i logo atu i le lalolagi ina ia sauniuni i ai le fanau a tagata? Tatou te fa'afetai i le Atua ona ua i ai lava le fe'au fa'apenā ua fa'ailoa mai i Lana Afioga Pa'ia.

1. **Levi. 23:23-27** I ōna pō o sauniga fa'a-fa'atusa, a o lumana'i pea le aso o le togiola i aso e iva, sa masani ona ilia ai o pū e fa'ailoa atu ai i le nu'u le aso tele ua lata mai.
2. **Fa'aal. 14:6,7** O lo'o i ai le fe'au tāua mo le lalolagi aoao o lo'o fa'ailoa atu ai nei e fa'apenei, "**Ua o'o mai le itū aso o Lana fa'amasinoga.**"

III. Ua matuā iloga lava le taimi tatau mo le tala'iina atu o le fe'au o le fa'amasinoga e pei ona fa'ailoa mai i le Fa'aaliga 14:6,7.

1. O le autū o lenei fe'au, o le fa'asalalauina atu lea i le lalolagi aoao o lenei fa'aaliga ofoofogia, "**Ua o'o mai le itūaso o Lana fa'amasinoga.**" O se fe'au fa'apea e ao lava ona 'avea o se fea'u mo ōna aso e gata ai. Sa lē tatau i ōna pō o Keriso, po o le 'au aposetolo, po o ōna pō fo'i o i latou o ē na latou toe fuata'iina le Lotu, ona tala'iina atu ai o lenei fe'au, auā e lē o ōna pō ia sa tatau ai. Ua fa'amalamalamaina iā tatou su'esu'ega ua mavae le uiga tele o le tausaga e 1844, na amataina ai le fa'amasinoga i le malumalu fa'ale-lagi. O lea sa tatau ai i na lava aso a'o lumana'i atu teisi le tausaga e 1844 ona amata ai le tala'iga o le fe'au o le fa'amasinoga.

Fa'aal. 14:14-16 Pe a uma le aogā o le fe'au o le fa'amasinoga, ona soso'o loa lava lea ma le afio fa'alua mai o Keriso.

2. Ua fa'amaonia i tala tu'ufa'asolo, na tutū mai i lona 19 o seneturi ni tagata o ē na latou tala'iina le fe'au o i ai i le Fa'aaliga, matā'upu e 14. O itū e tele o le lalolagi na tutū mai ai nei tagata, ma sa ta'ua muamua o "**Adventists**" (Le 'au fa'atuatua i le toe afio mai o le Ali'i). Mulimuli ane ua ta'ua i latou o "**Seventh-day Adventists,**" (le Ekalesia Aso Fitu o le Toe Afio Mai). O lo'o latou tala'iina lenei lava fe'au tāua, "**Ua o'o mai le itū aso o Lana fa'amasinoga.**" (Sa aofia ai tagata, atoa ma faife'au e to'atele o itū'aiga lotu Porotesano e tele).

IV. O le amataga o le fe'au o le fa'amasinoga ua fa'amalamalamaina mai lea i le valo'aga o lo'o i ai i le Fa'aaliga, matā'upu e 10.

1. **Fa'aal. 10:1** "O le agelu malosi mai le lagi," - o le fe'au mamalu mai le lagi.
2. **Fa'aal. 10:2** "O le tusi itiiti ua fofola," - o le Tusi lea a Tanielu, auā ua na o lea le tusi ua ta'ua mai sa mua'i punitia ma fa'amau fa'ailogaina (Tani. 12:4, 9). Ua 'avea le valo'aga a Tanielu ma fa'avae o le fa'amasinoga.
3. **Fa'aal. 10:5, 6** "E le toe i ai ni aso," - e fa'asino le tautoga a le agelu i le taimi fa'avalu'aga. Ua leai se vaega tausaga fa'a-valo'aga e āu atu lona taunu'uga i tala atu o le T.A. 1844.
4. **Fa'aal. 10:7** "O le mea lilo a le Atua," o le tala lelei lea. (Fa'aaogā le Efeso. 3:3-5; Kala. 1:11, 12). E fa'ai'uina le galuega o le tala'iga o le tala lelei i ōna pō o le iliga o lona fitu o pū (Fa'aal. 11:15).
5. **Fa'aal. 10:8-10** Sa suamalie tele le a'oa'oga mai le "tusi itiiti" (Tani. 8:14), auā sa manatu le 'au 'ave fe'au o le a afio mai Keriso i le 1844, Na te fa'a'umatia tagata amio leaga ma fa'amamā i le lalolagi e pei o Lana fetalaiga i le Mataio 3:12. Talu ai ona e le'i malamalama i latou i le matā'upu i le malumalu ma ona sauniga, o lea sa latou manatu ai, ai lava o le lalolagi nei o le a fa'amamāina i le fa'ai'uga o tausaga e 2,300. O lea na toe o'ona mulimuli ai le mea sa suamalie muamua ina ua mavae atu le taimi, a e le'i taunu'u lo latou fa'amoemoe. Na fa'ato'a pupula mulimuli iā te i latou, o le galuega fa'afaitaulaga a Iesu i le malumalu fa'ale-lagi e fa'asino tonu i ai le valo'aga, ina o le a ulufia le mea e sili ona pa'ia i le 1844 ma amata ai le fa'amasinoga su'esu'e.
6. **Fa'aal. 10:11** E i ai ona tala'iina atu nei o le fe'au o le fa'amasinoga i le lalolagi aoao e pei o le fa'atonuga mai le lagi, "E ao ona e toe vavalu i nu'u, ma atunu'u, ma gagana 'ese'ese."
7. **Fa'aal. 11:1, 2** O lenei fe'au mulimuli o ao lava ona fa'amamafaina ai le matā'upu i le malumalu ma ōna sauniga fa'a-fa'atusa.

V. O fua o le fe'au o le fa'amasinoga, o le a fa'apotopotoina i le lalolagi aoao ni tagata o ē ua latou vavae 'ese mai le leaga ma ua latou sauniuni e fa'afetaia'i le Ali'i i Lona toe afio mai (I Ioane 3:3).

1. **Fa'aal. 14:12** O le fa'amatalaga o le uiga ma le amio a i latou o ē latou te taliaina lenei fe'au.
2. **Fa'aal. 22:14** O lo latou tau.

TAULOTO: Fa'aaliga 14:6, 7.

O LE TAPUNIA O LE FAITOTO'A O LE ALOFA TUNOA

- I.** E ui lava ina o lo tatou Atua o Ia o se Atua o le alofa ma le alofa mutimutivale, a e ao ona tatou manatua, o Ia fo'i o le Atua Lē Na te tausia le fa'amasinoga ma Na faia le amiotonu.
- Esek. 34:5 -7** E ui lava ina o Ia o le Atua alofa mutimutivale, "a e lē fa'asaoina lava e Ia o ē agasala."
 - Esek. 18:23** E lē fiafia le Atua i le oti o lē ua amio leaga (Esek. 33:11).
 - Isaia 1:16-20** O le ala 'auina mai lea e le Atua o ni fe'au o le lapata'iga i tagata e vala'au ai iā te i latou ia liliu atu iā te Ia.
- II.** E sau le aso o le a fa'afo'isia ai le mea foa'i fua a Keriso, o Lana fa'aolataga lea o lo'o avanoa nei i so'o se tasi ua naunau fa'amaoni i ai. O le taimi faigatā lea o le a lē mafai ona toe maua ai e tagata o lenei lalolagi le fa'amagaloina o ā latou agasala.
- Kenese 6:3** E lē fa'avavau ona finau o le Agaga o le Atua ma tagata.
 - Kene. 7:1-10** Na tapunia le faitoto'a o le alofa tunoa mo le lalolagi tuai a o lumana'i pea le lolo i ni nai aso.
 - Amosa 8:11-14** O le a tapunia le faitoto'a o le alofa tunoa mo lenei lalolagi a o lumana'i pea le toe afio mai o Keriso i ni nai aso itiiti.
 - Mata. 25:10-13** Pe a tula'i le Matai o le aiga (o Keriso lea, Epe. 3:6), Na te tapunia le faitoto'a, o le a lē aogā loa ona toe sa'ili mo le ola.
- III.** O le a punitia le faitoto'a o le alofa tunoa pe a uma ona faia e Iesu o Lana galuega fa'a-faitaulaga i le mea e sili ona pa'ia i le malumalu fa'ale-lagi. Ona o'o mai ai lea i le lalolagi o aso faigatā e leai sona tusa.
- Tanielu 12:1** O ōna pō ia o le a fa'atūina ai le pule a Mikaele (Keriso). O le taimi lea o le a i ai i le tusi o le ola na o ē ua sao. O na tatou mautinoa lea ua fa'ai'uina le fa'amasinoga ma ua uma ona soloi 'esea o igoa o lē e lē fa'amaoni mai le tusi o le ola.
 - Faaal. 22:11, 12** O le toe ta'utinoga lenei a Iesu o le a faia i le taimi e tuā'oi tonu ma Lona toe afio mai, i le o lea fo'i ta'utinoga o le a iloga ona fa'amauiina ai o le i'uga o tagata ta'ito'atasi uma, pe lelei pe leaga.
 - Sefa. 2:1-3** O lo'o vala'au mai le Atua ia tatou matuā sa'ili atu iā te Ia manū o avanoa pea le āla.
- IV.** Pe a o'o ina ua tapunia le faitoto'a o le alofa tunoa, o le a liligi atu loa le to'asā o le Atua i ē ua latou te'ena Lona alofa.
- Fa'aal. 14:9, 10** "O le uaina o le to'asā o le Atua, ua liligiina atu e lē suia." O le a 'avea mala e fitu ma fa'aaliga o le to'asā a le Atua.
 - Fa'aal. 15:8** O ia ōna pō ua lē o toe fai ai se galuega i le malumalu ina ua lē o toe i ai se avanoa mo le fa'aolataga.
 - Sefan. 1:14-18** O le fa'amatalaga o lenā aso.

TAULOTO: Kenese 6:3.

O A'OA'OGA UA NENEFU AI LE TALA LELEI MONI

I. Ua saunia e Satani nisi āla e tele ina ia tosina atu ai mafauauga o ō tatou loto i nisi matā'upu e 'ese, a e ia 'aia lava ne'i tatou iloiloia le matā'upu ua sili i lō isi matā'upu uma ona tataua ona tatou malamalama lelei i ai, o le togiola ato'atoa lea ua fa'atasi ona saunia e le Ālo o le Atua, atoa ma Lana fautuāga. Ua matuā tele le ita o le fili i le a'oa'oga tāua fa'ale-Tusi Pa'ia, auā ua fa'aioa mai ai le leai lava o se isi fautua, po o se isi āla e maua ai lo tatou ola, ua na o Iesu Keriso lava. O lea ua ia taumafai malosi ai e fa'aliliu 'ese manatu o tagata mai iā Iesu, atoa ma Lana galuega tāua fa'a-Faitaulaga Sili.

1. **Faaal. 14:6,7** O le fa'amasinoga, o le tasi lea matā'upu tāua e ao ona tosina i ai manatu o le fanau a le Atua i ōna aso e gata ai. E lē mafai se tasi ona malamalama lelei i le matā'upu o le fa'amasinoga, vaganā ona ua muamua ona 'ia malamalama i le uiga o le galuega fa'afautua a Iesu i le malumalu fa'alelagi. O lea ua galue malosi ai Satani ina ia fa'anefuina le a'oa'oga manino e uiga i le malumalu ma ōna sauniga.
2. **Kenese 3:5, 6** O lana lava lea galuega mai le amataga, o le fa'auiga 'eseina ma le fa'anefuina o afioga a le Atua, ina ia 'avea ai se ta'ita'iga sesē o le a maua e tagata ma ala e o'o ai lo latou malaia.
3. **II Tesa. 2:7** Ua galuea'iina e Satani se tasi a'oa'oga, po o se tasi fo'i tala lelei ua fa'afoliga i le tala lelei moni. Ua ta'ua lenei galuega fa'afoliga "o le mea lilo a le amio leaga," e pei fo'i ona ta'ua le tala lelei moni "o le upu lilo i lā le amio Atua," (Va'ai i le II Timo. 3:16).
4. **Faaal. 17:1-6** O lenei ua fa'atusaina le "mea lilo" a le amio leaga i se "fafine talitane." O le "taupou fa'amaoni" o le fa'atua lea o le ekalesia moni a Iesu (II Kori. 11:2; Ierem. 6:2). Ua fa'apea fo'i ona 'avea o le fafine talitane ma fa'atua o se ekalesia; ona tatou mautinoa lea, o le mea lilo a le amio leaga, o se ekalesia lava.
5. **Faaal. 17:18** Ua ta'u fa'atua lenei fafine, po o lenei ekalesia, o se "a'ai." E leai se isi ekalesia ua ta'ua ai le igoa o se a'ai, ua na o le Ekalesia Katolika Roma.
6. **Faaal. 17:9** O lo'o nofo le fafine i luga o mauga e fitu. O le tasi lenei igoa ua lauiloa ai le a'ai o Roma, "**O le a'ai o lo'o tū i mauga e fitu,**" (fa'a-Peritania: "**The seven-hilled city**").

II. Pe 'afai o lea le ekalesia e fa'asino tonu i ai le valo'aga, e ao lava fo'i i lana a'oa'oga ona i ai o foliga o le mea moni, a e a fuaia i le malamalama fa'ale-Tusi Pa'ia, e matuā lē fetau lava.

Manatu Fa'aopoopo:- E fia fa'aeteete i lenei itū, ina ne'i i ai se manatu e fa'apea ua so'ona molia lenā itū'aiga. E leai lava se fia fa'aleagaina o i latou o ē ua tapua'i i lenā fata faitaulaga. E tele le manatu alofa mo i latou, ua i ai fo'i ma le āva, atoa ma le matauina o lo latou ma'elegā ma lo latou fa'amaoni i sauniga tau lo latou fa'atuatua. Matou te lē o molia lenei ekalesia, a e peita'i o lo'o i ai Lē ua Na molia, o le Atua lava lea i Lana Afioga Pa'ia. E lē gata i lea, a ua 'avea a'oa'oga a lenā ekalesia, atoa fo'i ma āna lava ta'utinoga, ma āla ua molia ai o ia e ia lava. E fia fa'amanatuina le fetalaiga a Iesu i tagata Iutaia, "'Aua tou te masalo 'ou te molia outou i le Tamā; o i ai lē tasi o lē molia outou, o Mose lea" (Ioane 5:45, 46). E leai sa matou fe'au e tataua ona molia ai se tasi, a e peita'i "o i ai le tasi o Lē na te molia."

Ua fa'aigoaina e lenā fa'atuatūāga i tatou Porotesano o "lotu mavae" ma le "'au heretiko (heretics)," i le o lea ua fia fa'amalamalamaina ai le tulaga moni o le Porotesano i le feagai ai ma nā a'oa'oga. Ua lau silafia lava le tapula'a e tausisi e i tatou Porotesano: "O le Tusi Pa'ia, o le Tusi Pa'ia 'atoa, ua na o le Tusi Pa'ia lava." So'o se a'oa'oga ua lē ō gatasi ma lenei tapula'a, ua lē mafai ona tatou fa'aaogāina.

Ua fa'aailoa mai e le Ekalesia Katoliko Roma se taulaga fa'afoliga, e pei o molimau nei mai i a latou lava tusi:

1. *"O le misa sā, o le tino lava lea ma le toto o Keriso ua fai ma taulaga i le Atua, ua faia i le ata o le pane (areto) ma le vine (uāina)." - Manual of Christian Doctrine, by a seminary professor (R.C.), p. 438.*
2. *"O le taulaga pa'ia o le misa sā, e leai lava se mea e 'ese ai ma le taulaga na faia i luga o le Mauga o Kalevario (Kolokota)..., ua tutusa lelei nei taulaga e lua." - Catholic Belief, Rev. Joseph Faa di Bruno, D.D. (R.C.), p. 101.*
3. Ua fa'aali mai le taofi o le ali'i Katinale o Herbert Vaughan e fa'apenei: *"O lo'o i ai nisi itū ua sili ai le aogā o le misa sā pa'ia i lo le taulaga na faia i Kalevario." - On the Holy Sacrifice of the Mass, p. 42.*

E ui la 'ina ua fai mai o lo'o tutusa nei taulaga e lua, a o lenei e fai lava sina sili o le misa sā. O lo'o i ai ma le ese'esega lenei ua toe i ai le Ekalesia Katoliko Roma, ina ua leai se toto, (fa'a-Peritania - **bloodless**), o le taulaga o le misa sā, a e sa maligi le toto i Kalevario. Ua manino ona fa'aailoa mai le Afioga a le Atua, "A lē o i ai fo'i se fa'amaligiina o le toto, ua leai fo'i se fa'amagaloina" (Epe. 9:22). E fa'apefea la ona sili o le aogā o le misa sā i lō le taulaga na faia i Kalevario? Pe se ā fo'i le aogā o lenei taulaga ua aunoa ma se toto e maligi ai? E lē o le pogai 'ea fo'i lenā na ala ai ona fa'alē-aogāina o le taulaga a Kaino, ona ua lē o i ai se toto? "E fai le toto ma fa'aailoga iā te outou ... 'ou te va'ai atu fo'i i le toto, ona 'ou sosopo ai lea iā te outou" (Esoto 12:13).

4. Ua toe fai mai le tasi o a latou tusi:-

"I luga o fata faitaulaga a le Ekalesia Katoliko, ua fa'ata'amilo ona so'o ai o le lalolagi, e saunia ai le taulaga o le misa sā i aso uma lava." - Catholic Religion, Charles A. Martin, popular edition, p. 195.

5. O lona uiga la, o lo'o fa'alasi i aso uma lava ona toe 'avea ai o le Ālo o le Atua ma taulaga i luga o fata faitaulaga a le Ekalesia Katoliko Roma. Fai mai le fetalaiga a Iesu, "Sa 'ou oti, fa'auta fo'i, ou te ola e fa'avavau, fa'avavau lava" (Fa'aal. 1:18). O ai la le tagata ola na te mafai ona 'ave ifo iā te Ia ma tu'uina atu e fai ma taulaga?
6. Fai mai le molimau a le aposetolo o Paulo, o faitaulaga uma (i ōna pō o Isaraelu) ua au'auna i lea aso ma lea aso, o lo'o avatu so'o i ai lava taulaga e le mafaia lava o na 'ave 'eseina ai o agasala; peita'i ane o Ia (o Keriso lea), na avatua e Ia le taulaga e tasi mo agasala, .. auā o le taulaga e tasi ua fa'a'ato'atoaina ai e Ia e fa'avavau o ē ua fa'a'atoaina," (Epe. 10:11-14. Fa'aaogā ma le Epe. 9:28; 10:10).

Silasila i le matuā manino lelei o lenei ese'esega, sa fai so'o i lea aso ma lea aso ia nā taulaga (fa'a-fa'atusa), a e peita'i lenei Taulaga (Keriso), e lē fa'alasi, a ua atu tasi ona osia, ma ua lava e fa'avavau mo le fa'a'ato'atoaina o le 'au fa'atuatua.

III. Ona ua lē ato'atoa 'ea ona lava o le Taulaga pa'ia ua saunia e lo tatou Keriso ua tatai ai ona fa'alasi ona toe tu'uina atu pea o Ia e fai ma taulaga? Se ā se mea a mafaia e le taulaga fa'afoliga e lē o i ai se toto, pe afai ua lē lava le Taulaga moni sa maligi ai le toto pa'ia mo agasala a le lalolagi? Ua fa'apea ona aumai o le taulaga fa'afoliga e fa'anefuina ai le mana ma le aogā o le mea moni.

1. O FAUTUA FA'AFOLIGA.

E tele le mau fautua 'ese o lo'o fa'aaloaloina e le Ekalesia Katoliko Roma, ua latou fa'atuatua i ai:-

a. **O a latou faitaulaga.** Fai mai:

"O le faitaulaga (Katoliko Roma), o ia lava o se fautua i le va o le Atua ma le tagata." - The Pilot, (R.C.) Boston, May 29, 1915.

Ua manino ona faailoa mai e Misi Elise (Rev. J.W. Hills, L.M.S.), o le eseese o le tulaga o le faitaulaga o le Ekalesia Katoliko Roma ma le tulaga o le faifeau Porotesano:

"Ua tū mai le faitaulaga i le vā o le agaga o le tagata ma Keriso; ua tū 'ese le faife'au ma ua fa'asino tonu le agaga o le tagata iā Keriso. Ua fa'ateleina e le faitaulaga o ia lava, a e tu'u i tua Keriso, ua tu'umuli i tua le faife'au, ma ua tu'u atu i luma Keriso. E peisea 'i ua logo mai e le faitaulaga le Keriso ua taumamao ma tagata; a o le faife'u ua tala'iina so'o ma le ta'utino atu le Keriso ua fa'atasi ma ōna tagata." - O Mata'upu e Fa'avaeina ai le Lotu Porotesano, (Malua Press), itulau e 110.

b. **O Maria.** O upu nei e fa'asino iā Maria ua i ai i se tasi tusi Katoliko:

"Maria e, o i matou nei tagata vaivai ma le agasala, ma leai lava se isi o matou sulufa'iga, ua na o 'oe lava; o 'oe o lo matou fa'amoemoe e tasi, o 'oe fo'i matou te fa'alagolago i ai mo le fa'aolaina o i matou. Ua na o 'oe le matou fautua i le vā ma Iesu Keriso; o 'oe lava e liliu atu i ai i matou uma." - The Glories of Mary, Aifonaus M. DeLiguori, p. 96.

I le itulau e 294 o lena lava tusi, ua ta'ua ai Maria, "O le ala faa'a'apefa'i i le lagi, o le fautua mo le lalolagi, i le ma le matuā fautua moni i le vā o tagata ma le Atua."

c. **O le 'au pa'ia i le lagi.** Fai mai:

"O le Taupou Pa'ia ma le 'au pa'ia uma o i le lagi... e matuā iloga lava ona 'avea o i latou ma fautua mo 'oe i luma o le nofoāli'i o le Atua." - Charity for the Souls in Purgatory, Michael Muller, C.S.S.R., p. 181.

E lē mana'omia e le Ālo Pa'ia o le Atua lenei mau fautua e fesoasoani iā te Ia. Ua lava tele ma ua totoa le mana ua iā Iesu "e mafai ai iā te Ia ona fa'aola pea lava i ē fa'alatalata i le Atua ona o Ia, auā o lo'o soifua pea Ia e fautua mo i latou" (Epe. 7:25). Ua molimau mai fo'i Paulo, "E to'atasi fo'i le puluvaga i le Atua ma tagata, o le tagata o Keriso Iesu lea" (1 Timo 2:5). "Pe afai fo'i e agasala se tasi, o iā te i tatou le Fautua i luma o le Tamā, o Iesu Keriso lea, o Lē amiotonu" (1 Ioane 2:1). Ioe, ua na o Iesu le Fautua moni e to'atasi, a e "lē aogā lava le olataga mai tagata" (Sala. 60:11).

O le fetalaiga a Iesu e uiga iā te Ia lava (a e o lona tinā), fai mai, "E moni, e moni, ou te fai atu iā te outou, e mulimuli ane e va'aia e outou le lagi ua avanoa; o agelu fo'i a le Atua e ō a'e ma ifoifo i luga o le Atali'i o le Tagata" (Ioane 1:51. Fa'aaogā ma le Kenese 28:12). O Iesu le Āla Fa'a'a'apefa'i, a e lē o Maria. (Faitau ma le fa'autauta i le Mata. 12:46-50; Luka 11:27, 28). Sa leai foi ma se manatu o Peteru ma Paulo o le a fa'atūina ai o lā fa'atagata i malumalu ina ia ifo ma tapua'i i ai tagata. (Fa'aaogā le Galuega 10:25, 26; 14:11-25).

E ui ina sa āva ma alofa tele Iesu i Lona tinā, a e sa lē finagalo o Ia ina ia fa'apea ona fa'asilia o Maria, auā o le tagata lava Maria e pei o tagata uma, ma o ia fo'i sa na mana'omia se Fa'aola e pei fo'i o i tatou uma (Luka 1:46, 47).

E o'o fo'i i le agelu pa'ia ma le mamalu tele na va'aia e Ioane i le fa'aaliga, ua lē mafai e ia ona talia o le ifoga a Ioane, a ua fai mai lana upu, "Ia e ifo i le Atua" (Fa'aal. 19:10). Ua fa'apea ona 'avea o na mau fautua 'ese ma ala ua fa'anenefuina ai le a'ano ma le aogā o le fautuaga a lo tatou Fautua Moni e to'atasi, o Iesu Keriso lea. (Faitau i le Galu. 3:12).

2. **O LE ATUA FA'AFOLIGA.**

Ua valo'ia mai lē o le a "ti'eti'e i le malumalu o le Atua, peisea'i o le Atua o ia, o lo'o fa'aali mai o ia, o le Atua lava o ia" (II Tesa. 2:3, 4). Ua na o le to'atasi lava ua na faia se fa'aaliga fa'apenā e pei o nei upu si'i mai tusi a le Ekalesia Katoliko Roma:-

"Ua fa'apea ona tele o le mamalu o le Tupu Sā, ma lona tulaga ua fa'apea ona silisili ma le maua'uga, ua 'avea ai o ia e lē na o se tagata, a e peita'i ua 'avea o ia peisea'i o le Atua, ma le sui o le Atua...."

"O le Tupu Sā ua peisea'i o ia lava o le Atua i le lalolagi, o lē ua pule to'atasi i le 'au fa'atuatua a Keriso, o le tupu sili o tupu uma, ua iā te ia le faula'iga o le malosi. O lo'o ua tu'uina atu iā te ia e le Atua, Lē o Ōna le malosi uma, le pulega o Lona malō, e lē gata i le fa'ale-lalolagi, a o le fa'ale-lagi fo'i." - Extracts from "Rerraris' Ecclesiastica Dictionary", (R.C.), article on the Pope.

A e fai mai le ta'utinoga a le Pope o Leo XIII e uiga i le tofi fa'ale-Tupu Sā:
"O lo matou tulaga i lenei lalolagi, o le tulaga lava lea o le Atua, Lē o Ōna le malosi uma lava." - The Great Encyclical Letters of Leo XIII, p. 304.

Fa'aaogā mau nei:

II Samuelu 22:32.

Isaia 44:8; 46:9.

Esekielu 28:2.

3. O LE SUI FA'AFOLIGA O KERISO.

- a. **O le Agaga Pa'ia**, o ia lava o le Sui lē va'aia o Keriso i le lalolagi (Ioane 15:26; 16:7).
- b. A e fai mai le a'oa'oga fa'ale-Ekalesia Katoliko Roma: **"O le Tupu Sā**, o ia lava o le sui o Keriso, po o le ao va'aia o le ekalesia i le lalolagi. O le Tupu Sā ua na o ia le tagata e to'atasi ua na faia se ta'utinoga e fa'apea, o lo'o iā te ia le tofi o Iesu Keriso. Ua fa'ale-fa'afitia fo'i lea ta'utinoga e ni tasi, o lea ua fa'amaonia ai lana pule." - Extracts from Sermon by Rev. J. Prendergast, S.J. (R.C), as reported in the Syracuse Post-Standard, New York, March 14, 1912.
- c. Ua lau silafia fo'i e le lalolagi le tasi suafa ua fa'asuafa ai le Tupu Sā iā te ia lava, o le suafa fa'a-Latina lea e fa'apea, **Vicarius Filii Dei**, o lona uiga pe a fa'a-Samoaina, **"o le Sui o le Ālo o le Atua."**

4. O LE TINO FA'AFOLIGA MO SAUNIGA FA'A-FA'ATUSA.

- a. Ua fa'anenefuina le uiga tāua o le galuega fa'a-faitaulaga a Iesu i le Fale Fetāfa'i moni i le lagi, ina ua ta'ita'i 'eseina manatu o tagata i se fa'ataunu'uga 'ese o ata ma sauniga fa'a-fa'atusa mai ōna pō o Isaraelu, e pei o la latou a'oa'oga lenei:-
"E ao ona 'ia na ona faitau o se tasi i tusi o le Feagaigai Tuai, a e maise o le Esoto, Levitiko, ma le Teuteronome mo le fa'amaonia o lenei mautinoāga, o le Ekalesia Iutaia, lē na ta'ua e le 'au evagelia ma aposetolo o le ata ma le fa'atusa. Ua na o le Ekalesia Katoliko lava e mafai ona fa'asino tonu i ai lenā ata ma lenā fa'atusa." - Catholic Doctrine as Defined by the Council of Trent, Rev. A. Nampion, S.J. (R.C.), p. 62.
- b. Ua toe fai mai fo'i:-
"O le matuā fa'amaoni ona fa'atasi ai o lo tatou Ali'i pa'ia i le eukalesitia (misa sā), ua 'avea ai fale fetāfa'i o Lē Silisili 'ese." - The True Voice, (R.C), Omaha, Nebraska, April 18, 1913.
- c. Ua fa'apea ona fa'aliliu 'eseina o mafaufauga o tagata mai le fale fetāfa'i moni o i luga i le lagi ma le galuega tāua o lo'o fai ai e Iesu, lo tatou Faitaulaga Sili.

5. O LE SAPATI FA'AFOLIGA.

E fa'apenei fesili ma tali o iai i se tasi katekisimo (tusi lotu) a le ekalesia Katoliko Roma, fai mai:-

Fesili: "O le fea aso le Aso Sapati?"

Tali: "O le aso To'ona'i, o le Aso Sapati lea."

Fesili: "Ai se ā ua tatou fa'amamaluina ai le Aso Sā (Sunday), a e lē o le Aso To'onai?"

Tali: "Ua tatou fa'amamaluina le Aso Sā (Sunday) e sui a'i le Aso To'ona'i, auā o le Fono i Laotikaia (T.A. 336) na si'itia ai e le Ekalesia Katoliko le pa'ia mai le Aso To'ona'i i le Aso Sā (Sunday)." - The Convert's Catechism of Catholic Doctrine, Rev. Peter Geiermann, C.S.S.R., p. 50, 2nd Ed., 1910.

E tele ma isi ta'utinoga a le Ekalesia Katoliko Roma ua fa'ailoa mai ai la latou pule ua fa'ataunu'uina ai lenei fesuia'iga.

IV. I ōna aso e gata ai o le a fa'aalia ai lona ese'esega o le mea fa'a-foliga ma le mea moni. O le a i ai se tala'iga mo le lalolagi aoao e fa'ailoa atu ai "le itū aso o lana fa'amasinoga ua o'o mai," ma o le a fa'amalamamaina ai fo'i sauniga uiga fa'a-fa'atusa o le malumalu ma le tino tāua fa'alelagi e fa'asino i ai.

1. **Faaal. 14:6-20** E i ai fa'atasi ma le fe'au o le fa'amasinoga le lapata'iga mamalu e fa'asino i tapua'iga fa'afoliga a le mea lilo o le amio leaga.
2. **Faaal. 18:4** O le vala'au i le fanau a le Atua ia ō 'ese mai totonu o Papelonia.
3. **Faaal. 18:5-8** O le a tauia e le Atua a'oa'oga sesē uma (Mata. 15:13).

TAULOTO: Fa'aaliga 18:4.

O LE AFIO FA'ALUA MAI O KERISO

I. O le folafolāga i le afio fa'alua mai o Keriso.

1. **Ioane 14:1-3** O le folafolāga a Iesu lava.
2. **Eperu 9:28** Na fa'amaonia ma toe fa'afouina lea folafolāga e agelu i le taimi o Lona afio a'e i le lagi.
3. **Gal. 1:9-11** Sa talitonu le ekalesia i ōna pō o le 'au aposetolo i le afio fa'alua mai o Iesu.
4. **Fa'aal. 22:20** Ua fa'ai'uina le Tusi Pa'ia i upu tāua o le folafolaga i Lona toe afio mai.

Manatu Fa'aopoopo: O le mata'upu i le afio fa'alua mai o Iesu, ua lē na o le Feagaiga Fou o lo'o ta'ua mai ai, a e peita'i sa 'avea fo'i o se matā'upu tāua i ōna pō o le Feagaiga Tuai. Ua fa'a 318 ona ta'ua mai o le afio mai fa'alua o Iesu i matā'upu e 216 o le Feagaiga Fou. O le tusagalemū, ua ta'i 25 fuaiupu ma le ta'ua mai ai.

5. **Iuta 14,15** Sa a'oa'o atu le pateriaka o Enoka i le afio fa'alua mai o Iesu.
6. **Iopu 19:25-27** O le ta'utinoga a Iopu.
7. **Sala. 50:3, 4** Sa molimau i ai Tavita.
8. **Isaia 25:8, 9** Sa fa'atuatua i ai Isaia.

II. E fa'aapefea ona afio mai?

1. **Mata. 24:23-27** E tatau ona tatou iloa pe fa'aapefea ona afio mai o Iesu.
2. **Gal. 1:9-11** E afio mai i le tino e pei o Lona afio atu i le lagi. O lona uiga e fa'aaliali lava.
3. **Fa'aal. 1:7** E afio mai ma ao ma o le a iloa atu o Ia e mata o tagata uma (Mata. 24:27). O ē na latou tu'ia o Ia o le a toe fa'atutūina mai e tuā'oi lava ma Lona toe afio mai ina ia latou iloa atu o Ia e pei ona valo'ia mai. (Faitau ma le fa'autauta i le Mata. 26:64; Tani. 12:2). O le toe tutū fa'alē-atoa lea e muamua i le toe afio mai o Iesu.
4. **Mata. 25:31** E afio mai ma le 'au agelu pa'ia uma.
5. **Mata. 16:27** E afio mai i le mamalu o Lona Tamā.
6. **Luka 9:26** I Lona mamalu ma lō le Tamā ma le 'au agelu pa'ia.
7. **I Tesa. 4:16** E afio mai ma le 'alaga ma le leo o le pū. (Ia fa'atusatusa ma le Salamo 50:3, 4).

III. O mea o le a tutupu pe a afio mai Iesu.

1. **I Tesa. 4:16** E toe fa'atutūina mai ai le 'au amiotonu sa oti.
2. **I Tesa. 4:17** E liua tino o le 'au amiotonu o lo'o ola ma o le a 'aveina a'e i le lagi fa'atasi ma i latou o ē ua fa'atutūina.
3. **I Tesa. 2:8** E fa'aumatia le mea fa'afoliga tau fa'asesē.
4. **I Tesa. 1:8-10** E fa'aumatia le 'au lē talitonu.
5. **Luka 17:26-30** O se fa'aumatiāga mata'utia ma le 'ato'atoa o le a o'otia ai le 'au amio leaga i lenā aso.
6. **Fa'aal. 1:7** O le aso faigatā ma le mata'utia e tagi auē ai (Fa'aal. 6:14-17).

7. **Mataio 16:27** O le aso e maua ai tau i pe lelei, pe leaga (Fa'aal. 22:12).

8. **Mata. 24:30, 31** O le a maua e le 'au amiotonu o pale o le amiotonu.

Manatu Fa'aopoopo: - E ui i le galuega tau fa'asesē a Satani, a e na te lē mafai ona fa'afoligaina se tasi o nei mea ua a'oa'o mai ai le Tusi Pa'ia o le a tutupu pe a afio mai fa'alua Iesu. O le a le mafai i ni vavega pepelo po o ni fa'aailoga ofoofogia o le a faia e le ti'āpolo ona fa'asesēina ai o i latou o ē ua latou fa'amasani lelei ma afioga tusia a le Atua. (Fa'aaogā le Fa'aal. 13:13, 14).

I Tesa. 5:16 E lē o'o mai le aso o le Ali'i e pei o se gaoi i le pō i le tagata Kerisiano mataāla.

TAULOTO: Ioane 14:1-3.

O FA'AILOGA O LE AFIO FA'ALUA MAI O KERISO - I

I. E ui lava ina ua lē fa'aioa mai le itūaso po o le aso tonu e afio mai ai Iesu, a ua tu'uina mai e le Ali'i o fa'aioa e tele ina ia mafai ona iloa ai e Lona nu'u Lona afio fa'alua mai pe a o'o ina ua lata mai. Ua finagalo Iesu ina ia tatou masani lelei ma fa'aioa ua la tu'uina mai.

1. **Mata. 16:1-3** Na molia ma a'oa'iina le 'au Faresaio e Iesu ona ua "latou lē matauina fa'aioa."
2. **Mata. 24:3** O le fesili a le 'au so'o: "Pe o'o afea ia mea? Pe se ā fo'i le fa'aioa o lou maliu mai, ma le gata'aga o le lalolagi?" Sa lē tali atu Iesu, "O outou tagata valea e, e leai se gata'aga,".. ae sa fa'asaga atu loa le Ali'i e tali i le fesili o Ōna so'o.
3. **Mata. 24:32, 37** Ua finagalo Iesu ia iloa e Ōna tagata ōna pō ua latalata ai ona Ia afio mai.

II. O Fa'aioa i le vā o Malō.

1. **Mata. 24:5, 6** O taua ma tala o taua.
2. **Ioelu 3:9-14** O sauniuniga mo taua e leai sona tusa.
3. **Isaia 2:1-5** O le taumafai mo le fa'atumauiina o le filemū. Matau mai.
4. **Mika 4:1-5** O tagata o lo'o tautala mai mea o le a latou faia, a e lē o le Atua.
5. **I Tesa. 5:2, 3** O le a talitonu nisi e to'atele i le mafai e ala fa'ale-tagata ona puipuiina ai o le filemū o le lalolagi. (Ia fa'atusatusaina ma le Isaia 8:9,10).
6. **Tanielu 12:1** O le a tauau pea ina fa'a-faigatāina le vā o malō e i'u ina o le a o'o mai ai aso vale e leai sona tusa talu ona fa'ato'ā tupu o nu'u.
7. **Luka 21:26, 28** O le atuatuvaale ma le mafatia o loto o tagata ona o fa'alavelave, e lē gata i le vā o malō, a o faigatā fo'i i totonu o malo ta'ito'atasi.

III. O Fa'aioa i le uiga o amio a tagata.

1. **Mataio 24:12** E tupu tele le amio leaga.
2. **Mata. 24:37-39** O le a pei lava o ōna pō o Noa ma Lota. (Silasila i le Kene. 6:5, 11, 12; Luka 17:28 – 30).
3. **II Timo. 3:1-5** O uiga leaga o le a aliali mai i amio a tagata.
4. **II Timo. 3:13** E lē tauau ina lelei le lalolagi.
5. **Iakopo 5:1-8** O fefinaua'iga i le vā o ē mau'oa ma a latou tagata faigaluega.

IV. O Fa'aioa i Mata'upu tau Tapua'iga.

1. **Mata. 24:11** O perofeta ma a'oa'o pepelo (F. 24-26).
2. **II Timo. 3:1-5** O le a i ai foliga o le amio atua, a e ta'upepeloina e le amio.
3. **Mata. 24:12** O le a maua loto o tagata e to'atele i le ma'alili fa'ale-agaga.
4. **II Timo. 4:2, 3** O le a ō 'ese nisi e to'atele mai le upu moni.
5. **Fa'aal. 12:12** O le a sili ona galue malosai ai o Satani.
6. **I Timo. 4:1** O le a mulimuli nisi e to'atele i a'oa'oga ma mata'upu fa'ataulaitu.
7. **Fa'aal. 13:3, 8** O le a tauau pea ina fa'alauteleina o le malosai ma le pule a le Ekalesia Katoliko Roma.

8. **Mata. 24:14** O le a tala'iina atu i le lalolagi aoao le tala lelei o le malō, (o le tala lelei lea o Lona toe Afio mai, Luka 23:42).
9. **II Pete. 3:3, 4** O le a i ai le vaega e to'atele o le 'au tauemu.
10. **Gal. 2:17** O le a liligiina ifo le Agaga Pa'ia i le uāga mulimuli mo le fa'aumaina o le galuega o le tala'iga o le tala lelei (Ioelu 2:28, 29; Saka. 10:1).

a. *"O le afio fa'alua mai o Keriso o le a taunu'u i le taimi aupito i pouliuli o le tala'aga o lenei lalolagi. O ōna pō o Noa ma aso o Lota ua 'avea ma āta o uiga o le lalolagi i le taimi e tuā'oi ma le afio mai o Keriso. Ua a'oa'o mai le Tusi Pa'ia, o le a galue Satani i le mana uma ua iā te ia e fa'asesē ai."*

"O aso nei o aso uiga tele i tagata ola uma. O tupu ma faipule, o i latou o ē ua i ai tofiga maua luga, atoa ma ali'i ma tama'ita'i mafau, o lo'o latou matuā matauina mea o lo'o tutupu mai. O lo'o latou matauina le vā o malō. O lo'o latou matauina le fegaoia'i o malos ese'ese fa'alenei lalolagi, ma ua latou mautinoa lava, o lo'o tauau ina tupu mai o se mea tele ma le mata'utia."

"O le Tusi Pa'ia, ua na o le Tusi Pa'ia lava, ua fa'ailoa mai ai le uiga tonu o nei mea. O le Afioga a le Atua ua fa'aalia mai ai la'asaga mulimuli o le tala tu'ufa'asolo o lenei lalolagi." - O Perofeta ma Tupu, itulau e 537, 717.

b. *"O le a lē fa'agataina lenei fe'au tele o le Tala Lelei i se fa'aaliga o le mana o le Atua e itiiti i lo lea na amataina ai. O valo'aga na fa'ataunu'uina i le liligiina ifo o le uāga muamua i le amataga o le folafolaina o le Tala Lelei, o le a toe fa'ataunu'uina fo'i i le liligiina ifo o le uāga mulimuli i lona fa'ai'uga." - O le Finauga Tele, itulau e 621, 622.*

c. *"O le liligiina ifo o le Agaga Pa'ia i le Aso Penetekoso, o le uāga muamua lea, a e peita'i o le a sili atu ona tele o le uāga mulimuli." - O A'oa'oga Fa'a-fa'ata'oto a Keriso, itulau e 121.*

Manatu Fa'aopoopo: I le Nu'u Pa'ia ma Suria ua masani lelei ai tagata ma lē uiga o nei upu, o le "uāga muamua," ma le "uāga mulimuli." O le uāga muamua e o'o mai ai i le amataga o le tausaga pe a mae'a ona galuea'iina o le lau'ele'ele ma ua saunia mo le lūlūina i ai o le fatu. Talu ai nei timūga ua totogo a'e ai le saito ma ua ola. A e peita'i le uāga mulimuli, e o'o mai lea i le tau fa'afuga o le tausaga ma o le a fa'ato'ā matua ai le saito mo le taimi o le seleselēga-saito. Ua fa'apea ona fa'aaogāina o lenei uiga fa'ale-tino e fa'amalamalamaina mai a'i le mea o le a faia e le Atua i Lana Ekalesia.

TAULOTO: Mataio 24:14.

O FA'AILOGA O LE AFIO FA'ALUA MAI O KERISO - II

I. O Fa'ailoga i le Lagi.

1. **Mata. 24:21, 22, 29** E muamua se vaitaimi o le puapuāga tele i le fa'ato'ā fa'ataunu'uina ai fa'ailoga i le lagi.

Manatu Fa'aopoopo: "O ia ōna aso" o le puapuagā ua ta'ua mai i le fuaiupu e 22 ma le 29, ua toe ta'ua mai fo'i i le Fa'aal. 12:6,13,14, fai mai o aso e 1260, po o tausaga fo'i e 1260, auā o le fa'atatau fa'avalō'aga e faitauina ai le aso, o le tausaga (Esek. 4:6; Nume. 13:34). E fa'asino tonu lenei taimi o le puapuagā i ōna pō o le pule aoao ma le pule sa'oloto a Roma Pope mai le T.A. 538 se'ia o'o ina fa'agataina i le T.A. 1798. E ui ina sa fa'ato'ā fa'ai'uina "ia aso" i le tausaga e 1798, a e peita'i o le vaeluagalemū o lona 18 seneturi na te'a ai le mamafa o sauāga. Ia manatua le folafolaga a Iesu, o le a "fa'apu'upu'uina ia aso ona o ē ua filifilia."

2. **Mareko 13:24** Fai mai o le a fa'apogisāina le lā i ōna pō ia "pe a mavae atu lenā puapuagā," ona tatou mautinoa lea, e ao lava ona taunu'u o lenei fa'ailoga i le vā o le 1750 ma le 1798.
3. **Fa'aal. 6:12, 13** E muamua i le fa'apogisāina o le lā ona taunu'u o se mafui'e tele, a e mulimuli ona pa'u'ū o fetū o le lagi.

Matau mai:- O le fa'asologa lenei o fa'ailoga e pei ona valo'ia mai:

- a. O le mafui'e tele.
- b. O le aso pouliuli.
- c. O le pa'u'ū o fetū. Ua fa'amaonia i tala tu'ufa'asolo o le lalolagi le matuā fa'ataunu'uina lelei o lenei fa'asologa.

II. O le Fa'ataunu'uina o ia Fa'ailoga.

1. O le Mafui'e tele i Lisapone, Potukali - Novema 1, 1755.

O le mafui'e pito tele lava lea ma le mata'utia talu mai ōna pō ua mavae se'ia o'o mai i lenā aso, ma ua sili fo'i ona tele o le Lau'ele'ele na lūlūina ai. O ni tasi nei molimau ua fa'amauiina i tusi:

"O le mafui'e o le aso lea Novema, 1755, ua sili lava lea ona tele i lo isi mafui'e uma sa lūlūina ai le malō o Potukali i aso anamua; e lē gata i lea, a e i ai fo'i ma nisi itū vā sili atu ai ona tele o lenei mafui'e i lo mafui'e uma ua tusia. O ulua'i lūlūga o lenei mafui'e sa fa'afuase'i ona taunu'u e aunoa lava ma se isi fa'ailoga, ua na o le gogolo tele e pei o le leo o se faititili ua alu a'e mai lalo i le ele'ele, ona soso'o loa lea ma le lūlūga tele na toetoe lava ina a fa'aumatia ai le a'ai atoa. I nai minute e ono, na fano ai tagata e to'a sefulu afe." - Earthquakes, William Herbert Hobbs, pp. 142,143.

"O le malosi o le mafui'e i le aso muamua o Novema, 1755, sa alu atu ma fa'asalalauina i le lau'ele'ele sa toetoe lava ina a atoa le 4,000,000 maila Peretania fa'atafafā o lona lautele; se lautele e matuā ofoofogia ma ua sili atu fo'i i lo isi mea fa'apenā ua tusia i tala tu'ufaasolo." - The History and Philosophy of Earthquakes, J. Nourse, p. 334.

2. O le Aso Pouliuli, - Me 19, 1780.
 - a. O le molimau lenei a le ali'i poto ta'uta'ua o Noah Webster:

"O le aso pōuliuli, Me 19, 1780, ua fa'apea ona fa'aigoaina o lea aso ona o le pogisā tele na o'o ai, na ufitia ai Niu Egelani (Amerika i Matu) uma. O isi vaega nu'u, e le'i mafai lava ona faitauina ai o se tasi se mata'itusi i fafo i itulā e tele. Sa pepese manu felelei e pei o la latou masani i le afiafi ona galo atu ai lea, ua leai lava se mea ua pisa pe gasē, o moa fo'i ua felelei i o latou moega, o lafu manu ua ō i fale e masani ona momoe ai, ua tutu fo'i molī o fale uma. Na amata ona fa'apouliuligiaina o le lā i le itulā e sefulu i le taeao ona tuputupu ai lava lea, ua o'o atu lava i le vaeluaga o le pō na tuā'oi ai, a e peita'i sa 'ese'ese le tele ma le umi o le pogisā i lea itū ma lea itū o le nu'u. Ua lē iloa lava e se tasi le mafua'aga moni o lenei mea fa'amanamana." - Noah Webster's Dictionary, edition 1869.

- b. E ui lava ina ua molimau mai lenei ali'i poto i le lē mailoa e se tasi mafua'aga moni o lenei "mea fa'amanamana," a ua iloa e i latou o ē ua latou su'esu'e i fa'aailoga o le toe afio mai o lo latou Matai. (Fa'aaogā ma le Isaia 13:10; Amosa 8:9). I lenā lava aso pouliuli ina ua pō, na oso a'e ai le masina, "ua liua e pei o le toto" (Fa'aal. 6:12). Fai mai le tasi molimau:

"O lo'u tamā ma lo'u tinā, o tagata lotu lava i la'ua, i le sa manatu i la'ua ua lata mai le aso fa'amasino. Sa alaala i la'ua i lenā pō atoa, i le o lona tau fa'ai'uga na mavae atu ai le uiga mata'utia o le pogisā ma sa toe maua ai e le lagi ona foliga e masani ai. O le masina sa 'atoa i lea taimi, a e peita'i sa tino mai e pei o le toto. E tele le mata'u ma le atuatuva'e na fa'atupuina ai, ma sa tele fo'i ona talatalaina pea o lenei mea, o lea na matuā o'otia ai lava lo'u mafaufau." - Stone's History of Veberly, Mass., U.S.A.

- c. Sa manatu nisi ua ala ona tupu o lenei fa'aailoga ona ua atagia le lā i se isi tino e i ai le masina, po o se tasi o paneta, a e peita'i ua matuā fa'afitia lava lea taofi e ali'i va'ai fetu popoto e pei o le fa'aaliga lenei:

"E le'i mafua lenei pouliuli ona ua lafo'ia le ata o se isi paneta i le tino o le lā, ua mautinoa lelei fo'i lea mea ona o tulaga sa i ai paneta i lea taimi; auā o le masina sa vā ma le lā e tusa ma tikerī e sili atu i le 150 i lenā aso atoa; e lē gata fo'i i lea, a ua fa'amaonia i su'esu'ega a ali'i va'ai fetū aupito lauiloa ma le ta'uta'ua le lē mafai i lenā tausaga ona fa'apouliuligiaina ai o le lā i paneta nei o Venu ma Mekuri. O le masina fo'i i lea taimi sa sili atu i le fā sefulu itula ona te'a atu ai i lana ta'amilosaga ma le tulaga e fa'afeagai tonu ai ma le lā." - Our First Century, R.M. Devens, chap. 4, "The Wonderful Dark Day," - 1780, p. 95.

- d. O le fa'amatalaga lenei a se tasi na ia va'ai lenā aso mata'utia, o lona suafa o Milo Bostwick, o le tagata o le a'ai o Camden i Niu Ioka, Amerika. O le tasi lenei vaega o lana molimau na tusia i le aso 3 o Mati, 1848:

"O le aso 19 o Me i le tausaga e 1780, ou te manatua lelei lava; o aso ia ua sefulu o'u tausaga. Sa lagi lelei lava le taeao, a e peita'i o le itulā pō ua tā 'ea le valu, na sau ai lo'u tamā i le fale ma fai mai o lo'o i ai le va'aiga 'ese i le lā. Sa leai lava ni ao, a e peita'i sa peisea'i ua mafafia le 'ea ma ua tai foliga i se asu, o le lā fo'i ua sesega lona i'ila ma ua lanu 'ena'ena, ma ua tauau pea ina fa'apouliuligiaina se'ia o'o lava ina ua lē o toe mava'aia. O le aoauli na tutu ai lo matou molī ga'o, a e peita'i ua lē tusa lona mumū i pō, sa lē mafai fo'i ona faitau tusi o lo'u tamā i moli ga'o e lua." - Quoted in Facts for the Times, p. 67.

3. O le pa'u'uga o Fetū - Novema 13, 1883.

Mai le tele o molimau ese'ese ua fa'amaonia ai le taunu'uga o lenei fa'aailoga o le a filifilia mai ai tau o se lua:-

"O le pō mai le aso 12 o Novema, 1833, se'ia o'o i le aso 13, na pei lava o ni uāga tetele ona pa'u'ū ifo ai o fetū i le lalolagi. O Amerika i Matū na lavea tonu i lenei tu'iga. E amata mai le vaifagaloa o Mekisekō, se'ia o'o atu i Alifeki (Halifax) sa fa'amalamalamaina ai le lagi ma sa so'ona fetosia'i i ai itulagi uma i ala fa'aafi o nei mea ua pei o ni fana afi. Sa

fa'alausoso'o lava ma sa fa'apea a nei e lē toe uma, ona fa'ato'ā tineia lea o lenei va'aiga ofoofogia ina ua iloga ona manumalō o le pupula o le ao." - *History of Astronomy in the Nineteenth Century*, Agnes M. Clerke, p. 328.

"E ui ina e le'i alu a'e le masina i le taimi na fa'ato'ā va'aia ai fetū, a e sa fa'apea ona tele o lo latou pupula, na mafai ai e i matou ona faitauina o mata'itusi, o lo latou malamalama fo'i sa sinasina ua sili atu i lō le malamalama mai o le masina."—*American Journal of Science and Arts*, Vol. XXV.

4. O isi mala ma puapuagā ua 'avea ma fa'ailoga o ōna aso e gata ai.
 - a. **Luka 21:25** "E ū fo'i le sami ma le sousou."
 - b. **Mataio 24:7** O ōge, ma fa'ama'i, ma mafui'e i lea mea ma lea mea.

TAULOTO: Mareko 13:24, 25.

O FAIGATĀ MA FA'ASESĒGA O ASO E GATA AI

I. O aso e gata ai, o aso faigatā lava ia mo le fanau a le Atua. E lē gata i faigatā e aliali mai i tua, e i ai mala ese'ese ma fa'afanoga mata'utia, po o le uiga leaga fo'i o tagata o ē ua pulea e Satani, a e peita'i e i ai fo'i ma fa'asesēga a le fili e lamatia ai le ola fa'ale-agaga. O le a fa'apea ona feagai o tagata Kerisiano ma faigatā i tua, atoa fo'i ma totonu.

1. **II Timo. 3:1** E o'o mai aso faigatā.
2. **II Timo. 3:13** E tauau pea ina fa'ateleina le leaga o ē amio leaga. (Fa'aaogā ma le II Timo. 3:2 – 5).
3. **II Timo. 3:12** E agaleagaina ē amio Atua.
4. **Isaia 59:13-15** O le a ta'atele i le lalolagi uiga ese'ese fa'a'ole'olea, e pei ona tala mai ai le perofeta.
5. **Sala. 91:1-16** O le āla e tasi latou te saogalemū ai, o le fa'atuatua ola lea i le tausiga ma le puipuiga a le Atua e pei o folafolaga tāua o i lenei Salamo.

II. O faigatā e lamatia ai le ola fa'ale-agaga.

1. **Luka 21:34-36** O le loto po o manatu fa'ale-lalolagi.
2. **II Timo. 3:13** O le malie i na o foliga o le amio Atua, a e le'i fa'amamāina le matāvai e puna mai ai le amio, o le loto lea. (Faitau ma le Mareko 7:21-23).
3. **Mata. 25:1-13** O le mativa fa'ale-agaga e pei ona aliali mai i taupou vālea e to'alima ina ua fuapau a latou suā'u, ona i'u lea ina lē lava.
4. **Mata. 24:42-44** O le lē nofo sauni i taimi uma lava.
5. **Mata. 24:48-51** O le fa'atamala (Eperu 2:3).
6. **Eperu 10:35-38** O le lē tumau ma le onosa'i (Mataio 24:13).
7. **Kalatia 6:9** O le fa'apalapala ma le fa'aloto vaivai.
8. **I Timo. 4:1** O le taliaina o matā'upu ma a'oa'oga e malaia ai (Mata. 24:23-27).
9. **Iakopo 4:4** O fe-fa'auōa'iga ma le lalolagi.

III. O nisi mea e ao ona faia e le fanau a le Atua i ōna aso e gata ai ma ia latou to'a'aga i ai.

1. **Ioane 15:4** Ia sa'ilia le feso'ota'iga ola ma le Pogai o le malosi uma lava.
2. **I Tesa. 5:17** Ia maua tele le agaga o talosaga.
3. **Luka 11:13** Ia tatalo pea mo le mana ma le ta'ita'iga a le Agaga Pa'ia (Kalatia 5:22, 23).
4. **Ioane 15:8** Ia fua tele mai i fua lelei (Filipi 1:11).
5. **II Pete. 1:5-8** Ia fa'aopoopo atili pea le lelei i le lelei.
6. **II Pete. 3:18** Ia tutupu i le alofa tunoa ma le poto.
7. **I Ioa. 2:15-17** 'Aua le mana'o i le lalolagi ma ōna tu'inaanau.
8. **Iakopo 1:27** Ia leoleo iā te i latou ina ne'i pisia i le lalolagi.
9. **Iakopo 5:7, 8** Ia maua tele le agaga o le onosa'i (Fa'aal. 14:12).
10. **Roma 13:11-14** Ia āla mai, fa'ate'a 'ese galuega o le pogisā.
11. **I Pete. 4:4** 'Aua le taufetuli fa'atasi ma le lalolagi.
12. **II Tesa. 3:8-12** 'Aua le fa'apaiē, a ia to'a'aga ma galulue pea i fe'au ma galuega tatau (I Tesa. 4:11,12).

IV. E ui lava i le mau fa'alavelave ma faigatā o ōna aso e gata ai, a e o le a ta'ita'iina lava e le Atua Lana fanau i le manumalō.

1. **Nauma 1:7** Ua silafia e le Atua ē o fa'atuatua moni ma fa'alagolago iā te Ia.
2. **II Timo. 2:19** Ua silafia e le Atua Ōna lava tagata.
3. **II Nofo. 16:9** E fetaufetulia'i fofoga o Ieova i le lalolagi uma.
4. **Isaia 26:9** O le a afio mai o Ia e fa'aola i ē o lo'o fa'atalitali iā te Ia.
5. **Fa'aal. 15:2-4** Na iloa atu e Ioane i le fa'aaliga le fa'apotopotoga o i latou o ē ua manumalō.

"Ua na o i latou o ē ua fa'amalolosiina o latou mafaufau i le a'oa'oga moni fa'ale-Tusi Pa'ia o le a mafai ona latou tutumau i ōna pō o le finauga tele mulimuli." - O le Finauga Tele, itulau e 593.

TAULOTO: II Timoteo 3:12.

O MALA MULIMULI E FITU MA LE TAUUA O AMAKETO

I. Ua manino ona fa'ailoa mai i le Tusi Pa'ia o se fe'au o le lapata'iga e fa'asino tonu i le fa'asalaga mulimuli a le Atua mo i latou o ē lē talitonu i ōna aso e gata ai.

1. **Faaa1. 14:9-11** O le fe'au mulimuli a le Atua e fia lavea'iina ai tagata mai le "to'asā o le Atua."
2. **Faaal. 15:1** O le a 'avea mala mulimuli e fitu ma āla e liligiina ifo ai le to'asā o le Atua.
3. **Faaal. 18:3** O le vala'au i tagata ia ō 'ese ma Papelonía ina ne'i tofusía fa'atasi i latou i nei mala.
4. **Faaal. 18:8** O le a o'o fa'afuase'i mai nei mala.

II. O le a liligiina ifo nei mala ina ua uma ona tapunia o le faitoto'a o le alofa tunoa.

1. **Faaal. 15:5-8** Ua lē o toe faia se galuega fa'afautua a Iesu i le malumalu i le lagi i le taimi e liligi ifo ai nei mala.
2. **Faaal. 14:10** E lē toe i ai lava se alofa tunoa mo tagata pe a o'o ina ua liligi ifo mala. O le a maua e le lalolagi le "inu o le uaina lē suia o Lona to'asā."
3. **Faaal. 16:17-21** E feagai tonu le taimi o lona fitu o mala ma le afio fa'alua mai o Keriso. (Ia fa'atusatusaina nei fuaiupu ma le Fa'aal. 6:12-17).
4. **Tani. 12:1** Talu ai nei mala, o le a o'o mai ai "aso vale e leai sona tusa." E amata lenei vaitaimi o le puapuagā pe a "tula'i mai Mikaele," (o Keriso lea ina o le a fa'a-nofotupuina).

Manatu fa'aopoopo: Pe a tula'i mai Mikaele, o le a tapunia loa le faitoto'a o le alofa tunoa, ma o le a alu atu loa fo'i ma le ta'utinoga e fa'amauiina ai le i'uga o tagata uma lava ta'ito'atasi. (Fa'aaogā le Luka 13:26; Fa'aal. 22:11, 12).

Ona soso'o loa lava lea ma aso vale e leai sona tusa talu ona fa'ato'ā tupu o nu'u. E mafua nei aso vale ona o le liligiina ifo o mala mulimuli e fitu. Ona o le molimau i le Fa'aal. 18:8, ua taofi ai nisi o le a tusa ma le tausaga atoa e tasi le taimi o le a liligiina ifo ai nei mala. (O le fa'ata'au o le aso e tasi fa'a-valo'aga, o le tausaga lea e tasi. Esek. 4:6). O le afio fa'alua mai o Keriso o le a fa'ai'uina ai mala.

III. O mala mulimuli e fitu, o fa'asalaga lava ia mai le Atua e sili atu lo latou mata'utia ma lo latou faigatā i lo isi ua fa'ao'oina mai i le lalolagi.

1. **Esoto 7:19-25** Ua 'avea mala na fa'ao'oino mai i aso ua mavae ma fa'amaoni.
2. **Esoto 9:8-11** O le mafai e le Atua ona toe taia o le lalolagi i mea fa'apenā.
3. **Iopu 8:22, 23** O lo'o i ai i le Atua o au'upega o le fa'aumatiāga e mafai ona Ia fa'aaogāina i so'o se taimi ua Ia finagalo ai.

IV. Ua amata loa ona fa'atagaina e le Atua o mala.

1. **O le Mala Muamua. Fa'aaliga 16:1-2.**
E tu'uina atu i ē ua i ai le fa'ailoga o le manu fe'ai.
2. **O le Mala e Lua. Fa'aaliga 16:3.**

O le a fa'aleagaina ai le sami.

3. O le Mala e Tolu. Fa'aaliga 16:4-7.

O le a fa'aleagaina ai vaitafe ma puna o vai.

4. O le Mala e Fā. Fa'aaliga 16:8, 9.

O le a taunu'u i le lā. O le tele o tapua'iga sesē e fai aga'i i le lā (Esek. 8:16). O le Aso o le Lā - Sunday, na fai ai tapua'iga a ē fa'apaupau i le lā. Ua valo'ia mai e le perofeta o Ioelu le faigatā o lenei mala (Ioelu 1:10, 20).

5. O le Mala e Lima. Fa'aaliga 16:10, 11.

E taunu'u i le laumua o le manu fe'ai. Matau mai, e liligi ifo lenei mala, a e o lo'o puapuagātia pea tagata ona o le mala muamua. (Ia fa'atusatusaina le faiupu e 3 ma le fuaiupu e 11).

E fa'apenei le fa'amatalaga a Misi Parate (Rev. G. Pratt, L.M.S.), i lana tusi e igoa "*O le Tusi e Fa'amatalaina ai le Tusi Pa'ia*," itulau e 668: "*Le nofoāli'i o le manu fe'ai (m. XIII. 2), o Roma lea. Ona fa'apouliuligia lea o lona malō. E pei o le mea na faia i Aikupito (Esoto 10:21-23). 'Ona latou feati ai lea, 'le uiga o le tigā ina ua tele.'*"

6. O le Mala e Ono. Fa'aaliga 16:12-16.

E taia ai le pule fa'a-Moameta (Mohamed). "O le vaitafe tele o Eufirate," ua 'avea le vaitafe ma fa'atusa o nu'u ma itū'aiga o lo'o nonofo ai i lea lau'ele'ele tele o lo'o tafe ane ai le Eufirate ma ōna magāvai. Sa fa'apea i aso ua mavae ona 'avea ai o le vaitafe o Eufirate ma fa'atusa o le tupu o Asuria ma āna 'au (Silasila i le Isaia 8:7). O vai, o le fa'atusa lea o nu'u ma motu o tagata (Fa'aal. 17:15).

"Ona mate ai lea o lona vai." Fai mai le fa'amalamalamaga a Misi Parate, "*Ua feagai lenei upu ma le tala i le Sami Ulaula, na mate ina ia ui ai le nu'u o Isaraelu, ... ua pa'umatū le vai, o le malō lea.*"

E lē ato'atoa ona manino o vaega uma o lenei valo'aga; auā o lo'o lumana'i pea, e le'i taunu'u. O lo'o taofi nisi e to'atele, e fa'asino tonu le valo'aga i le tauau i lalo o le malosi o le malō o Take ma isi malō Moameta (Mohammed) e tuā'oi ma ia. Sa fa'apea le taofi o Misi Parate: "*Le vaitafe tele o Eufirate (m. IX. 14-21), o le malō o Take lea.*"

Fai mai lenā taofi, o le a 'avea le tauau i lalo o le pule fa'a-Moameta ma ala e ō a'e ai "tupu mai nu'u e alu a'e ai le lā" i le taua o le aso tele o le Atua, o Amaketo lea. O agaga leaga (temoni, Efe. 6:12), o le a latou fa'aosoina malō o le lalolagi i le taua o Amaketo. E lē gata i le "itū i sasa'e," a o le aofia ai ma le "atu laulau uma" i lenā fetaia'iga tele.

O Amaketo, o le fanua laugatasi lea o i le itū i matū o Ierusalem, pe 55 maila le vā. O lona lautele o lenā fanua e 12 x 15 x 18 maila. E latalata i le Mauga o Karamelu ma sa igoa fo'i o le Vanu o Mekito, po o le vanu o Isaraelu (II Nofo. 35:22; Fa'amas. 6:33).

Sa 'avea lenei fanua laugatasi ma lau'ele'ele sa masani ona fa'afetaia'i ai o 'au i aso ua mavae. Sa osofa'ia ma fa'ato'ilaloina ai e Kitiana 'au a Mitiana ma Amaleka (Fa'amas. 6:33, 34). Sa maua ai le to'ilalo o Saulo iā Filisitia (I Samu. 29:1, ma le Matā'upu e 31). Sa fa'ato'ilaloina ai fo'i ma le tupu o Iosia e Farao Neko (II Tupu 23:29, 30).

7. O le Mala e Fitu. Fa'aaliga 16:17-21.

Ua aliali tino mai o le a tau pea lava le taua o Amaketo se'ia o'o atu lava i le taimi o lona fitu o mala. E fa'ai'uina lenā taua e lē ona ua manumalō au'upega a se tasi itū, a e peita'i ona o le a fa'afuase'i ona feagai o le lalolagi ma se va'aiga ofoofogia ma le mata'utia, ina o le

a iloa atu i le lagi le fa'ailoga o le Atali'i o le Tagata. Ona taufaitagitu'i ai lea o itū'aiga uma o le lalolagi pe a latou iloa atu le Atali'i o le Tagata ua afio mai i Lona mamalu, ma le 'au agelu pa'ia, ma o lo'o ti'eti'e o Ia i Lona nofoāli'i mamalu (Mata. 24:30; 25:31). O le taimi lea ua valo'ia mai e Ieremia, o le a liua mai mata uma, "ua matamata vale lava" (Ierem. 30:5-7).

O ōna pō fo'i ia e taunu'u ai le valo'aga ua tusia i le Fa'aal. 6:14-17. Matau mai, o lo'o ta'ua mai o tupu, ma ali'i sili, ma ta'ita'i o 'au, ma ē ua malolosi. O i latou lava ia sa vā tau, a ua leai nei so latou toe manatu i le taua; auā ua o'otia i latou i le mata'u tele. O lo'o i ai ma mau nei e fa'asino tonu i lenā lava taimi: Ierem. 25:31-33; Isaia 13:6-9.

- a. O le Si'ufofoga Tele: "Ua uma ona fai."
- b. O le mafui'e tele: E mafua ona o le si'ufofoga o Ieova (Ioelu 3:16; Ierem. 25:30, 31).
- c. O le uato'a Latetele. (Fa'aaogā ma le Iopu 38:22, 23; Sala. 7:11-13). O le mamafa o se matāuato'a e tasi, fai mai, "e pei o le taleni ona mamafa." O le taleni e tasi e 56 pauna.

V. Sa fa'apea le ta'utinoga fa'amaualuga a Farao, "O ai 'ea Ieova 'ou te fa'alogo ai i lana upu?" (Eso. 5:2). Na fa'ao'oina atu loa e le Atua o mala e sefulu i luga o Farao ma Aikupito uma, ma Lana fetalaiga e fa'apea, "O le mea nei e te iloa ai, o Ieova lava a'u" (Esoto 7:17).

Ua fa'apea lava i nei ōna pō ona maua o le lalolagi i le agaga o le fa'amaualuga ma le fa'afiapoto, ma ua latou fa'agalagaloina ai le Atua. A e peita'i e sau le aso o le a liligi ifo ai mala mulimuli o le to'asā o le Atua, ona fa'ato'ā talitonu ai lea o nisi e to'atele, o lo'o soifua pea lava Ieova.

VI. O le a tausia ma puipuiina e le Atua Ōna tagata amiotonu i ōna pō o nei mala.

Sala. 91 ma le 46 Ua tusia mo lea taimi faigatā.

VII. Ia tāua i tagata Kerisiano uma le lapata'iga o i ai i le Fa'aal. 16:15: "Fa'auta, 'ou te alu atu e pei o se gai; 'amuia lē mataāla, ma tauti i ona ofu, ina ne'i savali o ia e lē lavalavā, ne'i latou iloa atu fo'i lona mā." Ia tatou 'o'ofu pea i le 'ie vavae o le amiotonu. 'Aua ne'i mamafa o tatou laumata i le moe, ina ne'i gai o tatou 'ofu matagofie e le ali'i o lenei lalolagi, ona tatou māsiasi ai lea ona o lo tatou lē lavalavā i le aso o Lona toe afio mai.

TAULOTO: Salamo 46:1.

O LE MELENIUMA

I. O se fa'amalamalamaga.

1. Ua lē o tusia mai lenei upu "meleniuma" i totonu o le Tusi Pa'ia. O le upu e pogai mai i upu Latina e lua: (1). **Mille – afe** (1000), (2). **Annus – tausaga** (year). O lona uiga la, o se vaitaimi ua aofia ai ni tausaga se afe, ua ala ai fo'i ona 'avea ma upu ua fa'aigoaina a'i tausaga e afe ua ta'ua mai i le matā'upu e 20 o le tusi o Fa'aaliga.
2. Ua lē gata ina ua 'avea lenei upu "meleniuma" ma igoa ua lauiloa ai tausaga e afe ua fa'ailoa mai i le Fa'aaliga, a ua fa'apipi'i ane fo'i i ai e nisi ma le uiga lenei: O tausaga e afe o le filemū ma le amiotonu e muamua i le toe afio mai o Iesu.
3. Ua mafua le taofi ona o le manatu po o le fa'amoemoe ua ta'atele i le lalolagi e fa'apea, o le a 'avea le saisaitia o Satani i tausaga e afe (Fa'aal. 20:1-3) ma ala o le a fa'afaigofieina ai le tala'iga o le tala lelei ma o le a tu'ua ai e tagata a latou amio leaga, a e liliu uma atu iā Keriso ma Lana upu moni. Fai mai o le a toe fa'atūina mai i ōna pō o le meleniuma o tagata oti o ē sa fa'atamala i lenei olaga, ina ia toe maua so latou avanoa latou te talia ai le fa'aolataga a Iesu e aunoa ma le galuega fa'alavelave a le ti'āpolo e toe fa'ava'atu'ia ai lo latou taumafai.
4. O se a'oa'oga fa'alē-migao i le Atua lenei a'oa'oga, ina ua aliali mai ai, e fa'alē-lava Lona malosi e fa'aolaina ai nisi tagata e to'atele a o sa'oloto pea Satani, a e fa'ato'ā mafaia e le Atua ona lavea'iina o i latou ia ina ua fusifusia lē sa fai ma fa'alavelave.
5. E lē o ni aso matagofie o le filemū ma le amiotonu mo le lalolagi aoao e muamua i le toe afio mai o Iesu, a e peita'i o aso vale, ma le faigatā, mo lē amio leaga e leai sona tusa (Mata. 24:12; Tan. 12:1; II Timo. 3:1-5,13). E ui fo'i iā Satani ma lana 'auao, a ua lava ato'atoa au'upega fa'ale-agaga a le Atua e manumalō ai i latou uma o ē ua manana'o fa'amaoni i le ola (Efeso 6:11-16; Kolo. 1:11; I Kori. 15:57, 58; Iako. 4:7; Roma 8:31).

II. O le a se'i molimau mai pea le Afioga a le Atua i mea o le a tutupu mai i nei tausaga e 1000:-

1. Ua manino ona fa'ailoa mai o le mea o le a i ai le 'au pa'ia i ōna pō o le meleniuma. Fai mai, o le a latou nofo tupu fa'atasi ma Keriso, ma o le a tu'uina atu iā te i latou le fa'amasinoga.
 - a. **Fa'aal. 20:4** "Ua tu'uina atu fo'i le fa'amasinoga iā te i latou,...ua latou ola fo'i, ma ua fai ma tupu fa'atasi ma Keriso i tausaga e afe."
 - b. **I Kori. 6:1-3** Ua molimau mai Paulo i ōna pō o le a fa'amasinoina ai le lalolagi e le 'au pa'ia. (Ua tusia mai fo'i i le Sala. 149:5-9).
2. Talu ai ina ua tatou mautinoa lelei o le a faia lenei fa'amasinoga i ōna pō o le meleniuma, a o fa'atasi ma Keriso le 'au pa'ia, o lea na tatau ai ona tatou su'esu'e po o fea tonu ōna pō o le a fa'atasi ai le 'au amiotonu ma lo latou Ali'i, auā o lenei e lē mafai ona amataina o le meleniuma vaganā ona ua taunu'u fa'atasi atu o le 'au pa'ia i le mea o i ai Keriso.
 - a. **Ioa 14:1-3** I Lona Afio mai o le a talia ai e Keriso Lana fanau ia fa'atasi ma Ia.
 - b. **I Tesa. 4:16** E toe fa'atutūina mai e Iesu i Lona afio fa'alua mai o ē amiotonu sa oti.
 - c. **I Tesa. 4:17** I lea fo'i taimi o le a liua ai le 'au amiotonu o ē ola ma totoe, ona 'aveina a'e lea fa'atasi ma ē na oti ina ia "fa'atasi ma le Ali'i."
 - d. **Faaal. 20:4-6** O le a ola ma nofo tupu le 'au pa'ia fa'atasi ma Keriso i tausaga e afe.

Manatu fa'aopoopo: O le a 'avea tausaga e afe o le meleniuma o se malōlōga tāua mo le fanau a le Atua ina ua mavae aso o lo latou puapuagā fa'ale-lalo nei. O ōna pō lava ia e fa'asino i ai le folafolaga a Iesu i maota ua la saunia mo Lana fanau (Ioane 14:1-3), ma le folafolaga tāua lenei, "Pe afai tatou te tigā fa'atasi ma Ia, o le a fa'amanuiaina fo'i i tatou fa'atasi ma Ia."

III. Ua tatou feagai nei ma le fesili: Po o le a fa'aapefa le 'au lē talitonu i ōna pō o le meleniuma? E maua le tali i la tatou fesili pe a tatou su'esu'e i le mea o le a o'o i lenei vaega i le taimi o le toe afio mai o Iesu.

Fa'aal. 20:6 E lē toe fa'atutūina mai tagata lē talitonu pe a afio mai Keriso, auā "O le ulua'i toe tū" e toe fa'atutūina mai ai na'o ē amiotonu. Ua na "o ē o iā Keriso" e toe tutū mai i Lona toe afio mai (I Kori. 15:22, 23).

Sefa. 1:14-18 E 'avea le aso o le Ali'i ma aso o le fa'asalaga i ē lē talitonu.

Fa'aal. 15:1 O le to'asā o le Atua i ē amio leaga o le a liligiina ifo lea i mala e fitu se'ia o'o ina fa'a'ato'atoaina le fa'aumatiāga o i latou pe a fa'aali mai Iesu (Fa'aal. 16:17-21).

II Tesa. 1:7-10 E fa'asalaina tagata agasala i le aso o Lona toe afio mai.

Luka 17:26-30 O se fa'afanoga ato'atoa lava e pei o ōna pō o le lolo ma le fa'aumatiāga o Sotoma.

1. I ōna pō o le meleniuma, o le a saisaitia ai Satani i le "tō e lē gata."

a. **Faaal. 20:1-3** Ua manino ona fa'ailoa mai, o le "tō e lē gata," o le mea lava lea o le a taunu'u ona fa'asalaina ai o Satani.

b. **Esek. 28:17, 18** Ua molimau mai Esekielu i le mea tonu o le a fa'asalaina ai Satani, fai mai, o "lalo i le 'ele'ele po o le foga'ele'ele."

Manatu fa'aopoopo: O lenei upu, o le "tō e lē gata," e pogai mai le upu Eleni o **"ahussos,"** o lona uiga, o se mea gaogao ma tu'ufua. O lea lava fo'i le upu ua fa'aaogāina (i le fa'aliliuga o igoa o le Sepetuakina i le Kenese 1:2), e fa'ailoa mai ai le uiga gaogao o le lalolagi i le amataga.

2. Pe a o'o ina ia 'aveina a'e tagata amiotonu i le lagi ma ua fa'aumatia tagata agasala uma, ona 'avea ai lea o lenei lalolagi ma nu'u ua lē ainā.

a. **Faaal. 16:18, 20** O le mafui'e tele i le aso gata'aga, o le tasi lea ala o le a lē fa'agaogaoina ma so'ona fenumia'i ai le fogā'ele'ele.

b. **Ierem. 4:23-27** O le fa'amatalaga o le uiga o le lalolagi i ōna pō ia o le a liua ai e 'avea ma "tō e lē gata" e saisaitia ai Satani. (Matau lelei le F. e 23 ma upu nei, "tu'ufua ma gaogao." Ma le F. e 25, "e leai se tagata.").

c. **Ierem. 25:31-33** O le a fola tino o ē ua fasia i luga o le fogā'ele'ele. E lē aofia, e lē tanumia fo'i, auā ua leai ni tagata ola o totoe mai i le lalolagi.

d. **Sefa. 1:2,3,14-18** O le fa'amatalaga a le perofeta o Sefana'ia.

e. **Faaal. 20:1-3** O le lalolagi nei, pe a tu'ufua ma fa'atafuna'iina, o le a puipuiina ai Satani i tausaga e afe. O iinei lava i le mea sa na fa'apuapuagātiaina ai le fanau a tagata, ma na fa'aosoosoina ai i latou ia agasala ma fouvale i le Atua. O le a fusifusia ai o ia i le "maea u'amea tele," o le ata lea ma le fa'atusa ina o le a taofia ma puipuia e le mana o le Atua. O ōna pō ia o le a ta'ua ai Satani "ua lē galuega," ina o le a leai se isi e mafai ona ia toe fa'asesē i ai, a o le a na ona nofonofo ma mafaufau i le tele o le malaia ua mafua ona o ia, atoa ma le fa'asalaga mata'utia o lo'o fa'atalitali mo ia. Ia manatua le ata mai ōna pō o Isaraelu na 'ave a'e Asesela i le vao lē ainā ma tu'u ai. (Silasila i le mataupu XL, fa'aaogā ma le Isaia 24:21, 22).

IV. I le fa'ai'uga o tausaga e afe, o le a afio mai ai Keriso ma Lana 'Au Pa'ia i le lalolagi. O le a'ai pa'ia fo'i, o Ierusalema Fou, o le a alu ifo mai le lagi.

1. **Saka. 14:4, 5** "E tū Ōna a'ao i lea aso i luga o le Mauga o Olive." O le afio fa'atolu mai lea o Iesu, auā o Lona Afio fa'alua mai e lē pa'i mai ai Ōna A'ao i

le foga'ele'ele. (Va'ai I Tesa. 4:16, 17). O le a toe pa'i mai a'ao o le Ali'i i le mea tonu na Ia afio a'e ai i le lagi, o le Mauga lea o Olive. "Ma le 'Au Pa'ia uma fa'atasi ma Ia," le 'au amiotonu lea sa fa'atasi ma Ia i le lagi i tausaga e afe.

2. **Faaal. 21:2, 10**

E alu ifo le Ierusalem Fou, "o le a'ai tele ma le pa'ia," i lona tulaga ua saunia mo ia.

V. Ona toe fa'atutūina mai ai lea o tagata amio leaga ina ia maua lo latou tau fa'atasi ma Satani, o lē sa latou 'au'auna i ai.

1. **Faaal. 20:5**

O ē o totoe o ē ua oti (tagata agasala), e fa'ato'a toe fa'atutūina mai pe a 'atoa tausaga e afe. O le toe tutū lea "i le agasala." (Ioane 5:28, 29. Ia fa'aaogāina ma le Galu. 24:15; Isa. 24:22).

2. **Faaal. 20:7**

Ua tatalaina nei Satani ina ua toe ainā le lalolagi ma ua mafai ona ia toe faia o lana galuega fa'asesē.

3. **Faaal. 20:3**

Ua na o ni "nai aso" o le a sa'oloto ai Satani i le fa'ai'uga o le meleniuma.

4. **Faaal. 20:8, 9**

E toe fa'aosoina e Satani malō o le lalolagi ia la'e tau, ma ia latou o a'e e si'omia ma a'ea le a'ai pa'ia, a e peita'i, o le a lē manuia lenei galuega mulimuli a le fili.

Manatu Fa'aopoopo: O le taimi lea o le a fe-va'aia'i ai tupulaga uma o le lalolagi o ē amio lelei, o le a latou va'ai i le malaia o ē ua latou te'ena le alofa tunoa o le Atua. (Fa'aaogā le Luka 13:28; Fa'aal. 22:14,15; Fa'aal. 20:10,14,15). O le a liua le lalolagi e 'avea ma lepa afi e fano fa'atasi ai 'au uma a le agasala. O le oti fa'alua lea (Sala. 11:6; Mata. 3:12; II Pete. 3:12) sa saunia muamua mo le ti'āpolo ma āna agelu (Mata. 25:41), a o le a fano ai ma i latou uma ua 'au i la latou fouvalega.

5. **Mata. 10:28**

O le a matuā ato'atoa ona fa'aumatiaina o i latou, agaga atoa ma tino (Mala. 4:1-3). Fai mai Opetaiā, "E 'avea i latou e peisea'i ua leai lava i latou." Ope. 15, 16).

6. **Esek. 28:17-17**

O Satani fo'i o le a matuā fa'aumatiaina.

VII. O le galuega fa'amamā a le afi o le a maua mai ai o le lalolagi ua fa'afouina.

1. **Isaia 65:17**

O le folafolaga i le lagi fou ma le lalolagi fou.

2. **II Pete. 3:13**

"O le lagi fou ma le lalolagi fou, pei o lana na folafola mai."

3. **Fa'aal. 21:1**

Na va'ai a'e Ioane i le lagi fou ma le lalolagi fou.

4. **Isaia 14:5-7**

O le a 'alalaga fiafia le lalolagi uma pe a taunu'u ona fa'aumatiaina o Satani ma i latou uma o ē sa 'au iā te ia.

TAULOTO: Fa'aaliga 20:6.

O VAEGA TETEELE E LUA O LE FA'AMASINOGA

I. E lua vaega tāua ua vaevaeina i ai le galuega o le fa'amasinoga:

. O le iloiloga, po o le su'esu'ega.

. O le fa'ataunu'uina o le i'uga ua maua mai i le sue'su'ega na muamua. O lea ua tatou fa'aigoaina ai, "O le Fa'amasinoga Su'esu'e," ma le "Fa'amasinoga e Tu'uina mai ai Tau'i."

Tan. 7:9, 10

O le Fa'amasinoga Su'esu'e, o le iloiloina lea ma le su'esu'eina o molimau ua tusia ma fa'amaui i tasi o i le lagi.

Ioia. 5:26-29

O le Fa'amasinoga e Tu'uina mai ai Tau'i, pe lelei, pe leaga.

1. O le fanau uma lava a le Atua mai le amataga, e su'esu'eina i latou i le taimi o le **Fa'amasinoga Su'esu'e** e muamua i le afio fa'alua mai o Keriso.
 - a. **Tani. 8:14** Ua uma ona fa'amalamalamaina o le amataina o le fa'amasinoga su'esu'e i le 1844. (Silasila i le matā'upu e XLII, Fuai. L).
 - b. **Faaal. 14:6,7** O le fe'au aoao mo le lalolagi o lo'o fa'ailoa atu ai nei le itū aso o le fa'amasinoga.
 - c. **I Pete. 4:17** E amata le fa'amasinoga i le aiga o le Atua (tagata amiotonu).
2. I lona toe afio mai o le a fa'ataunu'uina atu ai e le Ali'i i le 'au amiotonu o i'uga e fa'asino iā te i latou. E ui ina o le a fa'aumatia i lea taimi tagata amio leaga o ola, a e peita'i e lē o lo latou tau'i mulimuli lea.
 - a. **Faaal. 22:12** E afio mai Iesu ma tau'i.
 - b. **I Tesa. 4:16,17** E maua e tagata amiotonu o latou tau'i i le aso o Lona toe afio mai.
 - c. **Luka 14:4** E tauia i latou i le toe tutū o ē amiotonu.
3. O le fa'amasinoga su'esu'e mo le 'au lē talitonu o le a fa'ato'ā faia lea i ōna pō o le meleniuma.
 - a. **Fa'aal. 20:4** E tu'uina atu le fa'amasinoga i le 'au amiotonu i tausaga e afe.
 - b. **I Kori. 6:2, 3** O le a fa'amasinoina e le 'au amiotonu o tagata, atoa ma agelu (Satani ma lana 'auao).

II. O le Fa'amasinoga e tu'uina mai ai tau'i mo le 'au amio leaga, o le a fa'ataunu'uina lea i le fa'ai'uga o tausaga e afe.

1. **Fa'aal. 20:5a** O le toe tutū lenei o ē amiolētonu, po o le "toe tutū i le fa'asala." (Ioia. 5:29; Galu. 24:15; II Pete. 2:9).
2. **Faaa. 20:9,10,14,15** O le a tauia tagata amio leaga i le fa'asalaga o le oti fa'alua.
3. **Mata. 25:46** O le sala (oti) e fa'avavau, e lē toe ala mai ai.
4. **Mala. 4:1-3** O Satani, atoa uma ma le 'au fai agasala, o le a fa'aumatia e fa'avavau.

"O le a 'avea le tala tu'ufa'asolo i le agasala ma molimau e fa'avavau i le aogā tele o le tulafono pa'ia a le Atua, ina ua 'avea lea ma fa'avae o le manuia moni o i latou uma ua Ia faia." - O le Finauga Tele, itulau e 671.

TAULOTO: I Peteru 4:17.

O LE ASO TELE O IEOVA

- I.** O lo'o ta'ua mai pea i le Tusi Pa'ia le "aso o Ieova," po o le "aso o le Ali'i," e lē gata i le Feagaiga Tuai, a ua fa'apea fo'i ma le Feagaiga Fou. Ua tele ona fa'amamafaina pea o le faigatā ma le mata'utia o lenā aso. O lea ua tatau ai i tagata Kerisiano uma ona latou ma'elegā e su'esu'eina 'ia fa'a'ato'atoaina lo latou malamalama i le uiga o lenā aso tele ma mea o le a tutupu ai. E muamua ona tatou fesili, "Po o ā ni mea ua tusia mai e uiga i le aso o Ieova?"

1. **Isaia 2:12** O le aso o Ieova o 'au, e o'o atu i ē fa'asiasia ma ē fa'amaualuga uma lava. E fa'amaualoina ai loto uma e fefete.
2. **Ierem. 46:10** O le aso o le tau'i ma sui, e tau'i atu ai i ē ua ita i le Atua, e ma'ona ai le pelu i le toto.
3. **Sefa. 1:15, 14** E matuā tagi auē ai le toa. O le aso o le to'asā ma le puapuagā ma le tigā. O le aso o le fa'atafunaiina ma le fa'agaogaoina.
4. **Isa. 13:6, 9, 13** E o'o mai pei o se malaia, e ogoogo i le to'atama'i ma le to'asā tele. E fa'aumatia ai tagata agasala o i le nu'u.
5. **II Pete. 3:10** E mavae 'eseina ai le lagi ma le gogolo tele, a susunuina ai le lalolagi ma galuega o i ai.
6. **Fa'aal. 16:14** O le taua i le aso tele o le Atua, o le a ma'ona ai le pelu i le toto e pei o le valo'aga a Ieremia (46:10).

- II.** Ua ta'ua o le aso o Ieova, a e lē o le aso o tagata, e pei ona faia nei e le fanau a tagata o mea uma ua latou loto i ai ma le seāseā o'o mai o se fa'aaliga o le to'asā o le Atua. O lo'o fai nei le aso o tagata, a e peita'i lenā aso o le a matuā iloga ona fa'agataina mai ai o le pule sa'oloto ma le fa'amaualuga o tagata ua latou fouvale ai i le Atua, a o le a fa'aalia mai Ieova, o Ia Lē e pule to'atasi, o Ia Lē e Ōna le malosi uma lava. Sa eva le lalolagi i le sa'olotoga a o lumana'i pea le lolo, a e peita'i na 'avea le o'o mai o le lolo ma "aso o Ieova" i lenā tupulaga, na fa'ato'ā latou talitonu ai, e lē ulagia le Atua, a e sau le aso e tau'i ai ma sui.

1. **Isaia 26:10** E ui ina alofagia ē amio leaga fa'atasi ma ē amio lelei, a e lē 'au iloa ai lava le mamalu o Ieova ma latou saga fai pea le aga pi'opi'o.
2. **Faila. 8:11** Ona ua lē vave fa'ao'otia le sala i ē amio leaga, o lea ua matuā naunau ai loto o tagata e fai mea leaga.
3. **Sala. 19:11** E fa'apea ifo tagata i o latou loto ua lē o silafia mai e le Atua a latou amio o fai (Sala. 73:11).
4. **Sala. 2:1-4** E ui i taupulega a tagata ma o latou manatu fa'amaualuga, a ua silafia uma e le Atua.
5. **Eso. 34:6, 7** "O le Atua alofa mutimutivale ma le alofa fua, e telegese lona to'asā...a e lē fa'asaoina lava e Ia o ē agasala."

- III.** O lo'o taofiofi nei le to'asā o le Atua; e ui fo'i ina o lo'o tau masa'a mai i nisi taimi, a e suia i le alofa. A e peita'i lenā aso, o le a liligi mai ai Lona to'asā e lē suia lava.

1. **Faaal. 7:1** O lo'o taofia nei matagi o mala ma puapuagā ia 'aia le so'ona agi tele mai i le fanua ma le sami.

2. **Isaia 28:12** A e peita'i lenā aso, o le a tula'i ai Ieova ma le to'asā tele, "ina ia faia Lana mea e fai, ua 'ese lava, ... o Lana galuega 'ese lava." E 'ese, auā o le a lē filo ai ma le alofa mutimutivale e pei ona masani ai le Atua.
3. **Isaia 13:13** E 'avea le aso o Ieova ma aso "o lona to'asā tele."
4. **Isaia 34:8** O le aso "e tau'i ma sui" i ē o finau ma Siona.
5. **Ioele 1:15** E o'o mai "pei o se malaia" ai Lē o Ōna le malosi uma lava.
6. **Faaal. 14:10** O le uaina o le to'asā o le Atua "e lē suia" i le ipu o Lona to'asā.

IV. E amata le aso o Ieova pe a liligi ifo mala mulimuli e fitu, ona soso'o lea ma le toe afio mai o Iesu ma tausaga e afe o le meleniuma, a e fa'ai'uina i le fa'afanoga tele mulimuli o le a fa'aumatiaina ai Satani ma 'au uma o le agasala, ma toe fa'afouina ai le lalolagi ia foliga i le Etena muamua a o le'i ofi mai le agasala.

1. **Luka 13:25** E i ai le taimi ua atofaina e le Tamā o le a tapunia ai le faitoto'a o le alofa tunoa. O le taimi lea e taunu'u ai ma le ta'utinoga e pei ona tusia mai i le Fa'aal. 22:11.
2. **Faaal. 15:1** Ona liligi ifo ai lea o mala e fitu o le to'asā o le Atua ina ua tapunia le faitoto'a o le alofa tunoa. E leai se fautuāga mo agasala e toe faia i le malumalu i le lagi pe a o'o ina liligi ifo mala e fitu (Faitau i le F. e 8).
3. **Faaal. 14:10** O le uaina o le to'asā o le Atua e lē suia (ina ua lē o toe filo ai ma le alofa tunoa o le Atua).
4. **I Tesa. 5:2-4** E o'o mai le aso o le Ali'i e pei o le gaioi, ina o le a lē ma-iloa e le lalolagi le taimi tonu e tapunia ai le faitoto'a o le alofa tunoa.
5. **Iere. 30:5-7** O ōna pō ia "o le puapuagā o Iakopo." Sa puapuagātia Iakopo ona o le manatu i le fetaia'iga ma lona uso o Esau i le aso a taeao, po o le a talia alofa o ia e Esau po o le a tau'i ma sui e tusa ma le agaleagaina o ia.

“O le tigā ma le puapuagā na o'o iā Iakopo i lenā pō o le la tauiviga ma le agelu, ua 'avea lea ma ata o lenā puapuagā tele e ao ona fa'aui ane ai le fanau a le Atua i ōna pō e tuā'oi tonu ma le afio fa'alua mai o Keriso. O le mana taofiofi o le Agaga o le Atua o le a 'ave'eseina lea mai le lalolagi. E pei ona sa fa'afeagai Iakopo ma le oti ai lima o lona uso e Esau le sa ita iā te ia, o le a fa'apea fo'i le fanau a le Atua ona fa'afeagai ma faigatā ona o o latou fili o ē ua sa'ili e fia fa'aumatia i latou. E pei ona sa tauivi Iakopo ma le agelu i lenā pō atoa ona o le fia maua o le lavea'iina mai le lima o Esau, o le a fa'apea fo'i le fanau a le Atua i ia ōna pō ona vala'au i le Atua i pō ma ao ona o le fia lavea'iina o i latou mai o latou fili o si'omia ai i latou.”- O Pateriaka ma Perofeta, itulau e 201.

E lē gata i lea, a o le a i ai fo'i ma le puapuagā fa'ale-agaga e pei ona sa mafatia ai le loto o Iakopo ona o le manatua o ōna sesē. O le a fa'apea fo'i ona maua o nisi e to'atele i le loto mafatia tele ma le femēmēa'i ona o le a fetaia'i ma Iesu, a e ua fa'alē mautinoa lelei po ua mae'a ona teuteuina o lo latou vā ma le Atua, po o le i ai fo'i ma ni a latou agasala e le'i fa'aalia ma fa'amagaloina. Sa mana'omia e Iakopo i lenā pō e lē na o le lavea'iina fa'ale-tino, a e maise fo'i o le lavea'iina fa'ale-agaga.

6. **Faaal. 16:17, 18** I le taimi o le a liligi ifo ai lona fitu o mala, o le a fa'alogoina ai le si'ufofoga tele mai le lagi, "Ua uma ona fai" ("ua taunu'u"), ona soso'o ai lea ma le mafui'e tele.

Manatu Fa'aopoopo:- E lē taumate o lea lava le si'ufofoga o lo'o ta'ua mai pea e le 'au perofeta, (e i ai Ioele 3:16; Ierem. 25:30; Epe. 12:26). E fa'amata ai fo'i o le taimi tonu lea o le a fa'ataunu'uina ai ma le toe tutū fa'alē-atoa (e pei ona valo'ia mai i le Tan. 12:2), o le a fa'atutūina

mai ai tau o se vaega o ē amiotonu ma ē amioleaga. E i ai toe tutū tetele e lua ua manino ona a'oa'oina mai i le Tusi Pa'ia:

1. O le toe tutū o ē amiotonu pe a ilia le pū fa'a'uma i le afio mai o le Ali'i (I Kori. 15:52; I Tesa. 4:16).
2. O le toe tutū mai o ē amioleaga pe a mavae tausaga e afe o le meleniuma (Fa'aal. 20:5). A e peita'i lenei toe tutū o le a toe fa'atutūina fa'atasi mai ai o nisi o le 'au pa'ia, atoa ma nisi o le 'au amioleaga.
 - a. O lo'o i ai ni mau i le Tusi Pa'ia ua fa'ailoa mai ai e tatau lava ona i ai o se toe tutū fa'alē-atoa a o lumana'i atu teisi le toe afio mai o Iesu. Ua molimau mai le Fa'aal. 1:7, o le a iloa atu Iesu i Lona toe afio mai e i latou o ē na latou tu'ia o Ia. (Fa'aaogā ma le Saka. 12:10). E fa'apea fo'i ma le folafolaga a Iesu e uiga iā i latou o ē na latou fa'amasinoina iā te Ia (Mata. 26:64). O le a fa'apefea la ona iloa atu e i latou nei le Ali'i o afio mai i ao o le lagi vaganā ona ua toe fa'atutūina mai a o lumana'i pea lenā aso? O lea ua valo'ia mai ai e Tanielu le toe tutū fa'alē-atoa, auā pe afai e lē o lea, o le a fa'ato'ā toe fa'atutūina mai nei tagata amio leaga i le fa'ai'uga o tausaga e afe o le meleniuma (Fa'aal. 20:5).
 - b. Na 'alaga Iesu ma le leo tele i luga o le satauro, "Ua taunu'u," ona i ai lea o le mafui'e tele na fa'a-avanoaina ai tu'ugamau ma toe tutū mai ai nisi o le 'au pa'ia sa momoe ai (Mata. 27:50-52; Ioane 19:30). O le tasi lenei toe tutū fa'alē-atoa. O se mea faigatā 'ea i le Atua ona toe fa'atutūina mai fa'apenā o nisi o Lana 'au pa'ia o ē sa galulue a'ia'i ma le fa'anaunau tele i lea aso ina ia latou va'aia atu i le mamalu o le afio mai o Lē sa latou fa'atalitali i ai? E lē gata i lea, a o nisi fo'i o ē sa 'avea ma fili faigatā o Lana upu moni, ia toe fa'atutūina mai ina ia latou va'ai i le mamalu silisili ma le pa'ia o Lē na latou fa'amasino i ai, ma tu'ia, ma tauemua?

V. E sili ona fa'amalamalamaina gofie o le aso o Ieova i se fa'afanua (e pei ona tusia i le itulau e 93). Silasila i ai ma ia su'esu'e ma le fa'autauta i ona vaega uma ma la'asaga.

VI. O lo latou vā feagai ma lenei aso tele ua taulata mai.

- | | |
|-------------------------|--|
| 1. Ioelu 2:11 | E mamafa le aso o Ieova e matuā mata'utia, po o ai sē na te mafai ona talia? |
| 2. Sefana. 2:3 | O le tali i le fesili, ia fa'apea ona faia e i latou uma o ē fa'atuatua ma matata'u, atonu e lilo ai i le aso o le to'asā o Ieova. |
| 3. Mika 6:8 | O mea ua finagalo ai Ieova ia tatou faia. |
| 4. I Ioa. 3:17 | 'Aua ne'i fa'asesēina se tasi, ua na o lē fai le amiotonu, o le amiotonu lea. |
| 5. Mata. 22:1-14 | Vagana ona ua tatou o'ofu i le ofu o le fa'aipoipoga (o le amiotonu lea a Keriso), o le a lē fa'avasegaina ai i tatou fa'atasi ma le to'atele o ē o le a tulia i le pouliuli i fafo. |

"Ua na o i latou o ē ua o'ofu i ofu o Lana amiotonu o le a latou lava tutū i luma o le pupula o Lona mamalu pe a afio mai o Ia ma le mana ma le mamalu tele." - O Keriso la tatou Amiotonu, itulau e 123.

"Na manumalo Iakopo ona o lona filigā ma lona finau maua'i. O le puapuagā o Iakopo, atoa ma lona manumalō, ua 'avea o se a'oa'oga tāua e mafai ona tatou lagona ai le mana ma le aogā tele o le tatalo fa'atauana. O ōna pō nei lava ua tatau ona a'oa'oina ai i tatou i le uiga o le tatalo fa'atauana ma le fa'atuatua e le ma-fa'aga'e'etia." - O Pateriaka ma Perofeta, itulau e 203.

TAULOTO: Sefana'ia 2:3.

O LE NOFOĀGA TUMAU O LE 'AU PA'IA

- I.** Ua folafolaina mai e le Atua o se nofoāga matagofie ma le silisili 'ese mo Lana 'au pa'ia o ē ua Ia fa'aolaina.
1. **Kenese 1:31; 2:8-19, 15** Sa ato'atoa ona lelei o le nofoāga na saunia e le Atua mo le tagata i le amataga, a e peita'i na 'avea le ofi mai o le agasala ma ala na lē iloa ai lenā nofoāga lelei.
 2. **Isaia 65:17** O le manatu ma le finagalo o le Atua i le mea o le a Na faia.
 3. **II Pete. 3:6,7, 10** O le lagi nei ma le lalolagi nei o le a matuā fa'aumatiaina lava.
 4. **II Pete. 3:13** O le a faia e le Atua o le lagi fou ma le lalolagi fou mo Lona nu'u.
 5. **I Kori. 2:9** O mea e le'i va'aia e mata, e le'i lagona fo'i e taliga, o mea ia ua saunia e le Atua mo i latou o ē alolofa iā te Ia ma tausi i Āna poloa'iga (Isa. 64:4).
- II.** O lenei nofoāga lelei ua folafolaina mai, ua 'avea ma fa'amoemoega o le fanau a le Atua i tupulaga uma.
1. **Eperu 11:8-10** Sa fa'amoemoe ma fa'atalitali i ai Aperā'amo.
 2. **Eperu 11:13-16** Sa fa'atuatua i ai le fanau moni a Aperā'amo.
 3. **Eperu 11:35** Atoa uma le 'au fa'atuatua.
 4. **Salamo 84:11** O le folafolaga tāua a le Atua.
- III.** O le 'au fa'atuatua uma e 'avea i latou ma suli fa'atasi ma Aperā'amo i mea lelei ua folafolaina mai.
1. **Roma 4:13** O le folafolaga iā Aperā'amo, o le a 'avea le lalolagi (fou) ma tofi o ia ma lana fanau.
 2. **Kalatia 3:29** O ē o iā Keriso, o suli i latou fa'atasi ma Aperā'amo i le mea ua folafolaina mai.
 3. **Mataio 5:5** "Amuia ē agamalu, auā e fai mo latou tofi le nu'u."
- IV.** Ua fa'amatalaina mai e le Tusi Pa'ia nisi uiga o le soifuāga o le 'au pa'ia i le lalolagi fou.
1. **Isaia 65:21-25** O nisi mea o le a latou faia.
 2. **Faaal. 21:1-5** O le uiga matagofie o lo latou soifuāga.
 3. **Isaia 66:22, 23** O tapua'iga fa'ale-lalolagi fou.
- V.** O le a silisili 'ese le matagofie o le lalolagi fou ma lona laumua, o le Ierusalema Fou lea.
1. **Isaia 35:1-10** O le tasi lenei fa'amatalaga o le lalolagi fou.
 2. **Faaal. 21:9-27** O le a'ai pa'ia, Ierusalema Fou.
 3. **Faaal. 22:1,7** O le vai o le ola ma le la'au o le ola.
- VI.** O le a ainā le lalolagi fou i tagata ē o ua aunoa ma le agasala ma ua iā te i latou le uiga lē i'uvale. O i latou uma ia ua togiolaina talu ai le taulaga ua saunia e Iesu.

1. **Faaal. 21:27** O le tofi o i latou o ē ua latou 'ausia le tapula'a a le Atua.
2. **Faaal. 22:14, 15** E sao atu i ai na o i latou o ē ua latou faia le finagalo o le Atua.
3. **Faaal. 22:4** O le a maua e i latou lenei manuia silisili, o le va'ava'ai atu lea i fofoga o lo latou Fa'aola.
4. **Isaia 53:11** O le a silasila ai Iesu i Lana fanau o ē ua Ia togiolaina, ma o le a malie ai Lona Finagalo.
5. **I Kori. 13:12** O le a fa'apupulaina ai le mau mea o lo'o fa'anenefu i lalo nei.

VII. O ōna pō ia o le a fa'ataunu'uina ai le mau valo'aga ma folafolaga o lo'o fa'amafanafanaina ma fa'amalosia ai nei loto o le 'au fa'atuatua a o latou feagai ma puapuagā fa'a-lenei lalolagi.

1. **Eperu 10:35** Ia fa'amalosia pea, auā "ua i ai le tau e tele."
2. **Roma 8:18** O le manuia atali e lē mafa'atusaina.
3. **II Kori. 4:17** O le manuia mamafa e matuā silisili 'ese lava ma le fa'avavau.
4. **Sala. 37:34** Ia fa'atalitali iā Ieova ma tausi i Lona ala ina ia fai mou le nu'u.
5. **Iakopo 1:12** Ia onosa'i i fa'aosoosoga, auā e maua ai le pale o le ola.
6. **Sala. 16:11** O le fiafia e malie ai ma le olioli e fa'avavau.

VIII. O lenei lalolagi sa to'ilalo i le pule sauā a le agasala, ma sa fa'amaulaloina ai fo'i ma fa'apuapuagātiaina ai le Ālo pa'ia o le Atua, o le a i'u ina matuā fa'a-silisilia lava ina o le a 'avea ma afioga o le Atua Soifua (Fa'aal. 21:1-3).

IX. E lē toe faoa e se tasi lenei malō, a o le a tumau e fa'avavau lava (Tanielu 2:44; Fa'aal. 22:5).

X. O le a pule aoao Keriso e fa'avavau lava (Isa. 9:6, 7; Sala. 72:8).

"O tausaga o le vavau a o soloa'i ane, o le a maua atili pea e le 'au pa'ia o fa'aaliga o le mamalu ma le pa'ia o le Atua ma Keriso e sili atu ona loloto ma le ofoofogia." - O le Finauga Tele, itulau e 678.

TAULOTO: Fa'aaliga 22:3, 4.

O LE TULAFONO PA'IA A LE ATUA

I. O le uiga o le Tulafono a le Atua.

1. **Sala. 19:7, 8** E sa'o, e fa'amaoni, e tonu, e mamā.
2. **Iako. 1:25** O le tulafono o le Sa'olotoga ua ato'atoa.
3. **Roma 7:12, 16** E pa'ia, e tonu, ma ua lelei.
4. **Roma 7:14** E fa'ale-agaga le tulafono.
5. **Kalatia 5:14** Ua 'avea le tulafono o se fa'aaliga o le alofa o le Atua.
6. **Roma 13:8-10** O le alofa, o le fa'ataunu'uina lea o le tulafono, auā o lona a'ano moni lava lea.
7. **Luka 16:17** E tumau pea le tulafono.
8. **Mata. 22:34-40** O vaega tetele e lua o le tulafono. O le molimau lenei a le ali'i faife'au ta'uta'ua o Supasione (C.H. Spurgeon):

"Pe afai ua ē alofa i le Atua ma lou loto atoa, e ao lava ona ē tausia le papa ma'a muamua, ma afai e te alofa i lē lua te tuā'oi e pei lava o 'oe lava iā te 'oe, e ao lava ona e tausia lona lua o papa ma'a." - The Perpetuity of the Law, p. 5.

II. O le tu'uina mai o le Tulafono.

1. **Iakopo 4:12** E to'atasi Lē Fai Tulafono.
2. **Malaki 3:6** E tumau le uiga o le Fai Tulafono, e lē liliu, e o'o fo'i i sina liliu itiiti, e leai lava (Iako. 1:17). O le pogai lea ua āla ai ona lē mafai ona fa'aliliuina ai e le Atua o le tapula'a o le amiotonu ua Ia fa'atūina, o Lana tulafono lea ua i ai poloā'iga e sefulu. E lē mafai ona fa'afiti le Atua iā te Ia lava. (Fa'aaogā le Sala. 89:34 ma le Teut. 4:13).
3. **Kenese 26:5** Sa i ai le tulafono ma sa tausia e Aperamo ma lana fanau, a o mamao atu pea i luma le taunu'u atu o le fanauga a Isara'elu i le Mauga o Sinai, na toe fa'amanatuina mai ai.
4. **Esoto 16:28** Na to'asā le Atua i le fanauga a Isara'elu ina ua latou solia Lana tulafono a o le'i oo atu i latou i Sinai (F. 4).
5. **Esoto 18:16** Na a'oa'oina atu e Mose le tulafono i le nu'u a o le'i o'o atu i latou i Sinai.
6. **Roma 5:13** Sa i le lalolagi le agasala e afua mai iā Atamu, se'ia o'o i ōna pō o Mose na tusia ai le tulafono i papa ma'a e lua. O le fa'amaoni lea ua tatou mautinoa ai, sa i ai le tulafono a o le'i o'o i Sinai; auā "pe a leai se tulafono, ua leai se soli i ai" (Roma 4:15; 3:20).

III. O le tu'uina mai o papa ma'a e lua i le Mauga o Sinai, e lē o le fa'ato'a feiloa'i lea o le lalolagi ma le tulafono a le Atua, auā e mafai i le Kenese ona fa'amaonia ai o poloā'iga uma e sefulu o le tulafono.

1. **Kene. 35:1, 2** Tu'u 'ese ia o atua 'ese.
2. **Kene. 31:19, 34** O tupua ua tā. O atua ia na poloa'i atu ai Iakopo i lona 'au aiga ia tu'u 'ese; auā ua aleua ai e lē na o le poloā'iga muamua, a ua fa'apea fo'i ma lona lua.
3. **Kene. 24:2, 3** Na fa'atautōina e Aperamo lana auauna i le suafa o Ieova, auā na ia iloa e lē mafai ona ta'ufuaina e le auauna o lenā suafa pa'ia.

4. **Kene. 2:1-3** Na faia le sapati i le fa'ai'uga o le ulua'i vaiaso sã. Na faia le sapati mo tagata (Mare. 2:27).
5. **Kene. 9:21-26** O le fa'asalaga ona ua lē āva i le tamā.
6. **Kene. 4:8-11** O le ulua'i fasioti tagata. Sa lua'i lapata'iina, "o lo'o i le "faitoto'a le agasala," (o le soli tulafono lava lea).
7. **Kene. 39:7-9** "Pe faapefea ona ou agasala ai i le Atua?" (Faaaoga ma le Kene. 20:2-6).
8. **Kene. 12:12,13,18** "Se ā le mea a matou gaoi ai ario po o auro?" (Kene. 20:4-7).

IV. O le Aogā o le Tulafono.

1. **Roma 3:20** O le tulafono e iloa lelei ai le agasala.
2. **Roma 7:7** Ana lē seanoa le tapula'a o le amiotonu, o le tulafono lea, po ua tatou lē iloa le uiga o le agasala.
3. **Roma 3:19** Ua nofo sala le lalolagi uma talu ai le tulafono ua latou solia.
4. **Kala. 2:16** E lē mafai i le tulafono ona ta'u amiotonuina ai le tagata agasala.
5. **Kala. 3:24** O le galuega tele ma le tāua a le tulafono, o le ta'ita'iina lea o i tatou iā Keriso ina ia ta'u amiotonuina ai i le fa'atuatua iā te Ia.
6. **Iako. 1:22-25** O le tulafono, o le tapula'a lava lea e fa'ataua i ai le olaga o le tagata Kerisiano.
7. **Iako. 2:8-12** Ia ō gatasi upu ma amio ma le tapula'a pa'ia fa'ale-tulafono.
8. **Mata. 19:17** E ui lava ina ua lē maua mai i le tulafono le fa'amagaloga o agasala, a ua tataua lava i lē ua fia o'o i le ola ona tasi i ai.
9. **I Ioa. 2:3, 4** E lē mafai se tasi ona ola i le ola moni fa'a-Kerisiano pe a lē usiusita'i i le tulafono a le Atua.
10. **Iako. 2:12** O le tapula'a o le fa'amasinoina ai le lalolagi, o le tulafono lava lea.

V. O le manatu o nisi e vā faitaga'i le Tulafono ma le Tala Lelei, a e peita'i e sesē lava lea taofi. E lē fete'ena'i, a e felagolagoma'i ma galulue fa'atasi lenei to'alua mo le fa'aolaina o i tatou. O lo tatou malaia pe a tia'i le tasi, e tu'u tau o le tasi.

Roma 3:21 O lenei ua molimau mai Paulo ma le leai o sina fa'aletonu, e lē fa'aleaogāina le tulafono i le fa'atuatua, a e atili fa'atumauiina ai. Ua fa'apenei ona fa'amalamalamaina mai e se tasi o lenei fuaiupu:-

"'Aua ne'i masalo se tasi e fa'alē-aogāina le tulafono a le Atua i le sauniga alofa e ta'ua ai le fa'atuatua iā Iesu e ola ai, a o le sauniga lava lea e fa'atumauiina ai le tulafono a le Atua, auā e fa'apea lava ona fa'aalia ai le lelei o le tulafono. E matuā mamalu ai le tulafono, auā o le togisala na faia e Iesu e iloa lelei ai e lē se mea mamāsagia le solia o le tulafono, auā o le togisala na faia e Iesu e iloa lelei ai fo'i e lē mafai ona solia e se tasi le tulafono, a o le mea faigatā lava. E iloa lelei ai fo'i e lē mafai ona soli e se tasi le tulafono, a e sa'oloto pea ma le lē sa'o. O lea sauniga fo'i e atili iloa ai e tagata le leaga o le agasala, ina ua fa'apea ona faigatā o le togiola, ona ino'ino ai lea i ai, a e fia 'ana'ana i le finagalo o le Atua. E tupu ai lava le fia usiusita'i i le tulafono o i latou o ē ua fa'aolaina i le fa'atuatua, auā latou te fia fa'aa'oa'o i lo latou Faaola."- Si'i mai le tusi e igoa, O le Fa'amatalaga o le Tusi a Paulo iā Roma, (Malua Press), itulau e 50.

VI. Ua fa'amalamalamaina e nisi mai itū ese'ese o le talalelei le tulafono.

1. Ua manino ona fa'amalamalamaina mai o le soso'o fa'atasi o le tulafono ma le tala lelei e se tasi o le 'au ulua'i misionare i Samoa, o Misi Tana lea. O lana a'oa'oga lenei ua si'i mai lana tusi e igoa, *O le Galuega a le Auauna a Iesu, (by George Turner, L.L.D., Second Edition, Malua Press,*

1912). O le Mataupu e VIII ua fa'atomuaina e fa'apea: "O Mataupu tatou te Lauga ai," itulau e 16,17, i le ua tusia ai nei upu:-

"Ai e lua igoa ua aofia ai matā'upu uma e autū ai a tatou lauga: o le tulafono, o le tasi lea; o le Tala lelei, o le tasi lea." Se'i tatou manatunatu i ia mea e lua.

- a. *"O le tulafono, o le mataupu lea ua aofia ai upu uma ua fa'atonuina mai e le Atua tatou te faia, a e maise tulafono e sefulu na tusia i papa ma'a (Esoto 20:17). Ia tatou lauga ai ma fa'amatala atu ai i tagata. Ua fai mai Paulo (Roma VII:12), 'E pa'ia le tulafono, ma le poloa'iga e pa'ia, e tonu ma ua lelei;' e lē o i ai se upu leaga, e lē o i ai ni upu a tagata, na o upu na saunia mai e le Atua. Afai tatou te usiusita'i i ai, e tele lo tatou manuia.... O le mea e fai atu ai nei, e tataua ona tatou ta'u atu ma fa'amatalaina atu i tagata le uiga ma le aogā tele o le tulafono. Ua sesē tagata e to'atele, ina ua latou fa'apea, tau o le alofa tunoa o Iesu e fa'asagasaga i ai, a e maua fa'apefea le alofa tunoa mai le lagi, pe a lē manatua tulafono a le Tupu o le lagi? E maua fa'apefea le alofa o le Atua, pe a fiasia pea i le galuega a le ti'āpolo? E lelei ina ta'ito'atasi ma tali le alofa tunoa ia fa'amagaloina ai lana sala, ia fa'asaga fo'i lava i tulafono lelei a lo tatou Ali'i, ina ia faia lava."*
- b. *"'Aua ne'i te'a ese'ese le tulafono ma le Tala lelei, a ia soso'o fa'atasi lava, pe a tatou lauga i tagata agasala. Ua fa'atau aogā ia matā'upu e lua; o le tulafono, o lo tatou ta'ita'i tama lea e ana e a'oa'i iā te i tatou ma ta'ita'i iā te i tatou, ia o'o iā Iesu (Kalatia 3:23). E aogā le tulafono e tui a'i le loto, a e aogā le Tala lelei e fofō ai le loto ua tu'ia, ua tigā ona o agasala. E aogā le tulafono tatou te iloa ai lo tatou ma'i, ina leaga; a o le Tala lelei, o le vaila'au lea e aogā i le ma'i.... O Iesu, o lo tatou Sui lava ia, a e lē na o lea, o Ia fo'i o lo tatou Tupu. E lelei ina tatou fa'atuatua i lo tatou Sui; a e lē na o lea, ia usiusita'i fo'i i lo tatou Tupu. Ua mamalu pea le tulafono ua lē fa'alē-aogāina lava i le fa'atuatua (Roma 3:31)."*

Se'i tatou faitau i lauga a Iesu, tatou te iloa ai sa masani lava Ia e ta'u atu le tulafono fa'atasi ma le Tala lelei. Ia fa'apea Āna auauna ona saunia o la latou galuega. "Aua ne'i te'a ese'ese le tala lelei ma le tulafono, a ia soso'o fa'atasi lava i lauga tatou te faia."

2. E fia fa'aopoopoina ma molimau a nisi faifeau ta'uta'ua ma le lau silafia ua manino ona latou fa'amalamalamaina mai ai o le matuā galulue fa'atasi o le tulafono ma le tala lelei:-

- a. *"E lē mafai ona lagona e le tagata le uiga moni o le agasala, pe a aunoa ma le tulafono a le Atua.... Ma ia matau lelei, sa lē gata iā Iutaia i ōna pō o le 'au aposetolo ona aogā i ai le tulafono, a ua fa'apea fo'i ma tagata o nu'u 'ese (e i ai tatou – Fa'atonu), e o'o lava i ōna pō nei. Ua lē aliali mai fo'i le salamō fa'amaoni pe a lē tala'iina ma fa'amamafaina poloa'iga e sefulu.... O lea ua 'avea ai le tulafono e peisea i o se mea faigaluega i lima o se faife'au fa'amaoni e fa'amata'u ma fafagu ai tagata agasala, ma ua mafai lava e ia ona fa'ailoa atu, ua i ai tagata agasala uma i lalo ifo o le fa'asalaga." - Atamu Kalata (Dr. Adam Clarke), Ekalesia Metotisi... On Romans 7:13.*
- b. Ua fa'apenei le a'oa'oga a lenei auauna ta'uta'ua o Supasione (C.H. Spurgeon):
"Se ā le aogā o le tulafono a le Atua? O lona aogā 'ea lenei ia tatou tausi i ai ma le fa'amoemoe ia fa'aolaina ai tatou? E leai lava! Ua tu'uina mai le tulafono ina ia fa'ailoa mai ai iā i tatou le matuā lē mafai ona fa'aolaina o i tatou i ni a tatou lava galuega, ma ia iloga ona punitia ai o i tatou mo le fa'aolaina i le alofa tunoa.... E le talia lava e tagata le alofa tunoa vaganā ona ua o'o ina latou tetemū i luma o le tulafono e tonu ma le pa'ia a le Atua. O lea ua matuā tataua ai lava ona i ai o le tulafono, ma o lo'o fai lona aogā tāua: e ao lava ona 'ia 'aua ne'i ave'eseina mai lona tulaga e tataua ai." - The Perpetuity of the Law, pp. 10,11.
- c. A o le a'oa'oga lenei a se tasi misionare sa galue i lo tatou atunu'u i tausaga e tele, o Misi Saipele lea (Rev. J.W. Sibire), ua si'i mai le tusi, - *O Lauga i le Afioga a le Atua*, (Malua Press), itulau e III.

"Sa fa'apea mai Luteru, 'Pe 'afai ua ou ma'i, ou te alu i le foma'i; ou te lē iloa le uiga o lo'u ma'i na ona lagona le tigā i lo'u tino. A o le foma'i o le a iloilo i lo'u tino, o le a fa'alogo i lo'u fatu. Mulimuli ane o le a fa'atatau mai le vaila'au e tusa ma lo'u ma'i. E lua vaega o le poto o le foma'i; o se tasi vaega ua mafai ai ona iloa le uiga o lo'u ma'i; o se isi vaega ua fa'atonu ai vaila'au ma togafiti ua aogā i ai.' O lenei fa'atatau: O le tasi itū o le poto, o le Tulafono lea, auā ua matuā iloa e le tulafono o mea uma i le loto o le tagata. O le a vave maua le pogai o le ma'i, o le agasala lea. O le a fa'atonu mea uma e tatau i ai, a ua lē mafai i le Tulafono e fa'amalolōina le tagata. Ua gata lea mea i le Tulafono, o le Ola ua iā Keriso Iesu."

3. E i ai sesē e lua e ao ina tatou 'alo 'ese ai:

- a. O le fa'amamafa teleina o le tulafono, a e fa'alē-amana'iaina Keriso, le Vaila'au.
- b. O le fa'amamafaina o le Vaila'au, a e fa'alē-amana'iaina le tulafono.

O le malaia pe a tū i tulaga muamua, a e tusa fo'i ona malaia ma lona lua o tulaga. O le finagalo moni o le Foma'i poto fa'ale-lagi, o lo tatou fa'aaogāina fa'atasi lea o vaega tāua uma e lua o le poto fa'afoma'i. A e o le tulafono ona fa'ailoa mai o le pogai o le ma'i, o le agasala lea. A e o le tala lelei na fa'ailoa mai o Keriso, Lē na te mafai ona lavea'i ma fa'aola i lē ua sulufa'i atu iā te Ia ai le pule sauā ma le malosi o le agasala.

O LE MALIU O IESU MA LE TULAGA O LE TULAFONO

- I. E to'atele ua i ai lenā taofi ma ua fa'aaliali ona latou a'oa'o mai e fa'apenei: Sa gata i ōna pō o le Feagaiga Tuai ona pulea ai tagata e le tulafono; a e peita'i ōna pō nei o le Feagaiga Fou ua lē o toe aogā ai le tulafono ina ua 'avea le maliu o Iesu ma āla ua magalo ai mea uma, ma ua fa'agataina mai ai fo'i ma le aogā o tulafono.

1. Ua lē ō gatasi lea taofi ma le a'oa'oga manino o i ai i totonu o le Tusi Pa'ia.

Isaia 42:21 O le valo'aga lenei i le mea o le a faia e le Mesia i le tulafono pe a afio mai o Ia, fai mai:

(1) Na te ta'uleleia le tulafono

(2) Na te fa'amamalu i ai.

- a. Na **"ta'uleleia" e Iesu le tulafono** i Lana a'oa'oga tāua ma Ia fa'amalamalamaina atili ai le a'ano moni ma le uiga loloto o le tulafono. Faitau ma le fa'autauta i le Mata. 5:21, 22, 27, 28, na fa'amatalaina ai e Iesu le uiga loloto o lona ōno ma lona fitu o poloā'iga e sili mamao atu lava i lō se malamalama sa maua e lenā tupulaga (Mataio 12:12, o lona fā o poloā'iga). Pe afai e moni, na silafia e Iesu ua toetiiti lava ona fa'ate'a 'eseina ai lea o le tulafono i Lona maliu, ona o le ā 'ea na Ia tau tigā ai e toe fa'amalamalamaina lona lautele ma lona loloto? Pe sa lē sili 'ea ona Ia fa'atusaina o le tulafono i se "upega ua lē tali fau?"

- b. Na **"fa'amamaluina" e Iesu le tulafono** i Lona matuā tausī ato'atoa i ai. (Faitau i le Ioane 15:10; 8:46). E leai se tasi o poloā'iga e sefulu e le'i tausia e Iesu. Ua valo'ia mai e Tavita le matuā fiafia tele o Iesu i le tulafono a Lona Tamā (Sala. 5:17, 18).

Mata. 5:17, 18 O Lana ta'utinoga malamalama, **"Ou te le'i sau e tatalaina le tulafono."**

Luka 16:17 O le a tatou talitonu 'ea ua mavae atu le tulafono 'atoa uma, meāmanū o se fasi mata'itusi e tasi ua fetalai mai ai Iesu: "E mavae gofie atu le lagi ma le lalolagi, a e lē i'uvale sina fasi mata'itusi e tasi o le tulafono?"

2. **Manatu Fa'aopoopo:- "A 'ia fa'ataunu'uina."** Ua taofi nisi, o le fa'agataina mai lea e Iesu o le tulafono i Lona maliu. A e ia manatua, na mua'i ta'utino mai e Iesu, "'Ou te le'i sau e tatalaina le tulafono." Ona soso'o loa lea ma nei 'upu, "a ia fa'ataunu'uina." E lē mafai lā ona uiga fa'atasi le tatalaina ma le fa'ataunu'uina, auā o lenei ua tu'u fa'afeagai e Iesu.

- a. O le 'upu Eleni ua fa'aliliuina "fa'ataunu'uina" i lā tatou Tusi Pa'ia, o **plerosai**, o lona uiga, o le "a'oa'oina atu," "tala'iina atu," po o le "matuā fa'amamafaina" (As defined in *Greenfield's Greek Lexicon*). Silasila o uiga uma lava e fa'afeagai tonu ma le "tatalaina," "fa'aumatiaina," ma "fa'agata mai."

- b. E fa'apenei le fa'amatalaga a *Misi Parate*:

"E fa'ataunu'uina. E tele mea na faia e Iesu ua taunu'u ai valo'aga iā te Ia. E fa'apea fo'i le tulafono, ua ana'ana i ai o Ia; ma ua fa'aali mai le lautele ma le loloto o tulafono ia ana'ana i ai ōna tagata." - *O le Tusi e Fa'amatalaina ai le Tusi Pa'ia*, itulau e 443.

- c. A o le fa'amalamalama lenei a le ali'i a'oa'oina o *Webster*, o le suafa lauiloa lea ona o lana tusi tele e su'esu'eina ai 'upu, fai mai: "O le uiga o le 'upu 'fa'ataunu'uina' pe a fa'atatauina i se tulafono, o le 'matuā usiusita'i lea i ai'."

- d. Ua fa'auiga e nisi le fetalaiaga a Iesu i luga o le satauro, "ma ua taunu'u," i le tulafono e fa'apea, o le fa'agataina mai lea e Iesu o le tulafono i Lona maliu.

Ioane 19:30 O lo'o lomia i le pito o le Tusi Pa'ia tele e fa'afeagai tonu ma lenei mau le "m. 17 4," o lona uiga, ia e liliu i le matā'upu e 174, e maua ai se fesoasoani mo le fa'amalamalamaina atili o le fetalaiaga a Iesu, "Ua taunu'u." Fai mai, "Ua 'ou

fa'aumaina le galuega na e tu'uina mai iā te A'u 'ou te faia." Ioe, e lē o le tulafono e fa'asino i ai lā lenā fetalaiga a Iesu, auā ua uma ona Ia ta'utino mai ma le leai o sina fa'alētonu, "'Ou te le'i sau e tatalaina le tulafono."

II. A e po o le ā 'ea lā le uiga o le 'upu a Paulo e fa'apea, o le alofa tunoa ua tatou nonofo ai nei, a e lē o le tulafono?

Roma 6:14 "Ua 'outou lē nonofo i le tulafono (-'ua 'outou lē nonofo i le fa'asalaga o le tulafono), a o le alofa tunoa. (Ia fa'atusatusaina ma le Roma 8:1).

- 1. Manatu Fa'aopoopo:-** Ua tau 'aveina e Keriso a tatou agasala i Lona lava tino i le satauro (I Pet. 2:24). O le fa'asalaga o le tulafono sa tataua ona tatou lavevea ai, "sa i Ōna luga lea" (Isa. 53:5). O i latou uma o ē ua latou talia Keriso i le fa'atuatua ina ia 'avea o Ia mo latou Fa'aola, ua tu'usaunoaina i latou ai le fa'asalaga o le tulafono. E i ai ona fai mai o Paulo, "O lenei, ua leai se fa'asala i ē o iā Keriso Iesu" (Roma 8:1). I le ma lenei, "Auā e lē pule le agasala iā te 'outou; auā ua 'outou lē nonofo i le tulafono (i lona fa'asalaga), a o le alofa tunoa (ua tu'usaunoaina ai 'outou e Keriso ai le fa'asalaga o le tulafono se manū a 'outou malaia ai. Roma 6:14).
- Ua na o i latou o ē ua latou te'ena Keriso o le a o'otia pea i le fa'asalaga o le tulafono talu ai ona ua latou lē talia o Ia e 'avea mo latou Sui. A ia matau lelei, e 'ese le tulafono lava ia, 'ese fo'i ma lona fa'asalaga. O le lavea'iina o i tatou mai le fa'asalaga o le tulafono, o lē o lona uiga ua tineia ai ma le tulafono. E lē 'avea le alofa tunoa o Keriso ma āla e so'ona solia ma te'ena ai le tulafono. Sa fa'apenā le manatu o nisi i ōna pō o Paulo, na āla ai ona a'oa'iina i latou e le aposetolo e fa'apea, "Tatou te agasala (soli tulafono) 'ea ina ua tatou lē nonofo i le tulafono (i lona fa'asalaga), a o le alofa tunoa? 'Aua ne'i fa'apea" (Roma 6:15).
- Pe a tineia le fa'asalaga o se pagotā i le alofa tunoa o le ali'i kovana, o lona uiga 'ea ua tineia ai fa'atasi ma le tulafono a le malō, po ua fa'atagaina lenei tagata ua alofagia ma fa'amagaloina ia alu ma na so'ona fa'ale-amana'iaina le tulafono? E leai, a o le a sili i lo tagata uma ona tataua ona āva o lenei tagata i le tulafono ina ua lagona tele e ia e lē na o le mamalu ma le malosi o le tulafono, a e maise fo'i o le alofa tunoa ma le alofa mutimutivale o lē āna le tulafono.

III. A e pe ai se ā lā ua fai mai ai Paulo, "O le i'uga o le tulafono, o Keriso lea?" E lē o lona uiga 'ea ua fa'aumatiaina e Keriso le tulafono?

Roma 10:4 "O le i'uga o le tulafono." O le i'uga lea po o le mea o galue aga'i i ai le tulafono ia tatou maua Keriso ma Lana amiotonu. O le ta'ita'i tama le tulafono na te ta'ita'ina i tatou iā Keriso (Kala. 3:24). E lē o le i'uga o le a gata mai ai, a e peita'i o le i'uga e galue aga'i i ai.

I le tusi e igoa, *O Lauga i le Afioga a le Atua*, (Malua Press), itulau e 218, o lo'o tusia ai le lauga a Misi Tana ua fa'avaeina i le Kalatia 3:24, ma ua 'otoina mai ai le vaega lenei:-

"Ua lē fa'aumatia le tulafono, ua aogā pea (Mata. 5:17; Roma 3:10). Ua fa'atusaina nei e Paulo i le ta'ita'i tama. O le ta'ita'i tama o le igoa lea o le tasi 'au'auna e tofia e le ali'i e va'ava'ai pea i ōna atali'i, ma ta'ita'i iā te i latou i mea latou te ō i ai. A e maise a'oga - e ā le ta'ita'i tama ona ta'ita'i o ālo o le Ali'i i le a'oa'o, lē na te faia a'oga a tama. Ua fa'apea fo'i i tatou i nei ōna pō, o tama i tatou, a o le tulafono o lō tatou ta'ita'i tama lea, e āna ē tau fa'atonu ai le āla tatou te savavali ai, ma se'ia ta'ita'iina ai i tatou iā Iesu."

IV. E i ai le aogā tāua o le tulafono i le sauniga o le ōlataga ma o le a tupu mai se fa'alavelave mata'utia pe a 'ave 'eseina mai lona tulaga ua atofaina e le Atua.

1. O le tulafono e iloa lelei ai le agasala. E lē ta'usalaina se tasi pe a lē o i ai le tulafono (Roma 3:20; 5:13).
2. Pe a leai lā le tulafono, ua leai fo'i ma sē e toe soli i ai. O lona uiga, ua tineia fa'atasi le tulafono ma le agasala; auā "o le agasala, o le solitulafono lava lea" (I Ioane 3:4).
3. Ona lē toe mana'omia ai lea o se Fa'aola. Ua fa'asuafaina le Ālo o le Atua o Iesu; **"auā e fa'aola e Ia Lona nu'u ai a latou agasala"** (Mata. 1:21). A e se'i fa'auta mai, ua leai sē toe agasala; auā ua fa'aumatia le tulafono.
4. Pe afai ua lē o toe mana'omia se Fa'aola, ua lē o toe mana'omia fo'i ma le tala lelei o lo'o folafolaina mai ai le Fa'aola ma Lona alofa tunoa. O le tala lelei, "o le mana lava lea o le Atua e ola ai i latou uma o ē fa'atuatua" (Roma 1:16). A e se'i fa'auta mai, ua lē o toe fia fa'aolaina se tasi, auā ua uma le tulafono, uma ai fo'i ma le agasala.
5. Pe afai ua lē o toe mana'omia le tala lelei, ua lē o toe mana'omia ai fo'i ma le Tusi Pa'ia o lo'o tusia mai ai le tala lelei. Ona lē toe mana'omia fo'i lea ma le vasega mamalu o faife'au ma a'oa'o, o ē latou te folafolaina le tala lelei ma fa'amatalaina le Tusi Pa'ia. O le a fa'apea fo'i ona lē toe mana'omia ni fale sā, a'oga fa'ale-lotu, 'au misionare mo nu'u 'ese, nusipepa fa'ale-tala lelei, ma isi lava mea tau i le tala lelei.
6. O lea ua tatou mautinoa ai, o se a'oa'oga mata'utia lava lenei a'oaoga ua ta'u lē-aogāina ai le tulafono pa'ia a le Atua. Pe a fa'amalepeina le fa'avae, e ao lava fo'i ona pa'ū i lalo ma le falealuga. O lea ua fai mai ai Tavita, "A fulisia fa'avae, ua leai loa se mea e toe mafaia e le tagata amiotonu" (Sala. 11:3).
7. E leai se fa'ai'uga mo lenei matā'upu e sili atu ona feagai lelei fa'apei o le molimau manino lenei e le ali'i faife'au mamalu o **Ioane Uesilē (John Wesley)**, ua ia molia mamafa ai i latou uma o ē ua latou ta'u lē-aogāina le tulafono.

"O fili aupito mata'utia o le Tala Lelei a Keriso, o i latou ia ua matuā fa'aaliali ona latou fa'amasino i le tulafono, ma latou ta'uileagaina le tulafono, .. ua latou a'oa'o mai ma le lē natia e fa'apenei: 'O le ā le mea na faia e le tatou Ali'i i le tulafono? Na ia fa'ate'aeseina. Tau lava ina ia e fa'atuatua, ona pau lea o le tiute o lo'o feagai ma oe.'...O lenei mea ua tusa i le matuā finau atu i lo tatou Ali'i i Ōna luma, ua tusa fo'i i le fai atu iā te Ia, ua lē iloa e Ia ona fa'ataunu'uina o le fe'au na 'auina mai ai o Ia. 'Le Ali'i e, 'aua e te tu'uina atu lenei agasala iā te i latou. Lo'u Tamā e, ia e fa'amagalo iā te i latou, auā ua latou lē iloa le mea ua latou faia!'

"O le itū e ōfo tele ai i lenei galuega fa'asesē, ona o i latou o ē ua latou faia, ina ua iā i latou lenei manatu, o lo'o latou āva iā Keriso i lo latou fa'amalepeina o Lana tulafono, ma o lo'o latou fa'amamaluina lona tulaga a o latou fa'alē-aogāina o Lana a'oa'oga! E moni, ua latou āva atu iā te Ia e pei ona faia e Iuta ina ua ia fai atu, 'Rapi e, si o'u alofa; ona sogi ai lea o ia iā te Ia.' Ua tusa ona tataua ona Ia fetalai atu iā te i latou uma ia, 'E te fa'alataina 'ea le Atali'i o le Tagata ma le sogi?'... E lē ma-fa'asaoina mai lenei moliga i so'o se tasi ua ia folafolaina le fa'atuatua i so'o se āla e fa'amata o le a fa'amāmāsagiaina ai ia so'o se uiga o le usiusita'i; so'o se tasi fo'i ua ia folafolaina Keriso i se āla e o'o ai le ta'u lē-aogāina, po o le fa'atauva'aina i so'o se itū, o se poloā'iga aupito itiiti a le Atua." - Works of Wesley, Sermon XXV (7 Vol. ed.), Vol. 1, pp. 225, 226.

TAULOTO: Luka 16:17.

O TULAFONO E LUA

I. E lua tulafono fa'ale-agaga ua manino ona fa'ailoa mai i le Tusi Pa'ia - o le tasi ua ta'ua o le tulafono a le Atua ua i ai Poloā'iga e Sefulu (Ten Commandments), ua lauiloa fo'i i lenei igoa, o le **tulafono tau le amio**. A o le tasi ua ta'ua o le tulafono a Mose, po o le **tulafono tau sauniga**.

1. **Tani. 9:10, 11** Ua manino ona tu'u 'ese'eseina o tulafono e lua, o le tulafono a le Atua ma le tulafono a Mose.
2. **Neem. 9:13, 14** O le tulafono na fetalai mai e le Atua lava, o lo'o aofia ai ma Lona Sapati pa'ia, ma le tulafono na ala mai iā Mose.
3. **II Tupu 21:8** O mea uma na ou poloa'i atu ai iā te i latou (tulafono a le Atua), atoa ma le tulafono uma na poloa'i atu ai la'u auauna o Mose. E lua tulafono.
4. **Malaki 4:4** Ia manatunatu i le tulafono a Mose. E 'ese lenei i lō le tulafono a le Atua. (Fa'aaogā ma le Levi. 7:37, 38).

II. Talu ai ona ua lē pupula iā te i latou lenei 'ese'esega, o lea ua ala ai ona tu'uina e nisi i le tulafono a le Atua o mea e fa'asino i le tulafono a Mose. O lea se'i tatou fa'atusatusaina nei tulafono e lua, o le a manino ona aliali mai o o la ese'esega.

TULAFONO A LE ATUA

- (1) O upu na fetalai mai ai Ieova (Esoto 20:1-17).
- (2) Na tusia e le a'ao o le Atua i papa ma'a (Eso. 31:18; Teut. 10:1-5).
- (3) Sa teu i totonu o le atola'au (Teut. 10:4, 5; I Tupu 8:9).
- (4) E lē o ta'ua mai ai ni taulaga po o ni tausamiga (Eso. 20:3-17; Ierem. 7:22, 23).
- (5) E tasi pē le Sapati o lo'o ta'ua mai ai, o le aso fitu lea e fa'apa'iaina i vaiaso sa uma (Kene. 2:1-3; Esoto 20:8-11).
- (6) Ua sa'o ma ua ato'atoa; e tumau pea e oo i le fa'avavau (Sala. 19:7, 8; Roma 7:12; Mata. 5:17, 18; Luka 16:17).
- (7) O lo'o nofosala ai pea tagata uma o ē soli i se tasi o nei poloā'iga e sefulu (Iako. 2:10; I Ioa. 3:4; Roma 3:19).
- (8) O le tapula'a lava lea e fa'amasinoina ai le lalolagi (Iak. 2:12; Fa'aal. 22:14).

TULAFONO A MOSE

- (1) O upu na poloa'i mai ai Mose (II Tupu 21:8).
- (2) Na tusia e Mose i le tusi (Teut. 31:9, 24; 2 Nofo. 35:12).
- (3) Sa teu i le itū o le atola'au (Teut. 31:24-26).
- (4) Sa tele ai faatonuga i mea e 'ai, ma mea inu, ma tausamiga (Eper. 10:1-10; Kolo. 2:14-17).
- (5) Sa i ai aso fa'asapati e fitu sa masani ona fa'amamaluina i tausaga uma (Levi. 23).
- (6) Sa ta'ua o le ata o mea atalī, sa fa'asino aga'i i luma i le Mesia, ona fa'agataina ai lea ina ua taunu'u i le satauro (Epe. 10:1-4; Kolo. 2:16, 17).
- (7) Ua soloia ma ua lē o toe ta'usalaina ai se tasi (Kolose 2:14).
- (8) Ua lē o toe fa'amasinoina ai nei se tasi (Kolose 2:16).

III. O Ekalesia Porotesano tetele uma ua latou ioe i lenei ese'esega e pei ona aliali mai i a latou ta'utinoga fa'avae, po o molimau fo'i a o latou ta'ita'i.

1. O le a fa'a'oto'oto ona lomua o nisi upu o le ta'utinoga fa'avae a le **Ekalesia o le Fa'apotopotoga** (Congregationalists) ua lausilafia i le igoa lenei: "*O le Ta'utinoga na faia i Savoi*," *Lonetona i le T.A. 1658, (Savoy Declaration)*. Ua 'avea lenā ta'utinoga o se feaofa'iga po o se fa'amaopoopoga o le a'oa'oga fa'avae ma le talitonuga a le Ekalesia o le Fa'apotopotoga e o'o mai lava i le aso nei. E i ai le vaega e fa'asino tonu i le tulafono, i le ua fa'apenei ona fa'avasegaina:-
 - a. "*Sa tu'uina atu e le Atua iā Atamu se tulafono ina ia 'avea o se feagaiga e ta'ita'iina ai lana amio, ma sa noatia ai fo'i o ia ma i latou uma o ē tupuga mai iā te ia i le usiusita'i e ato'atoa.*"
 - b. "*Ina ua mavae lona pa'ū, na 'avea ai pea lenei tulafono ma tapula'a ato'atoa o le amiotonu, ma na i'u ina tu'uina atu e le Atua i le mauga o Sinai i ona vaega e sefulu, sa tusia i papa ma'a e lua.*"
 - c. "*E 'ese ai i lo lenei tulafono (ua fa'atusilimaina e le Fa'atonu) ua lau iloa i lenei igoa, o le tulafono tau amio, sa finagalo malie le Atua e tu'uina atu i le nu'u o Isaraelu,...o tulafono tau sauniga, sa aofia ai sauniga ese'ese fa'afa'atusa e fa'asino i luma i le Keriso.... O nei fa'atonuga uma tau sauniga ua fa'agataina mai nei i le Feagaiga Fou ua tatou i ai.*"
 - d. "*O le tulafono tau le amio ua noatia ai e fa'avavau tagata uma, o ē ua ta'uamiotonuina atoa ma isi, ina ia latou usiusita'i i ai....Ua fa'apea lava fo'i ona lē 'avea le tala lelei iā Keriso ma ala e tineia ai lenei tiute, a e peita'i ua atili fa'amamafaina ai lava"* (Mata. 5:17-19; Iako. 2:8; Roma 3:31). -*O le Ta'utinoga na faia i Savoi, mataupu e XIX.*
2. O le ta'utinoga lenei a le ali'i faife'au a Ioane Uesilē, lē na ia fa'avaeina le **Ekalesia Metotisi** (Methodists), fai mai:-

"E moni, na afio mai lo tatou Ali'i e fa'aumatia ma matuā fa'ate'a 'eseina le tulafono o sauniga na tu'uina atu e Mose i le fanauga a Isaraelu, na aofia ai fa'atonuga uma ma sauniga na fa'asino i taulaga fa'a-anamua ma sauniga fa'ale-malumalu. O lenei mea ua molimau i ai le 'au aposetolo uma lava.... O lenei tusilima o tulafono na soloia lava e lo tatou Ali'i, ma na ave'eseina ma fa'amauiina i fao i le satauro (Kolose 2:14).

"A e peita'i i le tulafono tau le amio ua aofia ai poloā'iga e sefulu, ma sa fa'amamafaina e le 'au perofeta, na te le'i ave'eseina lava. Sa lē afio mai o Ia ina ia tatalaina e Ia se tasi o ona vaega. O lenei tulafono e lē mafai ona fa'aumatia e o'o i le fa'avavau, e tumau pea e pei o le molimau fa'amaoni i le lagi. Ua 'ese lava le fa'avae ua fa'avaeina a'i i le tulafono o poloā'iga e sefulu i lō le fa'avae ua fa'avaeina a'i le tulafono o sauniga... O vaega uma o lenei tulafono (poloā'iga e sefulu-Fa'atonu) -e ao ona tumau i tupulaga uma."-Si'i mai le tusi e igoa, O Lauga a Ioane Uesilē, Lauga e XXV, (Sermons on Several Occasions, 2 Vol. ed.), Vol. 1, pp. 221, 222.
3. O le a'oa'oga lenei a Misi Muti (D.L. Moody), **Ekalesia o le Fa'apotopotoga (Assembly)**:-

"E le'i mafua poloā'iga e sefulu iā Mose, ma e le'i fa'aumatia fo'i i latou ina ua fa'ataunu'uina iā Keriso le tulafono a Mose, ma ua fa'agataina mai ai le tele o ōna sauniga ma fa'atonuga."- Si'i mai le tusi e igoa, Ua Fuatia a ua Māmāsagia, itulau e 14, na tusia e Misi Muti. (Weighed and Wanting).
4. E fia fa'aopoopoina ma le vaega lenei o le ta'utinoga fa'avae a le **Lotu Egelani** (Anglican), ua manino ona latou tu'u 'ese'eseina ai o le tulafono a Mose ma le tulafono a le Atua:-

"Ua lē o toe noatia tagata Kerisiano i le tulafono mai le Atua ma āla mai iā Mose, o le tulafono lea tau sauniga; ua lē ao fo'i ona toe talia o ōna fa'atonuga e so'o se fa'apotopotoga po o se fa'atasiga. A e ui lava i lea, ua leai lava se tagata Kerisiano ua tu'usaunoina mai le usiusita'i i poloā'iga o le tulafono tau le amio." - The Thirty-Nine Articles, Article 8.

III. E lē o le tulafono o poloā'iga e sefulu e fa'asino i ai i le Kolose 2:14-17, a e peita'i o le tulafono a Mose.

Kolo. 2:14-17

Matau lelei mea e fā ua ta'ua mai i le fuaiupu e 16:-

- (1) O mea e a'ai ai ma inu ai.
- (2) O tausamiga.
- (3) O masina fa'ato'ā va'aia.
- (4) O Sapati (aso fa'asapati).

IV. Ua lē o ta'ua mai i le tulafono a le Atua se tasi o ia mea, a o fea o lo'o tusia mai ai? I le tulafono a Mose, le tulafono tau sauniga.

1. **Teut. 32:38** O taulaga i mea e 'ai ma mea e inu.
2. **Nume. 29:12** O tausamiga, e i ai le paseka, ma isi.
3. **I Nofo. 23:31** O masina fa'ato'ā va'aia.
4. **Levitiko m. 23** O aso fa'asapati e fitu sa fa'amamaluina.

V. E fitu aso fa'asapati sa fa'amamaluina e le fanauga a Isaraelu i tausaga ta'itasi e tusa ma le tulafono a Mose. Sa pa'ū nei aso i so'o se aso o le vaisapati.

1. **Levi. 23:5-7** O le aso muamua o le tausamiga o le paseka.
2. **Levi. 23:8** O lona fitu o aso o le tausamiga o le paseka.
3. **Levi. 23:15-21** O le aso o le tausamiga o mea fa'apolopolo.
4. **Levi. 23:23-25** O le aso o le tausamiga o le iligā pū.
5. **Levi. 23:26-32** O le aso o le togioa, aso sefulu o le masina e fitu.
6. **Lavi. 23:34, 39** O le aso muamua o le tausamiga o fale apitaga.
7. **Levi. 23:39** O le aso mulimuli o le tausamiga o fale apitaga.

Sa 'avea nei aso ma aso malōlō (aso fa'asapati) iā Isaraelu i tausaga ta'itasi. O sapati lava ia o lo'o fai mai ai Paulo i le Kolose 2:16, a e lē o le Sapati o lona fā o poloā'iga o le tulafono. Fai mai sa 'avea nei aso fa'asapati ma "āta o mea atalī" (F. 17). Sa fa'ataunu'uina uma i le satauro, a e peita'i le Sapati aso fitu, e lē o se "ata" e fa'asino aga'i i luma, a o le fa'amanatuga lea o galuega ōfoōfogia a le Atua i le foafoāga o le lalolagi. E fa'asino aga'i i tua le Sapati, a e lē o luma (Esoto 20:8-11).

VI. Ua matuā iloga lava ona tu'u 'eseina e Mose o nei sapati fa'a-fa'atusa e fitu, ma le Sapati aso fitu o le tulafono a le Atua.

Levi. 23:37, 38

O tausamiga po o fa'apotopotoga pa'ia (aso fa'asapati, f. 35, 36), atoa ma sapati o Ieova. O lona uiga, e 'ese aso fa'asapati e fitu fa'ale-tulafono a Mose 'ai le Sapati aso fitu o Ieova.

I āna tusi uma, pe a ta'ua mai ai e Paulo se tulafono ua mavae, po ua 'ave 'eseina, ma tineia, e ao loa ona tatou mautinoa, o le tulafono a Mose, le tulafono tau sauniga, o lo'o tautala mai ai le aposetolo, a e lē o le tulafono o poloā'iga e sefulu. E i ai le Efeso 2:15, 16, ua ta'ua ai le tulafono a Mose "o le tulafono i poloā'iga i 'upu fa'asino." E fa'apea fo'i ma "aso" o lo'o ta'ua mai i le Roma 14:5, o aso fa'ale-tulafono a Mose sa saga fa'amamaluina pea e nisi uso vaivai talu ai lo latou lē mautinoa lelei, ua fa'agataina i le satauro sauniga uma fa'apenā, atoa fo'i ma taulaga ese'ese i mea e 'ai e pei ona sa masani ai tagata Iutaia. O le fa'amatalaga lenei a Misi Parate (L.M.S.) i le Roma 14:5, fai mai, "*E sili le tasi aso. O aso ia na fa'asāina i le tulafono a Mose. Ua tutusa aso uma. Ua lē toe sā.*" — *O le Tusi ua Fa'amatalaina ai le Tusi Pa'ia, itulau e 559.*

TAULOTO: Ne'emias 9:13, 14.

O SAUNIGA E O'O MAI AI LE OTI PO'O LE AGAGA

I. Ua fa'aigoaina mamalu i le tusi iā Korinito.

1. I lana tusi e lua iā Korinito, o le matā'upu e tolu (faitau i ai ma le fa'autauta lelei), ua fa'atusatusaina ai e Paulo o mamalu e lua ma ua ia fa'aigoaina: "o le mamalu o le sauniga ua o'o mai ai le oti" (f.7), ma le "mamalu o le sauniga ua o'o mai ai le Agaga" (f.8). Ua toe fa'aigoaina fo'i: "o le sauniga na o'o mai ai le fa'asala," ma le "sauniga ua o'o mai ai le amiotonu" (f. 9).
 - a. O le fa'amatalaga e uiga i le "sauniga na o'o mai ai le oti," fai mai, "na togia ai i mata'itusi i ma'a" (f. 7). Ua fa'atusaina lona mamalu i le pupula sa aliali mai i fofoga a Mose i le taimi na ia alu ifo ai mai le Mauga o Sinai (Esoto 34:29-35), "o le pupula lea e fa'aumatia."
 - b. Ona o lea, ua ōso ai nisi i le fa'ai'uga e fa'apea, "o le sauniga na o'o mai ai le oti," o le tulafono lava lea o poloā'iga e sefulu. I le ua "fa'aumatia" nei lenā tulafono e pei o le pupula sa i le fofoga o Mose, sa aliali mai i se taimi, ona mavae atu ai lea.
2. O lenei fa'amatalaga e fia fa'amaonia ai, e lē o le tulafono a le Atua, a e peitai o le "fetu'u ma le malaia" sa tusia i le tulafono a Mose - o lea e fa'asino tonu i ai le sauniga na o'o mai ai le oti, po o le "fa'asala." Na tu'uina mai e le Atua Lana tulafono pa'ia ina ia 'avea o le tuafono o le ōla mo tagata, a e lē o le oti. (Silasila i le Teute. 30:15, 16). Fai mai le ta'utinoga a Paulo, "E pa'ia lava le tulafono, ma le poloā'iga e pa'ia, e tonu, ma ua lelei." Ona ia fesili mai ai lea, "Ia, ua 'avea 'ea le mea lelei ma mea e oti ai a'u?" Ona fai mai ai lea ma le tali, "'Aua nei fa'apea" (Roma 7:12, 13). O le ā 'ea fo'i le tali a Iesu i le taule'ale'a mau'oa? "Afai e te fia o'o i le ōla 'ia e tausi i poloā'iga" (Mata. 19:17). Ioe, o le tulafono o le ōla, a e lē o le oti.
3. Ia manatua le fetalaiga a Iesu, "Afai fo'i e fevaevaea'i se malō, e lē mafai ona tumau o lenā malō" (Mare. 3:24). E lē fevaevaea'i pe fete'ena'i le a'oa'oga a Paulo. O le T.A. 60 na ia tusia ai lana tusi e lua iā Korinito, a o le tausaga fo'i lea e tasi na ia tusia ai ma lana tusi iā Roma. Pe afai lā e moni ua ta'u mavaeina e le aposetolo le tulafono a le Atua i le II Kori. 3:7, ona o le ā 'ea ua ia toe a'oa'o mai ai i le Roma 3:31 e fa'apea, "E lē fa'aumatia le tulafono i le fa'atuatua, a e peita'i e atili fa'atumauiina ai." E mafai fa'apefea i le tausaga e tasi ona "fa'aumatia" ma "fa'atumauiina" ai le tulafono?
4. Po o lenei:- I lana tusi muamua iā Korinito na tusia i le T.A. 59, o lo'o a'oa'o mai ai Paulo ma le leai o sina fa'alētonu, "E lē aogā lava le peritome, e lē aogā fo'i le lē peritome; ua na o le tausi i poloā'iga a le Atua" (I Kori. 7:19). A e pe fa'apefea lā i le tausaga na tuā'oi ai ona toe fa'afitia ai e le aposetolo o lenā a'oa'oga i lona toe fai mai, ua "fa'aumatia" le tulafono?

II. O le "sauniga" ma le tulafono i le Korinito.

1. Ia matauina ma lenei, ua lē o ta'ua mai lava le tulafono i le matā'upu e tolu o le Korinito e lua. O lenei upu "sauniga" e pei ona fa'aaogāina nei, e lē uiga fa'atasi ma le 'upu tulafono. O le "sauniga" o lo'o tautala mai ai le aposetolo, e fa'asino lea i le āla, po o le faiga sa fai a'i le tulafono i ōna pō o le Feagaiga Tuai, ma o lo'o fai a'i nei i ōna pō o le Feagaiga Fou. E 'ese le tulafono lava ia, a e 'ese fo'i ma le "āla," po o le "faiga" sa faia a'i. E tumau le tulafono, a e suia le faiga.
2. O le mea ua faia e Paulo i lenei matā'upu e tolu o le Korinito e lua, ua ia tu'u fa'afesaga'i le faiga na fai a'i le malā o le Atua i ōna pō o le Feagaiga Tuai ma le faiga fou o lo'o fai a'i nei i ōna pō o le Feagaiga Fou. I ōna pō o Mose ma le fanauga a Isaraelu sa fasiotia ai lē ua soli

tulafono, sa lē alofagia lava. Ua lē fa’apea i nei ōna pō ina ua fa’a-avanoaina e Keriso le āla fou e alofagia ma fa’amagaloina ai le 'au soli tulafono (Eperu 10:19, 20).

III. O se fa’amalamalamaga.

1. O LE SAUNIGA NA O’O MAI AI LE OTI.

- a. E fa’asino tonu lea i le fetu’u ma le malaia ua tusia mai i le tulafono a Mose ma sa o’otia ai le tagata soli tulafono. O le tasi lenei ‘ese’esega i le vā o le tulafono a Mose ma le tulafono a le Atua, ina ua leai se fetu’u po o se malaia o lo’o tusia mai i le tulafono a le Atua, a e peita’i sa i ai i le tulafono a Mose.

i. **Tani. 9:11** “O le fetu’u ma le malaia” ua tusia i le tulafono a Mose.

ii. **Levi. 26:14-42** O le fetu’u ma le malaia mo lē ua soli tulafono. (Fa’aaogā ma le Teute. 27:14-26).

- b. E moni, sa tusia le tulafono o poloā’iga e sefulu i papa ma’a e lua, a e peita’i sa fa’apea fo’i ma le āta o le tulafono a Mose ma ōna fetu’u ona tusia e Iosua i ma’a o le fata faitaulaga i le Mauga o Evalu.

i. **Teute. 27:2-8** Sa poloa’iina Isaraelu ia latou tusia se āta o le tulafono a Mose i ma’a pe a o’o ina latou sopoa atu Ioritana, "ia togitogi lelei lava" (Teute. 11:26-29).

ii. **Iosua 8:30-34** Mulimuli ane, ina ua tū lau’ele’ele Isaraelu i le nu’u o le folafolaga, ona faia lea e Iosua e tusa ma lenei poloā’iga. Sa togitogia i ma’a o le fata faitaulaga i le Mauga o Evalu le āta o le tulafono a Mose, ua aofia ai ma lona fetu’u. O le sauniga la lenei na o’o mai ai le oti, “na togia i mata’itusi i ma’a,” a e lē fa’asino i papa ma’a e lua o le tulafono a le Atua; auā sa lē tusia ai se fetu’u po o se malaia. O papa ma’a fo’i ia na tusia e le a’ao o le Atua (Esoto 31:18), a e le’i togitogia e se tagata.

- c. I ōna pō o Mose ma le fanauga a Isaraelu sa vave tauia ai le soli tulafono na faia ma le loto i ai (faia ma le mautinoa).

Eperu 10:26-28 O lē na ia fa’ale-aogāina le tulafono a Mose, na oti o ia i le mau a le to’alua po o le to’atolu, ua lē alofagia. (Faitau ma le Levi. 20:9-15; Teut. 19:21).

Manatu Fa’aopoopo: Sa i ai le avanoa mo lē na agasala "ma le sesē," o lona uiga e le’i agasala ma lē mautinoa po o le loto i ai. I le pe afai ua na iloa lona sesē ma ua salamō, ona 'aumai lea o lana taulaga e fasia e fai a’i se togiola mo ia, "ona fa’amagaloina ai lea o ia" (Levi. 4:27-31).

- d. Sa lē gata i le poloā’iga fa’ale-tulafono a Mose, a e sa fa’apea fo’i ma poloā’iga e sefulu o le tulafono a le Atua, ona fasiotia o le tagata o lē sa soli i ai. Sa fa’atonu e le Atua ia fasiotia so’o se tasi na te solia nei tulafono:

Tulafono I Esoto 22:20; Numera 25:1-6.

Tulafono II Teuteronomie 17:2-5.

Tulafono III Levitiko 24:13-16.

Tulafono IV Numera 15:32-36.

Tulafono V Esoto 21:15, 17.

Tulafono VI Esoto 21:12; Levitiko 24:17.

Tulafono VII Levitiko 20:10; Numera 25:6-8.

Tulafono VIII Esoto 21:16; Teute. 24:7.

Tulafono IX Teuteronomie 19:16-21.

Tulafono X Iosua 7:20-25.

- e. O nei fa’asalaga uma na fa’atonuina ma fa’ataunu’uina i luga o le āla fa’ale-tulafono a Mose.

Teute. 17:9-11 Sa filifili fa'atasi le 'au faitaulaga ma fa'amasino i le mea e tataua ona faia i le tagata soli tulafono, ona faia lea e le nu'u e tusa ma le i'uga ua latou fa'aioa mai. (Fa'aaoga ma le Teute. 19:16-19).

- f. Sa 'avea le tulafono a Mose ma "sauniga," po o se āla fo'i, na fa'ao'oina atu ai loa le fa'asalaga o le oti i so'o se tasi ua na solia le tulafono ma le loto i ai (ma le mautinoa).
 - i. **II Kori. 3:7** Na āla ai ona fa'aigoaina e Paulo, "o le sauniga na o'o mai ai le oti."
 - ii. **II Kori. 3:9** Po o le "sauniga na o'o mai ai le fa'asala."
 - iii. **Kolose 2:14** I le ma "le tusilima na sala ai tatou."
- g. Fai mai Paulo, sa "mamalu" lenā sauniga (faiga, po o "āla") i ōna pō o Mose, a e peita'i o se mamalu fa'alē-tumau ina o le a fa'aumatia i le satauro a e sui i le āla fou e matuā sili atu ona mamalu (II Kori. 3:7,8). Ma e tumau fo'i (F. II).

2. O LE SAUNIGA E O'O MAI AI LE AGAGA.

- a. E fa'asino lea i le malamalama o le tala lelei o lo'o tatou savavali ai nei. Sa 'avea le tulafono a Mose o se "āta o mea lelei atali," a e peita'i ua tatou maua nei o le tino ina ua fa'aalia mai le silisili 'ese o le lelei o le tala lelei fa'ale-Feagaiga Fou.
 - i. **Eperu 10:1** O le āta o mea lelei atali, a e lē o le matuā tusa o ia mea.
 - ii. **Eperu 9:9-11** O le fa'atusa lea ... a o Keriso ua maliu mai o le Faitaulaga Sili ma le ato'atoa.
- b. Ua fa'aumatia nei le sauniga na o'o mai ai le fa'asala, a ua sui nei i le sauniga e o'o mai ai le Agaga (o le alofa ma le alofa tunoa o Keriso).
 - i. **II Kori. 3:6** Ua 'avea i matou ma 'au'auna o le Feagaiga Fou. "E ā le tusi (mata'itusi) e fasioti (o le fetu'u ma le malaia lea sa togia i ma'a o le fata faitaulaga i le Mauga o Evala), a e ā le Agaga e fa'aola (ua maua i le Agaga le ōla toe fuata'iina). (Fa'aaoga ma le Ioane 6:63).
 - ii. **II Kori. 3:12, 13, 18** O ōna pō nei ua fa'aali tino mai ai matā'upu silisili o le "tala lelei," a ua lē pei o ona po o Isara'elu sa fa'aali ai na o ata. O lea ua fa'atusaina ai e Paulo i le pupula o fofoga o Mose, o le pupula sa ufitia, a ua le aliali mai.
 - iii. **II Kori. 3:17** E lē o le sa'olotoga e silia ma fa'alē-amana'iaina ai le tulafono, a e peita'i o le sa'olotoga ina ua lē o toe fefefe i le fa'asalaga sa masani ona vave o'otia ai i latou. (E uiga fa'atasi ma le Roma 8:1). Ua galuea'iina e le mana o le Agaga Pa'ia le ola fou fa'ale-agaga ma le amio ua ō gatasi ma le tulafono.
 - iv. **Kala. 5:22, 23** E lē fa'atulafonoina fua o le Agaga, o lona uiga e lē fa'asalaina e le tulafono, auā e uiga fa'atasi ma le tulafono. O le tulafono fo'i "o lo'o i lā le Agaga" (Roma 7:14).
 - v. **Kalatia 3:13** O le fa'afanoga o le tulafono, o lona fa'asalaga lava lea e pei ona sa fa'aioa mai i le tulafono a Mose le fetu'u ma le malaia. Ua fa'atauina mai i tatou e Keriso mai lenā malaia ina ua fa'afanoina o Ia mo i tatou. E lē gata i lea, a 'ua 'avea fo'i Lona soifuāga manumalo ma āla o le a mafai ai e so'o se tasi ua na talia le mana o le tala lelei i totonu o lona loto ona ola ai i le ōla toe fuata'iina, o le sa'olotoga moni lava lea ina ua maua e lea tagata le amio ua ō gatasi (agaga fa'atasi) ma le tulafono pa'ia a le Atua (Amosa 3:3).
 - vi. **Roma 8:3, 4** Na āla ona maliu o Keriso ina ia maua se āla e si'itia ai le fanau a le Atua i le tulaga o le a ō gatasi ma le tulafono (o le amiotonu lea i lā le tulafono), a e lē ina ia tineia ai le tulafono.

- c. I ōna pō o le Feagaiga Tuai, sa tu'u fa'atasi ai pule fa'ale-malō ma le pule fa'ale-ekalesia. A e peita'i ōna pō nei o le Feagaiga Fou ua matuā tu'u 'ese'eseina ai nei pule e lua.
- i. **Teute. 17:9-11** Sa filifili fa'atasi faitaulaga (ekalesia) ma fa'amasino (malō) i le mea e tatau ona faia i le tagata soli tulafono (Teute. 19:16-19).
 - ii. **Mataio 22:21** A o lenei ua matuā iloga ona tu'u 'ese'eseina e Iesu le pule fa'ale-ekalesia ma le pule fa'ale-malō.
- d. I ōna pō nei o le Feagaiga Fou ua lē o toe fa'ataunu'uina ai e le ekalesia le fa'asalaga o le oti mo lē ua soli tulafono.
- i. **Mata. 18:15-17** O le fa'ate'a 'eseina po o le fa'apa'ū, o le fa'asalaga tupito lea ua mafaia nei e le ekalesia. Ua lē o toe āu atu lana pule i le ōla o tagata e pei o ōna pō ia.
 - ii. **I Kori. 5:13** A o 'e i tua (o ē ua fa'ate'a 'eseina) e fa'amasinoina e le Atua (a e lē o le ekalesia).
 - iii. **Roma 13:1-4** Ua tofia e le Atua le pule fa'ale-malō mo le fa'ataunu'uina o le fa'asalaga tupito, o le oti lea, pe a tatau ai.
- Manatu fa'aopoopo:-** O lo'o uia nei le āla o le gau alofa, a e lē o le gau mata'u. O le galuega a le ekalesia, o le lapata'i atu lea ma le pulunaunauina ma le alofa (Gal. 20:31; I Kori. 5:11). A lē mafafai, ia tu'u pea i Lē Na te tauia (Roma 12:19). Ua tu'uina mai e Iesu le fa'aa'oa'oga. (Faitau le Ioane 12:47). E ui ina ua lē vave o'otia nei le tagata agasala i le fa'asalaga a e lē fa'apea o le a lē i'u ina maua i le "fetu'u ma le malaia" e pei ona sa fa'a'iloa mai i le tulafono a Mose (Eperu 10:26, 27).
- e. Sa aliali mai lava i le faiga ma le a'oa'oga a Iesu Lona finagalo ia saunia se āla fou, o le "sauniga lea ua o'o mai ai le Agaga."
- i. **Ioane 8:3-11** Sa lē finagalo Iesu ia fasiotia lenei fafine mulilua e tusa ma le tū fa'ale-sauniga na o'o mai ai le fa'asala, a e ia alofagia ma fa'amagaloina ina ua salamō e tusa ma le agaga fa'ale-sauniga ua o'o mai ai le amiotonu.
 - ii. **Mataio 9:13** 'Ou te loto i le alofa. Ua fa'asilia le alofa (I Kori. 13:13).
 - iii. **Mata. 5:38, 44** Ua lē o le "aua ne'i e alofa iā te ia, etc." (Teute. 19:21), a e peitai o le alofa i tagata uma, e o'o fo'i i ē ua 'avea mo tatou fili.
- f. E ui ina ua f'aaigoaina ōna pō nei, o ōna pō o le "sauniga ua o'o mai le Agaga," a e lē fa'apea sa lē galue le Agaga i ōna pō o le Feagaiga Tuai, na 'ona ua o'o nei i le taimi ua sili atu ai ona fa'alauteleina o le galuega a le Agaga ina ua 'avea o Ia ma Sui o Keriso i le lalolagi.
- i. **Kenese 1:2** Sa galue le Agaga i le foafoāga.
 - ii. **Isaia 63:11** Sa tu'uina atu e le Atua Lona Agaga Pa'ia iā Mose.
 - iii. **Faama. 13:25** Sa galuea'iina le loto o Samasoni e le Agaga o Ieova.
 - iv. **Nume. 11:26** Na ōsofa'ia Elitato ma Metato e le Mana o le Agaga, ona lā perofeta ane ai lea.
 - v. **Nume. 27:18** Iosua, le atali'i o Nuno, o le tagata o i ai le Agaga.
 - vi. **Neemia 9:30** Sa i ai le Agaga i le 'au perofeta.
 - vii. **Salamo 139:7** O le molimau a Tavita, "'Ou te alu 'ea i fea ai lou Agaga?"

TAULOTO: Roma 8:1.

O FEAGAIGA E LUA

I. E lua feagaiga na osia e le Atua ma le fanauga a Isara'elu.

Eperu 8:6-8 E lua feagaiga ua manino ona fa'ailoa mai.

Ierem. 31:31-33 E lua lava feagaiga.

Eperu 8:13 Ua ta'ua o le Feagaiga tuai ma le Feagaiga fou.

Eperu 8:7 Ua ta'ua fo'i o le feagaiga na muamua, ma le tasi feagaiga o lona lua lea.

1. Na osia le feagaiga muamua, po o le feagaiga tuai, i le vā o le Atua ma Isara'elu i ōna pō na latou ō a'e ai nai le nu'u o Aikupito.

a. **Eperu 8:9** O le feagaiga na 'Ou faia ma ō latou tamā i le aso na 'Ou ta'ita'i atu ai iā te i latou nai le nu'u o Aikupito.

b. **Epe. 9:18-20** Ua fa'amatalaina mai e Paulo la'asaga o le faiga o le feagaiga muamua, a ua tusia le tala atoa i le Esoto matā'upu e 19 ma le 24 (**Esoto 19, 24**).

2. O le a se'i tatou iloiloaina le tala i le faiga o le Feagaiga Tuai.

a. **Esoto 19:1-6** O le folafolaga a le Atua iā Isara'elu i mea o le a Ia faia mo i latou, pe afai latou te matuā fa'alogo i Lona si'ufofoga ma tausisi i Lana feagaiga.

b. **Esoto 19:7, 8** O le tali a le nu'u: "Matou te faia lava mea uma ua fetalai mai ai Ieova."

c. **Esoto 10:9** Na folafola e le Atua o le a Ia fa'ailoa atu Lona finagalo, "ina ia lagona mai e le nu'u." Na faia lea e le Atua i Lona fetalai mai o Lana tulafono pa'ia mai le Mauga o Sinai (**Esoto 20:1**), ma Āna fa'amasinoga iā Mose (**Esoto 21:1**).

d. **Esoto 24:3-8** Ua mae'a ona fa'ailoa mai e le Atua o Lona finagalo, ma ua fa'amaui e Mose o ia afioga uma i le tusi, ona ōsi feagaiga ai lea o le nu'u ma Ieova "i nei mea uma lava." Na fa'amaui le feagaiga i le toto o povi.

e. **Esoto 32:1-4** Ina ua mae'a lenei ōsiga feagaiga, ona alu a'e ai lea o Mose iā Ieova i le mauga sa ia nofo ai i ao ma pō e fāgafulu (**Esoto 24:12,18**). A o le'i o'o ina alu ifo Mose, a e fouvale loa le nu'u i lo latou gaosia o le tama'i povi auro e fai mo latou atua e ifo i ai. Ona tatou mautinoa lea, e itiiti i lō aso e fāgafulu le taimi na tumau ai Isaraelu i la latou ōsiga feagaiga ma Ieova na se'i mae'a ona ōsia i lo latou vā.

f. **Esoto 32:15-20** Na fa'amalepeina e Mose papa ma'a e lua o le tulafono e fa'ailoa ai, ua matuā solia lava e Isara'elu lā latou feagaiga ma Ieova, auā o le feagaiga na ōsia e uiga i le tulafono.

Manatu Fa'aopoopo:- Ua ta'ua le tulafono o poloā'iga e sefulu, o le "feagaiga a le Atua." (Silasila i le Teute. 4:13). Ona tatou mautinoa lea, o le tulafono lava e fa'asino tonu i ai le fetalai a le Atua i le taimi na Ia sa'ilia ai se ōsiga feagaiga ma Isara'elu, fai mai, "Afai tou te matuā fa'alogo mai i lo'u leo, ma tausisi i la'u feagaiga" (**Esoto 19:5**). Ua fa'apea ona 'avea o le feagaiga a le Atua (O Lana tulafono), ma fa'avae o le ōsiga feagaiga ma Isara'elu.

Ua ta'ua lenei feagaiga muamua, o le feagaiga o le amiotonu ua sa'ilia i galuega. Ua aunoa lava lenei feagaiga ma se folafolaga a le Atua e fa'apea o le a Ia fesoasoani iā Isara'elu ina ia mafai o na latou fa'ataunu'uina o ia mea uma. A o le mea ua manino ona aliali mai, o le matuā talitonu lea o le nu'u i lo latou lava malosi fa'ale-tagata o le a mafai ona latou fa'ataunu'uina ai o 'upu uma o le

feagaiga. Sa fa'apea la latou tali, "Matou te faia lava mea uma ua fetalai mai ai Ieova." Sa lē gata i lenei ūlua'i folafolāga, a e sa fa'alua ma fa'atolu ona latou ioe, o le a latou faia mea uma lava ua fetalai mai ai Ieova (Esoto 24:3,7), ma le leai lava o sina fa'ailoga e tasi se'i aliali mai ai, ua latou mautinoa lo latou vaivai ma ua latou mana'omia se fesoasoani mai le Atua.

3. E lelei ona tatou vaevaeina o lenei feagaiga i ona vaega 'ese'ese e tatau ai.

- a. O ē sa ōsi feagaiga: O le Atua ma Isara'elu.
- b. Fa'avae o le feagaiga: O le Tulafono.
- c. Puluvaaga ma fautua: O Mose.
- d. Malosi e fa'ataunu'uina ai: O folafolāga a le nu'u.
- e. Mea sa fa'amauiina a'i: O le toto o manu.

Eperu 8:7, 8 Sa lē sao ona lelei o le feagaiga na muamua, na āla ai ona sa'ilia o sona lua.

Eperu 8:9 Na lē tumau le nu'u i le feagaiga na latou ōsia ma le Atua. E le'i atoa aso e fāgafulu, a e maua atu i latou e Mose o lo'o latou sisiva ma si'omia le tama'i povi auro, a e sa fa'atolu ona latou ioe i upu uma o le feagaiga.

4. Pe mata 'ea o le ā le pogai tonu na āla ai ona i'uvale o lenei feagaiga?

- a. Sa tausia lelei e le Atua ia Lana vaega o le feagaiga. Sa lelei ato'atoa fo'i le fa'avae o le feagaiga, o le tulafono lea, e pei ona molimau i ai Tavita, "E sao le tulafono a Ieova" (Salamo 19:7). (Fa'aaogā ma le Roma 7:12). Ua lē o aliali mai fo'i se 'aleu o Mose. A o ai lā na i'uvale ai le feagaiga? O le nu'u lava ina ua latou fa'atuatua i lo latou lava malosi fa'ale-tagata, a 'ua lē manatua e i latou le tasi lenei a'oa'oga fa'avae fa'ale-tala lelei. E leai se mea e mafaia e le tagata, pe a na o ia. Fai mai le fetalaiga a Iesu, "E lē mafai e 'outou ona fai o se mea e tasi pe a A'u lē i ai" (Ioane 15:5).
- b. Na āla ona ōsia o lenei feagaiga ina ia 'avea o se a'oa'oga tāua mo tagata uma lava latou te iloa ai le lē taitai ona lava o le malosi fa'ale-tagata e faia ai le finagalo o le Atua. O le feagaiga lenei e fa'asino i ai le 'upu a Paulo e fa'apea: "Auā o le mea na lē mafaia i le tulafono, ina ua vaivai ia ona o le tino" (Roma 8:3). Sa vaivai le tulafono, e lē ona o ia lava, a e peita'i ona o le tino (le uiga vaivai fa'ale-tagata) ina ua ōfo le tagata o le a na faia le mea, e lē mafaia lava e se tasi pe a aunoa ma le galuega lilo a le mana o le Atua. "O le loto i lā le tino o le ita lea i le Atua! auā e lē usiusita'i i le tulafono a le Atua, e lē mafai foi i ai" (Roma 8:7).
- c. Ua sesē le fa'aogāina o le tulafono i le feagaiga muamua, ina ua 'avea peisea'i o se fa'aola ua fa'amoemoe i ai le nu'u o le a maua ai lō latou ōla pe a latou tausī i ai. E lē o se fa'aola le tulafono, a e peita'i o le ta'ita'i tama o ia na te ta'ita'iina i tatou i le Fa'aola moni o Iesu Keriso e pei ona faia i lona lua o feagaiga.

II. O lea se'i tatou la'ala'a atu nei i se fa'amatalaga o lona lua o feagaiga, o le feagaiga fou lea.

1. **Eperu 8:10-13** O lona lua lenei o feagaiga, o le feagaiga fou, ua avanoa ai le āla tatou te tausī ai i le tulafono a le Atua, e lē o le malosi fa'ale-tagata e i'uvale, a e peita'i o le Mana o le alofa tunoa o le Atua, e lava lea e fesoasoani mai iā te i tatou (II Kori. 12:9).
2. **Eperu 8:6** Ua ta'ua le feagaiga fou, o le feagaiga e sili ona lelei ina ua fa'amauiina i folafolāga e sili ona lelei, e lē o folafolāga vaivai a le tagata. "O mea uma ua folafolaina e le Atua, ua ioe iā te Ia (Keriso), ua amene fo'i iā te Ia" (II Kori. 1:20). O le puluvaga o lenei feagaiga, o Keriso lava lea.
3. **Mareko 14:24** Ua fa'amauiina le feagaiga fou i le toto o Keriso. Ua lē o se feagaiga o le amiotonu ua sa'ilia i galuega a le tulafono, a e peita'i o le feagaiga o le amiotonu e āla mai i le fa'atuatua iā Iesu Keriso.

4. **Fa'aal. 13:8** E ui ina ua ta'ua lenei feagaiga o le feagaiga fou, a e sa i ai i le finagalo o le Atua mai le fa'avaeina o le lalolagi.
5. **Kenese 3:15** Sa fa'ailoa atu lenei feagaiga i ō tatou ūlua'i mātua ina ua fa'ato'ā pa'ū'ū. Ona tatou mautinoa lea, e muamua le feagaiga fou i lō le feagaiga tuai, a ua āla ona ta'ua o lona lua, auā na fa'ato'ā fa'amauiina mulimuli i le toto pa'ia o le Ālo o le Atua ina ua maluu o Ia i luga o le satauro.

6. **Kenese 12:1-3** Na toe fa'afouina iā Apera'amo lenei lava feagaiga, o le ōla iā Keriso Iesu.

Manatu Fa'aopoopo:- E ui ina sa lē maua le fa'amagaloga o agasala i le feagaiga na ōsia i Sinai, a ua tatou iloa sa fa'amagaloina lava agasala a le 'au fa'atuatua i nā ōna aso, a o lumana'i pea le satauro. O lea ua tatou mautinoa ai, sa fa'amagaloina agasala a nā tupulaga talu ai lō latou fa'atuatua i le feagaiga fou, o le feagaiga lea o le ōla sa tonu mai le amataga, a ua fa'ato'ā fa'amauiina i le maluu o Keriso i luga o le satauro. Fai mai le fetalaiga a Iesu, "O Apera'amo lō 'outou tamā, na matuā fiafia o ia ina a iloa e ia lo'u nei aso, na ia iloa fo'i, ma oli'oli ai" (Ioane 8:56).

III. Ia matau lelei, ua 'avea le tulafono ma fa'avae o nei ōsiga feagaiga uma e lua. Na āla ona sa'ilia o lona lua o feagaiga e lē ona ua leaga le tulafono pe ona e lē toe aogā fo'i, a e peita'i ona ua fia saunia e le Atua se āla tāua o le a mafai ai e le fanau a tagata ona tauti i Āna poloā'iga.

1. **Roma 8:3, 4** O le mea na lē mafaia e Isaraelu ina ua latou fa'afesaga'i ma le tulafono e aunoa ma se fesoasoani, "ua faia lea e le Atua i lona 'auina mai o Lona lava Ālo ... ina ia ato'atoa (fa'ataunu'uina) ai le amiotonu i lā le tulafono iā i tatou, o ē lē savavali i lā le tino, a e i lā le Agaga."
2. **Ierem. 31:33, 34** Ua manino ona fa'ailoa mai, o lo'o maua pea i le feagaiga fou le tulaga mamalu ma le aogā tāua o le tulafono. (Silasila i le Eperu 8:8-12). A o lenei le 'ese'esega tele ina ua folafolaina ma le fesoasoani o le Atua i le tatou uiga lē lava, a ua lē tu'u i le taumafai vaivai fa'ale-tagata e lē pine ona fa'a-va'atu'ia.

IV. O tagata uma o ē tapua'i i le Atua, latou te fa'alatalata atu iā te Ia i se tasi o nei āla e lua: o le feagaiga muamua, o le fa'alagolago i le mea e mafaia e le tagata i lona lava malosia, po o lona lua o feagaiga, o le feagaiga fou lea e fa'atuatua tasi ai i le mana o le alofa tunoa o Keriso.

1. **Kenese 4:1-5** Ua 'avea le faiga taulaga a Kaino ma Apelu ma fa'atua o nei āla po o nei feagaiga e lua. Na 'aumai e Kaino na o se taulaga fa'afetai, o fua o le galuega a ōna lava lima. Sa lē lagona e Kaino lona fia maua o se fesoasoani. O lona fa'alatalata atu i le Atua ua ui i le āla fa'ale-feagaiga muamua. A e peitai Apelu, sa matuā lagona e ia lona vaivai ma lona fia maua o le fesoasoani e lē mai iā te ia. O lea na ia 'aumai ai le taulaga na fa'atonuina e le Atua, o le tama'i mamoe fasia, e fa'ailoa atu ai lona fa'atuatua i lona lua o feagaiga o le a fa'amauiina e le toto o le Tama'i Mamoe a le Atua.
2. **Luka 18:9-14** Ua fa'apea fo'i le faresaio ma le telona ona 'avea ma fa'atua e fa'amalamalamaina ai nei āla po o nei feagaiga e lua, ina ua so'ona mitamita vale le faresaio i le tele o āna galuega lelei, a ua fa'atuatua tasi le telona i le alofa tunoa o le Atua.

Manatu Fa'aopoopo: O nei feagaiga e lua, o tūlaga lava ia e lua o tagata i lō latou vā feagai ma le Atua. Sa ao lava ona ōsia o le feagaiga muamua ina ia 'avea lona matua'i i'uvale ma āla tatou te sa'ilia ai lona lua o feagaiga, o le feagaiga lea o lo ua aofia ai manuia uma lava ua saunia e le Atua mo i tatou. O le mea pa'ia (potu muamua) i le fale fetāfa'i, o le tasi lea la'asaga aga'i i le Atua; a e fa'ato'ā maua i le mea e sili ona pa'ia, i tala atu o le puipui, le matuā fa'afeagai tonu ma le Atua, po

o le mafutaga fa'atasi ma Ia ua ato'atoa lava. E to'atele o lo'o latou malilie pea i le tulaga fa'ale-tagata muamua, a e o lo'o vala'auina i tatou e le Atua ia tatou la'ala'a atu i luma i le tulaga e sili ona lelei, ia o'o atu lō tatou fa'atuatua "i totonu i tala atu o le 'ie puipui" (Eperu 6:19).

- V. Ua 'avea le aiga o Aperā'amo ma mea sa tutupu ai ma a'oa'oga tāua ua mafai ona tatou malamalama atili ai i nei feagaiga e lua.

Kala. 4:22-26, 31 "Auā o fafine nei o **feagaiga e lua ia.**" O Akara, o le Aikupito, le auauna pologa. Ua 'avea Akara ma fa'atua o le feagaiga muamua. E fanau mai iā te ia o pologa. A e peita'i Sara, ua 'avea o ia ma fa'atua o lona lua o feagaiga. E fanau mai iā te ia o tama a le 'ele'ele.

Manatu Fa'aopoopo:- Sa lē fa'atuatua Aperā'amo ma Sara i le mana fa'ale-Atua, na āla ai ona lā sa'ilia o se āla fa'ale-tagata ina ia vave fa'ataunu'uina ai le folafolāga a le Atua i se atali'i e fanau mai i le fafine pologa. E i ai 'ona fa'apea ane Sara, "E lē tofia fa'atasi le tama a le fafine pologa ma la'u tama o Isa'ako" (Kene. 21:10). Na fanau mai Isāmaeli i lā le tino, a e peita'i Isa'ako na fanau mai o ia ona o le mea na folafolaina.

Ua fa'apea lava nei feagaiga e lua. O le feagaiga muamua, e i lā le tino lea, auā e fa'atuatua ma fa'alagolago i le poto ma le malosia fa'ale-tagata. A e peita'i lona lua o feagaiga, e i lā le Agaga lea, auā ua i ai le fa'atuatua i le mana ma le fesoasoani o Lē ua folafola mai.

Sa tutupu fa'alavelave i totonu o le aiga o Aperā'amo talu ai lenei tama'ita'i o Akara ma lana tama. Sa so'ona fa'amaua le fafine pologa i lona matai tamaita'i; o Isāmaeli fo'i ua tauēmu iā Isa'ako, le suli moni. Na fa'ato'ā filemū le aiga o Aperā'amo ina ua tutuli 'eseina le fafine pologa ma lana tama.

Ua fa'apea ona 'avea o mea sa tutupu i le aiga o Aperā'amo ma āla ua fa'amalamalamaina ai le uiga o le fete'ena'iga o lo'o i ai i loto o le fanau a tagata, e pei ona molimau i ai Paulo i le Kalatia 5:17. E tasi pē le āla o le a maua ai le to'a filemū i totonu o ō tatou loto, o le tutuli 'eseina lea o Akara ma lana tama, o le manatu fa'ale-tino lea "ua fa'asiasia i le matā'upu a le Atua" (II Kori. 10:5), e maua ai lō tatou nofo pologa pea i le agasala, ma ua lē mafai ona tatou 'ausia ai le tapula'a o le soifuāga moni fa'a-Kerisiano.

- VI. O le a se'i toe fa'atusatusaina nei feagaiga e lua.

1. O le Feagaiga Tuai

- Na ōsi feagaiga le Atua ma Isara'elu. **Esoto 19:1-5; 24:1-8.**
- I luga o le tulafono o poloā'iga e sefulu. **Teuterenome 4:13.**
- O le puluvaga ma le fautua, o Mose lea. **Esoto 24:2, 3.**
- Na fa'amauiina i le toto o manu. **Esoto 24:8.**
- Na i'uave ona o le vaivai o folafolaga a le nu'u. **Esoto 24:3, 7.**
- E le'i atoa aso e fāgafulu na tumau ai. **Esoto 24:18; 32:15-20.**
- Sa lē sao ona lelei o lenei feagaiga. **Eperu 8:7.**
- Sa gata ona tusia ai o le tulafono i papa ma'a. **Esoto 32:15, 16.**
- Sa lē maua ai le fa'amagaloga o agasala. **Eperu 10:4.**
- Ua fa'atusaina iā Akara, le fafine pologa. **Kalatia 4:24, 25.**
- E fanau mai ai o pologa e pei o Isāmaeli. **Kalatia 4:24.**
- O le feagaiga o le amiotonu ua sa'ilia i galuega. **Roma 9:23.**

2. O le Feagaiga Fou

- Ua ōsi feagaiga le Atua ma Isara'elu (fa'ale-agaga). **Ieremia 31:33.**
- I luga o le tulafono o poloā'iga e sefulu. **Eperu 8:10; Roma 8:4.**
- O le Puluvaga ma le Fautua, o Iesu Keriso lea. **Eperu 8:6.**
- Ua fa'amauiina i le toto o Keriso. **Mataio 26:27, 28.**

- e. E lē mafai ona i'uvale, auā o le Atua ua folafola mai. **Eperu 8:6, 10.**
- f. E tumau e o'o i le fa'avavau. **Eperu 13:20.**
- g. O le feagaiga e sili ona lelei. **Eperu 8:6.**
- h. E tusia ai fo'i le tulafono i papatusi a'ano o le loto. **Eperu 8:10.**
- i. Ua avanoa tele ai le āla mo le fa'amagaloina o agasala. **Eperu 8:12.**
- j. Ua fa'atusaina iā Sara, le fafine o le tama a le ele'ele. **Kalatia 4:22, 24.**
- k. E fanau mai ai o suli moni e pei o Isa'ako. **Kalatia 4:22, 23, 30, 31.**
- l. O le feagaiga o le amiotonu e āla mai i le fa'atuatua. **Roma 1:17.**

"Ne'i mao ona tatou manatu o le a mafai i sō tatou lava lelei ona maua ai o lō tatou ōla, ua na o Keriso lava lō tatou fa'amoemoe e tasi mo le ōla e fa'avavau." - O Pateriaka ma Perofeta, itulau e 431.

TAULOTO: Ieremia 31:33.

O LE SAPATI I LE FEAGAIGA TUAI

I. O le Mafua'aga ma le Uiga o le Sapati.

1. **Kenese 2:1-3** Na faia le Sapati i le fa'ai'uga o le vaiaso sã o le foafoāga.
2. **Mareko 2:27** Na faia mo tagata (tagata uma lava).
3. **Isaia 56:3-7** Na faia mo tagata o nu'u 'ese a e lē na o Iutaia. Ua lē fa'atasi ona ta'ua o le Sapati, o le "Sapati o tagata Iutaia" i totonu o le Tusi Pa'ia. E sili atu i le 2,000 tausaga na vā a'i le fa'atūina o le Sapati ma le fanau mai o lē na tupuga mai ai le nu'u o Iutaia, o Aperā'amo lea (Kene. 11:18; Ioa. 8:39). Ua ta'ua le Sapati e Ieova, o "lo'u aso sã," po o "o'u sapati" (Isa. 58:13; Esek. 20:12, 20). Ioe, o le Aso o le Ali'i mo tagata uma lava, a e lē fa'apito iā Iutaia.

II. E tolu la'asaga i le faiga o le Sapati.

1. **Na malōlō ai le Atua.** O le uiga lava lea o le 'upu Sapati, o le "**malōlōga**." Ua āla ona 'avea o le aso fitu ma Sapati, auā o le aso tonu lava lea na malōlō ai le Atua. E le'i malōlō le Atua ona ua vaivai (Isa. 40:28), a e peita'i ona o le pa'ia o le aso ia fa'avae tonuina i Lana malōlōga. Na āla ona fa'amanuia atu le Atua i le aso fitu ma Na fa'asāina, "auā na malōlō ai o Ia i Lana galuega." (Fa'aaogā ma le Esoto 20:11).
2. **Ona fa'amanuia atu lea o le Atua i le aso fitu.** Ua lē na ona ta'u manuiaina, a ua matuā iloga ona tu'uina atu i ai o le manuia. E manuia i latou o ē tausi i ai. O le manuia lea e tumau pea i le aso fitu, e lē mafai ona toe 'ave 'eseina ai e se tagata. Ia manatua le ta'utinoga a Pala'amo, "Ua uma fo'i ona fa'amanuia e ia, 'ou te lē ma-liua" (Nume. 23:20). (Fa'aaogā ma le II Samu. 7:29).
3. **Ma Na fa'asāina ai.** O lona uiga ia mapu i galuega fa'ale-tino i lea aso, a ia ūa'i atu le loto i le Atua. E fai ai sauniga pa'ia (Levi. 23:3; Galu. 16:13; 18:4). E le'i fa'asāina le Sapati, ona tu'u lea ia fa'agaloina, a e peita'i ia fa'apa'iaina e tagata ma latou tausi i ai. Na faia le Sapati "mo tagata," - mo Atamu ma Eva, ma le lā fanau, ma fanau a lā fanau, se'ia o'o lava i tupulaga amulī.

Ua fa'ailoa mai e *Matini Luteru* (Martin Luther) lona taofi e fa'apea, sa tausia le Sapati e Atamu i le fa'ato'āga i Etena, e pei o 'upu nei ua si'i mai i lana tusi e igoa, **O Lauga i le Kenese**, fai mai:-

"Talu ai ona ua muamua ona ta'utino mai o le Sapati i le Tusi Pa'ia i lō Atamu, pe sa lē poloa'iina 'ea la o ia ia galue i aso e ōno, a ia malōlō i le aso fitu? E lē o se mea e taumateina lea mea; auā ua fa'ailoa mai sa tu'uina atu o ia i le fa'ato'āga i Etena e galue ai, ma sa pule fo'i o ia i i'a o le sami, ma manu felelei, atoa ma manu vaefā." - Enlarged Edition, vol. 33, p. 67.

- Esoto 20:8-11** Ua 'avea le Sapati ma fa'amanatuga o galuega o le foafoāga. O lea ua tataui ona tumau pea o le Sapati e pei fo'i ona tūtūmau o galuega na faia e le Atua (Esoto 31:17).
- Ierem. 10:10-12** E iloa le Atua moni i Lona mana na Ia faia ai le lagi ma le lalolagi, i le ua 'avea le Sapati ma fa'aailoga tāua o lenā mana (Sala. 96:5; Esek. 20:20).
- Esoto 31:13** E lē gata i lea, a ua 'avea fo'i le Sapati ma fa'aailoga o le mana o le Atua Na te fa'apa'iaina ai Lana fanau, o le foafoāga fa'ale-agaga lea. (Silasila i le matā'upu e XV, vaega e 5).

III. O le Sapati mai le Foafoāga se'ia o'o i Sinai.

1. **Esoto 16:21-30** Sa tausia le Sapati e le fanauga a Isaraelu a o le'i o'o atu i latou i le Mauga o Sinai. Ona tatou mautinoa lea sa 'avea le Sapati o se tasi o poloā'iga o le tulafono a le Atua a o le'i o'o ina toe fa'amanatuina mai i Sinai. (Ia matauina lelei le F. e 27 ma le 28).
2. **Esoto 20:8-11** Na tu'uina le Sapati i le totonugalemū o le tulafono a le Atua i Sinai.
3. **Kenese 26:5** Na tausia e Aperā'amo o poloā'iga ma tulafono a le Atua, sa tatau lā ona tausia e Aperā'amo ma le Sapati, auā ua manino ona fa'aalia mai e le Atua, o le tasi lea o Āna poloā'iga mai le amataga. (Toe fa'aaogā le Esoto 16:27, 28).
4. **Sala. 105:43-45** Na aumaia e Ieova Lona nu'u mai Aikupito "ina ia tausi i latou i Āna sauniga, ma usiusita'i i Āna tulafono." O le tasi poloā'iga o le tulafono na tofotofoina ai loa le fanauga a Isaraelu, o le Sapati lea (Esoto 16:4, 26-30). Ona tatou mautinoa lea, o tulafono lava sa i ai muamua, a ua fa'agalagaloina e Isaraelu talu ai le faigatā o lo latou nofo pologa i Aikupito.

Manatu Fa'aopoopo:- O le matā'upu e 5 o le Kenese ua fa'ailoa mai ai le ōlaga fa'afualoa o tupulaga muamua o tagata. Na fanaua Metusela ina ua 687 tausaga o le ōlaga o Atamu. Ona ōla fa'atasi ai lea o Atamu ma Metusela mo tausaga e 243, i le oti ai Atamu. Ua atoa tausaga e 869 o Metusela, a e fanau loa Semu, le ūlumatusa a Noa. Ona ōla fa'atasi ai lea o Metusela ma Semu mo tausaga e 100, i le oti ai Metusela. Ua 452 tausaga o Semu, a e fanaua loa Aperā'amo, 'ona ōla fa'atasi ai lea o Semu ma Aperā'amo mo tausaga e 148, i le oti ai Semu.

Ua fa'apea ona fa'asoso'oina i ōlaga fa'afualoa o nei tagata fa'atuatua e to'atolu le vā mai le foafoāga se'ia o'o iā Aperā'amo. E fa'apefea lā 'ona lē fa'ailoa e Atamu le Sapati moni iā Metusela, o Metusela iā Semu, a o Semu iā Aperā'amo, e i ai ona tatou maua o le molimau iā Aperā'amo e pei ona tusia i le Kenese 26:5?

O le faitauina o vaiaso sā, o le tasi lea fa'amaoni. E leai lava se isi mafua'aga o le vaevaeina o aso i vaega e ta'i fitu aso, po o vaiaso sā, ua na o le tausiga o le Sapati aso fitu. Pe a tatou faitau i le tala i le lolo, sa faitauina e Noa e ta'i fitu aso (Kenese 8:10,12). Ua toe ta'ua mai fo'i i le tala iā Iakopo ma Lapana (Kenese 29:27, 28). O le tasi lea fa'amaoni ua tatou mautinoa ai, sa iloa le Sapati i ōna pō ia ma sa tausia ai fo'i.

IV. O le Sapati i ōna pō o Isaraelu.

1. **Esek. 20:13** Sa to'asā le Atua iā Isaraelu ina ua latou solia Lona Sapati i le vao i lo latou ō a'e mai Aikupito.
2. **Esek. 22:8, 26** I ōna pō na fouvale ai Isaraelu, na galo ai iā te i latou le Sapati o le Atua.
3. **Iere. 17:21-25** Na folafola atu e le Atua, o le a tumau Ierusalem e fa'avavau pe afai a e latou te fa'amaoni pea i le tausiga o le Sapati.
4. **Ne'em. 13:17-22** Na āla ona fa'atafeaina le fanauga a Isaraelu ona ua latou solia le Sapati. O lea na toe fuata'iina ai e Ne'emia le tausiga o le Sapati.
5. **Isaia 56:1, 2** Na folafolaina atu le manuia mo i latou uma o ē tausi i le Sapati.

TAULOTO: Esoto 20:8-11.

O LE SAPATI I LE FEAGAIGA FOU

I. O le vā o Keriso ma le Sapati.

1. **Luka 4:16** O le masani a Iesu ona tausi i le Sapati.
2. **Mareko 2:28** Ua Ia fa'asuafa iā te Ia lava, o le Ali'i o le Sapati (Mataio 12:8).
3. **Mare. 3:1-5** Na a'oa'o atu Iesu i tagata i le agaga tonu e tausia ai le Sapati. Na Ia fa'aali iā te i latou, e tatau lava ma le tulafono o le Sapati ona fai ai o galuega alofa. (Faitau ma le Luka 13:10-17; Mataio 12:10-13).
4. **Mataio 12:1-8** Sa galue Iesu mo le fa'asaoina o le Sapati mai le tausiga gaogaosā a Iutaia. E o'o lava i le loto fesoasoani ma le agalelei e tatau ai ma le Sapati, sa lē iloa lava e i latou ona fa'avasegaina. O le āla fa'atonu atu lea o Iesu e tusa ma galuega alofa e tatau ai ma le agaga moni o le Sapati. E ui ina sa fa'apenā ona manatu ai o Iutaia, a e sa lē solia ai lava e Iesu le Sapati i lea faiga.

Manatu Fa'aopoopo:- O fefinaua'iga uma sa tutupu i le vā o Keriso ma Iutaia e uiga i le Sapati, e le'i mafua ia ona o le aso pe tatau ona fa'amamaluina, pe leai; a e peita'i ona o le āla tatau e tausia ai. O le vā o Keriso ma le tulafono a Lona Tamā, fai mai, "O lo'o i totonu lava iā te a'u lau tulafono" (Sala. 40:8). Ua toe molimau mai fo'i Iesu i Lona tausi fa'amaoni i poloā'iga uma a Lona Tamā. (Silasila i le Ioane 15:10).

Sa tausia e Iesu le Sapati i le agaga tonu e tatau ai, a e lē pei o le faiga a Iutaia na latou fa'aopoopo ai fua le mau tulafono ma 'uputu'u fa'ale-tagata i le tausiga o le aso, se'ia o'o ina ua lē o toe 'avea "o le aso fiafia" (Isaia 58:13), e pei ona finagalo ai Lē na Ia faia, a ua 'avea o le "'avega mamafa ma le 'ave gatā." Sa fa'apea ona fa'anefuina e a'oa'o Iutaia o le a'ano moni fa'ale-agaga ma le aogā tonu o le Sapati. (Fa'aaogā le Mataio 15:6, 9; 23:4).

- (1). O le faamatalaga lenei ua sii mai le tusi e igoa, "*O Tū Fa'a-Iutaia ua ta'ua i le Tusi Pa'ia*," (L.M.S.), itulau e 100, fai mai: "*O ōna pō o Iesu ua fa'amamafaina ai na'uā tulafono fa'ale-Sapati; ua fai ia tulafono ma mea fa'asoesā lava (Mataio 12:2,10; Ioane 5:10). Ua tineia lava ia tulafono fa'atauva'a e Iesu i lana fetalaiga, 'Ua faia le Sapati mo tagata, a 'ua lē faia tagata mo le Sapati' (Mare. 2:27). O le aso lea e malōlō ai, ma tapua'i atu ai ma le loto filemū, a e lē vao'ia galuega alofa a lē tasi i lē tasi.*"
- (2). Ioe, e lē ona ua 'au 'ese Iesu i le Sapati, a e peita'i 'ona o Lona fia lavea'iina o Lona Aso Pa'ia mai le tausiga sesē fa'a-Iutaia.
 - a. **Isaia 42:21** Na fa'ataunu'uina e Iesu 'upu fa'avalō'aga i Lona fa'amamaluina o le Sapati.
 - b. **Mataio 24:20** Na a'oa'o atu Iesu i Ōna so'o ia latou āva i le Sapati ma fa'amamalu i ai.
 - c. **Luka 23:50-56** Na malōlō le tino o le Ali'i i le tu'ugamau i le aso Sapati.

II. O le vā o le 'Au So'o ma le Sapati.

1. **Mataio 28:1** O le Sapati i ōna pō o Iesu, o le aso lea e tuaoi tonu ma le ulua'i aso o le vaisapati.
2. **Luka 23:56** Sa tausia le Sapati aso fitu e so'o o Iesu i le taimi o Lona maliu.
3. **Mataio 24:20** E lē gata i lea, a e sa a'oa'oina i latou e Iesu ia latou tausi pea i le Sapati pe a mavae Lona maliu.

Manatu Fa'aopoopo:- Na fetalai atu Iesu i nei upu ina ua taulata i Lona maliu i le T.A. 31. A o le sola'aga na Ia lapata'i atu ai i Ōna so'o, na fa'atoā fa'ataunu'uina lea i le fa'atafunaina o

Ierusalemia i le T.A. 70, e tusa i ni tausaga e 39 le vā. Ona tatou mautinoa lea, sa leai se fa'amoemoe o Iesu ia suia le aso, a ia tausia pea le Sapati aso fitu e Ōna so'o e o'o atu lava i lenā taimi ina ua mavae tausaga e 39 talu Lona maliu. O nei tausaga e tele sa fa'amanatuina ai pea le Sapati i talosaga a le 'au Kerisiano ina ia 'aia nei latou sosola mai Ierusalemia i le Aso Pa'ia o le Atua.

4. **Gal. 13:14,42-44** Na tausia le Sapati e Paulo ma Panapa i Anetioka i le T.A. 45, ina ua mavae tausaga e 14 talu le maliu o Keriso. Sa fa'apea fo'i ma le sauniga mo tagata o nu'u 'ese ona faia i le Sapati (a 'ua lē se'i tu'u mo le ulua'i aso pe afai o le Aso Sā fou lenā). Ona tatou mautinoa lea, e lē o se fa'atatau na faia e nei aposetolo ona o lā galuega mo tagata Iutaia, a e peita'i ona o lea lava le aso e tasi na fa'apa'iaina e le 'au Kerisiano, atoa ma Iutaia i nā ōna pō.

5. **Gal. 16:13** Na tausia le Sapati e Paulo ma Sila i Filipi. Sa feiloa'i i la'ua ma nisi uso tama'ita'i, e lē o totonu o le sunako o tagata Iutaia, a e peita'i o luga o le 'auvai o le vaitafe, o le mea sa masani ona latou potopoto ai. O le T.A. 53 lea, ina ua mavae tausaga e 22 talu le maliu o Keriso.

6. **Gal. 17:1, 2** Sa fa'apea fo'i i Tesalonia ona fa'amamaluina ai e Paulo le Sapati.

7. **Gal. 18:1-4, 11** E 78 Sapati ua ta'ua mai sa fa'alasososo'o ona fa'amamaluina e Paulo a o nofo o ia i Korinito. Fai mai sa lauga o ia i le sunako i lea Sapati ma lea Sapati; a o le umi o aso sa ia nofo ai i Korinito, fai mai, e tasi le tausaga ma masina e ōno o lo'o aofia ai Sapati e 78.

Manatu Fa'aopoopo:- E ui lava i nisi mea e tele na molia ai Paulo ma nisi aposetolo e tagata Iutaia, ma sa ta'ita'iina ai so'o i latou i luma o le 'au faitaulaga ma fa'amasino, a ua lē fa'atasi lava ona se'i molia i latou i lenei mea, ona ua latou taumafai e fa'atūina se isi aso sã fou e 'ese i lo lea sa fa'amamaluina o le nu'u. E lē o se mea e taumateina le matuā amana'ia tele e Iutaia pe 'ana fa'apenā ona faia e le 'au Kerisiano i nā ōna pō.

Fa'aal. 1:10 Na tausia le Sapati e Ioane, le so'o pele, ina ua taulata i le fa'ai'uga o le ulua'i seneturi T.A. O le "Aso o le Ali'i," ua fa'atatau lava lea i le Sapati aso fitu (Mataio 12:8).

Manatu Fa'aopoopo:- Na fa'ato'ā amata ona ta'ua o le ulua'i aso o le vaisapati i lenei igoa, o le Aso o le Ali'i, ina ua leva ona mavae atu o Ioane ma e sa totoe o le 'au aposetolo. E le'i iloa lava e Ioane ma lenā tupulaga o tagata Kerisiano se isi "Aso o le Ali'i," ua na o le Sapati aso fitu na tausia e le ekalesia aoao i nā ōna pō. Ua lē o ta'ua mai lava i le Afioga a le Atua se fesuia'iga o le aso malōlō o le a faia e Keriso po o le 'au aposetolo, a e peita'i ua valo'ia mai ai se tasi pule o le a "manatu o ia e fa'aliliu" i le tau fa'ale-Atua (Tanielu 7:25).

O le ali'i a'oa'oina o *Dr. Augustus Neander*, o ia lava lea ua ta'u fa'atasia ma i latou o ē ua sili ona ta'uta'ua o ā latou tusiga i tala fa'asolopito i le Ekalesia Kerisiano. O le suafa lauiloa lenei suafa, i lē o lana ta'utinoga lenei e uiga i le ulua'i aso (Sunday), fai mai:-

"O le aso ua ta'ua nei o le Aso Sā (Sunday) ma ōna sauniga, ua na o se aso fa'ailogaina lava fa'ale-tagata. Sa le'i taitai lava tau ane i ai fa'amoemoega o le 'au aposetolo ina ia fa'avaeina ai o se poloā'iga fa'ale-Atua. Sa matuā mamao lava ma i latou, fa'apea fo'i ma le ulua'i ekalesia, ona taumafai e fa'aliliu le tulafono o le Sapati i le aso ua ta'ua nei o le Aso Sā (Sunday)." - Rose's Neander, p. 186.

TAULOTO: Luka 4:16.

O FA'AMATALAGA FA'AOPOOPO E UIGA I LE SAPATI

I. Po o le fea aso e ta'ua o le aso fitu?

1. Ua amata le faitau a nisi i le Aso Gafua ona fitu ai lea i le Aso Sā (Sunday) o lo'o fa'apa'iaina nei. Pe afai ua sa'o lenā faitau, po ua sa'o ai fo'i lā ma le faitau a tagata Moameta, e amata i le Aso To'ona'i, ona fitu ai lea i le Aso Faraile o lo'o latou fa'apa'iaina?
2. Ua manino ona fa'ailoa mai e le Tusi Pa'ia o le aso tonu e 'avea ma Sapati. (Ia e faitau ma le fa'autauta i le Luka 23:50-56 se'ia o'o i le 24:1-6). E tolu aso ua manino ona fa'ailoa mai ai:
 - a. **O le aso maliu o Iesu.** O le aso lava lea na alu atu ai Iosefa, le Arimataia, iā Pilato ma na fa'anoi atu i le tino o Iesu. Ua lauiloa e tagata malamalama uma le aso o le vaisapati na fa'asatauroina ai Iesu, o le Aso Faraile lea. Ua ta'ua le aso, "o le aso o le sauniga, ua latalata le sapati" (F. 54).
 - b. **O le aso e tuā'oi ma le Aso Faraile,** o le Aso To'ona'i lea, ua ta'ua "o le sapati e tusa ma le poloā'iga" (F. 56). Na lē fa'au'uina ai e so'o le tino o le Ali'i, a ua toe fo'i atu i le a'ai ma fa'amamalu i le aso Sapati.
 - c. **O le ulua'i aso o le vaisapati.** O le aso lea e tuā'oi ma le Sapati, i le taeao po o le aso, i le tafa o āta, na o atu ai fafine i le tu'ugamau a e fa'auta, ua lē o i ai le Ali'i ina ua toe soifua mai o Ia. O le Aso Sā lea o lo'o fai nei (Sunday), ua ta'ua o le ulua'i aso o le vaisapati i le Tusi Pa'ia (Luka 24:1).
3. Ona tatou mautinoa lea, e maua le "Sapati e tusa ma le poloā'iga," (o le aso fitu tonu lea, Esoto 20:8-11), i le vā o le Aso Faraile ma le Aso Sā (Sunday). O le Aso To'ona'i, o le Sapati aso fitu lea.
4. Fa'aaogā se "**dictionary**" ("fa'amalamalama 'upu") o iā te 'oe. (O le tusi lea e su'e ai 'upu ma o latou uiga). Silasila i le 'upu "**Saturday**," (Aso To'ona'i), o le a e maua ai le fa'amatalaga, o lona fitu lava lea o aso o le vaisapati. Silasila fo'i i se kalena ma ia e matauina le aso e amata ma fa'ai'uina ai le faitauina o aso o le vaiaso sā.

II. E iloa fa'aapefea, o le Sapati moni lenei mai le amataga?

1. E to'atele o lo'o latou fesili mai i lenei fesili ma ua fa'aali mai lo latou manatu, pe e le'i fenumia'i 'ea le tau o aso ua āla ai 'ona lē toe māiloa i nei ōna pō o le sapati moni mai le amataga. E leai lava se fa'avae mo lea taofi. E fā gafulu tausaga na fa'ailogaina ai e le Atua le Sapati moni mai le amataga i le vavega sautualua o le manai, na fa'alua ai ona tele o mea na fa'aputuina e le fanauga a Isaraelu i le aso ōno, a 'ua lē maua se mea i le Sapati. Pe a teu fo'i se mea i le taeao i aso faiso'o, ona ēlosia ai lea, a e peita'i le vaega na teu i le aso ōno mo le Sapati, e le'i ēlosia pe tutupu mai ai ni ilo (Eso. 16:11-26). Ona o'o lea i ōna pō o Iesu, na tausila lava e le Ali'i Fa'aola le Sapati aso fitu fa'atasi ma tagata Iutaia. Sa tataua lava ona silafia e Iesu pe 'ana fai e lē o lea le Sapati moni mai le amataga.
2. Mai ōna pō o Iesu, se'ia o'o mai i le taimi nei, e leai lava se fenumia'iga i le tau o aso. Ua fa'ailoa mai e le vasega popoto o le 'au va'ai fetū, e lē mafai sina minute e tasi o le taimi ona lē iloa, a e fa'aapefea lā 'ona lē iloa o se aso atoa?

III. Po ua lē fa'alavelaveina 'ea le tausiga o le Sapati talu ai 'ona e lapotopoto le tino o le lalolagi ma ua 'ese'ese ai le taimi o lea konetineti ma lea konetineti?

1. Pe afai ua mafaia e le vaega e to'atele o tagata Kerisiano ona latou tausia o le Aso Sā (Sunday) i le lalolagi lapotopoto e aunoa lava ma se fa'alavelave, ona o le ā 'ea ua manatu ai fa'apea tagata pe a tausia le Sapati aso fitu?
 2. O tagata e to'a āfe ma āfe i nu'u uma o le lalolagi, o lo'o latou fa'amamaluina lona fitu o aso o le vaisapati e aunoa lava ma se fa'alavelave e fa'afaigatā ai. Pe mata 'ea na lē silafia e le Atua le tino o le lalolagi e lapotopoto ina ua Ia poloa'i mai i tagata ta'ito'atasi i nu'u uma, "Ia e manatua le aso lea,..." O lona uiga, e amata le aso i lona vaega pouliuli, pe a goto le lā i le tasi afiafi, se'ia o'o ina ua toe goto le lā i le tasi afiafi. O le tau lea fa'ale-Tusi Pa'ia. O le tau fa'a-Roma lenei o lo'o tausisi i ai le lalolagi, e amata ai le aso i le tulua o pō, se'ia o'o fo'i le i tulua o pō (Levitiko 23:32). - "E amata mai i le afiafi tou te fai ai ma sapati e malōlō ai."
- Ne'em. 13:18, 19** "Ua o'o ina mamalu le pō i faitoto'a o Ierusalema, o lumana'i i le sapati."
- Mareko 1:32** "Ua o'o i le afiafi i le goto o le lā (ua mavae le Sapati), ona 'aumaia lea o tagata mama'i iā Iesu."

TAULOTO: Levitiko 23:32.

O LE ASO SĀ (SUNDAY) I LE FEAGAIGA FOU

I. O se fa'amatalaga.

1. Ua lē o ta'ua mai lava le Aso Sā (Sunday) i totonu o le Tusi Pa'ia.
2. Ua lē o i ai se fe'ese'esea'iga o taofi e uiga i le ulua'i aso o le vaisapati i ōna pō o le Feagaiga Tuai, auā ua lauiloa, sa lē 'avea ai lenā aso ma aso pa'ia.
3. A e peita'i ua taofi nisi e fa'apea, o le ulua'i seneturi T.A. na fa'ataunu'uina ai se fesuia'iga mai lona fitu o aso i le ulua'i aso, ma o lo'o i ai i le Feagaiga Fou ni molimau ua lava e fa'amaonia ai le tausiga o le Aso Sā (Sunday). O lea o le a tatou fa'asaga atu ai nei e su'esu'e ma iloilo i mau uma o lo'o ta'ua mai ai le ulua'i aso i le Feagaiga Fou.

II. Ua na o le fa'avalu ona ta'ua mai o le ulua'i aso o le vaisapati i totonu o le Feagaiga Fou, i le pe afai o lo'o i ai ni molimau tau i le fa'apa'iaina o lea aso e fai ma aso sā e sui a'i le aso fitu, o mau lava ia e valu ua tataua ona tatou maua ai o se fa'aaliga fa'apenā. O le a tatou liliu nei i mau ma faitau i ai ma le fa'autauta lelei.

1. **Mataio 28:1** O lenei mau ua fa'ailoa mai ai, o le ulua'i aso e tuā'oi tonu ma le Sapati. Fai mai, o le aso lea na asiasi ai fafine i le tu'ugamau. Ua leai lava sina 'upu e tasi se'i fa'ailoa mai ai, o le aso sā fou lea mo tagata Kerisiano.
2. **Mare. 16:2** Ua fa'apea fo'i ma lenei mau ona lē aogā mo le fa'amaoniga o le fa'apa'iaina o le ulua'i aso o le vaisapati e fai ma aso sā. E leai se fa'aaliga o i ai e 'ese i lō le mau i ona luma.
3. **Mare. 16:9** Ua na o lenei le fa'aaliga ua maua mai i lenei mau fai mai, o le ulua'i aso o le vaisapati na fa'aali atu ai le Ali'i Fa'aōla iā Maria le Makatala, ona gata mai ai lea. Ua lē o tusia mai ai lava se poloā'iga po o se fa'atonuga mo le fa'apa'iaina o lenā aso.
4. **Luka 24:1** O lenei fo'i ua na ona fai mai, o le ulua'i aso, i le tafa o āta, na ō atu ai fafine i le tu'ugamau ma mea manogi na latou saunia. Ua fā nei mau ua tatou iloiloia, a e tatou te le'i maua mai ai lava sina fesoasoani e tasi mo le tau fa'avaeina o le pa'ia o le ulua'i aso.
5. **Ioane 20:1** Se'i maua ia se mau ua matuā ta'utino mai ai, o le ulua'i aso o le vaisapati, o le aso sā fou lea mo tagata Kerisiano, a e leai; ua na 'ona toe molimau mai Ioane i le mea ua uma ona molimau ai i le 'au tusi evagelia i ona luma, e fa'apea, o le taeao po o le ulua'i aso na ō atu ai fafine i le tu'ugamau. Na tusia e Mataio, Mareko, Luka, ma Ioane a latou evagelia ina ua leva ona mavae atu o le toe soifua mai o Keriso, a e peita'i ua tautala mai i latou uma i le ulua'i aso na o se aso aunoa latou te le'i fa'apa'iaina.
6. **Ioa. 20:19, 20** O le fa'ato'ā maua lenei o se mau ua tau foliga e fai sona aogā; auā o lenei ua ta'ua mai e peisea'i o se fa'apotopotoga ua faia e le 'au so'o i le afiafi o le ulua'i aso o le vaisapati, ai lava se saunigā lotu. A e peita'i, pe a tatou iloilo lelei i ai, e lē o se saunigā lotu, e lē o se maota fo'i ua fa'ailogaina e fai ai ni sauniga, a o lo latou lava aiga po o lo latou nofoāga e masani ai, ma o lo'o fai fo'i le 'aiga o le afiafi i le taimi na ulufale atu ai Iesu iā te i latou (Gal. 1:12,13; Mare. 16:14). Ua molimau mai fo'i Ioane i le pogai

na āla ai ona fa'apotopoto o le 'au so'o i lea mea ma latou punitia faitoto'a, fai mai, "ona o le fefe iā Iutaia."

- a. Ua fa'aali mai le taofi o nisi e fa'apea, na āla ona fa'apotopoto o le 'au so'o ina ia latou faia se saunigā lotu e fa'amanatuina ai le toe soifua mai o lo latou Ali'i. A e peita'i ua leai lava se fa'avae mo lea taofi; auā ua manino ona fa'ailoa mai, o lea taimi e le'i o'o ai ina talitonu le 'au so'o ua toe soifua mai Keriso. E fa'apefea lā ona latou fa'amanatuina o se mea latou te le'i talitonu i ai (Mareko 16:10-14; Luka 24:10, 11, 33-35; Ioane 20:9)?
- b. E lē gata i lea, a o lenā lava aso na savavali ai le to'alua o i latou mai Ierusalemā i Emau ma toe fo'i i Ierusalemā. O le umi o lea savaliga e 15 maila, (o le vā lea o Apia ma Saoluafata), a e fa'i fo'i ua amata ona fa'amamaluina o le aso e fai ma aso sā fou fa'ale-Feagaiga Fou (Luka 24:13, 33).

7. **Galue 20:7** O lenei ua fa'ato'ā iloga ona ta'ua mai o se saunigā lotu ua faia i le ulua'i aso o le vaisapati, fai mai ua fa'apotopoto le 'au so'o e tofitofi le areto ma ua lauga atu Paulo iā te i latou. A e peita'i pe a tatou iloilo lelei i ai, ua lē aogā fo'i ma lenei mau e fesoasoani atu ai mo le tau fa'avaeina o le pa'ia o le ulua'i aso.
- a. O le tau o lo'o tausisi nei i ai le lalolagi, o le tau fa'a-Roma lea e amata ai le aso i le tulua o pō, a e toe fa'ai'uina fo'i i le tulua o pō. E lē fa'apenā le tau fa'ale-Tusi Pa'ia sa tausisi i ai i latou o ē na latou tusia le Feagaiga Fou, atoa fo'i ma le 'au Kerisiano i ia ōna pō. O le tau fa'ale-Tusi Pa'ia e amata ai le aso i le afiafi pe a goto le lā, a e fa'ai'uina pe a toe goto le lā i le tasi afiafi. (Silasila i le Kenese 1:5, 8, 13; Levi. 23:32; Ne'em. 13:19; Mare. 1:32). E muamua le vaega pouliuli o le aso, a e mulimuli lona vaega malamalama. E amata le ulua'i aso i le afiafi o le Sapati pe a goto le lā.
 - b. O lenei sauniga ua ta'ua mai, o le lotu fa'amavae lea a Paulo ma le ekalesia sa i Teroa, i le sa fai pō lea sauniga e pei o le fa'aaliga i le F. 8, "Ua tele fo'i lamepa i le afeafe aupitoaluga ua fa'apotopoto ai i latou." O lea ua tatou mautinoa ai, o le pō o le Aso To'ona'i na fai ai lenei sauniga ina ua mavae le Sapati, ona fa'alevaleva ai lea e Paulo o lana apoapoa'iga se'ia o'o i le tulua o pō na fa'ai'uina ai, a o le taimi tonu fo'i lea e fa'ato'ā amata ai le Aso Sā (Sunday) i le tau fa'a-Roma o lo'o tausisi nei i ai le lalolagi.
 - c. Ua malama le taeao o le ulua'i aso (Sunday), ona sauni malaga ai lea o Paulo ma i latou o ē sa fa'atasi ma ia. Ua folau atu le 'au so'o i Aso e fa'atalitali ai iā Paulo, auā ua ui ā uta o ia (F. 13). Fa'auta! Ua lē gata i le 'au so'o ona latou galulue i le ulua'i aso i le tau āloina o lo latou va'a, a o Paulo fo'i ua ia savali i maila e 19, o le vā lea o Teroa ma Aso.
 - d. Ua lē taitai lā ona 'avea o lenei mau ma fesoasoani e fa'amaonia ai le pa'ia o le ulua'i aso o le vaisapati, a e peita'i ua 'avea le tala i le asiasiga a Paulo ma lana 'au malaga i Teroa ma āla ua atili ai ona tatou mautinoaina le matuā leai lava o so latou fa'aeteetega mo lenā aso. Sa latou mua'i fa'ataunu'uina o sauniga e masani ai i le Sapati, soso'o loa ma le lotu fa'amavae i le pō ina ua mavae le Sapati, a e fa'aaogāina le aso ua ta'ua nei o le Aso Sā e fai malaga ai i Aso. Sa i ai le 'au ekalesia i Teroa. 'Ona o le ā 'ea la ua lē nonofo ai Paulo ma lana 'au malaga se'i mua'i fai sauniga e ōno ma tatau mo le "Aso o le Ali'i," i le fa'ato'ā sauni malaga ai i le taeao o le Aso Gafua?
 - e. O le itū i le tofitofiga o le areto, ua leai lava se poloā'iga po o se fa'atonuga o i ai i le Tusi Pa'ia e uiga i le fa'amanatuga po o fea se aso e tatau ai ona fai, pe fa'afia ona fai, po o fea fo'i e tatau ona fai ai. O le ulua'i fa'amanatuga na faia lea e Iesu ma Ōna so'o i le potu aluga i Ierusalemā i le pō o le Aso Tofi, a e lē fa'apea ua pa'ia ai le Aso Tofi talu ai lea faiga (I Kori. 11:23).

8. **I Kori. 16:2** O le toe mau lenei i le Feagaiga Fou ua ta'ua mai ai le aso muamua o le vaisapati. Ua fa'augaina e nisi lenei mau e fa'apea o se taulaga ua aoia i

se saunigā lotu ua faia i le ulua'i aso, peisea'i o se faiga ua masani ai ia le ekalesia i nā ōna pō, a e peita'i e lē mautū lava lea taofi. E lē fa'asino le 'upu a Paulo i se taulaga faiso'o i totonu o se malumalu, a e peita'i e lē mautū lava lea taofi, a e peita'i o le sauniga e tataui ai a tagata ta'ito'atasi i o latou lava aiga e tusa ma se fesoasoani ua latou mafaia mo le 'au uso puapuagātia i Ieruselema. (Silasila i le F. 1 ma le Roma 15:25-28).

Manatu Fa'aopoopo: O le fa'aliliuga o le Tusi Pa'ia i le gagana Sepania ma Italia ua manino ona fa'ailoa mai ai, o le sauniuniga e faia e ia tagata i tua "i lona lava aiga," a e lē o totonu o le malumalu po o le sunako. E fa'apenā fo'i ma le fa'aliliuga a Luteru i le gagana Siamani, atoa ma isi fa'aliliuga e tele. E le'i alu atu Paulo i Korinito ma se aso sã fou, a e peita'i na ia tausia pea le Sapati aso fitu a o ia galuea'iina le 'au ekalesia fou i lenā a'ai (Gal. 18:1-4). Sa fai taulaga le ekalesia i taulaga e masani ai i le aso Sapati, a e peita'i lenei taulaga o lo'o fai mai ai le aposetolo, ua tu'u lea i le ulua'i aso ma le fa'atatau a le tagata lava ia i se mea na te mafaia i tua i lona lava aiga e tusa ma le fa'amanuiāga a le Atua iā te ia. Sa tataui lenei sauniuniga mo se aso aunoa, a ua lē tataui mo le Sapati.

- III.** Ua fa'ai'uina nei la tatou iloiloga i mau e valu o lo ua ta'ua mai ai le ulua'i aso o le vaisapati, a ua leai lava se tasi o nei mau ua fai sona aogā e fa'amaonia ai le fa'amamaluina o lenā aso e pei ona faia nei e le vaega e to'atele o tagata Kerisiano.

Ua fa'aali tino mai e nisi ali'i faife'au ta'uta'ua o ē sa tasi i le Aso Sā (Sunday), le matuā aunoa lava o lā latou fa'amamaluina o le ulua'i aso ma se fa'avae tataui fa'ale-Tusi Pa'ia.

- 1. Ekalesia o le Fa'apotopotoga (Congregational Church):** *"E ui lava i so tatou fa'amaoni ma so tatou filifiligā i le tausiga o le Aso Sā (Sunday), a ua matuā manino lava ua tatou lē o tausia le Sapati.... O le Sapati na fa'avaeina lava i luga o se poloā'iga fa'ale-Atua. Ua tatou lē maua lava se poloā'iga fa'apenā se'i fa'avaeina a'i le tausiga o le Aso Sā. Ua leai lava se fuaiupu e tasi i le Feagaiga Fou se'i fa'ailoa mai ai, tatou te nofosala pe a tatou solia le pa'ia ua fa'apea- ua i ai i le Aso Sā."* - *The Ten Commandments*, R.W.Dale, M.A., pp. 106,107.
- 2. Lotu Egelani (Anglican Church):** *"Ua leai lava se 'upu, po o se manatu ua fa'aalia mai i le Feagaiga Fou e uiga i lenei itū, o le 'aua le galulue i le Aso Sā (Sunday)... Ua aunoa lava le malōlōga fa'ale-Aso Sā ma se tulafono fa'ale-Atua.... O le fa'amamaluina o le Aso Lulu (lea ua ta'ua i Samoa o le Aso o le Lefulefu – Ash Wednesday), ua tutusa lelei lava le tulaga o lona fa'amamaluina ma le tulaga o le Aso Sā."* - *The Ten Commandments*, Canon Eyton, pp. 62-65.
- 3. Ekalesia Metotisi (Methodist Church):** *"Ua lē o tusia mai lava se 'upu fa'apea, na i ai se poloā'iga fa'ale-Atua i le 'au aposetolo ia suia le Sapati mai le aso na masani ona fa'amamaluina ai e Iutaia i le ulua'i aso o le vaisapati."* - *A Dictionary of the Bible*, R.Watson, author of the "Lives of the Wesleys."
"E moni lava ua le'i ma'oti mai se poloā'iga mo le papatisoina o tamaiti....Ua fa'apea fo'i ona leai o se poloā'iga mo le fa'apa'iaina o le ulua'i aso o le vaisapati." - *Theological Compend*, A. Binney, pp. 180,181.
- 4. Ekalesia Katoliko Roma (Roman Catholic Church):** *"E mafai ona 'e faitauina le Tusi Pa'ia mai le Kenese e o'o lava i le Fa'aaliga, a e o le a 'e lē maua ai lava se laina e tasi ua fa'atonuina mai ai le fa'apa'iaina o le Aso Sā (Sunday). Ua poloā'iina mai lava e le Tusi Pa'ia le fa'amamaluina fa'ale-lotu o le Aso To'ona'i (Aso Fitu), a e peita'i ua tatou lē o fa'apa'iaina lava lenā aso."* - *The Faith of Our Fathers*, Cardinal Gibbons, p. 111.

"E le'i maua i le Tusi Pa'ia le aso sã tatou te fai nei, auā o le 'upu ua tusia i le Tusi Pa'ia, o le aso to'onai, o le aso sã lava lea." – Si'i mai le tusi e igoa, *O le Ekalesia a Iesu Kilisitō*, Lomiga Katoliko, Moamoa, 1924, itulau e 71.

IV. O le matuā su'esu'e ma iloilo i le a'oa'oga fa'ale-Feagaiga Fou e uiga i le Aso Sā (Sunday), e ao lava ona ta'ita'iina ai i tatou i nei fa'ai'uga:

1. Ua lē maua se mau e tasi e fa'amaonia ai, sa suia le Sapati.
2. Leai se mau e tasi ua ta'upa'iaina ai le ulua'i aso o le vaisapati.
3. Leai se mau e tasi ua poloa'iina ai i tatou ia tatou tausi ma fa'amamalu i le ulua'i aso o le vaisapati.
4. Leai se mau e tasi e fa'amaoni ai, sa tausia le Aso Sā (Sunday) e Iesu.
5. Leai se mau e tasi ua foa'iina atu ai se igoa pa'ia i le ulua'i aso o le vaisapati.
6. Leai se mau e tasi ua fa'aali mai ai se manatu e fa'apea ia fa'amamaluina le ulua'i aso e fa'amanatuina ai le toe soifua mai o Keriso.
7. Leai se mau e tasi e fa'amaonia ai, sa i ai se fa'aeteetega a le 'au aposetolo mo lea aso.
8. Leai se mau e tasi e fa'aalia ai, sa a'oa'oina tagata e le 'au aposetolo ia latou tausia le Aso Sā (Sunday).
9. Leai se mau e tasi e fa'amaonia ai, ua fa'ate'a 'eseina le Sapati aso fitu.

"O le taofi o lo ua salalau nei, fai mai, na fa'atonuina lava e Keriso ma Lana 'au aposetolo le suiina o le ulua'i aso mo le aso fitu, ua aunoa lava lea ma se fa'amaoni o tusia mai i le Feagaiga Fou."- Ta'utinoga a le ali'i a'oa'oina o Dr. Lyman Abbot, lē na ia fa'atonuina le nusipepa lauiloa o le "Christian Union", January 19, 1882.

"O le fa'amamaluina o le Aso Sā (Sunday) e fai ma matā'upu fa'a-Kerisiano, na mafua lea ona o le galuega a 'le mea lilo a le amio leaga,' o lē sa amata ona galue i ōna pō o Paulo."- O le Finauga Tele, itulau e 54.

TAULOTO: Mareko 16:1.

UA TAUMAFAI TAGATA E FA'ALILIUINA TULAFONO A LE ATUA

- I. E ui lava ina e tumau le tulafono a le Atua e lē ma-liua, a e peita'i ua valo'ia mai se tasi pule o le a tū mai ma o le a na taumafai e fa'aliliu i ai.

Tanielu 7:25 "E manatu o ia e fa'aliliu i tausaga ma tulafono."

Manatu Fa'aopoopo:- Ua fa'amae'ae'a ona fa'amalamalamaina mai e le ali'i a'oa'oina ma le ta'uta'ua o *Albert Barnes* (Ekalesia Peresepiteriana- Presbyterian-) le uiga o 'upu Eperu o i ai i le fuaiupu ua ta'ua i luga, e fa'apea:

1. **"E manatu o ia"** - *O se mea ua ia fa'amoemoe i ai ma ua ia mana'omia ina ua uma ona fuafuaina i lona loto, ma ua ia mautinoa lelei e aogā iā te ia.*
2. **'Tausaga'** - *E fa'asino i taimi ua fa'ailoga,- ōna pō ua atofaina, o vaega taimi pa'ia, o aso fa'a-aso sā.*
3. **'Tulafono'** - *O tulafono fa'ale-lotu, tulafono i matā'upu tau le Atua. O le a i ai i lenei pule sa loto o le a ia fa'asaga atu ai na te fa'aliliuina mea ua tonu mai ānamua ma lona fa'amoemoe o le a na mafai lava ona fa'ataunu'uina mai ānamua o fesuia'iga e fesoasoani ai i lana lava matā'upu o lo'o ia tau galuea'iina. O le a fia pulea malosi e ia le ōla fa'ale-agaga o tagata, o le a ia sa'ilia le pule o le a mafai ona ia fa'ate'a 'eseina ma fa'atūina ai o sauniga ma tulafono e tusa ma le mea ua ia loto i ai." "From Commentary," Rev. Albert Barnes, *On The Book of Daniel*, pp. 313,314. (Silasila i le Tanielu 8:24, 25).*

O le a fa'asilia e lenei pule o āna lava matā'upu (uputu'u) i lō poloā' iga a le Atua. O le vaega o le tulafono a le Atua ua fa'ailoa mai ai se vaega taimi ua ta'upa'iaina, o lona fā lea o poloā'iga ua poloā'iina ai le tausaga o le Sapati Aso Fitu. O le a lavea i le galuega a lenei pule.

- II. O mea uma ua valo'ia mai i le Tanielu, matā'upu e 7, e fa'apea, o le a faia e le pule ua fa'atusaina i le "nifo itiiti," e fa'atatau tonu lava ia i le pule fa'ale-Ekalesia Katoliko Roma. O le tele o ali'i a'oa'oina o itū'aiga Lotu Porotesano 'ese'ese, o ē ua latou su'esu'e i lenei valo'aga ma ua fa'aali mai ō latou taofi i ai, ua toetoe lava ina a lē maua ai se to'atasi ua 'au 'ese i le fa'atauga e pei ona ta'ua i luga.

1. **Tanielu 7:1-8** O manu fe'ai e fā na iloa e Tanielu i le fa'aaliga.
2. **Tanielu 7:17** O le fa'amatalaga o le fa'aaliga.
3. **Tanielu 7:23** O lona fā o malō (Roma).
4. **Tanielu 7:24** O nifo e sefulu (o vaega ia e sefulu na vaevaeina i ai le malō o Roma).
5. **Tani. 7:24, 25** O le nifo itiiti na tupu mai i le vā o nifo e sefulu. O nei fa'amatalaga uma i mea o le a faia e le nifo itiiti, ua iloga ona fa'ataunu'uina e le pule fa'ale-Pope.
6. **II Tesa. 2:3, 4** O le fa'amatalaga a Paulo i le uiga o lenei pule.

Manatu Fa'aopoopo: Ia silasila lelei i lō tatou atunu'u, o lenei a'oa'oga ua lē taitai lava ona gata i le Ekalesia Aso Fitu ona latou faia, a e peita'i ua fa'amauiina lava i tusi e tele a isi itū'aiga Lotu Porotesano. A o le'i o'o ina fa'alogoina e Samoa le tala'iga fa'ale-Ekalesia Aso Fitu, na tusia ai e Misi Parate (L.M.S.) ia nei 'upu e uiga i nisi valo'aga o i ai i le Tusi o Fa'aaliga, fai mai:

"Ua lē iloa nei valo'aga e ē ua Lotu Pope, auā ua sā ona latou faitau le Tusi Pa'ia. E fa'auiga 'ese fo'i e i latou nei 'upu, ma fa'atatau i Roma ina o fa'apaupau. 'Ana latou su'e i tusi, po ua latou iloa lelei ai, ua na o Roma Lotu Pope e tatau i ai." O le Tusi na Fa'amatalaina ai le Tusi Pa'ia, itulau e 670.

Ua fa'apea fo'i ma le fa'amatalaga a Misi Parate i le pule fa'ale-"nifo itiiti" ona fa'aali tino mai ai o lona taofi e fa'apea: "*O le nifo itiiti na fa'i 'esea nisi nifo e tolu, ua taunu'u lea i le Lotu Pope*" (itula e 388).

Ua lē so'ona fai lenei fa'amatalaga ma le lē mafaufau, pe 'ona ua i ai se agaga ua fia fa'aleaga ma fa'atigā ai i nisi uso – 'auea ne'i fa'apea! A ua faia ma le loto alofa e tusa ma afioga fa'avalō'aga ua manino ona tusia mai i le Tusi Pa'ia, ma ua lē 'ese fo'i ma le a'oa'oga ua loto gatasi ai i le tele o itū'aiga Lotu Porotesano. O lo'o i ai i le Ekalesia Katoliko Roma, e pei fo'i o itū'aiga lotu uma, o tagata Kerisiano fa'amaoni e to'atele, o ē ua matata'u i le Atua ma o lo'o latou au'auna atu iā te Ia e tusa ma le malamalama ua latou maua. Tatou te āva i lo latou fa'amaoni ma lo latou ma'elegā. O lea ia mautinoa lelei ai, o fa'amatalaga ua tusia i lenei tusi e uiga i le Ekalesia Katoliko, ua lē faia aga'i i ōna tagata, a e peita'i o le fa'atuatuāga lava ia ma lona uiga. Fai mai le aposetolo o Paulo, "Ua 'ou lē natia se mea, ina ne'i lē fa'ailoa atu iā te 'outou le finagalo uma o le Atua" (Galuega 20:27).

III. Pe a tatou su'esu'e i *Katekismo* (Catechism - tusi lotu) a le Ekalesia Katoliko Roma, o le a tatou mautinoa ai, e tolu fesuia'iga ua faia e lenā ekalesia i le tulafono a le Atua:

1. Ua 'ave 'eseina le poloā'iga e lua mai lona tulaga e tatau ai, ma ua fa'aopoopoina atu na o ni ōna vaega i le poloā'iga muamua. O nisi fo'i o ā latou katekismo ua matuā iloga ona 'ave 'eseina atoa ai o lona lua o poloā'iga o le tulafono. E i ai le katekismo e igoa o "*Butler's Catechism*," itula e 28, i le ma le "*Convert's Catechism of Catholic Doctrine*," (Rev. Peter Geiermann), itula e 48, 49.
2. Ua vaeluaina le poloā'iga e sefulu ina ia fa'a'ato'atoaina ai poloā'iga e sefulu.
3. O le poloā'iga e fā (ua ta'ua e i latou o le tolu), ua lē fa'ailoga tonuina ai le aso e tatau ona fa'apa'iaina ina ua suia 'upu.

IV. I le *katekismo* o lo'o fa'aogāina nei i Ausetalia, o lo'o tusia ai e fa'apenei: "Ia 'e manatua le Aso o le Ali'i e te fa'apa'iaina," ona i ai lea ma lenei fa'aopoopoga, "*Ua poloa'iina i tatou i lona tolu o poloā'iga ia tatou fa'apa'iaina le Aso Sā (Sunday)*."

Fesili: "Pe 'ua 'e iloa 'ea ma se isi āla e fa'amaonia ai, o lo'o i ai i le ekalesia le pule e fa'atūina ma fa'atulafonoina ai aso fa'a-aso sā?"

Tali: "Pe 'ana fai e lē o iā te ia lea pule, semanū e lē mafai ona faia ai e ia o le mea ua loto gatasi ai ma ia le 'au failotu uma i nei ōna pō, - semanū e lē mafai e ia ona suia o le tausiga o le Aso To'ona'i, le aso Fitu, i le Aso Sā (Sunday), le ulua'i aso o le vaiaso sā; o se fesuia'iga lea ua aunoa lava ma se afioga mai le Tusi Pa'ia e fa'amaonia a'i." - *A Doctrinal Catechism*, Rev. Stephen Keenan, p. 147.

Fesili: "Se ā sau molimau e te fa'amaonia ai, o lo'o i ai i le ekalesia le pule na te poloa'iina ai le fa'amamaluina o aso fa'a-aso sā?"

Tali: "Ona ua ia suia le Sapati i le Aso Sā (Sunday), o se fesuia'iga lava lea ua talia e tagata Porotesano ma ua latou fa'afiti ai ia i latou lava ina ua latou ma'elegā i le tausiga o le Aso Sā (Sunday), a ua latou solia le tele o isi aso fa'a-aso sā ua poloa'iina e le ekalesia lava e tasi (Katoliko)."

Fesili: O le ā sau fa'amaoniga o lea mea?

Tali: "Auā o lo latou tausī i le Aso Sā (Sunday) ua latou ioe atu ai i le pule ma le malosī o le ekalesia (Katoliko), na te fa'atūina ai aso fa'a-aso sā.... *An Abridgement of Christian Doctrine*, 1649, Henry Tuberville, D.D.

E fa'apenei ma 'upu a se tasi ali'i Katoliko e fa'asino tonu i le 'au Porotesano o ē ua latou tausī i le ulua'i aso o le vaiaso sā, fai mai:

"O le a e fai mai nei iā te a'u, o le Aso To'ona'i o le Sapati fa'a-Iutaia lea, a 'ua suia le aso malōlō o tagata Kerisiano i le Aso Sā (Sunday). Ua suia? Oi, a e po o ai 'ea ua na suia? O ai 'ea ua i ai le pule na te fa'aliliuina ai se poloā'iga mautinoa a le Atua, o Lē e Ōna le malosi uma lava? Ina ua tulei mai le si'ufofoga o le Atua ma ua Ia fetalai mai, 'ia 'e fa'apa'iaina le aso fitu,' o ai 'ea o le a na fa'amalosia o ia e ia ma na fa'apea atu, 'E leai, e taga ona e faia o le mau fe'au fa'ale-lalolagi i le aso fitu;' a e ia e fa'apa'iaina le ulua'i aso e sui a'i le aso fitu?"

"O lenei fesili, o se fesili lava e matuā tāua tele, ma ua 'ou lē iloaina se āla e fa'amata o le a mafai ona e tali mai ai i ai."

"O 'oe o le Porotesano, ma o lau ta'utinoga fo'i lenei, o lo'o e savali e tusa ma le a'oa'oga o i ai i le Tusi Pa'ia, ua na o le Tusi Pa'ia lava. A e peita'i, i se matā'upu tāua fa'apei o lenei, o le fa'amamaluina o se aso e tasi mai aso e fitu ia 'avea ma aso pa'ia, ua 'e te'ena ai le a'oa'oga mautinoa a le Tusi Pa'ia, ma ua e 'aumaia se isi aso 'ese e sui a'i le aso ua poloa'iina mai e le Tusi Pa'ia. O le poloā'iga mo le fa'apa'iaina o le aso fitu, o se tasi lava lea o poloā'iga e sefulu; ua e talitonu o lo'o tumau pea le isi iva; a e po o ai 'ea ua na tu'uina atu iā te 'oe le pule ua e lotea ai lona fā? Pe afai o lo'o e pipi'i mau ma le fa'amaoni i le fa'avae o lou fa'atuatua, ma pe afai fo'i ua e talia le Tusi Pa'ia, ua na o le Tusi Pa'ia lava e fai mou ta'ita'i, ua tataua loa lava 'ona e mafai ona fa'asino mai se vaega o le Feagaiga Fou ua matuā iloga ona fa'aliliuina ai o lenei poloā'iga e fā." - Library of Christian Doctrine; "Why Don't You Keep Holy the Sabbath Day?" pp. 3,4, London, Burns and Oates (R.C.).

- V. O Ekalesia Porotesano fo'i ua latou mautinoaina le matuā leai o se fa'avae fa'ale-Tusi Pa'ia mo le fa'aliliuina o le Sapati, ma ua latou ioe mai fo'i, o lea fesuia'iga o se fesuia'iga lava fa'ale-tagata ua aunoa lava ma se poloā'iga fa'ale-Atua. (Silasila i le matā'upu e 63, Vaega e 3).

"O le fa'amoemoēga e tasi o Satani mo le fa'afelaveiina o le finagalo o le Atua, o lona ta'ita'iina lea o ali'i ma tama'ita'i ia latou lē usiusita'i i lenei tulafono (poloā'iga e sefulu)." — O Pateriaka ma Tupu, itulau e 178.

TAULOTO: Tanielu 7:25.

O LE FA'AMAUFA'AILOGA A LE ATUA

- I. O le fa'amaufa'aailoga a le malō pe a tu'u i se pepa po o se tusi, e maua ai lona mamalu, e āva i ai tagata. O tupu ma faitulafono, latou te tu'uina atu a latou fa'amaufa'aailoga i fa'atonuga ma tulafono ua latou faia, e fa'amamaluina a'i ina ua i ai le fa'aailoga o le pule a lē e āna le fa'atonuga.

I Tupu 21:8 O le āla fa'aaogāina lea e Iesepela o le fa'amaufa'aailoga a le tupu o A'apo ina ia fa'amamaluina a'i lana tusi o le a 'auina atu i ali'i ma toea'ina o le a'ai.

Eseta 3:12 Na tusia e le 'au tusi'upu tusi a le tupu o Asueru sa fia fa'asalalauina atu i lea itū malō ma lea itū malō, ona fa'amaufa'aailogaina ai lea i le mama a le tupu.

- II. E tolu mea e ao ona i ai i se fa'amaufa'aailogaina ia atoa lelei ai o lona aogā. (Fa'ata'ita'i, example).

1. O le suafa o le faitulafono.
2. O le tofiga o lē e āna le tulafono.
3. O le pule'aga a lē e āna le tulafono.

E FA'APEA (Example): SIAOSI VI, TUPU O PERITANIA TELE.

Isaia 8:16 O fa'amaufa'aailoga a tupu ma ali'i o lenei lalolagi, e tu'uina atu i ai i ā latou tulafono ina ia noatia ai o latou tagata i le āva ma le usiusita'i. Ua fa'apea fo'i ona tu'uina atu e le Atua o Lana fa'amaufa'aailoga i Lana tulafono pa'ia ina ia noatia ai Ōna tagata uma i le āva ma le usiusita'i.

Esoto 20:1-17 Ia e faitauina le tulafono ma le fa'autauta lelei, ina ia e iloa ai po o fea tonu o i ai le fa'amaufa'aailoga a le Atua: O Lona suafa, tofiga, ma le pule'aga.

- III. Ua i ai le fa'amaufa'aailoga a le Atua i lona fā o poloā'iga o le tulafono.

Esoto 20:8-11 O lona fā o poloā'iga o le a e maua ai o nei vaega e tolu e ao mo le fa'a'ato'atoaina o le fa'amaufa'aailoga.

- (1) Suafa: O Ieova lou Atua.
- (2) Tofiga: O Lē na Ia faia mea lava.
- (3) Pule'aga: O le lagi ma le lalolagi, atoa ma le sami.

Manatu Fa'aopoopo: Ua lē o fa'aailoa mai i le poloā'iga muamua po o ai lē e āna le tulafono. Ua na 'ona poloa'i mai ai 'ia “**Aua ne'i e fai mo 'oe ni atua 'ese i o'u luma,**” a e peita'i ua lē ta'u mai po o ai lē o lo'o fetalai mai.

1. O lona lua o poloā'iga ua fai mai, “**O Ieova lou Atua,**” a e peita'i ua aunoa ma se fa'aaliga o Lona tofiga ma Lana pule'aga. E fa'apea fo'i ma lona tolu ma lona lima o poloā'iga.
2. O poloā'iga e ōno, fitu, valu, iva, ma le sefulu, ua lē o ta'u mai ai lava le suafa o le Atua. Pe 'ana lē seānoa lā ia lona fā o poloā'iga, po ua aunoa lava le tulafono ma se fa'amaufa'aailoga ina ia fa'amaonia ai, o le tulafono lava a le Atua soifua.
3. Pe a fa'atusatusaina le mana ma le mamalu o Ieova ma atua o nu'u fa'apaupau, e masani lava le Tusi Pa'ia ona fa'amanatuina o galuega ōfoōfogia o le foafoāga e fai ma fa'aailoga e lē ma-fa'afitia e iloa ai le Atua moni e to'atasi, le Tupu e fa'avavau (Jerem. 10:10-12; Sala. 96:15). O le āla 'avea lea o Ia ma o tatou Atua tatou te ifo ma tapua'i i ai, auā o Ia “**Lē na Ia faia i tatou**” (Salamo 95:6, 7).

O lea ua 'avea ai lona fā o poloā'iga ma fa'amaufa'ailoga ua fa'amaonia ai, e lē o le tulafono a se tasi atua, a e peita'i o le tulafono a le Atua moni e to'atasi, Lē soifua e fa'avavau, na Ia faia le lagi ma le lalolagi i Lona mana tele.

Esoto 31:13

O le āla 'avea lea o le Sapati aso fitu ma fa'ailoga tāua i le vā o le Atua ma Ōna tagata.

Esek. 20:12, 20

E fai fo'i ia ma fa'ailoga iā te a'u ma 'outou.

IV. I ōna aso e gata ai, o le a tu'uina atu ai e le Atua Lana fa'amaufa'ailoga i muāulu o i latou uma o ē ua ta'ua o Āna 'au'auna fa'amaoni.

Na va'aia e Ioane se galuega tāua o lo'o faia i le lalolagi, o le fa'amaufa'ailogaina lea o le 'au fa'amaoni i o latou muāulu i le fa'amaufa'ailoga a le Atua soifua. E taofia e agelu matagi o mala se'ia o'o ina mae'a lelei lenei fe'au.

Manatu Fa'aopoopo: E lua vaega o le fe'au o le fa'amaufa'ailogaina ua manino ona fa'ailoa mai. E fa'asino le tasi vaega i le tulafono. Ua 'ave 'eseina le fa'amaufa'ailoga a le Atua mai Lana tulafono, o le Sapati lea ina ua fa'aliliuina e tagata. A e peita'i ua 'avea le tala'iga o le toe fuata'iina o le Sapati ma āla e toe fa'amaufa'ailogaina ai le tulafono.

O lona lua o vaega, e fa'asino tonu lea i le fa'amaufa'ailogaina o au'auna a le Atua i ō latou muāulu. E fa'ataunu'uina lea galuega i se vaitaimi o lumana'i e tuā'oi tonu ma le toe afio mai o le Ali'i. O ōna pō ia o le a matuā iloga ona fa'afesaga'i ai o nei aso e lua, o le Sapati moni o Ieova, ma le Aso Sā (Sunday) o tagata. O le a fa'asaga atu le tasi pule e igoa "o le fa'atagata o le manu fe'ai," i se āla malosi fa'ale-tulafono ina ia talia ai e tagata uma le fa'ailoga o le manu fe'ai (Fa'aal. 13:15-17) i ō latou muāulu. O le fa'ato'ā iloga lea ona 'avea o le Aso Sā (Sunday) ma "fa'ailoga o le manu fe'ai," ina o le a lauiloa e tagata lona mafua'aga, ma o le a 'avea lo latou tausi pea i ai ma fa'ailoga o lō latou fia mulimuli atu pea i lenā pule. (Fa'aaogā le Fa'aal. 13:8). Ua fa'amalamalamaina atili i le matā'upu e soso'o ma lenei.

1. **Fa'aal. 14:1** O le fa'amaufa'ailogaina o au'auna a le Atua i ō latou muāulu ma le tusia o le suafa o le Atua i ō latou muāulu, e tutusa lava ia mea e lua, auā o lo'o i ai le suafa o le Atua i le fa'amaufa'ailoga, o lona fā lea o poloā'iga. A e lē gata fo'i i lea, auā o le suafa o le Atua ua fa'ailoa mai ai Lona uiga ma Lana amio (Esoto 34:5-7). O ē o le a fa'amaufa'ailogaina o le a iā te i latou le amio e foliga i le amio a le Atua.
2. **Fa'aal. 14:3-5** E lē pona i latou i luma o le nofoāli'i o le Atua. E lē 'avea le Sapati ma fa'amaufa'ailoga, vaganā ona ua maua le agaga moni o le tausi Sapati ma ua aliali mai fo'i fua o le Agaga Pa'ia i le ōlaga o le tagata (Kala. 5:22-25).
3. **Esekielu 9:4** I le fa'aaliga na va'aia e Esekielu, na fa'ailogaina ai na o i latou o ē sa mapuitigā ma feōi ona o le agasala.
4. **Fa'aal. 7:13, 14** O i latou lava ia ua fa'asinasinaina ma ua fa'amamāina a latou agasala i le toto o Iesu.
5. **Fa'aal. 14:9** O i latou ia ua matata'u i le lapata'iga a le Atua ma ua latou te'ena le fa'ailoga o le manu fe'ai.

TAULOTO: Isaia 8:16.

O LE FA'AILOGA O LE MANU FE'AI

I. O le fe'au mulimuli a le Atua mo le lalolagi ua aofia ai ma le lapata'iga mata'utia e uiga i le taliaina o se tasi fa'aailoga ua igoa **“o le fa'aailoga o le manu fe'ai.”**

1. **Fa'aal. 14:6-14** O le fe'au a nei agelu e to'atolu o lō ua aofia ai le fe'au mulimuli a le Atua mo le lalolagi ua goto ifo i le lua o le agasala ma ua ufitia i le pogisā. Ua tatou iloa e fa'asino tonu lenei fe'au i ōna aso e gata ai, auā ua fa'aailoa mai ai le itū aso o le fa'amasinoga a le Atua (F. 7). Ma o lona fa'ai'uga fo'i, e afio fa'alua mai ai le Ali'i i le ao sinasina ma le sele saito ma'ai ua i Lona a'ao (F. 14).

2. **Fa'aal. 14:9-11** O le fe'au o lona tolu o agelu ua i ai le lapata'iga mata'utia e uiga i le manu fe'ai ma lona fa'atagata, atoa ma lona fa'aailoga. O lenei lapata'iga e fa'asino tonu i nisi uiga o le a aliali mai i ōna pō e tuā'oi tonu ma le afio fa'alua mai o Iesu.

Manatu Fa'aopoopo: O le taliaina o le fa'aailoga o le manu fe'ai, ua ta'ua lea o se ifōga po o se tapuā'iga, e pei ona fa'aaogāina le 'upu **“worship”** i le Tusi Pa'ia Peretania. E lē taumate lā ona fa'asino o lenei fa'aailoga i se tasi faiga fa'ale-lotu ua lē tusa ma le finagalo o le Atua, ma o le a 'avea lona taliaina ma āla o le a iloga ai ona 'au 'ese o lenā tagata i le Atua.

O le āla e tasi o le a mafai ona fa'asaoina ai o se tasi mai le taliaina o le fa'aailoga o le manu fe'ai, o lona fa'asaga atu lea e tausi i poloā'iga uma a le Atua e aunoa ma le fa'alē-aogāina o se tasi. O lea ua fa'aailoa mai ai le uiga o i latou o ē o le a latou 'ana'ana i le lapata'iga a lona tolu o agelu, atoa fo'i ma fe'au a agelu e to'alua i ōna luma fai mai, "O le mea lenei ua i ai ē ua tausi i poloā'iga a le Atua ma le fa'atuatua iā Iesu" (Fa'aal. 14:12). (Fa'aaogā ma le Galuega 4:19; 5:29). O le fa'aailoga o le manu fe'ai ua tatau lava lā ona aliali mai ai o se uiga lē usiusita'i i se tasi o poloā'iga a le Atua.

3. **Fa'aal. 16:1, 2** O le mala muamua e taia ai na o i latou o ē ua i ai le fa'aailoga o le manu fe'ai ma ua latou ifo i lona fa'atagata.

II. O le manu fe'ai e fa'asino tonu lea i le pule fa'ale-Pope; auā ua na o lea le pule e tasi ua ia fa'ataunu'uina lelei o uiga uma fa'ale-manu fe'ai e pei ona valo'ia mai i le Tanielu 7, a e maise o le Fa'aaliga 13.

1. **Fa'aal. 13:1-3** Na va'aia e Ioane le tasi manu fe'ai ua alu a'e nai le sami, e fitu ōna ūlu ma ōna nifo e sefulu. Ua i ai fo'i ma ōna itū tino e foliga i le nameri, le urosa, ma le leona. (Silasila i le Tanielu 7:1-8, 15-25).

Manatu Fa'aopoopo: O lenei manu fe'ai ua aofia fa'atasi ai nisi uiga e pei ona fa'aailoa mai i le Tanielu 7. E uiga fa'atasi ma lona fā o manu fe'ai na va'aia e Tanielu. Auā e sefulu ōna nifo, o vaega ia e sefulu na vaevaeina i ai le malō o Roma. Ua lē o ta'ua mai i lenei manu fe'ai se “nifo itiiti” ua tupu a'e i le vā o nifo e sefulu, a 'ua maua i ōna ūlu le fa'atusa e fa'asino tonu iā Roma Pope.

2. **Fa'aal. 13:8** O lenei manu fe'ai, o se pule fa'ale-lotu fua ina ua "ifo iā te ia o i latou uma o ē nonofo i le lalolagi." Fa'a-Peretania, **"All that dwell upon the earth shall worship him."**

3. **Fa'aal. 13:3, 10** Na foa le tasi ūlu o lenei manu fe'ai, semanū a mate ai. Na fa'ataunu'uina lea i le T.A. 1798, na o'o atu ai i Roma le vaega 'au a Farani ma latou 'aveina fa'atagata-o-taua le Pope o Pio VI (Pius VI). Na maliu o ia i le a'ai o Valeni (Valence) i Farani i le aso 29 o

Aokuso, 1799, a e fa'ato'a tofia se isi Pope fou i le aso 14 o Mati, 1800. Na matuā gausia ai le pule malosi a le Ekalesia Katoliko i lea vaitaimi, a e fai mai le valo'aga, o le a "**mafu**" le foa o le manu fe'ai ma o le a i'u ina mulimuli iā te ia le lalolagi uma (F. 4, 8).

III. Pe a tatou fa'atusatusaina le manu fe'ai o lō ua ta'ua mai i le Fa'aal. 13:1-10, ma le uiga o le "nifo itiiti" ua fa'ailoa mai i le Tanielu 7, o le a tatou mautinoa ai lava lo lā uiga fa'atasi:

1. E fai 'upu i Lē Silisili 'Ēse. **Tani. 7:25; Fa'aal. 13:6.**
2. E fa'asauā i le 'au pa'ia a le Atua. **Tani. 7:21; Fa'aal. 13:7.**
3. E tautala i 'upu fa'asausili. **Tani. 7:8, 20; Fa'aal. 13:5.**
4. E pule sa'oloto i tausaga e 1260. **Tani. 7:25; Fa'aal. 13:5.**

“Masina e fāgafulu ma le lua. A fa'atatau le aso e tasi i le tausaga e tasi, ua 1,260 tausaga. O ōna tausaga ia o le solia o le ekalesia.” - O le Tusi ua Fa'amatalaina ai le Tusi Pa'ia, Misi Parate (L.M.S), itulau e 663. Ua toe fai mai le fa'amatalaga a lenei misionare e uiga i mea ua tusia i le Fa'aaliga 13, “Ua uma ona taunu'u ia 'upu i le lotu pope” (Itulau e 666).

IV. E i ai ma le fa'ailoga lenei e iloa ai le manu fe'ai po o ai, o lona "faitau aofa'i" lea, po o lona fuai numera.

Fa'aal. 13:18 Fai mai, o le "*faitau aofa'i o le tagata.*" O lē ua 'avea ma ao o lenā fa'atuatūaga, o le Tupu Sā lea po o le Pope. O le suafa ua silisili ona fa'aaogāina pea e le Pope mai iā te ia lava, o "**Vicarius Filii Dei,**" o le suafa Latina lea, o lona uiga pe a fa'a-Samoaina, o le "**Sui o le Ālo o le Atua.**"

Ua fa'apea le fa'atatauina o mata'itusi ma fuainumera:-

V	I	C	A	R	I	U	S
5	1	100			1	5	= 112
F	I	L	I	I			
	1	50	1	1			= 53
D	E	I					
500		1					= <u>501</u> 666

V. O le "**fa'atagata o le manu fe'ai,**" o le tasi lea pule o le a tū mai ma o le a ia fesoasoani i le manu fe'ai ina o le a ia taumafai i le malosi fa'ale-tulafono ona u'una'ina ai le taliaina e tagata o le fa'ailoga o le manu fe'ai.

1. **Fa'aal. 13:11, 12** Ua valo'ia mai le tasi pule o le a tū mai, ma o le a "faia e ia 'ona 'ia ifo (tapua'i) le lalolagi i le ulua'i manu fe'ai." O le āla e tasi e fa'amata o le a mafai ona fa'ataunu'uina ai o lea mea, o le poloā'iga malosi lea o se aso malōlō, o le tausiga lea o le Aso Sā (Sunday).
2. **Fa'aal. 13:15, 17** O le a a'apa atu lenei pule i le malosi fa'ale-malō ina ia taliaina ai e tagata le fa'ailoga o le manu fe'ai.

Manatu Fa'aopoopo: O lenei manu fe'ai na alu a'e nai le fanua, e i ai lona uiga e fa'asino ai i le Unaitē Setete o Amerika, e pei ona fa'avaeina lenā malō i luga o le ta'utinoga o sa'olotoga e lua: (1) O le sa'olotoga i matā'upu tau le vā ma le Atua (religious liberty). O le fa'avae matagofie lea i ōna vaega e lua, ma ua fa'atusaina i nifo e lua o se tama'i mamoe. A e mulimuli ane, o le a aliali mai i totonu o lenei malō ni tasi uiga 'ese o le a mavae ai iā te ia le uiga fa'a-mamoe, a o le a tautala mai

o ia e pei o se tarako. O le āla e tautala mai ai se malō, o āna tulafono ia. O lona uiga la, o le a ia faia ni tulafono ina ia tineia ai le sa’olotoga i matā’upu tau tapuā’iga.

A e peita’i e fa’asino fo’i lenei manu fe’ai i se tasi pule fa’ale-lotu o le a tupu mai ma o le a fai le Unaite Setete ma ōna laumua. O le taofi e uiga i lenei pule fa’ale-lotu, o le **“Au Porotesano liliu ese”** lea (**apostate Protestantism**), ma ua latou tu’u le fa’avae moni o le fa’atuatuāga fa’a-Porotesano e fa’apea, “O le Tusi Pa’ia, o le Tusi Pa’ia atoa, ua na o le Tusi Pa’ia lava,” a ‘ua latou mulimuli atu i le Ekalesia Katoliko i lo latou fa’asilia o ‘uputu’u a tagata i lō afioga tusia a le Atua. O le a i’u lava ina faia e Porotesano le amio sa gata ona faia e le pule fa’ale-Pope, o le pule malosi lea i agaga ma loto fuatia ifo o tagata, e i ai ona ta’ua lenei ‘au Porotesano liliu ‘ese **“O le fa’atagata o le manu fe’ai.”**

Ua amata nei i le Unaite Setete o Amerika ona sau ai i luma o lenei uiga, o le fai talosaga atu i le malō ina ia latou faia ni tulafono e taofia ai le lotu o le to’atele, a ia tausia e tagata uma le Aso Sā (Sunday) i le poloā’iga malosi a le malō. O lo’o i ai ni sosaiete Porotesano o lo’o latou galulue malosi mo le sa’iliga o lea lava i’uga, e i ai le **"Lord's Day Alliance,"** (O le Sosaiete mo le Puipuina o le Pa’ia o le Aso o le Ali’i), ma le **"National Reform Association,"** (O le Sosaiete lea o lo’o latou galulue mo le toe fuata’iina o le tausiga o le Aso-Sā - Sunday). Ua lē lava se avanoa ina ia mae’a lelei ia se fa’amalamalamaga o lenei valo’aga tāua.

- VI.** Ua ta’utino mai lava e le Ekalesia Katoliko e fa’apea, ua ‘avea le fa’atūina o le Aso Sā (Sunday) ma fa’aailoga o lana pule i matā’upu uma tau le vā o le tagata ma le Atua.

I le masina o Novema, i le tausaga e 1894, na tusi fa’afesili atu ai se tasi i le ali’i o H.F. Thomas, o ia o le failautusi a le ali’i Katinale ta’uta’ua o Kipeona (Cardinal Gibbons) i Amerika. O le a’ano o le fesili e fa’apea, *“Pe moni ‘ea ua ‘ioe mai le Ekalesia Katoliko ua ia fa’aliliuina le Sapati?”* I le o le tali lenei na saunia e le ali’i failautusi:

“O lea lava, ua matuā ‘ioe atu lava le Ekalesia Katoliko e fa’apea, o le fa’aliliuga o le aso, o lana lava lea galuega.... I le ua ‘avea fo’i lea fa’aliliuga ma fa’aailoga (ua fa’atusilimaina e le Fa’atonu) o lana pule fa’ale-lotu.”- Quoted in *Bible Readings for the Home Circle*, pp. 449, 450.

I se tasi katekisimo Katoliko ua i ai lenei fesili ma lona tali:

“Fesili: *“Se ā sau molimau e te fa’amaonia ai, o lo’o i ai i le ekalesia (Katoliko) le pule na te poloa’iina ai le fa’a-aso sā?”*

“Tali: *Ona ua ia suia le Sapati i le Aso Sā (Sunday), o se fesuia’iga lava lea ua talia e tagata Porotesano.”—An abridgment of Christian Doctrine, Tuberville, p. 58.*

- VII.** I matā’upu fa’ale-agaga tau le vā o le tagata ma le Atua, o le ā se āla e mafai ona iloa ai po o ni au’auna a ai i tatou?

1. Roma 6:16 O āna au’auna ‘outou tou te ‘ana’ana i ai.

Manatu Fa’aopoopo: O le tagata o lē ua tausi ma le fa’amaoni i le aso fitu, le Aso To’ona’i, e fai ma Sapati e fa’apa’iaina, o ai ua ia ‘ana’ana i ai? Ua ia ‘ana’ana i le Atua; auā o lea lava le poloā’iga manino a le Atua i le vaega e fā o Lana tulafono.

A e po o ai ua ‘ana’ana i ai le tagata o lē ua ia fa’amamaluina le ulua’i aso o le vaisapati, Sunday, e fai ma Aso Sā? E lē o le Atua ua ia ‘ana’ana i ai; auā sa leai lava, ma ua leai nei fo’i se poloā’iga a le Atua ia fa’apa’iaina e se tasi le ulua’i aso o le vaisapati. A e po o ai lea la ua ia ‘ana’ana i ai? Ua ia ‘ana’ana i le pule fa’ale-Ekalesia Katoliko Roma, lē ua ia suia le Sapati aso fitu i le Aso Sā, le ulua’i aso.

O se matā’upu faigatā lenei matā’upu; auā ua fetalai mai lō tatou Keriso, “E tapua’i fua mai i latou iā te a’u i lō latou fai ma matā’upu o poloā’iga a tagata” (Mataio 15:9).

O le a i ai le fanau a le Atua o ē ua latou te’ena le fa’aailoga o le manu fe’ai.

2. Fa'aal. 15:2-4

Na va'aia e Ioane le motu o le 'au pa'ia, o ē "na manumalō i le manu fe'ai, ma lona fa'atagata, ma lona fa'ailoga."

“O Kerisiano i tupulaga ua mavae, sa latou tausia lava le aso muamua (Sunday), ma le taofi o lo'o latou tausia le Sapati o le Tusi Pa'ia. Ma o lenei fo'i ua i ai Kerisiano moni i itū'aiga lotu uma lava, e o'o lava i le Ekalesia Katoliko Roma, o ē ua latou taofi lava ma le fa'amaoni, o le Aso Sā (Sunday) o le Sapati lava lea na poloa'iina mai e le Atua. E talia lava e le Atua lo latou fa'amaoni e tusa ma lo latou malamalama. A e a o'o loa ina o le a fa'amalosia i ni āla fa'ale-tulafono ona tausia o le Aso Sā (Sunday), ma o le a malamalama fo'i le lalolagi i le tausiga o le Sapati moni, o ōna aso lā ia, o le a na solia se isi fa'avae e maualuga a'e i lō Roma, o ia lā lenā o le a na fa'asilia le Pope i lō le Atua. O ia fo'i lea o le a ifo iā Roma atoa ma le pule o le a na fa'amalosia le poloa'iga a Roma Pope. O ia lea o lē ua ifo i le manu fe'ai ma lona fa'atagata. A te'ena loa la e tagata le fa'avae mai le Atua na fai mai ai o Ia, o le fa'ailoga lea o Lana pule, a e fa'aaogā se tasi fa'avae 'ese ua fa'atūina e Roma Pope e fa'ailoa a'i le silisili o lana fo'i pule, ona latou taliaina ai lea o le fa'ailoga e ifo iā Roma, - o le fa'ailoga lenā o le manu fe'ai. O aso la ia, pe a o'o ina ua matuā manino ona fa'apupulaina i luma o tagata o lenei matā'upu atoa, o le a o'o ai loa ina matuā filifili ifo lava latou, po o poloa'iga a le Atua, po o poloa'iga a tagata, ma o ē la o le a solitulafono pea, o le a iā i latou le fa'ailoga o le manu fe'ai.” - O le Finauga Tele; itulau e 594.

TAULOTO: Fa'aaliga 15:2.

O LE FE'AU MO LE TOE FUATA'IINA O LE SAPATI

- I. O la tatou su'esu'ega i matā'upu nei, "O le Fa'amaufa'ailoga a le Atua," ma le "Fa'ailoga o le Manu Fe'ai," ua tatou mautinoa lelei ai, o ōna pō e tuā'oi ma le toe afio mai o Keriso o le a tala'iina atu ai i le lalolagi aoao se fe'au e uiga i le Sapati moni.
1. **Fa'aal. 14:6, 7** Ua fa'amamafaina i lenei fe'au le foafoāga, ona tatou mautinoa lea, e aofia ai fo'i ma le fa'aaliga o le Sapati moni, auā ua tu'uina mai le Sapati e fai ma fa'amanatuga o galuega o le foafoāga (Esoto 20:8-11).
- Manatu Fa'aopoopo:** Ua fa'afeagai lelei lenei fe'au mulimuli ma le a'oa'oga a le 'au fa'afiapopoto ua ta'atele nei i le lalolagi, ua latou fa'afiti ai i le foafoāga na faia i aso e ōno e pei ona molimau i ai le Kenese. (Fa'aaogā le matā'upu e XVII o le Tusi I).
2. **Fa'aal. 14:12** O le i'uga o i latou o ē latou te taliaina le fe'au mulimuli a le Atua, fai mai, o i latou ia ua latou tausī i poloā'iga a le Atua. Ua lē gata i poloā'iga e iva, a 'ua fa'apea fo'i ma le poloā'iga i le Sapati moni ua fa'agaloina e le lalolagi.
3. **Fa'aal. 12:17** O le ekalesia mulimuli e i ai lenei fa'ailoga, o le tausī i poloā'iga a le Atua, e aofia ai ma le Sapati aso fitu, auā e le'i fa'ate'a 'eseina lava lea poloā'iga.
- II. O le tiute o lo'o feagai nei ma i latou uma o ē ua latou taliaina lenei fe'au, o le lapata'i atu lea i tagata e uiga i le Sapati fa'afoliga, ma le fa'ailoa atu iā te i latou o le Sapati moni.
1. **Esek. 13:1-8** O le to'asā o le Atua i ē ua ta'ua i latou e i latou o a'oa'o o Lana upu moni, ia matauina le tasi mea ua molia ai i latou ina ua latou lē faia: "Ua 'outou lē a'e i mea ua lepetia, ua 'outou lē ati a'e fo'i le pā mo le aiga o Isara'elu" (F. 5).
2. **Fa'aal. 15:1** O le aso o le to'asā o Ieova, o le a fa'ataunu'uina lea i ōna pō e liligiina ifo ai mala mulimuli e fitu.
3. **Fa'aal. 14:9, 10** O le a fa'asalaina i nei mala o i latou uma o ē ua latou ifo i le manu fe'ai ma ua latou taliaina lona fa'ailoga.
4. **Isaia 58:1** O le āla vala'au lea o le Atua i Ōna tagata o ē ua i ai le malamalama mo ōna aso e gata ai ina ia latou 'alagaina tele ma fa'aali atu i le nu'u o ā latou solitulafono.
5. **Isaia 58:12** O i latou o ē ua latou faia lenei galuega, ua ta'ua i latou o le 'au "ati a'e i solo." (O le fe'au lea ua lē faia e i latou o ē ua fa'asaga i ai le to'asā o le Atua. Esekielu 13:5).
6. **Isaia 58:13** O le solo i le tulafono a le Atua, o le Sapati lea ina ua fa'aliliuina e le pule fa'ale-Pope.
7. **Esek. 22:26** Talu ai 'ona ua suia le Sapati, ua solia ai e tagata le tulafono ma ua latou "fa'aleaga" ai le aso pa'ia o le Atua. "Ua latou lē fa'ailogaina mea pa'ia, ma mea e lē pa'ia."
8. **Esek. 22:28** Ua fe'alo'alofa'i le 'au perofeta pepelo i lō latou fai mai, "O lo'o fa'apea 'ona fetalai mai o le Ali'i o Ieova, a e le'i fetalai mai lava Ieova."
9. **Esek. 22:30** Ua leai lava se aogā o ia fa'amatalaga fe'alo'alofa'i ina ia toe atiina a'e ai le solo ua i ai i le pā o le tulafono.

10. Esek. 13:10

Ua ati a'e le tasi (pule fa'ale-Pope) i le pā (ina ua latou fa'aofi le ulua'i aso i le tulaga o le aso fitu), fa'auta fo'i, ua vali e nisi (Ekalesia Porotesano) i le penisina (o ā latou fa'amatalaga fa'atauva'a ia ua latou tau fa'avaeina a'i le tausiga o le aso e le'i poloa'i mai ai le Atua).

11. Esek. 13:11-14

O le a lepetia lenei ogāpā ua atiina a'e i ma'a 'ese e le'i tofia e le Atua, se'ia o'o lava ina aliali mai o ōna fa'avae, o 'uputu'u a tagata, a e lē o afioga pa'ia a le Atua. O le a soloia fo'i ma matafi le vali penisina o fa'amatalaga pepelo pe a o'o mai le afā o le to'asā tele o le Atua.

III. I ōna aso e gata ai o le a liligi ifo ai e le Atua le manuia tele iā te i latou o ē āva ma tausi i Lona Sapati.

1. Isa. 56:1, 2, 6,7

O le manuia ua folafolaina mai.

2. Fa'aal. 22:14

O le folafolaga a le Atua i ē tausi i Āna poloā'iga.

"O le a 'avea le Sapati ma matā'upu e sili ona tofotofoina ai o i latou o ē ua fa'amaoni i lo latou fia 'au atu i le Atua."- O le Finauga Tele, itulau e 605.

TAULOTO: Fa'aaliga 22:14.

O LE FE'AU FA'A-ELIA

I. Ua 'avea le galuega fitā na faia e le perofeta o Elia ma fa'atusa uiga o le fe'au mulimuli a le Atua i le lalolagi.

1. **Malaki 4:5** I ōna pō e tuā'oi ma le toe afio mai o Iesu, o le a galuea'iina ai i le lalolagi se galuega e foliga i le galuega na faia e Elia.
2. **Malaki 4:6** 'Ona o lenei galuega, o le a fa'aliliuina ai loto o mātua e to'atele i ā latou fanau, ma loto o nisi fanau i ō latou mātua.

II. O lenei valo'aga a Malaki, o le tasi lea valo'aga uiga lua, ina ua maua le tasi o ōna taunu'uga i le galuega a Ioane le Papatiso, a o lona fa'ataunu'uga sili e fa'asino lea i le fe'au mulimuli a le Atua i ōna aso e gata ai.

1. **Mata. 17:10-13** "Ua mavae ona sau o Elia." O le fetalaiga a Iesu e uiga iā Ioane le Papatiso.
2. **Ioane 1:21** Ina ua fesiligia Ioane, po o ia o Elia, na ia fa'afiti ai, "E lē o lea," auā sa silafia lelei e Ioane le a'ano o lenā fesili ona ua taofi nisi, o ia o Elia i lā le tino ua alu ifo mai le lagi.
3. **Luka 1:16, 17** E lē o Elia i lā le tino, a e peita'i "**o le loto o Elia ma lona fa'amalosi.**" O lea le āla na 'avea ai le tala'iga a Ioane ma fa'ataunu'uga o le valo'aga i le Malaki 4:6.

Manatu Fa'aopoopo: O le galuega a Ioane le Papatiso, o le saunia lea o tagata mo le afio muamua mai o Keriso. O lana tala'iga, o se tala'iga ma'ama'ai ma le lē 'alo e pei lava o le tala'iga sa faia e Elia, ma sa sunu'i tonu fo'i i le uiga fa'alētonuga o le nu'u o Iutaia i ia ōna pō. E ui i lo latou ma'elegā i ufitia ai i latou. E ui fo'i i lo latou mitamitaga fai so'o e fa'apea, "O Aperā'amo, o ia o lō matou tamā" (Mataio 3:9), a e sa lilo iā te i latou lō latou māmāsagia i le silafaga a le Atua talu ai 'ona ua latou lē faia le amio a Aperā'amo. "Ua tū le matau i tafu'e o la'au," a e latou te le'i iloa. Sa lē 'alo Ioane, a e na ia ta'utino atu i le nu'u a latou agasala, se'ia o'o lava i agasala a le tupu o Herota.

III. Sa faia e le perofeta o Elia lana tala'iga i ōna pō o le nofoā'iga a le tupu o A'apo ma lana masiofo o Iesepela. O ōna pō lava ia o le matuā sē 'ese o Isaraelu mai le upu moni a le Atua, ina ua ta'ita'iina le nu'u e Iesepela i tapuā'iga fa'apaupau iā Pa'ala, le atua o le lā.

1. **I Tupu 21:25** "E leai lava sē tasi lā te tutusa ma A'apo, o lē na fa'atau e ia iā te ia e fai mea leaga i luma o Ieova; o ia na fa'aosoosoina e Iesepela lana avā."

Manatu Fa'aopoopo: O Iesepela o le afafine o Etepa'ala, le tupu o Turo. A o laitititi pea lenei tama'ita'i, na fa'asāina ai o ia mo le atua o le lā, o Pa'ala lea, ma sa a'oa'oina o ia i sauniga lililo uma tau lenei ifoga fa'apaupau. Mulimuli ane, ua i'u ina 'avea o ia ma faitaulaga tama'ita'i a Pa'ala. Ina ua fa'aipoipo o ia ma A'apo, sa ia mautinoa loa se avanoa tele o le a ia mafai ona ta'ita'iina ai o Isaraelu i le tapuā'iga iā Pa'ala.

O le loto o Iesepela na āla ai ona fa'atūina e A'apo o se malumalu tele mo Pa'ala i Samaria, le laumua o itū'aiga e sefulu (I Tupu 16:31, 32). Ua o'o loa ina ua mausalī le pi'itaga o Iesepela i le malō o Isaraelu, ona ia fa'asaga atu lea e fa'asauā iā te i latou uma o ē sa tumau pea ma le fa'amaoni i le tapuā'iga moni. Sa manatu o ia ua fuli atoa le malō i le tapuā'iga fa'a-Pa'ala ma ua lē o totoe sē molimau e to'atasi mo Ieova, a e sa lilo iā te ia le to'afitu āfe, o ē latou te le'i to'otuli iā Pa'ala pe sogi iā te ia (I Tupu 19:18).

O lea na fa'ao'oina atu ai e le Atua le lā mala i le nu'u mo tausaga e tolu ma masina e ōno. O lea lā mala na matuā 'avea ma fa'ailoga manino o le lē aogā o Pa'ala, le atua o le lā. O ā latou galuega uma ma taulaga sa faia ina ia lavea'i mai Pa'ala iā te i latou, sa nā 'ona 'avea ma āla na atili ai ona mumū a'asa o le lā ma fa'aumatia ai ā latou mea aogā e tele.

2. I Tupu 18:17 I le lā feiloa'iga ma A'apo na molia ai Elia e le tupu e fa'apea, "O 'oe 'ea o lē fa'atigā iā Isaraelu?" Ua lafo e A'apo le leaga i le perofeta ma lana tala'iga.

3. I Tupu 18:18 A e peita'i na tali atu Elia ma le lē 'alo. "E lē o a'u le fa'atigā iā Isaraelu, a o 'oe ma le aiga o lou tamā; **auā ua 'outou tu'ua o poloā'iga a Ieova, ma 'outou mulimuli atu iā Pa'ala.**"

4. I Tupu 18:21 Ina ua fa'apopotoina le nu'u i le Mauga o Karamelu, na matuā tu'uina atu ai e Elia i o latou luma lenei filifiliga: "Pe tou te fa'alētonu i manatu e lua se'ia ā fea? Afai o Ieova o le Atua ia, ia outou mulimuli atu iā te Ia; a e afai o Pa'ala, ia outou mulimuli atu iā te ia."

Manatu Fa'aopoopo: O se tala mautinoa lava le tala i le faiga taulaga a Elia ma le 'au perofeta a Pa'ala i le Mauga o Karamelu, i le o le a lē toe fa'alauteleina se fa'amatalaga i ai. O le a'ano fa'ale-agaga lenei o le fe'au e Elia:

- (1). O le nu'u ua mulimuli i se tasi atua 'ese, i le sa vala'auina i latou e Elia ina ia latou toe fo'i mai i le Atua moni e to'atasi, Lē na Ia faia le lagi ma le lalolagi ma mea uma o i ai.
- (2). O le fata faitaulaga a Ieova ua solia i lalo, i le sa toe atiina a'e e Elia ma na fa'ae'e atu i ai, e lē o se taulaga fa'a-Pa'ala, a e peita'i o le taulaga na poloā'iina e le Atua.
- (3). Ua solia e le nu'u le tulafono a le Atua, i le sa vala'auina i latou e Elia ina ia latou fa'asaga atu e tausī ma le fa'amaoni i Āna poloā'iga.

IV. A o le'i o'o i le aso tele o Ieova, o le a toe fa'alogoia ai i le lalolagi le leo fa'a-Elia e vala'auina ai le fanau a le Atua ina ia latou ō 'ese mai so'o se tapuā'iga ua lē ui tonu i luga o le Tusi Pa'ia, a ia latou fa'atasi atu i le fa'apopotoga lea e fa'asino i ai le 'upu a Ioane, **"O le mea lenei ua i ai ē ua tausī i poloā'iga a le Atua ma le fa'atuatua iā Iesu"** (Fa'aaliga 14:12).

Fa'aal. 14:6-14 O fe'au e agelu e to'atolu, o le vala'au fa'a-Elia lea "i ē o nonofo i le lalolagi, i atu nu'u uma, ma itū aiga, ma gagana 'ese'ese, ma nu'u." O le vala'au alofa lea i tagata uma ina ia latou ifo ma matata'u i Lē na Ia faia le lagi ma le lalolagi, ma ia latou tausī i Āna poloā'iga, a e maise o lona fā o poloā'iga ua fa'aliliuina i le pule fa'ale-tagata. O mātua e to'atele o ē ua latou maua lenei malamalama, ua liliu atu o latou loto i le fanau pele ina ia taliaina fo'i e i latou. O le fanau fo'i o ē ua latou taliaina lenei fe'au mulimuli, ua lau aluga i ō latou loto le manatu mo mātua pele, ia savavali fo'i ma i latou i le malamalama. Ua fa'apea ona fa'ataunu'uina o le valo'aga a Malaki e uiga i le 'auina mai o le perofeta o Elia a o le'i o'o i le aso tele o Ieova.

Manatu Fa'aopoopo: Ua tataua lava ona aofia ai i le tala'iga mulimuli o le uiga fa'ale-fe'au a Ioane le Papatiso, atoa ma le uiga fa'ale-fe'au a Elia.

1. O le autū o le fe'au a Ioane, fai mai, "Inā salamō ia 'outou, auā ua latalata mai le malō o le lagi," o le Mesia lea o le a afio mai. Sa 'avea Ioane ma "teuteu āla" o le Ali'i (Mataio 3:1-3).
2. O le autū o le fe'au a Elia, o le vala'au lea ia tausī i poloā'iga a le Atua, ina ua tu'ua e le nu'u o poloā'iga a Ieova (I Tupu 18:18).

O lea o lo'o tala'iina atu ai nei i le lalolagi aoao le fe'au tāua i le toe afio mai o Iesu ua lata mai, atoa ma le toe fuata'iina o le Sapati aso fitu, o le poloā'iga lea o le tulafono ua iloga ona solia e le lalolagi.

V. E fia fa'aopoopoina mai le fa'amatalaga lenei i le uiga o le galuega fa'asesē a Iesepela.

1. **Fa'ama. 6:25** Na poloa'iina Kitona e le Atua ia na soloia i lalo le fata faitaulaga a Pa'ala sa tapua'i ai lona tamā, ma ia fa'apea fo'i ona vavae i lalo o le tupua o Asaira sa i ōna talane.
2. **Fa'ama. 2:13** O lenei fo'i ua toe ta'ua fa'atasi Pa'ala ma Asaira. O le fa'amalamalamaga lenei a *Misi Parate*: "*O Pa'ala ma Asaira. O le lā ma le masina. O le atua fafine Asaira.*" - *O le Tusi ua Fa'amatalaina ai le Tusi Pa'ia*, itulau e 72.

Manatu Fa'aopoopo: Sa ō lua le tapuā'iga iā Pa'ala, le atua o le lā, ma le tapuā'iga iā Asaira, le atua fafine o le masina. O le poloā'iga a le Atua iā Kitona, ia fa'aumatia nei fata faitaulaga uma e lua. I ōna pō o Iesepela sa ta'ita'iina ai Isaraelu i le tapuā'iga sesē fa'apaupau i lenei lava to'alua, o Pa'ala ma Asaira.

3. **Fa'aal. 2:20** O le valo'aga i ekalesia e fitu, o le tala tu'ufa'asolo lea i le Ekalesia Kerisiano mai i lona fa'atoā fa'avaeina, se'ia o'o i le i'uga. O ekalesia ta'itasi ua ta'ua mai i le Fa'aaliga 2 ma le 3, o vaega taimi lava ia o le ekalesia Tuatira, o le ekalesia lea i ōna pō o sauāga a Roma, na ia sola ai i le vao.
4. **Fa'aal. 12:14** Ua molia Tuatira ona o nisi a'oa'oga fa'a-Iesepela o lo'o ia pipi'i pea i ai ma ua fa'asesēina ai au'auna a le Atua.

Manatu Fa'aopoopo: E o'o mai i ōna pō nei, o lo'o totoe mai pea i le Ekalesia Kerisiano nisi vaega o le a'oa'oga fa'asesē a Iesepela:

- (1). O le Aso Sā (Sunday). O le fa'amatalaga o le igoa "**Sun Day**" o le "Aso o le lā," auā o le aso lava lea na fai ai tapuā'iga iā Pa'ala i aso anamua. O lenei ua 'aumai le aso o Pa'ala ma ua fai ma Aso Sā o tagata Kerisiano.
- (2). O le sauniga ua ta'ua o le **Easter**, e aofia ai le aso maliu ma le aso o le toe soifua mai. E tele molimau ua mafai ona fa'amaonia ai le mafua'aga o le Easter, o le sauniga fa'apaupau e fa'asino tonu i le atua fafine o le masina, o Asaira, lea sa masani ona faia i le masina o Aperila, i le ua 'aumai nei ma ua fa'auiga i le aso maliu ma le aso o le toe soifua mai. Ua lausilafia e lō tatou atunu'u le aso maliu e pa'ū iā Mati i se tasi tausaga, a o Aperila i se tasi tausaga; auā ua fa'atatauina i le ta'amilosaga a le masina, a e lē o le fa'asologa o aso o le kalena.

"E iloga le aso sā e pito ane i le aso e ato'atoa ai le masina iā Mati, o le aso lea e fai ai lea sauniga e i latou." - O nai 'upu i le Lotu Pope, (L.M.S.), itulau e 109.

Sa le'i faamamaluina e le 'au Kerisiano muamua se aso maliu, po o se aso o le toe soifua mai. Sa 'avea aso uma ma aso maliu iā Paulo (II Kori. 4:10). E lē gata i lea, a ua fa'atūina e le Ali'i le sauniga o le papatisoga (fa'atofu), e fa'amanatuina ai Lona maliu ma Lona toe soifua mai (Roma 6:3-5).

Ua fa'asaga le fe'au fa'a-Elia i nei faiga uma o lo'o mamau pea o latou a'a i le tū fa'a-Pa'ala ma fa'a-Asaira. Fai mai le fetalaiga a lō tatou Matai, "O la'au uma e le'i totōina e lo'u Tamā o i le lagi, e lia'iina ia" (Mataio 15:13).

TAULOTO: Malaki 4:5, 6.

O LE EKALESIA MA LE MALŌ

I. E lua pule tetele e ao ona usiusita'i i ai tagata uma lava.

Mata. 22:15-21 Ua manino ona fa'ailoa mai e Iesu, e i ai nisi mea e ao ai i tagata ona latou usiusita'i iā Kaisara (le pule fa'ale-malō); a o nisi mea e ao ai i tagata ona latou usiusita'i i le Atua. Po o lenei: E i ai le vā o le tagata ma le malō e pei fo'i ona i ai le vā o le tagata ma le Atua. E tofu nei vā e lua ma ōna tiute o lo'o feagai ai ma le tagata.

1. O le tiute e muamua ma le sili o lo'o feagai ma le tagata, o lona tiute lea i le Atua.

a. Mataio 4:10 Ua na o le Atua e ifo ma tapua'i i ai. So'o se tagata, sosaiete, pule, po o se malō ua ia taumafai e pulea malosi tagata i matā'upu tau tapuā'iga, ua ia faoa le pule ua tataui i le Atua, ua na o le Atua lava.

b. Roma 14:12 O le vā o tagata ma le Atua, o se vā lava e fa'asino i tagata ta'ito'atasi. Talu ai ona e ao i tagata uma ta'ito'atasi ona tala atu i le Atua i la latou amio ua faia, o lea ua foa'iina atu ai e le Atua i tagata uma ta'ito'atasi le sa'olotoga e tapua'i ai, po o le lē tapua'i fo'i, e tusa ma le mea ua lagona i o latou lava loto fuatia ifo.

c. II Kori. 5:10 E fa'amasinoina uma e le Atua.

2. A e i ai fo'i ma le tiute o le tagata i lona vā feagai ma le malō.

a. Roma 13:1 Ia usiusita'i tagata uma i faipule silisili (o le pule fa'ale-malō lea).

b. Roma 13:5 E tataui i le tagata Kerisiano ona usiusita'i i le pule fa'ale-malō, e lē gata ona o le mata'u i le to'asā o le malō, a e peita'i "ona o le loto fuatia ifo," auā o le tiute ua poloa'iina mai e le Atua.

c. Roma 13:7 Ia 'avatu i le malō le mea e tataui ma le malō. Ia āva ma fa'aaloalo i le pule fa'ale-malō.

d. I Pete. 2:13-17 O apoapoa'iga e uiga i le vā feagai ma le pule fa'ale-malō.

II. Ua tofia e le Atua le pule fa'ale-malō ina ia pulea ai tagata i matā'upu uma tau le vā ma le malō, a e lē ina ia a'apa atu fua i matā'upu tau tapuā'iga.

Roma 13:1-4 Ua tofia le pule fa'ale-malō mo le fa'atonutonuina o le vā fa'ale-tagata, "o le au'auna o ia a le Atua, o lē na te tau i le to'asā i lē amio leaga."

Manatu Fa'aopoopo: Ua manino ona fa'ailoa mai e le Atua o le matuā lē tataui i le pule fa'ale-malō ona sopo tuā'oi i lona fia aiā ma poloa'i atu malosi i se āla e tataui ai ona faia o tapuā'iga. E i ai nei tala mautinoa:

1. O le lavea'iina o taulele'a Eperu e to'atolu. **Tanielu 3.**

2. O le lavea'iina o Tanielu. **Tanielu 6.**

3. O le lavea'iina o sāluta mai iā Hamanu. **Eseta.**

4. O le molimau a Peteru ma Ioane. **Galuega 5:17-32.**

III. Ua tofia le ekalesia e le Atua ia na tala'iina le tala lelei ma maua mai agaga, e lē ma le gau mata'u, a e peita'i o le pulunaunauina i le alofa.

1. **Mareko 16:15** O le fa'atonuga a Iesu mo Lana ekalesia.

2. **Efeso 6:11-19** O au'upega fa'ale-agaga o le taua nei.

3. **II Kori. 10:3-5** E lē tau fa'ale-tino le ekalesia, e lē fa'amalosi atu lona finagalo i se tasi.
4. **Mata. 26:47-51** Sa lē fa'atagaina e Iesu le fa'aaogāina o au'upega fa'ale-tino.
5. **Luka 9:51-56** E lē o le fa'aaogāina o au'upega fa'ale-tino e alualu ai i luma le galuega a Iesu.

IV. Pe a faia e so'o se pule se tulafono malosi e fai ma āla o le a tatou solia ai se tasi o poloā'iga a le Atua, ua sopo'ia loa e lenā pule le tuā'oi e gata mai ai lana pule'aga, ma ua tatau ai lava ona tatou usiusita'i atu pea i le Atua, e tusa po o le ā se mea o le a tupu mai ai.

Gal. 5:29 "E tusa ona sili o lō matou 'ana'ana i le Atua, i lo matou 'ana'ana i tagata."
O lo'o i ai le pule e sili i lō se pule aupito maualuga fa'a-lenei lalolagi.

TAULOTO: Galuega 5:29.

O SEFULUA'I MA TAULAGA

I. O le Atua e Ōna le lalolagi ma mea uma lava o i ai.

Salamo 24:1 E ā Ieova le lalolagi ma mea ua tumu ai.

Sala. 50:10-12 E ā Ieova o mea ōla uma lava.

Hakai 2:8 E ā Ieova le 'oa uma o lenei lalolagi.

1. Talu ai ona ua leai se mea a le tagata ua maua e ia mai iā te ia lava, a ua tu'uina atu iā te ia mea a le Atua ia na fa'aaogāina, o lea ua tū ai le tagata i le tulaga o se 'au'auna tausi mea.
 - a. **I Timo. 6:7** O mea uma lava ua iā te i tatou, o mea lava ua tu'uina mai e le Atua.
 - b. **Mata. 25:14** Ua tu'uina mai e le Atua o Āna mea iā te i tatou.
 - c. **I Nofo. 29:12** E mai le Atua le tamāo'aiga ma le mamalu.
 - d. **I Nofo. 29:14** E ui fo'i i ni mea o iā i tatou ua tatou foa'i atu mo le Atua, a e peita'i o Āna lava mea ua tatou fa'afo'i atu iā te Ia.
 - e. **Teute. 8:18** E mai le Atua le malosi e maua mai ai 'oloa.
 - f. **I Kori. 4:2** Talu ai 'ona ua 'avea i tatou ma 'au'auna tausi mea, ua tataui ai fo'i ona tatou fa'amaoni i lō tatou tofi.
2. Ua manino 'ona a'oa'oina o i tatou e le Atua i le āla e 'avea ai i tatou ma Āna 'au'auna tausi mea fa'amaoni.
 - a. **Efeso 5:3** E lē fiafia le Atua i le tagata manumanu.
 - b. **Luka 12:15** Ia 'alo i le matape'ape'a.
 - c. **Luka 12:16-21** Ia 'aua ne'i fa'asilia i ō tatou loto lē fia fa'aputuina o le 'oa.
 - d. **Eperu 13:5** "Ia gata ia ō 'outou mana'o i mea ua iā te 'outou."
 - e. **I Timo. 6:17-19** Pe 'afai ua fa'amanuiaina se tasi i se tamāo'aiga, ia na toe fa'amanuia atu ai i nisi.
 - f. **Eperu 13:16** O le itū'aiga taulaga e fiafia i ai le Atua.
 - g. **Fa'ata'oto 3:9** Ia tatou āva i le Atua i lō tatou 'oa.

II. Ua finagalo le Atua ina ia tatou 'avatu iā te Ia mea e sefulua'i a tatou mea uma e maua.

1. **Levi. 27:30-33** O mea uma e sefulu a'i a tatou mea, o mea ia a Ieova, ua pa'ia lava iā te Ia.
2. **Numera 18:21** E fa'aaogāina le sefulua'i mo le tausiga o le 'au-faigaluega a le Atua.

Manatu Fa'aopoopo: Ua taofi nisi e fa'apea, o le sefulua'i o le tasi lea matā'upu fa'ale-tulafono a Mose, ma ua tineia fo'i fa'atasi ma sauniga uma o lenā tulafono. A e peita'i ua matuā lē fetau lava lea taofi, ma le fa'aaliga malamalama o i ai i le Tusi Pa'ia ua fa'ailoa mai ai, sa i ai le tulafono o le sefulua'i a o mamao atu pea i luma Mose ma le fanauga a Israelu. E o'o mai lava i ōna pō nei o le Feagaiga Fou, o tumau pea lenei tulafono, auā o le ala filifilia lea a le Atua mo le tausiga o Lana 'au faigaluega.

3. **Kene. 14:17-20** Na tu'uina atu e Aperamo iā Mekisateko le faitaulaga a le Atua o mea e sefulu a'i āna mea uma.
4. **Epe. 7:1,2** Ua fa'amanatuina mai e Paulo le fa'aa'oa'oga a Aperamo.
5. **Kene. 28:20-22** Sa usiusita'i fo'i ma Iakopo i le tulafono o le sefulua'i.
6. **Mata. 23:23** Ua a'oa'o mai Iesu ia faia le sefulua'i, a e 'aua le tu'ua.
7. **I Kori. 9:11-14** Ua fa'amaonia e Paulo le tumau pea o le tulafono o le sefulua'i i ōna pō nei o le Feagaiga Fou. O āna 'upu e fa'asino aga'i i tua i le tausiga o faitaulaga ma sā Levi mai le sefulua'i (Nume. 18:20, 21, 24-26), 'ona

soso'o lea ma lona fai mai, "Ua fa'apea fo'i le poloā'iga a le Ali'i (i ōna pō nei o le Feagaiga Fou), i ē folafola le tala lelei, e maua mea a le tino i le tala'iga o le tala lelei." O le "tufa'aga" e fa'asino tonu i le fata, o le sefulua'i lea e tausia ai i latou o ē 'au'auna i le fata.

Manatu Fa'aopoopo: Sa tū i le fa'ato'āga i Etena le la'au na fa'asāina e le Atua mo Ia lava. Sa taga iā Atamu ma Eva 'ona lā fa'aaogāina o le tele o mea sa i totonu o le fa'ato'āga, a e na 'avea lenei la'au e tasi ma āla na fa'amanatu ai pea iā te i la'ua le pule aoao a le Atua. Ua 'avea le tulafono i le sefulua'i e pei lava o lenei la'au. O vaega e iva o ā tatou mea e maua, e ā tatou ia e fa'aaogāina mo i tatou, a o le vaega e tasi (1/10) o totoe e fa'a'atoaina a'i le sefulu, o le vaega lea ua Ia ta'upa'iaina ma ua tatou lē pule i ai. Ua fa'apea lava fo'i ona foa'iina mai e le Atua o aso e ōno e fai ai a tatou galuega, a o le aso fitu, o le vaega lea o le taimi ua Ia ta'u pa'iaina.

Na avatu e Aperamo mea e sefulu a'i āna mea iā Mekisateko, le faitaulaga a le Atua. O Keriso, o Ia o le faitaulaga e fa'avavau e uiga fa'atasi ma Mekisateko (Eperu 7:17). O lea ua tatau ai i le fanau fa'ale-agaga a Aperamo i ōna pō nei o le Feagaiga Fou (Kalatia 3:7, 29), 'ona latou 'avatu mea e sefulua'i o ā latou mea iā Keriso, lo tatou Faitaulaga Sili, Lē ua uiga fa'atasi ma Mekisateko. (Fa'aaogā ma le Ioane 8:39).

III. E lē gata i le sefulua'i, a ua finagalo fo'i le Atua i taulaga ua faia ma le loto malie.

- | | |
|----------------------------|---|
| 1. Salamo 96:8 | O ā tatou taulaga, o le tasi lea vaega tāua o tapuā'iga ua faia ma le tonu. |
| 2. Eso. 23:14, 15 | Sa a'oa'oina le fanauga a Isaraelu ia tofua ma lana taulaga pe a latou ō atu i luma o Ieova i le taimi o tausamiga fa'ale-agaga, e pei ona sa atofaina. |
| 3. II Kori. 9:7 | O le agaga moni e foa'i atu ai a tatou mea mo le Atua. |
| 4. Teute. 16:16, 17 | O le fua e fa'atatau i ai le uiga o lō tatou foa'i atu. |
| 5. II Kori. 8:12 | O le āla o le a talileleia ai a tatou taulaga. |
| 6. Mar. 12:41-44 | O se a'oa'oga i le āla tatau e fai taulaga ai. |
| 7. Mata. 6:1-4 | O le āla sesē ia 'alo 'ese ai. |
| 8. Gal. 20:35 | O le manuia o le foa'i atu. |

IV. Ua folafolaina mai le manuia tele mo ē ua 'avea ma 'au'auna tausi mea fa'amaoni, a o le malaia mo i latou ua lē fa'amaoni.

Malaki 3:8-10 O le fa'afanōga ma le fa'amanuiāga. (Fa'aaogā ma le Hakai 1:6, 9).

"Ua tatau lava ona 'ia tele ma faula'i ni mea o i ai i le fale teu 'oa a le Atua, i le semanū lava fo'i e fa'apenā pe 'ana lē taofia le sefulua'i e i latou o ē ua manumanu ma le agaga o le alofa fa'apito ma le mata pe'ape'a." - O le 'Au Faigaluega o le Tala Lelei, itulau e 227.

TAULOTO: Malaki 3:8 – 10.

**O SAUNIGA FA'ALE-EKALESIA - I
O LE PAPATISOGA.**

I. O le sauniga pa'ia lea ua fai ma leoleo na te leoleoina le faitoto'a e ulufale atu ai tagata i totonu o le ekalesia a le Atua.

1. **Efeso 4:5** E tasi le papatisoga.
2. **Mata. 28:19** Ua soso'o fa'atasi le sauniga o le papatisoga ma le galuega o le tala'iga o le tala lelei i se feso'ota'iga e lē motusia lava.
3. **Mar. 16:15, 16** Ua poloa'iina faife'au o le tala lelei ina ia latou papatiso atu iā i latou uma o ē ua fa'atuatua.
4. **Mata. 3:13-17** Na papatisoina Iesu, e lē 'ona ua ao iā te Ia 'ona Ia papatisoina, a e peita'i 'ona o Lona fia tu'uina mai o se fa'aa'oa'oga ato'atoa mo i tatou. O Lana fetalaiga lenei: "E fa'apea ona tatau iā te i tatou ona fa'ataunu'uina o mea tonu uma."

II. O le āla e tasi ua fa'ailoa mai e le Tusi Pa'ia e fai ai lenei sauniga, o le fa'atofu lea.

1. **Roma 6:4** O le papatisoga fa'ale-Tusi Pa'ia, o le āta lea po o le fa'atusa o se "tanuga."
2. **Ioane 3:23** E ao mo le fa'ataunu'uina o le sauniga o le papatisoga 'ona 'ia maua se mea e "tele ai vai."
3. **Gal. 8:38, 39** Ia fa'apea ona tele o se vai 'ina 'ia mafai ona o ifo fa'atasi i ai o lē o le a papatisoina ma lē o le a na faia le papatisoga. Ia mātau lelei, "na toe o a'e ai lea o i la'ua nai le vai," ina ua mae'a le sauniga.
4. **Mata. 3:5, 6 13,16** O le āla e tasi na faia ai e Ioane le sauniga o le papatisoga, o le fa'atofu lea i lalo ifo o le fogāvai.
5. **Efeso 4:5** E tasi pē le āla sa'o e fai ai le papatisoga.

Manatu Fa'aopoopo: O mau uma o i ai i le Feagaiga Fou o lo ua ta'ua mai ai le sauniga o le papatisoga, ua fa'aaogāina ai pea lava le veape Eleni o le **"baptise,"** po o le fa'atofu i lalo ifo o le fogāvai. O le 'upu Eleni mo le "fa'atulutulu," o le **"rantize,"** i le 'ua 'ese mamao lava lea i lō le **"baptize."**

III. Ua 'avea le papatisoga ma fa'ailoga va'aia o le galuega mana o le alofa tunoa o Keriso i totonu o le tagata, ua mafai 'ona fasiotia ai le tagata tuai ma lona uiga lē usiusita'i i le Atua, a e suia i le tagata ua fa'afouina, ua foliga i le Keriso, ma ua fiafia e savali i le ōla toe fuata'iina.

1. **Roma 6:3, 4** O le papatisoga e fa'ailoa atu ai e le tagata lona fa'atuatua moni i le maliu ma le toe soifua mai o Keriso ua maua ai le fa'amagaloga ma le mana fa'ale-agaga e manumalō ai i le malosi o le agasala (Filipi 3:10).

Manatu Fa'aopoopo: Fai mai ua "tatanu" fa'atasi i tatou ma Keriso i le papatisoga. E ao lava i le sauniga o le papatisoga ona 'ia maua ai le āta po o le fa'atusa o nei mea e tolu: O le maliu, o le tanuga, ma le toe tū mai. Ua lē maua i se tasi faiga, a ua na o le fa'atofu; auā e tanumia ai le tagata tuai o le agasala ua fasiotia i lalo ifo o le fogāvai ia lilo ai, ona toe tū mai ai lea ma lona fa'amoemoe fiafia i le ōla fou o le a ia manumalō ai, i lō o leaga talu ai le fesoasoani mai o Keriso.

2. **Roma 6:6** E ao ona ia fasiotia le tagata tuai ma ōna tu'inaanu (Efeso 4:22-24; Kalatia 5:24; Kolose 3:5).

3. **Roma 6:11** O le oti lea i lā le agasala, a ua ōla i lā le Atua.

IV. E i ai ni la'asaga e muamua i le papatisoina o sē tasi.

1. **Galu. 2:38** Ia salamō.

2. **Galu. 8:37** Ia fa'atuatua iā Keriso.

3. **Mata. 3:7, 8** Ia fua mai ni fua e tatau ma le salamō.

4. **Galu. 16:25-53** Ia mua'i a'oa'oina mai le Afioga a le Atua i matā'upu fa'avae o le soifuāga fa'a-Kerisiano (Galuega 8:35-37).

Manatu Fa'aopoopo: O le autū ma le aogā o le papatisoga, o le fa'amaonia lea o lē ua papatisoina iā Keriso ma Lona mana tele. Pe a aunoa ma lea, ua 'avea loa le papatisoga o se mea fua ua aunoa lava ma sona aogā, e pei ona ta'utino mai e Peteru: "O le fa'atusa fo'i lea mea o le papatisoga, o lo'o fa'aola mai ai nei iā i tatou, (e lē o le fa'ate'a 'eseina o le 'ele'ele o le tino, a o le tali a le loto fuatia ifo e lelei i le Atua) i le toe tū mai o Iesu Keriso" (I Pete. 3:21). O lona uiga, e leai se mana o i ai i le papatisoga lava ia e fa'ate'a 'eseina ai sō tatou 'ele'elea, auā ua na o se fa'atusa. A e peita'i pe a i ai le fa'atuatua ōla i le mana o le toe soifua mai o Keriso (o le tali lea a le loto fuatia ifo e lelei i le Atua), ona fa'ato'ā maua ai lea o le aogā o le papatisoga e fa'aolaina ai le tagata.

O le papatisoga mo le fa'amagaloina o agasala. (Faitau ma le fa'autauta lelei i le Galuega 2:38). Pe 'afai ua fai se aogā o le papatisoga mo le fa'amagaloina o agasala, ua āla 'ona fa'apea ona ua i ai le salamō fa'amaoni ma le fa'atuatua ōla iā Iesu, a e lē 'ona o le papatisoga lava ia, auā ua na o se fa'atusa. O le "papatisoina i le suafa o Iesu," o lona uiga, "o le fa'atuatua lea i le suafa o Iesu;" i le ua molimau mai le Galuega 10:43: "Ona o lona suafa e maua ai le fa'amagalo o agasala a e fa'atuatua iā te ia uma lava." Pe a alu ifo se tasi i le vai o le papatisoga e aunoa ma le salamō ma le fa'atuatua moni, e toe alu a'e lava o ia ma le 'avega o āna agasala o lo'o pipi'i atu pea iā te ia ina ua leai se mana o i le suāvai e fufulu 'eseina ai, a 'ua na o le fa'atuatua iā Iesu e mafai ai.

O le fa'amatalaga lenei a Misi Parate i le Galuega 2:38: "**Mo le fa'amagaloina.** E lē o le papatiso e maua ai, a o le mea e fa'atusaina mai ai." – *O le Tusi ua Fa'amatalaina ai le Tusi Pa'ia (L.M.S.), itulau e 524.*

V. Ua folafolaina mai le Agaga Pa'ia iā i latou o ē ua papatisoina ma lō latou mautinoa lelei o le uiga ma le a'ano tāua fa'ale-agaga o lea sauniga.

1. **Galu. 2:38** O le folafolaga.

2. **Mare. 1:9-11** Na maua e Keriso se fa'aopoopoga fou o le mana o le Agaga ina ua papatisoina o Ia.

3. **Galu. 8:39** O le papatisoga, pe a sauniuni lelei i ai, e fa'a'oli'oliina ai le loto.

VI. E ao i lē ua papatisoina ona ia pipi'i atu pea i le Atua ma le fa'amaoni.

1. **Kalatia 3:27** O lē ua papatisoina, ua "'ofu" o ia iā Keriso.

2. **Kolose 1:10** Ua tatau iā te ia ona savali e tusa ma le Ali'i (Efeso 4:1).

3. **Kolose 3:1-3** Ia sa'ili i mea o i lugā.

4. **Roma 8:14-16** Ia 'avea o le fanau moni a le Atua ina ua ta'ita'iina e le Agaga o le Atua.

"Ua fa'atūina e Keriso le sauniga o le papatisoga ina ia 'avea ma fa'aailoga o le ulufale atu i Lona malō fa'ale-agaga." - O Molimau mo le Ekalesia, Tusi e VI, itulau e 91.

TAULOTO: Roma 6:4.

O SAUNIGA FA'ALE-EKALESIA - II O LE FA'AMANATUGA

E lua sauniga tāua ua fa'atūina e Keriso i totonu o le Ekalesia:

- (1) O le sauniga o le loto maulalo, po o le femulumulua'iga o vae.
- (2) O le talisuāga a le Ali'i, po o le fa'amanatuga.

I. O LE SAUNIGA O LE LOTO MAULALO.

1. **Ioane 13:1-5** Ua tu'uina mai e Keriso se fa'aa'oa'oga tāua, o le finagalo maulalo ma le agaga moni o le 'au'auna atu i nisi (Mataio 20:28).
2. **Ioa. 13:6-11** O le tete'e atu o Peteru ina o le a mulumuluina e Iesu ōna vae. Ia mātauina le tali a Iesu ua Ia fa'a'iloa mai ai lona tāua tele o lenei sauniga (F. 8). O lē ua pupula iā te ia le a'ano tāua fa'ale-agaga o lenei sauniga, a e na te te'ena, e leai se tofi o lea tagata fa'atasi ma Keriso.
3. **Ioa. 13:6-11** O le mulumuluga o vae, o le tasi lea āta o le fa'amamāina fa'ale-agaga o le fanau a le Atua.
4. **Ioa. 13:12-17** O nei afioga ua fa'atūina ai e Iesu o se sauniga pa'ia ia faia e i latou o ē mulimuli atu iā te Ia. (Ia mātauina lelei le F. e 15 ma le 17. Faitau ma le I Pete. 2:21).
5. **Luka 22:24** O le agaga lea na fa'atatau tonu i ai e le Ali'i Fa'aola lenei sauniga ina ia fofōina ai.
6. **Luka 22:25, 26** O le fa'a'iloa e iloa ai lē ua na maua le tulaga ua ta'ua o lē ua sili i le silafaga a le Atua.

"O lenei sauniga (femulumulua'iga o vae), o le āla lava lea ua fa'atonuina mai e Keriso tatou te sauniuni ai mo le sauniga pa'ia o le fa'amanatuga. A o fa'aleagaina le loto i le fa'amaualuga ma le fia sili, ua lē mafai ona maua e le agaga o le mafutaga pa'ia fa'atasi ma Keriso. Ua lē nofo sauni ai tatou e talia fa'atusa o Lona tino ma lona toto. O le āla fa'atonu mai lea o Iesu, ia muamua ona fa'ataunu'uina o le sauniga e fa'amanatuina ai Lona fa'amaulalo."- O le Fa'anaunaga o Tupulaga, itulau e 650.

O lo'o ta'atele i lō tatou atunu'u lenei manatu, o se mea fou lenei sauniga na se'i fa'atūina nei e le Ekalesia Aso Fitu, ma ai lava ua gata iā i latou ona fa'apea lō latou malamalama i le uiga o le mea na faia e Iesu, e pei ona molimau ai Ioane. A e peita'i e sesē lava lea manatu, e pei o le fa'aaliga a le ali'i a'oa'oina ma le lauiloa o Kitto, o ia o sē tasi o le 'au popoto o ē ua su'esu'e tele i le tala tu'ufa'asolo o le Ekalesia Kerisiano ona o lō latou fia malamalama i tū ma matā'upu sa tausisi i ai le 'au Kerisiano i lea tupulaga. I le o lana molimau lenei e uiga i le sauniga o le femulumulua'iga o vae, fai mai:

"O le femulumulua'iga o vae, sa 'avea lava lea o se tasi o matā'upu sa tausisi i ai le ekalesia muamua.... O lō 'ua salalau solo i le tala tu'ufa'asolo o le Ekalesia o molimau e tele e fa'asino tonu i lea masaniga." - Cyclopedia of Biblical Literature: Washing of Feet.

E lē gata i lea, a 'ua matuā fa'amaonia sa faia lenei sauniga e le 'au Ualetenese (Waldenses) ma le 'au Alepikenesi (Albigeneses), o itū'aiga ia o Kerisiano fa'amaoni o ē sa pipi'i mau pea i le fa'avae fa'ale-Tusi Pa'ia i ōna pō o sauāga a Roma i tausaga e 1260. O le ta'utinoga a le 'au Ualetenese e uiga i matā'upu o lā latou fa'atuatūāga o lo'o aofia ai ma le vaega lenei:

"Ua matou ta'utino atu, o le femulumulua'iga o vae, o le tasi lea o sauniga na fa'atūina e Keriso, i lē sa faia e Ia lava i Ōna so'o, ma na tu'uina mai ai se fa'aa'oa'oga ia fa'apea ona faia e Ōna tagata fa'atuatua." – Waldensia Confession of Faith, p. 12.

A o le molimau i le 'au Alepikenesi, fai mai:

"Sa faia e i latou le tū o le femulumulua'i i o latou vae, na latou mulimuli ai i le fa'aa'oa'oga a le Ali'i Fa'aola, Lē na Ia mulumuluina vae o Lona 'au so'o ma na tu'uina atu ai iā te i latou se a'oa'oga i le uiga o le loto maulalo." - History and Doctrine of the Sect of the Cathares, or Albigeneses, Professor C. Schmidt, University of Strassburg, p. 26.

II. O LE TALISUĀGA A LE ALI'I.

1. **I Kori. 15:2-4** E ao mo le fa'aolaina o i tatou ona ia tatou fa'amanatuina pea ma taofi mau i nisi mea sa tutupu, ma ua 'avea ma matā'upu tāua fa'ale-tala lelei.
2. **I Kori. 5:7** I ōna pō o le Feagaiga Tuai, sa 'avea ai le sauniga o le paseka ma āla na mafaufau ai pea le 'au fa'atuatua aga'i i luma i le maliu o le Keriso o le a afio mai.
3. **I Kori. 11:23, 24** A e peita'i ōna pō nei o le Feagaiga Fou, ua 'avea ai le sauniga o le **Talisuāga a le Ali'i**, po o le **Fa'amanatuga**, ma āla tatou te fa'amanatuina ai pea le maliu o Keriso.
4. **I Kori. 11:25** **O le uāina**, o le fa'atusa lava lea o le toto o Keriso ua fa'amauiina ai le Feagaiga Fou.
5. **I Kori. 11:26** **O le areto**, atoa ma le uāina, o fa'atusa lava ia e fa'amanatuina ai le maliu o Keriso.
6. **I Kori. 11:27, 29** O se sauniga pa'ia tele, e ao ai 'ona tatou matuā fa'aeteete ina ne'i tatou 'a'ai ma inu ma le fa'alē-tatau.
7. **I Kori. 21:28** Ia mua'i su'esu'e ifo le tagata i lona loto, i le 'auai i lenei sauniga.
8. **I Kori. 10:16** O le 'auai i le Talisuāga a le Ali'i, o le matuā ūlufale atu lava lea i le mafutaga fa'atasi ma le tino ma le toto o Keriso.
9. **I Kori. 11:26** E tumau lenei sauniga se'ia o'o lava i le toe afio mai o Keriso.
10. **Mata. 26:26-29** O lo'o i ai lona itū tāua e fa'asino ai lenei sauniga pa'ia i le talisuāga tele i le lalolagi fou.

Manatu Fa'aopoopo: Talu ai 'ona ua 'avea le mea fa'afefete ma fa'atusa o le agasala (I Kori. 5:7, 8), ua tatau ai 'ona fa'aaogāina i lenei sauniga o le areto lē fa'afefeteina ma le uāina lē filogia, auā o fa'atusa o le tino ma le toto o Lē ua aunoa lava ma le agasala.

TAULOTO: I Korinito 11:26.

O LE TINO O LE MALUMALU O LE ATUA

I. O ʻō tatou tino, o malumalu ia o le Atua; auā na Ia faia ma togiolaina i tatou.

Roma 12:1 O le finagalo lenei o le Atua, ia tatou tu'uina atu ʻō tatou tino iā te Ia e fai ma taulaga ʻōla ma le pa'ia.

I Kori. 6:19, 20 E lē aiā i tatou iā i tatou, auā ua fa'atauina i tatou e le Atua i le tau e silisili lona faigatā, o le toto tāua lea o Lona Ālo pele (I Pete. 1:18, 19). O lea ua tatau ai lava ona tatou vivi'i atu i le Atua i ʻō tatou tino ma o tatou agaga, o mea a le Atua ia.

II Kori. 6:16 O ʻō tatou tino, o malumalu ia o le Atua soifua e ao ona fa'apa'iaina ina 'ia 'avea ma Ōna afio'aga.

Fa'aal. 3:20 Ua fia ūlufale mai Keriso i Lona malumalu ua Ia fa'atauina e fai Mōna.

Ioane 14:16, 18 Ua 'avea le foa'iina mai o le Agaga Pa'ia ma āla tāua e afio ai Keriso i totonu iā te i tatou.

1. O lea ia tatou tausi lelei ai i le malumalu o le tino, a e 'aia ne'i tatou faia se mea e fa'aleagaina ai.

a. **I Kori. 3:16, 17** Pe afai e fa'aleagaina e se tasi lenei malumalu, e fa'aleagaina lenā tagata e le Atua.

b. **I Kori. 6:20** Ia tatou vivi'i atu i le Atua i ʻō tatou tino.

c. **I Kori. 10:31** O le tasi āla mautinoa tatou te vivi'i atu ai i le Atua i ʻō tatou tino, o lō latou 'a'ai lea ma inu e tusa ma Lana a'oa'oga ua tu'uina mai. E lē gata i lea, a e so'o se mea tatou te faia i le tino, ia muamua 'ona tatou fesilisili ifo i ʻō tatou loto, pe mata e vi'ia ai Lē na Ia faia i tatou.

2. O ni tasi nei āla e mafai 'ona fa'aleagaina ai o le malumalu o le tino:

a. **Fa'ama. 13:4, 14** O le inu i le 'ava malosi ma le 'ai i mea leaga (Tanielu 1:8).

b. **Roma 1:24** O tu'inaanu leaga fa'ale-tino.

c. **I Kori. 6:10, 9** O ē ua nofo pologa i mafauauga lē mamā ma le inu 'ava e 'onanā ai, e lē fai mo latou tofi le malō o le Atua.

II. O le finagalo moni lenei o le Atua, ia fa'apa'iaina ʻō tatou tino mo Ia.

1. **I Tesa. 5:23** Ia ato'atoa ona fa'apa'iaina o i tatou, o le agaga, ma le loto, atoa ma le tino. E i ai le feso'ota'iga i le vā o ia mea. E matuā sesē tele le taofi e fa'apea, ia sa'oloto pea le tagata i so'o se mea na te fia faia i lona tino, a e o le a lē afāina ai lava lona ʻōla fa'ale-agaga.

2. **II Kori. 7:1** Ia fa'amamāina i tatou i mea uma e leaga ai le agaga, a e peita'i o mea lelei 'ia fa'aaogāina ma le fa'atatau ina ne'i 'avea le so'ona fa'aaogāina tele ma āla e tupu mai ai sō tatou leaga. Ia fa'ato'ilaloina ʻō tatou tino. O lona uiga, ia 'aia ne'i pulea i tatou e ʻō tatou tu'inaanu fa'ale-tino, a 'ia pule ma fa'apologa i ai (Fa'ata'oto 25:26, 27).

3. **I Ioane 4:3** O i latou uma o ē ua i ai le fa'amoemoe i le feiloa'iga ma Iesu i Lona afio fa'alua mai, ia tautuanā ma i latou le galuega tāua o le fa'amamāina o i latou ai mea uma lava e leaga ai le agaga, atoa ma le tino (I Kori. 1:8).

III. E fiafia le Atua i le tino malōlōina o Lana fanau. O le mana fo'i e fa'amalōlōina ai ō tatou tino mama'i, e mai iā te Ia lea. E lē mafai i le tagata 'ona 'avea o ia ma Kerisiano fa'amaoni a o ma'i lona tino (e pei o Iopu 2:10; 13:15), a o le mea e sili ona mana'omia, o le soifua malōlōina lea i lā le agaga ma i lā le tino fo'i.

1. **III Ioane 2** O le finagalo alofa o le Atua ina 'ia tatou maua le soifua malōlōina i lā le agaga, ma i lā le tino fo'i.
2. **Mataio 4:23** O le fa'amalōlōina o tagata mama'i, o le tasi lea vaega tāua o le galuega sa faia e Iesu a o femāliua'i o Ia i lenei lalolagi (Galuega 10:38).
3. **Sala. 103:3** "O Lē fa'amalōlōina ōu ma'i atoa uma."
4. **Iako. 5:14, 15** E mafai i le tatalo ua faia ma le fa'atuatua ona fa'aolaina ai o ē mama'i.

Manatu Fa'aopoopo: O talosaga uma e faia mo ē ua mama'i ia aofia ai pea ma lenei manatu, "A e 'aia le faia lo'u loto, a o Lou finagalo;" auā tatou te lē ma-iloa po o le a 'avea se malosi fou o le a maua e lē ma'i ma āla e vi'ia ai le Atua pe leai.

O nisi ma'i ma puapuagā e maua ai le fanau a tagata i lenei olaga, o le tau'i lea o a latou lava soliga tulafono (Ioane 5:14). O nisi ma'i e māfua i le mana leaga o Satani (Luka 13:16). A o nisi fo'i ma'i e fa'atagaina e le Atua ina ia fa'aalia ai Lona mana fa'aola, pe 'ina 'ia a'oa'oina ai fo'i i tatou ma tosina atu ai atili iā te Ia. E i ai le tasi tauaso (Ioane 9:2, 3), ma le puapuagā sa lagona pea e Paulo i lona tino (II Kori. 12:7-9). Ma le tagata supa na fa'amalōlōina e Iesu (Mataio 9:1-8).

TAULOTO: I Korinito 6:19, 20.

O SE A'OA'OGA I LE TAUSIGA O LE TINO

- I. Talu ai ona ua finagalo le Atua ina ia maua e Lana fanau o tino malōlōina, o lea ua Ia tu'uina mai ai o ni fa'atonuga e puipuiina ai lo latou soifua malōlōina.

Esoto 15:26

Na folafola e le Atua iā Isaraelu, o le a Ia fa'asaoina i latou mai itū'aiga ma'i uma fa'a-Aikupito pe afai a e latou te usiusita'i lelei i Āna poloā'iga ma sauniga uma lava. O le tasi lenei mea "na tusia e a'oa'o mai ai iā te i tatou" i nei ōna pō (Roma 15:4), ina ia tatou mautinoa ai. E fa'apea lava fo'i ona fa'asaoina ma i tatou mai nisi itū'aiga ma'i e tele pe 'afai tatou te usiusita'i lelei i fa'atonuga ma a'oa'oga o lo ua puipuiina ai le soifua malōlōina (Teute. 7:12-15).

Kalatia 6:7, 8

"O le mea e lūlūina e le tagata, o le mea lava lea a seleseleina mai ai e ia." O le tulafono lenei e lē ma-'alofia i le fa'ale-agaga, fa'apea fo'i ma le fa'ale-tino.

1. Ua faia o tatou tino i mea tatou te 'a'ai ai i lea aso ma lea aso. O lea ua tatau ai ona tatou filifilia tau o mea lelei tatou te 'a'ai ai ina ia malolosi ai pea o tatou tino.
 - a. **Failauga 10:17** Ia a'ai ina ia malolosi ai, a e lē ina ia onā ai.
 - b. **Isaia 55:2** Ia a'ai i mea lelei. 'Aua ne'i maumau a tatou tupe "i mea e lē ni mea e 'ai." O mea ia e na 'ona fa'atumuina ai fua le manava, a e lē iloga 'ona faamalosia ai o le tino.
2. E i ai nisi mea ua fa'asāina ia 'aua ne'i tatou 'a'ai ai.
 - a. **Teute. 14:, 3, 2** 'Aua e te 'aina se mea inosia e tasi.
 - b. **II Kori. 6:17** Ua lē gata i le Feagaiga Tuai, a 'ua fa'apea fo'i ma le Feagaiga Fou 'ona apoapoa'iina ai i tatou, "'Aua tou te papa'i atu i se mea leaga."
 - c. **Teute. 14:1-21** O le fa'atonuga i manu mamā e a'ai ai ma manu 'inosia e sā 'ona a'ai ai. E aofia ai ma mea o i le sami, ma vaitafe, atoa ma manu felelei. (Fa'aaogā ma le Levitiko 11:1-31).
 - d. **Teute. 14:8** Ua matuā iloga ona fa'asāina o le puā'a (Levi. 11:7, 8).
 - e. **II Pete. 2:22** O se manu amio fa'ainaelo le puā'a (Mataio 7:6).

O Misi Paueli (Rev. Thomas Powell, L.M.S.), o ia o se tasi o le 'au ulua'i misionare Peritania i Samoa. Sa ia tusia se tasi tusi aogā e igoa, "**O le Tala i Manu**," i le ua fia si'i mai ai ni fa'amatalaga e fetaui tonu ma le a'oa'oga o fai nei:

"Ai na fa'asino e le Atua iā Atamu manu e tatau ona 'aiina e tagata ma fai taulaga ai i le Atua, ma manu e lē tatau ai. O manu e tatau ai, na ta'ua "O manu e mamā;" a o manu e lē tatau ai, ua ta'ua "O manu e lē mamā" (Kenese 7:2). Na fa'asino fo'i e le Atua iā Mose manu fa'apea (Levitiko 11:1-47; Teute. 14:3-20)."

"Ua na o manu e mamā na fai taulaga ai. Na sā lava 'ona 'aiina pe fai se taulaga i se manu lē mamā (Gal. 10:14). E lē se mea fa'atauva'a lenā fa'atonuga, a o le fa'atonuga e lelei ma le aogā."

- (a). "Na aogā e a'oa'o ai i tagata, 'aua le so'ona 'ai, a e filifili lelei ma a'ai ai na o tino o mea e aogā e gatusa ma le finagalo o le Atua; 'Pe tou te a'ai, pe tou te inu, po o se tasi mea tou te faia, ia faia mea uma ia vi'ia ai le Atua;' a e 'aua le so'ona usita'i se tasi i lona fia 'ai.
- (b). "Na aogā lea fa'atonuga i mea e 'ai, ina ia iloga ai tagata o le Atua ua 'ese i latou, a e 'ese nu'u fa'apaupau ua so'ona a'ai mea uma, ma fai taulaga i mea fa'atauva'a."—Itulau e 2, 3.

O le fa'amalamalamaga lenei a Misi Paueli i le pogai na āla ai 'ona fa'asāina o le puā'a, fai mai:

"O le alofa lea o le Atua i tagata auā e tele ma'i 'ese'ese e tutupu i nisi tagata i lā latou a'ai puā'a. Sa matuā 'inosia le puā'a e Iutaia, ua ta'ua ai le puā'a o le mea 'inosia.... A e ui 'ina ua sā i tagata Iutaia e a'ai i puā'a, na latou fai fāgaga o ia manu i ōna pō o le Ali'i: ua peiseā i na latou fa'amāmāsagia le poloā'iga a le Atua, ai o le mea lea na fa'aumatia ai le lafu tele, e fai ma sala i lo latou fa'alogogatā (Mata. 8:30-32; Mare. 5:11-13; Luka 8:32, 33)." Itulau e 230.

II. Ua fai le fa'aaliga iā Peteru (Galue 10:9-16) ma lafitaga o nisi e to'atele o ē ua latou fia maua pea le sa'olotoga i mea e a'ai ai, a e peita'i e tatau 'ona vave lagona e lē ua suesue i ai ma le loto mataāla, e lē o mea e 'ai e fa'asino i ai le fa'aaliga na iloa e Peteru, a e peita'i o le tatalaina atu o le tala lelei mo tagata o nu'u 'ese, o ē sa 'inosia e Iutaia se'ia o'o ina latou fa'aigoaina o "ulī" (Mata. 15:21-27). E fa'apenei le fa'amatalaga a Misi Parate i le fuaiupu e 26: *"Lafu i ulī. O le igoa lea ua 'avane ai e sā Iutā i tagata 'ese."*

1. Ina ua fa'alogu Peteru i le si'ufofoga mai le lagi o fai mai, "Peteru e, inā tū ia i luga, inā fasi ma 'ai," sa vave ona ia tali atu, "Le Ali'i e, 'a'ua lava; auā 'ou te le'i 'ai lava se mea e sā, po o se mea e leaga" (Gal. 10:14). Sa mua'i māsalsalo Peteru i lona loto pe se ā lea fa'aaliga (F. 17). A e mulimuli ane na pupula ato'atoa ai iā te ia le uiga o le fa'aaliga e pei o lana ta'utinoga iā Konelio ma lona 'au aiga, "Ua 'outou iloa lava ua sā i le tagata Iutaia 'ona fa'atasi pe fa'alatalata i le tagata 'ese; a 'ua fa'asino mai e le Atua iā te a'u (o le fa'aaliga lea), 'a'ua 'ou te ta'uina atu ua sā pe leaga se tasi tagata (a e lē o se tasi manu)" (F. 28).
2. Sa fa'apea lava fo'i ona fa'amalamalamaina e Peteru o le uiga o le fa'aaliga i le 'au matutua sa i Ierusalem, e le'i taitai fa'auiga e ia i le fa'atagaina o ni mea 'ai sa mua'i fa'asāina, a e peita'i o le fa'atagaina o nu'u 'ese ia tala'i atu i ai le tala lelei. (Faitau ma le fa'autauta i le Galuega, matā'upu e 11).

Manatu Fa'aopoopo: O le fa'avasegaina o manu mamā ma manu e lē mamā, sa i ai lava lea a o le'i taitai o'o iā Mose ma le fanauga a Isaraelu (Kenese 7:8; 8:20). E ui 'ina sa toe fa'amanatuina ma fa'amamafaina lenei tulafono i ōna pō o Mose, a e sa lē fa'agataina fa'atasi ma sauniga fa'ale-tulafono a Mose, e pei fo'i o le Sapati ma le sefulua'i, sa i ai a o le'i o'o iā Mose, i le o lo'o i ai nei lava 'ina ua mavae ōna pō o Mose. O lenei lava o lo'o apoapo'i mai pea le Afioga a le Atua, "'Aua fo'i tou te papa'i atu i se mea leaga" (II Kori. 6:17). Po ua sui nei 'ea le uiga ma le amio a le puā'a na āla ai 'ona fa'asāina? Ua fa'asāina e le Atua na o mea ua la silafia e lē aogā i le tino o le tagata, a e tele ma faula'i mea lelei o totoe tatou te fa'aaogāina e tausia ai o tatou ōla fa'ale-tino ma fa'amalieina ai o tatou mana'o i mea lelei.

III. E ao i le tagata Kerisiano ona ia manumalō i tu'inaanau o le tino.

1. **Fa'ata. 25:28** O le tagata o lē ua na lē ma-taofia mana'oga o lona loto, ua fa'atusaina o ia i se a'ai ua aunoa ma ni ōna puipui e malu ai, ina ua sofa'ia lona 'au pā ma ua a'ea gofie ai e le fili (Fa'ata'oto 16:32).
2. **I Kori. 10:5, 6** 'Aua ne'i 'avea i tatou e pei o le fanauga a Isaraelu o ē sa oti o latou tino i le vao talu ai le tu'inaanau. E ui i le fa'asoāga ma le sauniuniga lelei a le Atua mo i latou, a e sa tu'inaanau pea o latou loto i tufa'aga o mea leaga fa'a-Aikupito (Esoto 16:3-15; Numerā 14:26-29).
3. **Filipi 3:18-20** Ua tusi mai Paulo e uiga i nisi e to'atele o ē ua fai le manava ma ō latou atua.
4. **Isaia 5:20, 21** O le tasi uiga fa'alenei lalolagi, o le ta'uleleia lea o mea ua ta'uleagaina e le Atua, o lea ua suamalie ai iā te i latou le mea ua fetalai mai ai le Atua e 'o'ona.

5. **Kenese 3:6** O le usiusita'i o Eva i lona fia 'ai i le fua na fa'asāina e le Atua, na maua ai lona to'ilalo iā Satani.
6. **Mataio 4:1-4** Sa taumafai e le ti'āpolo i lenei lava āla e tasi o le tu'inanau i mea 'ai - ona fa'ato'ilalo ai i le Ali'i Fa'aola, a e peita'i na manumalō Iesu i le mea na faia'ina ai ō tatou ulua'i mātua.
7. **Kala. 5:24** O ē o iā Keriso, ua fa'asatauroina e i latou le tino, ma ōna mana'o, ma ōna tu'inanau.
8. **I Ioa. 3:17** O le a mavae atu lenei lalolagi ma ōna tu'inanau, a o lē fai le finagalo o le Atua, e tumau lea e fa'avavau.

“Pe a aunoa ma le tino malōlōina, o le a lē mafai lava e se tasi ona tusa ona mautinoa lelei ma fa'ataunu'uina ato'atoa o lona tiute iā te ia lava, ma ōna uso a tagata, a e maise o Lē na Ia faia o ia. O lea ua tatau ai o na leoleoina ma puipuiina lelei o le soifua malōlōina, fa'apei lava o le amio.” – O A'oa'oga, itulau e 195.

TAULOTO: Kalatia 6:7.

O LE UIGA MONI O LE TAGATA

I. O le tele o a'oa'oga tau le uiga o le tagata, ua ātina'e lava i luga o lenei fa'avae e tasi (ma ua sēsē ai):

O le agaga, o le vaega lea o le tagata e soifua pea lava, e lē mafai ona o'o i ai le ōti.

O le tino, ua na o se atigi o lo'o fafao ai i totonu le tagata moni, o le agaga lea.

1. E ui la ina maliliu le tino, a e ōla pea le agaga ia. Ua talia e le to'atele lenei a'oa'oga peiseā'i lava o se mea ua mautinoa lelei ma ua fa'amaonia i molimau e tele, a e peita'i ua aunoa lava ma sona fa'avae tonu fa'ale-Tusi Pa'ia.

2. O le Atua, o Lē na Ia faia le ulua'i tagata, ua iā te Ia le malamalama ato'atoa i lona uiga a o ōla o ia, e fa'apea fo'i pe a ōti. O lea ua 'avea ai le molimau fa'ale-Tusi Pa'ia ma tapula'a silisili e mafai ona tatou iloa ai le tonu o lenei matā'upu. "Inā sa'ili ia i le tulafono ma le mau; afai latou te lē tautala e tusa ma ia 'upu, ua leai lava se malamalama iā te i latou" (Isaia 8:20).

Sala. 139:14-16 Ua silafia lelei e le Atua le tino o le tagata ma le āla na fai ai. Ua tautala mai nisi e to'atele e uiga i le "agaga soifua pea lava," o lo'o i ai i totonu o le tagata. E peiseā'i o se mea ua mautinoa lava, ma ua manino fo'i ona fa'ailoa mai i le Tusi Pa'ia, a e peita'i ua leai lava se fa'aaliga fa'apenā ua tatou maua.

3. E malamalama le a'oa'oga a le Tusi Pa'ia i le faiga o le tagata i le amataga, i lē o le molimau fo'i lea e tataua ona tatou iloa ai, pe moni na tu'uina atu e le Atua se agaga soifua pea i totonu o le tagata.

a. **Kenese 2:7** E na o le lua lava o mea na fai a'i le tagata e le Atua:

i. **O le ēfuēfu o le 'ele'ele**. Ina ua mae'a ona gaosia e le Atua o le tino o le tagata, ona ta'atia ai lea, ua iloga mai ua ato'atoa lelei le tagata. a e peitai e le'i o'o ina o'o i ai se ōla iā te ia.

ii. **O le māmāva ōla**, po o le māmāva o le ōla (Kene. 7:22). Na fa'ato'a 'avea le tino ēfuēfu ma tagata ōla 'ina ua māmāvaina atu i ai e le Atua le māmāva o le ōla. Ona pau pau lava lea o le mea ua ta'ua mai na fa'aūlu atu e le Atua i totonu o le tagata.

Manatu Fa'aopoopo: E leai se ōla sa i ai i le tino ēfuēfu o le tagata lava ia na o ia. E leai fo'i se ōla sa i ai i le māmāva lava ia na o ia. Peita'i ua na o le fa'atasiga o i la'ua ina ua ūlu atu le māmāva o le ōla i poga'i isu o le tagata, ona fa'ato'a 'avea ai lea o le tagata ma tagata ōla ua mafai ona gaoioi ma mafaufau.

b. **Faila. 3:19** O le māmāva o lo'o tatou ōla ai nei, o le māmāva lea e tasi o lo'o ōla ai fo'i ma manu (Kene. 7:21, 22). Pe 'afai la o le māmāva o le ōla ua maua ai e tagata le uiga lē i'uvala, po 'ua lē tataua fo'i la o na i ai i manu o lea lava uiga; auā o lenei, e tasi le māmāva o lo'o māmāvaina e tagata, ato'a ma manu.

II. E pei ona malamalama o le fa'aaliga i le āla na maua ai le ōla o le tagata, e fa'apea fo'i ma le fa'aaliga i le āla e i'u ai.

Sala. 104:29 Pe a 'ave 'eseina le māmāva o le ōla, ona toe liu ēfuēfu ai lea o le tagata 'ina ua ōti, ma manu i na ua mamate. O le ōla sa i ai talu ai le fa'atasiga o le māmāva o le ōla ma le tino ēfuēfu, o lenei ua leai i na ua fa'amalepeina lea feso'ota'iga.

Salamo 146:4 E alu 'ese lona "agaga," o le māmāva o le ōla lea. Silasila i le Tusi Pa'ia fa'a-Peritania ua fa'apenei ona tusia ai o lenei mau: "**His breath (māmāva) goeth**

forth. O le tasi lea uiga o le 'upu "agaga," o le mǎnǎva, e pei o na ta'ua mai i le Tusi Pa'ia fa'a-Peritania. "E alu 'ese lona agaga (mǎnǎva), e fo'i atu i le 'ele'ele na i ai o ia; e fa'aumatia i lea lava aso ǎna manatunatu." E fa'amae'ae'a o na fa'amatalaina o le uiga o le agaga i le matǎ'upu e soso'o ma lenei.

Manatu Fa'aopoopo: O le tino ǎfuǎfu, pe a fa'aopoopo i ai le mǎnǎva o le ǎla, e maua ai le tagata ǎla. A e peita'i le tino ǎfuǎfu, pe a to 'ese ai le mǎnava o le ǎla, e maua ai le tagata oti. A tusi fa'a-fuainumera, e fa'apenei:

Tino ǎfuǎfu ma le mǎnǎva o le ǎla ua maua ai le tagata ǎla. Po o lenei fo'i tino ǎfuǎfu 'ave 'ese le mǎnǎva ǎla, ona totoe ai lea na o le tagata ǎti (*Tino + Mǎnǎva = Tagata ǎla*).

O le ǎti, e lē o lona uiga e saga ǎla pea, a e peita'i o le matuǎ iloga lava lea ona fa'agataina mai o le ǎla ma le mafaufau. "E fa'aumatia i lea lava aso ǎna manatunatu." (Fa'aaogǎ ma le Faila. 9:5, 6, 10). O le taimi lea e fa'asino tonu i ai le fetalaiga a le Atua, "O le ǎfuǎfu 'oe, 'e te toe fo'i atu lava i le ǎfuǎfu" (Kene. 3:19). Ua aunoa lava le tala i le faiga o le tagata ma se fa'aaliga e fa'apea, na tu'uina atu e le Atua i le tino ǎfuǎfu se agaga soifua pea e 'ese mai i lō le mǎnǎva o le ǎla na mǎnǎvaina atu e le Atua i poga'i isu o le tagata.

1. E ui lava ina ua fa'alasi ona tusia mai o lenei 'upu "agaga" i totonu o le Tusi Pa'ia, a 'ua lē fa'a-tasi lava ona se'i pipi'i ane i ai o ni soǎnauna fa'apenei: agaga soifua pea; agaga lē i'u vale; agaga e lē mafai ona ǎti. Ua molimau mai se tasi ali'i Kerisiano mafaufau:

*"O 'upu Eperu ma 'upu Eleni ua fa'aliliuina mai ai lenei 'upu (agaga), e tusa o le fa'a-1,700 o na tusia mai i le Tusi Pa'ia. Po 'ua lē tatau 'ea lǎ i lenei lisi umi o na se'i fa'atasi ona ta'ua mai ai, o le agaga o le tagata e soifua pea, po o le agaga e lē ǎti lava, pe 'afai o le fa'amatalaga sa'o lenǎ o lona uiga, ua tatou fia maua se fa'amaoniga se tasi mai lenei 1,700.... A e peita'i o le mea ua tatou maua mai i lea sa'iliga, ua na o le leai lava." - Uriah Smith, *Here and Hereafter*, p. 65.*

- a. **I Timo. 1:17** Ua na o le to'atasi lava le suafa ua tatou maua i le Tusi Pa'ia ua mafai ona pipi'i ane i ai o le soǎnauna, "soifua pea," ua na o le Atua poto lea e to'atasi, "le Tupu o le vavau, o Lē soifua pea lava."
- b. **I Timo. 6:15, 16** Pe to'a fia 'ea nisi ua fai mai ai le aposetolo ua latou maua lea uiga, o le soifua pea? E na o le to'atasi, o le Atua, lea na o Ia lava.
2. O fa'amatalaga uma o i ai i le Tusi Pa'ia e fa'asino tonu i le tagata ma lona uiga, ua na ona fa'amanatuina mai ai pea o le fa'atauva'a ma le vave mavae o le ǎla o lo'o iǎ te ia. O lea ua fai mai ai Tavita, "Se ā 'ea le tagata e te manatu mai ai iǎ te ia?" (Sala. 8:4).
 - a. **I Pete. 1:24** Ua fa'atusaina i le mutia ma le fuga o le vao e vave mavae.
 - b. **Sala. 103:15, 16** A āgi mai i ai le matagi, ona leai lea (Iakopo 1:10, 11).
 - c. **Iopu 14:2** E mavae atu e pei o le āta, ma ua lē tumau.
 - d. **Iakopo 4:14** O le puao lava lea, ua aliali mai i se itū aso itiiti, ona mōu ai lea.
 - e. **Salamo 39:5** Ua e faia o'u aso e pei o le lautele o le alofilima.

III. O nei uiga tāua uma: ǎla e fa'avavau, ǎla pea, lē i'u vale, lē ǎti lava, o mea lava ia o lo'o lapata'i mai ai le aposetolo o Paulo e ao ona tatou sa'ili i ai ina ia tatou maua. A 'ia manatua le a'ano o le taofi e pei ona ta'atele nei. O le tino ua na o se atigi o lo'o fafao ai i totonu le tagata moni, o le agaga lea. I le pe 'afai lǎ o le agaga (tagata moni) e soifua pea lava, ona o le ā 'ea lǎ o le a tatou tautigā ai pea e toe sa'ili le mea ua iǎ i tatou?

1. **Roma 2:6, 7** O lenei uiga, e gata ona maua o le le i'u vale e i latou o ǎ ua latou sa'ili i ai ma le filigā. A e po o le a tatou saga sa'ili 'ea pea lǎ le mea o lo'o

iā i tatou? Pe sa galo 'ea iā Paulo, o le tagata moni (agaga) e lē o'o ane i ai le ōti?

Manatu Fa'aopoopo: Po ua lē ta'u valeaina nei lā i tatou fa'atasi ma Paulo ina ua tatou saga sa'ili pea le mea o lo'o iā i tatou? Po ua lē tusa lā i tatou ma se toea'ina valevale matua, ua'atoa le aso e tautigā e sa'ili solo lana tioāta (va'aiga), a e fa'auta, o lo'o i ōna lava mata le tioāta?

2. **Roma 6:23** O le ōla e fa'avavau, o le mea alofa tāua lea a le Atua ua folafolaina mai. A e po ua lē fa'alēaogāina loa lā 'ia lenei mea alofa a le Atua talu ai o na o lo'o iā te i tatou le agaga e ōla pea lava?
3. **I Kori. 16:51-54** Ua lē gata ina fofafolaina mai le ōla e fa'avavau, po o le lē i'u vale, a 'ua fa'ailoa mai fo'i ma le taimi tonu e fa'ato'ā maua ai, o le aso lea o le toe tutū pe a ilia le pū fa'a'uma. A e fa'auta mai, pe 'afai e moni ua iā i tatou i le taimi nei le uiga lē i'u vale, po 'ua lē 'avea 'ea lā o se mea fua le folafolaga a le Atua, atoa fo'i ma le fa'aaliga o le taimi o le a fa'ataunu'uina ai?
4. **I Ioa. 6:11, 12** E gata iā i latou o ē ua iā te i latou le Ālo ona latou maua o le ōla pe a o'o i nā ōna pō e tusa ma le folafolaga a le Atua. E lē maua e sē tasi e lē o i ai le Ālo, a e fai mai lenā a'oa'oga, e tofu le tagata ma le agaga soifua pea, e o'o lava i ē amiolētonu.
5. **Kene. 3:22-24** Na āla o na tulia 'eseina o ō tatou ulua'i mātua mai le fa'ato'āga ina nei 'avea lō lā fa'aaogāina o fua o le la'au o le ōla ma āla e maua ai e i la'ua lenei lava uiga, o le lē i'u vale, po o le soifua pea. A e po 'ua lē 'avea 'ea lā lenei fa'atatau o se mea fua ma le lē aogā pe 'afai e moni, o lo'o i ai i le tagata le vaega e lē o'o ane i ai le ōti?

Manatu Fa'aopoopo: O lo'o taofi nisi e fa'apea: Ua faia le tagata i le fa'atusa o le Atua, ia foliga iā te Ia (Kene. 1:26), o lea lā ua tataui ai fo'i i le tagata o na i ai o le uiga lē i'u vale e pei o le Atua, o lo'o soifua pea lava Ia. A 'ia mataui lelei e lē o fai mai na faia le tagata 'ia lā tutusa ma le Atua, a e na o na foliga iā te Ia i le amiotonu. (Fa'aaogā le Failauga 7:29). A e pe 'ai se ā ua fa'amamafaina ai tau o lenei uiga e tasi, o le agaga soifua pea lava, meāmanū e tele uiga o le Atua. Po ua mafai 'ea lā e tagata o na latou iloa o mea uma e pei o na silafia e le Atua mea uma (**Omnipotent**)? Po ua mafai 'ea e tagata 'ona i ai i mea uma e pei o le Atua (**Omnipresence**)? O le Atua e Ōna le malosi uma lava, a e po o fea lā e pau mai ai le mea e mafaia e le tagata?

IV. O le pepelo a Satani ua āla ai ona fa'alētonu ma felefele lenei matā'upu.

1. **Kene. 2:16, 17** O le ta'utinoga a le Atua: "O le aso e te 'ai ai, e te ōti ai lava."
2. **Kene. 3:4, 5** O le pepelo o le gata (ti'āpolo): "Lua te lē ōti lava, 'a e peita'i o le a 'avea ai 'oulua e pei ni atua."

Manatu Fa'aopoopo: O le ōti, o le 'upu lea e fa'afeagai ma le 'upu ōla. Pe 'afai ua ōti se tasi, o lona uiga, ua uma lona ōla. E lē fa'apea e ōti na o se isi vaega, a e ōla pea se isi vaega. E lē o se ōti le toe ta'a i le lalolagi. E lē o se ōti le alu e toe ōla i le malaia. E lē o se ōti le alu i le lagi e vivi'i ai ma fa'atasi ai ma le Atua i le manuia. E lē o se ōti fo'i le toe alu e fa'atalitali mai i pule katorio, po o le fale puipui o agaga, a e se'i toe fai atu nisi galuega mo lona fa'aolataga.

Ua mātua nei taofi uma 'ona o le pepelo lava a Satani ua ia fa'afiti ai i le fa'aaliga a le Atua i lona fai atu, "Lua te lē ōti lava." O le a'ano lenei o le pepelo a le ti'āpolo, o le ōti e lē o le ōti lava lea, a e peita'i o se faitoto'a lava e ūlu ai i se isi ōla i tala atu o lenei ōla, o se ōla e sili atu i lō le ōla o fai nei; auā o le a 'avea ai 'oulua "e pei o ni atua."

O a'oa'oga uma ma togafiti fa'ataulaitu, o lo latou fa'avae lava lenei e tasi, o le talitonu e mafai i ē ua ōti ona latou fa'afeso'ota'i pea ma ē ōla e pei lava o le pepelo a Satani i le amataga, "Lua te lē ōti lava." O se mea e ōfo ai le mafaufau ona ua faigatā i tagata ona latou talia ma talitonu i le fa'aaliga malamalama mai le Atua, a 'ua vave 'ona latou talitonu ma fa'aaogāina le pepelo a Satani.

O le pepelo lea o lo'o lafi mai i lalo i le ta'ele o le fa'atānoa ua tumu i le mau a'oa'oga ma taofi ua ta'u pepeloina ai le Atua, a 'ua aliali mai ai peiseā'i ua sa'o le fa'aaliga pepelo a le fili.

TAULOTO: Kenese 2:7.

PO O LE Ā LE AGAGA?

I. O lenei fesili ua tatau ona tatou su'esu'e loa i ai ma le matuā naunauta'i o ō tatou mafau'fau. Po o le ā 'ea lenei 'upu ua tatou fa'alogo so'o i ai, ua ta'ua o le **agaga**?

1. Ua lē fa'asino le 'upu "agaga" i se mea e tasi, a e peita'i e tele mau mea 'ese'ese e fa'asino atu i ai. E leai se mea e 'ese ai ma le 'upu o le **"tau."** E tasi le 'upu, a e tele ōna uiga e mafai o na fa'aaogāina i ai.

- E fia le **tau** o lenei mea? (price).
- Tau** o se mea ia iloga ai. (designate).
- Ua **tau** lelei atu le malaga i si aiga. (reached).
- O lo'o **tau** nei le taua tele i Europa. (fighting).
- Sa **tau** e le teine le fua o le moli. (Picked)
- O lo'o **tau** le va'a i tai. (anchor).
- Na 'ou **tau** ane i lau Tusi Pa'ia. (came across).
- Ua **tau** ma ou taliga i le fia fa'alogo. (some need).
- Ua 'ou fiu i **tau** mafau'fau o se tali i lau fesili. (was trying).
- Ua sau o ia ma le **tau** i'a. (some/pack).

Silasila i le mau uiga o lea 'upu, e ui 'ina tasi, a 'ua tofua lava le fuaiupu ma lona uiga e 'ese mai ai i lō le tasi.

2. E fa'apea lava le uiga o le 'upu "agaga," e tele ōna uiga 'ese'ese, a e peita'i ua manatua e le to'atele na o le uiga lea e tasi, o le agaga soifua pea, e pei o na fa'auiga i ai e le a'oa'oga o lo'o ta'a tele nei. Ua tusa le 'upu **"agaga"** ma 'upu fa'a-Peretania e lua, o le **"soul"** ma le **"spirit."** E tolu 'upu fa'a-Eperu, ma 'upu fa'a-Eleni e lua ua maua mai ai lenei 'upu e tasi, o le "agaga," atoa ma ōna uiga 'ese'ese uma. O le a fa'asolo atu ia 'upu, atoa ma ō latou uiga i lā tatou gagana 'ina 'ia fa'afaigofie o na tatou malamalama i ai.

- Nephesh** (Eperu) Mānāva o le ōla, tagata ōla, mea ōla, loto, mafau'fau, tino.
- N'shah-mah** (Eperu) Mānāva, matagi, tagata ōla, meaōla, mafau'fau, atamai, loto.
- Ruahh, or Ruach** (Eperu) Mānāva, 'ea, savili, loto.
- Psuech** (Eleni) Le ōla i le olaga nei, le ōla atalī, ōla o le manu, mānāva, loto, mafau'fau, uiga fa'ale-agaga o le tagata.
- Pneuma** (Eleni) Mānāva o le ōla, o le mānāvanāva o se mea, mānāvanāvāga o le 'ea, matagi, ōla.

-Definitions from Gesenius, Parkhurst, Greenfield, Robinson, Hebrew and Greek Lexicons.

3. Silasila i lenei mau uiga 'ese'ese o 'upu ua maua mai ai lenei 'upu **"agaga."**

- Tagata ōla.
- Mea ōla.
- Tino.
- Loto.
- Mafau'fau.
- Atamai.
- Mānāva.
- Ōla o le tagata.
- Ōla o le manu.
- Savili, atoa ma isi uiga e pei ona ta'ua i luga, a e lē fa'apea fo'i ua atoa ai.

E ui i nei uiga e tele, a e ua lē o aofia ai lava ma se uiga po o se fa'amatalaga e tasi se'i fa'amaonia ai lenā a'oa'oga ua ta'ua ai le agaga, "o le tagata moni lea o lo ua fafao i totonu o le atigi o le tino, ma e lē o'o ane lava i ai le ōti." Ua leai lava!

II. O lea ua faigofie ai lē ua malamalama i nei uiga 'ese'ese o na fa'avasega tonuina e pei o mau nei.

1. Pe a faitau i **le Salamo 103:1**, "Lo'u agaga e, inā fa'amanū atu ia iā Ieova," ona mautinoa lea, e lē o fai mai Tavita i sona agaga soifua pea lava, a e peita'i o lona loto e fa'atatau i ai. O lona uiga tonu, "Lo'u loto e, inā fa'amanū atu ia iā Ieova."
2. Pe a molimau mai le **Kenese 35:18** i le maliu o Rasela e fa'apea, "Ua o'o ina a mavae atu lona agaga," ona mautinoa lea, o le māmāva o le ōla e fa'atatau i ai. E tusa o na tusia fa'apea, "Ua o'o ina a tō lana māmāva." Silasila i le Tusi Pa'ia Samoa telē (Sala. 146:4), o lo'o tusia ai, "E alu 'ese lona agaga." I talane o le "E" o lo'o tusia ai le mata'itusi la'ititi o le "d" o lo'o i le pito taumatau o le itulau, ma o lo'o tusia ai le **Salamo 104:29**. Liliu i ai, o le a ē faitau ai i nei upu, "**Ua 'e 'ave 'eseina a latou māmāva.**" O lea ia e silafia lelei ai, o le alu 'ese o le "agaga" ma le 'ave 'eseina o le "māmāva," e tutusa pau ia fa'amatalaga e lua, o le mea lava e tasi.
3. E fa'apea fo'i ma le **I Tupu 17:21, 22**, "ua toe fo'i mai le agaga o le tama i totonu iā te ia." Ua ōso nisi i le fa'ai'uga sesē e fa'apea o le agaga soifua pea lā lea, o le vaega o le tamaitiiti (po o le tamaitiiti moni lenā) na lē afāina i na ua ōti; auā e ōla pea lava. Fa'amolemole, e leai: Faitau i le F. e 17 ua fa'amatalaina mai ai le tigāina o le ma'i o lenei tamaitiiti, atoa ma lona i'uga, mai fai, "sa tele lava lona ma'i, ua i'u ina lē toe se māmāva iā te ia." O lona uiga, ua tō le māmāva o le ōla sa i le tamaitiiti, ua tete'a 'ese ma ia. I le sa tatalo atu loa Elia i le Atua, ia Na toe fa'afo'isia mai le mea na Ia 'ave 'eseina mai le tamaitiiti, o le māmāva lea o le ōla, ia toe ūlu mai i le tino ēfuēfu ma 'ia toe ōla ai. O le fa'aaogāina e Elia o le 'upu "agaga," e leai se mea e 'ese ai ma le 'upu "māmāva," auā o lea le uiga o le 'upu "agaga" ua tatau ai mo lea fa'amatalaga. Pe 'afai o le fuaiupu, "O lo'o tau e le teine le moli," o ai se tagata valea o le a manatu ifo ma fa'apea, "O lo'o tau e le teine se taua ma le moli," po o le ā na 'aumaia se isi o le mau uiga o le 'upu tau ma na fa'atatauina i lenā tala malamalama ma le mautinoa lelei?
4. Pe a fai mai Solomona, "Ma toe fo'i atu le ēfuēfu i le 'ele'ele e pei o na i ai ia, ma toe fo'i atu le agaga i le Atua o lē na foa'iina mai ai" (**Failauga 12:7**), e leai lava se faigatā o i ai, auā o le māmāva o le ōla lava lea na fa'aūlu mai e le Atua o lo'o tatou ōla ai (Gal. 17:25), a e toe fo'i atu i le Atua pe a te'a 'ese ma le tino (Iopu 12:10).
5. O lo'o ta'ua mai e **Isaia 57:16**, "O agaga na faia e le Atua," ona tatou mautinoa lea, o tino o tagata ōla e fa'atatau i ai, e pei o le molimau i le Kenese 2:7, "Ona 'avea ai lea o le tagata ma **tagata ōla.**" (Fa'a-Peritania: "**And man became a living soul,**" (o le agaga ōla lea). Ua molimau mai Peteru e fa'apea, "Na fa'asaoina ai tagata e to'aitiiti, e to'avalu lava ia, i le vai" (I Pete. 3:20). I le Tusi Pa'ia fa'a-Peretania ua fa'aaogāina ai, e lē o le 'upu tagata, a e peita'i o **souls**, (agaga); auā o le tasi lea uiga mautinoa o le 'upu "agaga," o tagata ōla ia. "**Wherein few, that is, eight souls** (tagata e to'avalu), **were saved by water.**"

Ua tele ona fia fa'aumiumi pea o lenei fa'amatalaga, a e peita'i ua lē lava se avanoa. E ui ina e i ai nisi tala, po o nisi fo'i mau, i le Tusi Pa'ia o lo'o femēmēa'i ai le to'atele, a e 'aia le popole vale ai; auā e lē mafai o na fete'ena'i o afioga a le Atua. Tau lava ina ia tatou su'esu'e pea ma le ma'elegā fa'amaoni i luma o le Atua e tatau ai, o le a lē mafai lava ona nātia e Ia o Lona finagalo iā te i tatou.

Manatu Fa'aopoopo: I le amataga lava o le finauga tele i le vā o le 'upu moni a le Atua ma le a'oa'oga sesē fa'afelāva'i a le ti'āpolo, e lua ta'utinoga ua feagai ma le fanau a tagata, o le afioga fa'amaoni a le Atua ma le a'oa'oga pepelo fa'a'ole'ole a Satani. Sa fetalai le Atua, "E te ōti ai lava" (Kene. 2:17). A e sa fa'afelāveia loa e le fili le fetalaiga a le Atua i lona fai atu, "Lua te lē ōti lava" (Kene. 3:4).

E ui tonu le a'oa'oga moni fa'ale-Tusi Pa'ia i luga o lenā afioga a le Atua ua fa'ailoa mai ai le i'uga mai le agasala, o le ōti lea e lē toe iloa ai pe lagona se mea. (Fa'aaogā le Faila. 9:5, 6, 10).

A e peita'i le a'oa'oga ua 'ese mai ai, ua so'ona fa'amamafaina ai le lē i'u vale o le agaga e pei o le folafolāga pepelo fa'a'ole'ole a Satani, "Lua te lē ōti lava." O a'oa'oga 'ese'ese ma taofiga fa'a-fa'apaupau, o sauniga fa'ataulaitu e fa'asesē ai, o pulekatorio (purgatorial) ma āna a'oa'oga o lo'o fe-pi'iti i ai, e i ai talosaga mo ē ua oti, o fua matua uma lava ia o le pepelo a Satani na faia i le fa'ato'āga i Etena.

6. Ia malamalama lelei i le a'oa'oga e pei ona fai atu nei: E lē o le leai o le agaga mafaufau i le tagata soifua, a o lona uiga, e leai se agaga ōla pea po'o se aitu o le tagata pe a ōti.

III. E ui i le taofi ta'atele e fa'apea, o le agaga, o le vaega lea o le tagata e lē manumalō i ai le ōti, a 'ua lē fa'apea o na a'oa'o mai o le Tusi Pa'ia.

1. **Salamo 89:48** O ai se tagata na te lavea'iina lona agaga ai le pule a le tu'ugamau? O le tali, e leai se tagata na te mafaia lea mea, a e manumalō le tu'ugamau i le agaga.
2. **Mataio 10:28** O le a'oa'oga lenei a Iesu ua manino ona Ia fa'ailoa mai ai, e fano le agaga e pei fo'i o le tino.

IV. Pe a fa'amalepeina le fa'atasiga o le mănāva o le ōla ma le tino ēfuēfu e fo'i atu ai lea o le tagata i le 'ele'ele, e fa'aumatia fo'i i lea lava aso ōna manatunatu (Sala. 146:4). A e po o le i'uga 'ea la lenā o le tagata? Fa'afetai i le Atua, e leai, a o le a fa'atalitali o ia i le tu'ugamau e fai mōna fale se'ia o'o ina suia o ia (Iopu 14:14; 17:13).

1. **Kolose 3:3, 4** O ē ua maliliu ma le fa'atuatua ōla iā Iesu, "ua lilo ō latou ōla fa'atasi ma Keriso." Ona toe maua lea āfea? "Pe a fa'aali mai Keriso lō tatou ōla, o na iloa ai lea o 'outou fa'atasi ma Ia i le manuia." Ioe, e lē o le ō loa i le manuia pe a ōti, a e fa'ato'ā taunu'u lea fa'amoemoe pe a fa'aali mai Keriso i Lona toe afio mai.
2. **Tito 3:7** O ē ua ta'u amiotonuina i le alofa tunoa o Keriso ua fai i latou ma suli e tusa ma le fa'amoemoe i le ōla e fa'avavau.
3. **I Kori. 15:52-55** O le fa'amoemoe i le ōla e fa'avavau, e fa'ato'ā fa'ataunu'uina lea i le aso o le toe tutū.

TAULOTO: I Ioane 5:11-12.

O FEA O I AI Ë UA MALILIU?

- I. Fai mai e tusa ma le 33,000,000 tagata e maliliu i le lalolagi i tausaga ta'itasi uma. O fea ua latou ò i ai?

Iopu 14:10 "A o le tagata e òti o ia, ma ta'atia, e tō fo'i le mănāva a le tagata, ona i fea lea o ia?" E to'atele ua latou fia maua tali malamalama i lenei fesili a Iopu, i le e lē sa'ili mamao mai fo'i se tali, auā o lo'o i ai le tali malamalama i totonu o le Tusi Pa'ia.

I Tesa. 4:12 Ua finagalo le Atua ina ia tatou malamalama lelei "i le matā'upu i Ë o momoe."

1. Ua fa'atusaina le maliu o le tagata i lenei fa'atusa matagofie, **o le moe**.

- a. **Salamo 13:3** O le tatalo a Tavita 'ina ne'i moe o ia i le òti, a e le'i o'o 'ina fa'amalamalamaina òna mata.
- b. **Galu. 7:60** Na moe (maliu) Setefano ina ua fasia o ia.
- c. **Ioa. 11:11-14** Sa fa'aaogāina e Iesu lenei fa'atusa i Lana fetalaiga e uiga i le maliu o Lasalo. "O lo'o moe lā tatou uō o Lasalo." A e mulimuli ane ua Ia matuā ta'utino atu, "Ua òti Lasalo." E lē iloa pe lagona se mea e lē o lo'o moe.

Manatu Fa'aopoopo: Se'i tatou manatunatu i lenei tagata o Lasalo, auā na toe fa'atūina mai e Iesu. E fā aso na òti ai Lasalo, i le e fā fo'i lā aso sa tatau o na nonofo ai o ia i le lagi e tusa ma le a'oa'oga ua masani ai le to'atele. O le tagata amiotonu Lasalo, o le uō a Iesu. E le'i vala'au Iesu, "Lasalo e, inā alu ifo ia mai le lagi;" a e peita'i, "**Lasalo e, inā sau ia i fafo**" mai le tu'ugamau o lo'o e i ai. Na fetalai atu loa Iesu i le motu o tagata, "Tatala ia iā te ia, inā tu'u atu ia e alu." Ona toe fealua'i ai lea o Lasalo ma ua latou mafuta fa'atasi ma tagata e pei ona sa masani ai a o le'i òti o ia. A e po'o fea lā o lo'o tusia mai ai se tala po o se fa'amatalaga a Lasalo e tusa ma le mau va'aiga òfoōfogia sa feagai ma ia i le lagi i na aso e fā? (Ioane 11:39-44). E le'i iloa ni mea e Lasalo i nā aso e fā, auā o ia sa "moe i le òti."

2. A e po o fea o lo'o latou momoe ai?

- a. **Iopu 7:21** O lo'o latou ta'o'oto i le 'ele'ele.
- b. **Iopu 17:13** Ua fofolaina o latou moēga i le pōuliuli, ua fai le tu'ugamau ma ò latou fale.

3. Po o le ā le molimau a le Tusi Pa'ia i Ë ua òti, po o latou iloa mea o tutupu i le lalolagi, pe fai ni o latou mafaufauga?

- a. **Salamo 146:4** E fa'aumatia i lenā lava aso òna manatunatu.
- b. **Iopu 7:9, 10** E lē toe fo'i i lona fale, e lē toe iloa i le mea sa i ai o ia.
- c. **Iopu 14:12** E lē āla, e lē fāgua se'ia o'o i le aso o le toe tutū.
- d. **Iopu 14:21** Latou te lē iloa se mea o mea o lo'o tutupu i le lalolagi, e o'o lava fo'i i mea o tutupu i ò latou aiga totino.
- e. **Faila. 9:5, 6** Latou te lē iloa se mea e tasi. E lē toe alolofa, pe ita, pe mātatau'a.
- f. **Sala. 88:11, 12** O le tu'ugamau, o le nu'u lea "e galo ai mea."
- g. **II Tupu 22:20** Na fa'aopoopoina atu le tupu o Iosia i òna tamā (na maliu o ia), i na ia lē va'ai òna mata i le malaia o le a o'otia ai le nu'u.

4. E lē o i le lagi e pei o le taofi o lo'o ta'atele nei.

- a. **Isaia 38:18** Ua fa'afiti mai le Tusi Pa'ia, "E lē fa'ane'ene'e lē òti iā te oe." A e fa'i fo'i o le taimi tonu lea e fa'ato'ā avanoa lelei ai le āla mo ni fa'ane'ene'ega e tatau ai i luma o le Atua.

- b. **Sala. 115:17** “E lē vivi’i atu iā Ioa ē ua ōti,” a e fa’i fo’i o lo’o latou pepese fiafia i le manuia (Sala. 6:5).
- c. **II Tupu 22:20** Sa ta’utino e le aposetolo o Peteru, a ‘ua mavae tausaga e iva selau ma ōna tupu talu o na maliu o Tavita, fai mai, "Auā e le’i alu a’e Tavita i le lagi." Ua maliu o ia, ua tanumia fo’i, ua iā i tatou lona tu’ugamau ua o’o mai i ōna pō nei." (Silasila i le Salamo 17:15). Ua molimau mai ai Tavita i le fa’amoemoe sa iā te ia.

Manatu Fa’aopoopo: Fa’auta e le’i alu a’e i le lagi Tavita, le tā kitara ma le fatu pese mālīe o Isaraelu, o lē sa matuā iloga o na fiafia i ai le Atua. A e fa’aapefea lā ‘ona toe gasolo mulimuli nei o nisi amiotonu fa’alē mautinoa e toe tā kitara i le lagi ma vivi’i atu i le Atua? Ua matuā tele le fete’ena’i o taofi o le lalolagi, meāmanū o lo’o fa’aali mai e le Tusi Pa’ia le sa’o, o lo’o latou momoe uma lava ma fa’atalitali mo le aso e fāgua ai ma toe tutū mai ai i le ōla fou.

- d. **Ioane 20:17** E o’o lava fo’i i le Ali’i Fa’aola, e le’i afio a’e o Ia i le lagi i le aso o Lona maliu.
- 5. O le ā se a’oa’oga a le Tusi Pa’ia e uiga i le taimi tonu e maua ai tau i o ē amiotonu?
 - a. **Luka 14:13,14** Ua manino ona fa’aailoa mai e Iesu, "E lē o le aso e ōti ai," a e peita’i "e tauia ‘oe i le toe tutū mai o ē amiotonu."
 - b. **Fa’aal. 22:12** E maua tau i pe a afio fa’alua mai Iesu.

II. Ua manumalō Keriso i le pule sauā a le ōti.

- 1. **Eperu 2:14** O le ti’āpolo ua i ai le malō e ōti ai. O lana galuega lea ia ōti tagata. Pe a na faia le mea ua loto i ai le ti’āpolo, e leai se tagata e toe fa’atūina mai.
- 2. **II Timo. 1:10** A e peita’i ua fa’aumatiaina e Iesu le faigatā o le ōti. Ua liua e Iesu le ōti i le moe e toe āla mai ai. Ua totoe na o le "āta" o le ōti (Sala. 23:4), ina ua fa’a’umatiaina e Iesu lona tino.
- 3. **Ioane 5:25-28** O lo’o i le Ālo o le Atua le mana e fāgua ai i latou uma o ē o momoe i tu’ugamau.
- 4. **Ioane 6:39-40** O le aso gata’aga e toe fa’atūina mai ai e Keriso Lana fanau o ē o momoe.
- 5. **I Kori. 15:26** O le toe fili e fa’aumatia, o le ōti lea.

"O le ōti i le tagata Kerisiano, ua na o se moe po o sina mapu filemū i le mea ta’aligoligoa."- O le Fa’anaunauga o Tupulaga, itulau e 787.

TAULOTO: Failauga 9:5, 6.

O TOE TUTŪ E LUA MA LE ŌTI FA'ALUA

I. E lua toe tutū ta'uta'ua ua a'oa'oina mai i le Tusi Pa'ia.

1. **Ioane 5:28, 29** O le toe tutū i le ōla, ma le toe tutū i le fa'asala.
2. **Fa'aal. 20:5** E toe tutū mai ē amiotonu i le afio fa'alua mai o Iesu (I Tesa. 4:16), a e fa'ato'a toe ola mai ē amio leaga i le fa'ai'uga o tausaga e āfe o le meleniuma.
3. **Mata. 24:30, 31** Pe a toe tutū mai ē amiotonu, o le a fa'apotopotoina i latou e Keriso ma Āna agelu.
4. **Isaia 26:19** O lea aso o le a fa'alogoia ai le si'ufofoga o le Ālo o le Atua o lo'o vala'au, "inā āla mai ia, ma alalaga fiafia 'outou o ē nonofo i le ēfuēfu."
5. **Iopu 14:15** Sa fa'amoemoe fiafia Iopu i le aso o le a ia fa'alogoia ai le vala'au a Iesu, ma o le a ia tali fiafia i ai.
6. **I Kori. 15:54-57** Latou te ō a'e ma le pese o le manumalō, "Le oti e, o fea o i ai lou tui? Le tu'ugamau e, o fea o i ai lou manumalō?"
7. **Fa'aal. 20:5-9** Pe a o'o ina toe fa'atutūina mai 'au a le amio leaga, o Satani o le a ia fa'apotopotoina i latou.
8. **Fa'aal. 20:13** O le a toe fa'atutūina mai ē ua ōti mai le sami ma seōli, (o le tu'ugamau lea).

Manatu Fa'aopotopoto: Ua fa'apenei le fa'amatalaga a Misi Parate i le uiga o lenei 'upu "seōli," e pei o na fa'aaogāina i le Fa'aal. 20:13; *"Le ōti ma seōli. Ua fa'atusaina i ali'i e to'alua e pule i tagata ōti (I Kori. XV). E lē toe taofia tagata, a e tu'uina mai."* - **O le Tusi ua Fa'amatalaina ai le Tusi Pa'ia**, (L.M.S.), itulau e 671. O ai nei ali'i e to'alua ua ta'ua mai i le I Korinito 15:55? O le ōti ma le tu'ugamau. O seōli lā, o le tu'ugamau lea.

II. Po o le ā se a'oa'oga ua tatou maua e uiga i le ōti fa'alua? (Fa'aaogā le matā'upu e XXXIV i le Tusi 1, vaega e 3).

1. **Fa'aal. 20:6** E lē o'o le ōti fa'alua i ē amiotonu, o ē ua manumalō. (Fa'aaogā ma le Fa'aal. 2:11).
2. **Fa'aal. 20:14** O le ōti fa'alua, o le lepa āfi lea.
3. **Fa'aal. 20:15** E o'o le ōti fa'alua iā te i latou uma o ē ua lē o tusia o latou igoa i le tusi o le ōla.

III. O le ā le tino e toe tutū mai ai? Po o le 'a tatou iloina i latou o ē sa tatou masani ai i lenei ōlaga?

1. **I Kori. 15:35** O le fesili: "Pe fa'apefea o na tutū mai o ē ua ōti? Se ā fo'i le uiga o le tino latou te ō mai ai?"
2. **I Kori. 15:36-38** **O le tino e alu ifo ma le tagata i le tu'ugamau, o lona tino fo'i lea e toe ōla mai ai o ia, e pei o na fua mai o le saito (a e lē o se isi itū'aiga la'au) i le fatu saito ua tu'u i le 'ele'ele.**
3. **I Kori. 15:44** A e peita'i o lenei le 'ese'esega: Sa lūlūina, o le tino fa'ale-tino (le tino ma'i, vaivai, i'u vale), a e toe fa'atutūina mai, o le tino fa'ale-agaga. E tumau pea ōna foliga muamua, a e peita'i ua i ai le fesuia'iga ōfoōfogia, ina 'ua 'avea o le tino fou ua fa'a'ato'atoaina i le malosia ma le soifua malōlōina, ma e lē toe ōti lava.

4. **Ioane 20:16** O le fa'alogo atu i Lona si'ufofoga na vave iloa ai e Maria le Ali'i ina ua toe soifua mai o Ia.
5. **Ioane 20:29** Na fa'apea fo'i 'ona vave iloa e Toma le Ali'i ina ua va'ai iā te Ia.
6. **I Kori. 13:12** O le a fa'apea ona tatou iloa tinoina o mātua, ūso, tuafāfine, fanau, ma uō i le aso fiafia o le toe tutū.
7. **I Kori. 15:51-54** E toe fa'atutūina mai le 'au pa'ia i tino lē ōti lava. E liua i latou e pei o le 'emo o le mata.
8. **Filipi 2:20, 21** O le a faia o latou tino ia fa'atatau i Lona tino matagofie (I Ioane 3:2).

TAULOTO: Ioane 5:28, 29.

O LE FA'ASALAGA MO Ē AMIOLEAGA

I. O le i'uga mata'utia ua folafolaina mai e le Atua mo i latou uma o ē fa'alologatā, o le fa'aumatiāga lea e fa'avavau.

1. **I Pete. 4:17** E amata le fa'amasinoga i le aiga o le Atua, pe se ā lā "le gata'aga o ē fa'alologatā?"
2. **Mata. 25:41** O le a fa'apuapuagātiaina le 'au lē salamō i le āfi e fa'avavau ua saunia mo Satani ma āna agelu. E lē o mū nei lenā āfi.
3. **II Tesa. 1:9** O le i'uga o le a maua mai i lenā āfi e fa'avavau, o le fanōga e fa'avavau lava. Ua āla o na ta'ua o le "āfi e fa'avavau," 'ona o le i'uga mai le āfi, o le fa'aumatiāga lea e fa'avavau, po o le "sala e fa'avavau" (Mata. 25:46).
4. **Mata. 3:11, 12** O le āfi o le a fa'aumatiaina ai tagata amio leaga, fai mai, "e lē mā-tineia."

II. O le ā se fa'amatalaga i lenei āfi e fa'avavau, e lē mā-tineia? "E fa'avavau," e fa'asino lea i le i'uga mai le āfi, a e lē o aso e mū ai.

Manatu Fa'aopoopo: O le fa'aaogāina ma le fa'atatauina e tagata Iutaia o lenei 'upu fa'avavau (i mea e 'ese mai i lō ni uiga fa'ale-Atua, po o nisi fo'i uiga tumau fa'ale-lagi ma le fa'ale-tala lelei), sa mautinoa lelei lava, e lē o lona uiga lenei, o le lē fai o se gata'aga o se mea. A e peita'i o le fai pea, po o le tumau pea, se'ia o'o ina ua 'uma le aogā o se mea, po 'ua o'o i ōna lava aso e tataua 'ona fa'agataina mai ai, po 'ua i'u fo'i le ōla o le tagata e fa'atatau i ai le fa'amatalaga.

E i ai le Teute. 15:17, fai mai, "Ona 'avea lea o ia ma 'au'auna iā te 'oe e fa'avavau." O lona uiga mautinoa, o le a 'avea ma 'au'auna lea tagata i aso uma e tumau ai le ōla iā te ia, ona gata mai ai lea; auā e lē mafai se tasi ona toe 'avea ma 'au'auna pe a o'o ina ua ōti.

Ma le Iona 2:6, ua fa'amatalaina mai ai e Iona le uiga o lona alu ifo i le manava o le i'a, fai mai: "Ua 'ou alu ifo i vae mauga; ua fa'amauiina fa'amaui o le lalolagi i luga iā te a'u e fa'avavau." A e po o le ā le 'umi o lenā "fa'avavau?" Sa na o le tolu o aso (Iona 1:17).

1. E lē mā-tineia. O lona uiga, e lē mā-tineia se'ia o'o ina ua matuā iloga o na fa'aumatiaina o 'au a le amio leaga.

Mare. 9:43-46 I "Kena," i le āfi e lē mafai ona tineia, o i ai ē lē mamate ō latou ilo.

O Kena, po o le Vanu o Hinoma: Sa tū pea i luma o mata o le nu'u, i tua atu o le 'aupā o Ierusalemā, le āta o le i'uga o ē amio leaga, e pei o na fa'asino ane e Iesu iā te i latou.

Manatu Fa'aopoopo: O Kena, le Vanu o Hinoma, i le itū i matū o Ierusalemā, sa tapua'i ai ānamua tagata i le tupua o Moloka (II Nofo. 28:3; 33:6; Ierem. 32:35). Ona mulimuli ane lea, ua 'avea le Vanu o Hinoma ma mea sa la'u i ai otaota o le a'ai o Ierusalemā, atoa ma tino o manu mamate, fa'apea fo'i ma tino o tagata amio leaga o ē sa fa'asalaina i le ōti.

Sa tafu ai pea le āfi i le Vanu o Hinoma e susunuina ai nei otaota; auā pe 'ana leai se āfi, po ua tupu ai se fa'ama'i i le leaga o otaota. O le āfi la lea sa igoa o le āfi o Kena. Matau lelei, fai mai, so'o se mea sa tutuina atu i lenei āfi o Kena, sa mū lava i le āfi e lē mā-tineia. E leai se mea na lafo i ai e le'i fa'aumatia, pe na te talitalia le āfi, pe tumau ai e lē mū.

2. Fai mai, "e lē mamate o latou ilo." E fa'asino lea i mea sa i 'autafa o le āfi o le'i mū, o mea ia sa fa'aumatia e ilo. Ua fa'apea o na fa'amatalaina mai o le fa'aumatiāga o tagata agasala, e leai so latou e sao pe totoe i le aso o le lepa āfi.
3. E mū pea le āfi pe a fafaga i ai, a e a leai se mea e toe tu'u atu i ai, ona mate ai lava lea. E ui la i se to'atele na'uā o ē o le a malaia, e fa'amata ai lava o le a lē taitai 'ona lava o i latou uma ia mo le fafagaina pea o le āfi e fa'avavau.

- a. **Ierem. 17:24-27** O le valo'aga a Ieremia: Pe 'afai a e lē usiusita'i le nu'u i poloā'iga a le Atua, o le a i'u lava 'ina tutuina e leova le āfi i faitoto'a o Ierusalema, e susunuina ai ōna maota, e lē tineia lava. A e po o le ā 'ea lā se i'uga na maua mai i lenā āfi e lē mātineia?
- b. **II Nofo. 36:19-21** O le fa'ataunu'uga o le valo'aga a Ieremia, fai mai, na matuā iloga lava o na fa'atafunaina o Ierusalema, 'ona mate ai lava lea o le āfi ina ua lelefu le a'ai. Ioe, o lona uiga, e lē mātineia se'ia o'o 'ina ua uma o lana galuega.

III. O le a'oa'oga mata'utia fa'apea: Pe a ōti le tagata amio leaga, o na alu ai lea i le mea o lo'o mū ai le āfi e fa'apuapuagātiaina ai o ia e fa'avavau, fa'avavau lava ma le lē maua lava e ia o se mapusaga. E aunoa lava lea a'oa'oga ma se fa'avae tonu fa'ale-Tusi Pa'ia. E lē gata i lea, a o se a'oa'oga fa'alē-migao lava lea i le Atua, ina ua fa'afitia ai Lona uiga aupito tāua ma le ta'uta'ua, **o le alofa lava lea.** Ua 'avea lenei a'oa'oga mata'utia ma le sesē tele, ma āla ua fia liliu 'ese ai nisi e to'atele mai le Atua ma Lana 'upu moni, talu ai 'ona ua lē mafai e i latou ona fa'afeso'ota'iina i o latou mafaufau o se faiga sauā tele fa'apenā ma le uiga alofa o le Atua o lo'o molimau mai ai le Tusi Pa'ia.

E moni, o le a lē fa'asaina lava e le Atua o ē agasala (Esoto 34:7). A e peita'i e lē so'ona fa'asalaina e le Atua ma lē sauā, a e i ai le amiotonu i mea uma lava Na te faia. O le a lagona e tagata agasala le puapuagā fa'ale-maufau e lē ma-fa'amatalaina, 'ina o le a latou mautinoa, ua fa'ate'a 'eseina i latou ma le Atua e fa'avavau. "E lafo i le pōuliuli i fafo, e i ai le taufai tagi auē ma le lilivau o nifo" (Mataio 22:11-14). E ōti i latou i le ōti fa'alua, ma o le a fa'aumatia i le āfi se'ia o'o ina ua lelefu o latou tino (Malaki 4:1-3).

1. **Salamo 37:20** O le a fano i latou e pei o le ga'o o tama'i mamoe pe a susunuina i le āfi, e lē tumau, a e mavae atu e pei o le āsu. E fa'apea lā 'ona ta'afilifili ma feōi i le āfi e fa'avavau, fa'avavau lava?
2. **Isaia 1:28** E "o'o fa'atasi" le malaia o ē solitulafono. E fa'ataunu'uina i le fa'ai'uga o le meleniuma (Fa'aal. 20:9, 10), a e lē fa'apea o lo'o fa'asalaina nei; auā e le'i maua le tau aofa'i o 'au a le amio leaga se'i fano "fa'atasi" ai.
3. **Mataio 8:29** Ua iloa lelei e temoni, o lo'o lumana'i pea le aso o le a fa'apuapuagātiaina fa'atasi ai le 'au agasala uma ma fa'aumatia ai e fa'avavau.

Ua manino ona fa'ailoa mai i le Tusi Pa'ia le i'uga o ē amio leaga, fai mai, e fa'aumatia i latou. Po o le uiga mautinoa 'ea lenā o le 'upu "fa'aumatia," ia ōla pea ma tigā ma le tagata i le āfi e fa'avavau, fa'avavau lava?

TAULOTO: Malaki 4:1, 3.

SAUNIUNIGA MO LE OLA E FA'AVAVAU

I. O le fa'aolataga, o le mea alofa lea a le Atua mo le taimi nei.

1. **II Kori. 6:2** Fa'auta, o lenei le aso e fa'aolaina ai. O le taimi nei e talileleia mai ai tatou.
2. **Eperu 3:7, 8** O le aso nei, 'aia le fa'ama'a'a ai o 'outou loto. Ia fa'aavanoaina o tatou loto i le taimi nei mo le taliaina o le fa'aolataga mai le Atua.
3. **Kolose 4:5** Ia fa'aaogaina aso o lenei olaga. O lona uiga, e leai se isi vaitaimi i tala atu o lenei olaga e mafai o na tatou toe fa'aaogaina mo le fa'aolaina o i tatou.
4. **Eperu 2:3** Pe sao fa'apefea pe a fa'atamala i le fa'aolataga e matuā tele. Sa leai se fa'amoemoe o Paulo i se isi tala'iga i tala atu o le oti e toe fa'asaoina ai i latou o e sa fa'atamala i lenei olaga.

Manatu Fa'aopoopo: E tolu vaega o le taimi, a 'ua na o le tasi o na vaega e pule i ai le tagata, o le taimi nei lea. O lo'o i o tatou tua le faitoto'a ua punitia, e le mafai e se tasi ona toe tatalaina, o le taimi tuana'i lea. E le mafai e se tatou 'ona toe fa'afo'isia mai o sina minute e tasi o le taimi ua tuana'i atu; ua o se manu lele ua lele atu e le toe fo'i mai. E fa'apea fo'i ma le taimi o lumana'i. Ua o se faitoto'a ua avanoa i o tatou luma, a e peita'i ua i le finagalo ma le silafaga a le Atua pe tatou te ulu atu ai pe leai. E le pule le tagata i le taimi lumana'i. Ua mana'o le fili ia fefo'ifo'ia'i o tatou manatu i le va o le taimi tuana'i ma le taimi o lumana'i, a 'ia 'aia ne'i tatou fa'aaogaina le taimi nei; auā o le vaega lea e tasi o le taimi tatou te pule i ai ma 'ua tataua 'ona tatou sa'ili atu ai mo le fa'aolaina o i tatou.

5. **Fa'ata. 27:1** E fa'alētonu le taimi o lumana'i; auā e soifua i le aso, a e lamatia e le oti i le aso ā taeao. (Fa'aaoga ma le Iakopo 4:13-16).
6. **Luk. 12:16-20** Ua ta'ua lenei tagata o le "vale," 'ona ua tele lana taupulega mo le taimi o lumana'i, a 'ua ia le fa'aaogaina le taimi nei e teuteuina ai lona va ma le Atua.

II. E leai se sa'iliga, po o se sauniuniga, e toe fai i tala atu o le oti.

1. **Eper. 10:26, 27** E leai se toe avanoa, a e na o le fa'atali mo le fa'asalaga.
2. **Faila. 9:5,10** Ia fa'aaogaina aso o lenei olaga e sauniuni ai mo le ola; auā e leai se galuega e toe mafaia pe a o'o 'ina ua sau le oti.
3. **Sala. 6:5** E leai se toe manatu i le Atua pe a oti.
4. **Sala. 27:13** Sa mautinoa lelei e Tavita, e gata i aso o lenei olaga ona mafai ona o'otia ai o le loto i le agalelei o le Atua.

Manatu Fa'aopoopo: O le tulaga o i ai le tagata pe a oti, o lona lava lea tulaga e le toe māliua, pe lelei, pe leaga. O lea ua apoapoa'iina ai i tatou ia fa'amauiina lo tatou vala'auina ma lo tatou filifilia, ina ne'i o tatou i'u vale (II Pete. 1:10). I le ma lenei, ia galulue a'ia'i (manu o tumau le ola) ina 'ia fa'aolaina i tatou (Filipi 2:12).

III. Ua tu'uina atu e le Atua i tupulaga uma ma tagata uma ta'ito'atasi se avanoa e mafai ona latou talia ai o Lana fa'aolataga. Ua foa'iina atu fo'i ia te i latou ma se malamalama ua lava, latou te mafai 'ona iloa ai o Lona finagalo.

1. **Roma 1:18-20** O galuega tetele o le foafoāga e mafai ona iloa ai o matā'upu fa'avae o Lona finagalo. E lagona lava i mafaufau o i latou o e ua latou sa'ilia le

fa'aaliga tau le Atua moni ma Lona finagalo alofa. O lea o le a lē mafai ona tali atu ai se tasi i luma o le Atua, "E leai se avanoa na Ē tu'uina mai mo a'u." "O lea fo'i ua lē mautali ai i latou." (Fa'aaogā ma le Galuega 17:26, 27; Salamo 19:1-4).

2. **Sala. 87:4-6** E matauina e le Atua le mea na fanau mai ai tagata ta'ito'atasi uma, ma o le a fa'amasinoina i latou e Ia e tusa ma le malamalama ua foa'ina atu i ō latou nu'u ma ō latou tupulaga.
3. **Roma 2:11-16** E o'o fo'i i nu'u 'ese, o le a fa'amasinoina i latou e le Atua e tusa ma lō latou fa'aaogāina o se vaega o le malamalama ua lagona i ō latou loto.
4. **Mata. 8:11, 12** O le a i ai i le malō o le Atua nisi e to'atele o ē sa lē manatu i ai o le a latou maua le manuia. Ia manatua le afioga a le Atua iā Samuelu, "E lē va'ai Ieova pei o le va'ai o tagata, auā e va'ai tagata i le tino, a e va'ai Ieova i le loto" (I Samu. 16:7).

Manatu Fa'aopoopo: Ua fa'apenei le fa'aaliga a se tasi ali'i Kerisiano, "Pe 'a o'o ina o le a 'ou fa'atasi ai ma le 'au pa'ia i le lagi, e tolu mea o le 'a ōfo tele ai lo'u loto:

1. Ona o le a 'ou iloina atu nisi e to'atele o ē sa 'ou fa'apea, e lē taitai lava 'ona maua o sō latou tofi fa'atasi ma Keriso.
2. Ona o le a 'ou matauina ua lē o i ai nisi e to'atele, o ē sa 'ou fa'apea, e tataua lava 'ona i ai i le malō o le Atua.
3. A o le mea o le a silisili 'ona ōfo ai o lo'u loto, ona ua i ai fo'i ma 'ita nei."

IV. E lē avanoa pea le faitoto'a o le fa'aolatāga, a e sau le aso e tapunia ai.

1. **Mataio 25:10** E o'o mai le aso e tapunia ai le faitoto'a.
2. **Luka 13:27** Pe 'a o'o ina ua tapunia le faitoto'a, o le a i ai i latou o ē o le a tu'itu'i atu, a e peita'i o le a lē toe tatalaina le faitoto'a. (Fa'aaogā ma le Luka 13:27, 28).

V. O lo'o i ai nisi fa'ata'oto a Iesu ua matuā iloga 'ona Ia ta'u sesēina ai o le fa'amoemoe i se isi avanoa e toe tu'uina atu mo i latou o ē sa fa'atamala i lenei olaga.

1. **Mata. 25:31-33** O le a i ai na o vasega e lua i le aso o Lona afio mai, **o mamoe ma 'oti**. E leai se galuega ua ta'ua mai o le a mua'i faia 'ina 'ia toe taumafai ai 'ona liua o nisi 'oti ina 'ia 'avea ma mamoe.
2. **Mata. 13:47-50** E lafoa'iina i'a leaga, a e fa'aaogāina na o i'a lelei.
3. **Mata. 13:24-29** E leai se galuega e toe liua ai titania 'ia 'avea ma saito lelei, a e peita'i o le a fusia i fusi ma susunuina.

Manatu Fa'aopoopo: Ia matauina le fa'amatalaga a Iesu i le uiga o le fa'ata'oto i le saito lelei ma titania (F. 36-43). "O le seleselega, o le gata'aga lea o le lalolagi." Pe a ōti sē tasi, e tusa ua o'o iā te ia le gata'aga o le lalolagi; auā e soso'o le moe i le tu'ugamau (na te lē iloa ai se mea, Faila. 9:5, 6), ma le toe āla mai i lea aso. Pe 'afai sa "titania" i le aso na ōti ai, o le a fa'apenā lava fo'i pe a o'o i le seleselēga.

1. **Faila. 11:3** "O le mea e pa'ū i ai le la'au e i ai pea ia." Fai mai le fa'amatalaga a Misi Parate (L.M.S.) i lenei fuaiupu: "Ua fa'atusa i le ōti. O le mea e mamafa i ai le la'au e pa'ū ai; a pa'ū e ta'atia pea i le mea na pa'ū ai. E fa'apea le tagata. O le mea e mamafa i ai lona loto, po o le manumanu, po o le alofa, e ōti ai o ia. E lē toe liliu pe a o'o i ai."
2. **Kenese 19:17** O le vala'au alofa a le Atua, "Inā sola ia e te ōla ai." Sola nei, 'aua le fa'atuai.

3. II Pete. 1:10

Ia fa'amauiina lō 'outou vala'auina ma lō 'outou filifilia. Ia fai nei manū o maua pea le ōla.

"Ia 'outou ma le uiga lenei, o le fa'agesegese. Soia le faifai mālie i le galuega o le lafoa'iina o agasala ma le sa'ili i le loto mamā e maua mai iā Iesu.... O se mea o le a tatou lē manumalō i ai, o le a manumalō mai lea iā i tatou, ma galuea'iina lō tatou malaia.... E to'atele o lo'o latou fa'afilemūina ō latou loto fuatia ifo i le manatu fa'apenei, latou te mafaia lava 'ona liliu 'ese mai ō latou āla leaga i so'o se aso e manatu ai i latou. Ma e ui lava i lō latou faiaga pea i le vala'au alofa a le Atua, a o le a fa'apea lava i nisi aso o lumana'i o na toe lagona ai e i latou le musumusuga a le Agaga. O lo latou manatu, e ui lava 'ina sa latou fa'alē-amana'iaina le alofa tunoa o le Agaga ma sa tu'uina atu pea lō latou mafau fau ma lō latou malos i le itū a Satani, a e o le a mafai lava 'ona latou liliu 'ese mai lō latou āla sesē pe a latalata mai le malaia. A e peita'i e lē o se mea faigofie lea mea." - O La'asaga iā Keriso, itulau e 36, 37.

TAULOTO: Failauga 9:10.

O IESU MA LE FAOMEA I LE SATAURO

I. Na ōle atu le faomea iā Iesu, “Le Ali’i e, ‘ia ē manatua mai a’u, pe a ē afio mai i lou malō.” Ona fetalai atu ai lea o Iesu iā te ia, "E moni, ‘ou te fai atu iā te ‘oe o le asō tā te fa’atasi ai ma ‘oe i parataiso" (Luka 23:42, 43).

1. Ua fa’alē malamalama nisi e to’atele i le uiga o lenei tali a Iesu, fa te i latou, o le aso lava lea na feiloa’i ai le Ali’i ma le faomea i parataiso.
2. O lea o le a se’i muamua ai o na tatou su’esu’e ina ia tatou iloa, po o fea tonu o i ai lenei mea ua ta’ua o "parataiso."
 - a. **II Kori. 12:2-4** O parataiso, o le lagi tuatolu lea.
 - b. **Fa’aaliga 2:7** O parataiso e i ai le la’au o le ōla.
 - c. **Fa’aal. 22:1, 2** O le la’au o le ōla o lo’o tū i 'auvai o le vaitafe o le ōla, a o le vaitafe o le ōla fo’i o lo’o tafe ifo mai le nofoāli’i o le Atua.

Manatu Fa’aopoopo: O nei mau ua manino ona fa’ailoa mai ai, o parataiso, o le mea lea o lo’o afio ai le Atua, o le lagi tuatolu lea o i ai le la’au o le ōla, ma le vaitafe o le ōla, atoa fo’i ma le nofoāli’i o le Atua. Pe ‘afai la o le uiga moni lea o le folafolāga a Iesu i le faomea ia lā fa’atasi ma ia i parataiso i lea lava aso, po ‘ua tataui ai fo’i lā i lea lava aso ‘ona maua ai o se fesilafa’iga a Iesu ma Lona Tamā.

II. A e peita’i ua molimau mai le Tusi Pa’ia ma le leai lava o sina fa’alētonu e le’i fesilafa’i Iesu ma Lona Tamā i le aso o le fa’asatauroga.

Ioane 20:17 O le molimau a Iesu lava e pei ona sa Ia fetalai atu ai iā Maria le Makatala (a o le aso tolu fo’i lea talu Lana folafolāga i le faomea), "'Ou te le’i alu a’e lava i lo’u Tamā." O lona uiga lā, e le’i afio a’e lava Iesu i parataiso i le aso o Lona fa’asatauroga; auā o parataiso, o le mea lava lea o lo’o afio ai le Tamā. A e toe fai mai Lana fetalai, "Ālu i o’u so’o, ma fai atu iā te i latou, **‘Ou te alu a’e i lo’u Tamā ma lō ‘outou Tamā’.**"

Manatu Fa’aopoopo: Ua aliali mai nei, o lo’o i ai le fete’ena’iga tele i le vā o le folafolāga a Iesu i le faomea ma Lana fetalai iā Maria. Pe ‘afai e moni o le aso lava lea o le fa’asatauroga na afio a’e ai Iesu i parataiso, po ‘ua sesē lā Lana fetalai iā Maria. A e pe ‘afai fo’i ua sa’o le fa’aaliga iā Maria, po ua lē taunu’u ai lā le folafolāga a le Ali’i i le faomea e fa’apea, "O le asō tā te fa’atasi ai ma ‘oe i parataiso." O lea ua fesili fa’atauemu mai ai se tasi fili o le tala lelei, "Po o le fea o lenei to’alua ua pelogia e Keriso, o le faomea, po o Maria? "

III. Ua āla ona lē ō gatasi o le folafolāga a Iesu i le faomea ma Lana fa’aaliga iā Maria, ona o le tasi koma i le Luka 23:43, ina ua sesē o lona tulaga.

1. **Luka 23:42** Ia matau lelei le uiga ma le a’ano o le ōlega a le faomea, fai mai, "Le Ali’i e, ia ē manatua mai a’u, **pe a ē afio mai i lou malō.**" Sa leai se fa’amoemoe o le faomea mo lenā lava aso, a e peita’i sa fa’asino i luma lana ōlega i le aso o le afio fa’alua mai o Iesu o le a Ia fa’apotopotoina ai Lana 'au filifilia (Mata. 24:30, 31).
2. **Luka 23:43** O lea la ‘ua fa’atatau tonu ai le tali a Iesu i lea lava mo’omo’oga o le faomea. "E moni, ‘ou te fai atu iā te ‘oe i le asō, (i le aso nei lava a o fa’apuapuagātiaina i ta’ua i luga o nei la’au), tā te fa’atasi ma ‘oe i

parataiso, (pe a o'o i lenā aso tele o le a āoina ai fa'atasi i parataiso le 'au pa'ia a le Atua)."

Manatu Fa'aopoopo: Ua sesē ona tū o le koma i luma o le "aso," a 'ua tatau ona tū i ōna tua mai e pei ona faia i luga. E ao ai la ona sui le "o le asō," i le "i le asō" ma o le a lē toe mana'omia ai fo'i la le "ai" o lo'o mulimuli i le 'upu "fa'atasi."

O le a fai mai nei nisi, Pe mafai fa'apefea ona tia'i o ni 'upu 'ua uma o na tusia mai? E ao ona tatou manatua, ua lē mā-'alofia le fa'aaogāina o le "o" ma le "ai" talu ai ona ua sesē le tulaga o le koma ma ua fa'auiga 'eseina ai fo'i le fetalaiga a Iesu. A e sēmanū lava e lē i ai ia 'upu i le fa'aliliuga o lenā fuaiupu pe 'ana sa'o le tulaga o le koma ma pupula lelei ai le uiga tonu o le folafolāga a Iesu i le faomea.

3. **Teute. 8:19** Ia matau lelei le 'upu "aso nei" ma le tulaga o le koma. (Fa'aaogā ma le Teute. 30:18; Saka. 9:12). Sa masani tagata i ōna pō ia o na fa'atomuaina o ā latou ta'utinoga tāua i nei 'upu, "i le asō," po o le aso nei," etc., na fa'apea 'ona latou fa'amamafaina o ā latou ta'utinoga.

a. E mafai i le fesuia'iga o le tulaga o le koma i se fuaiupu ona matuā liua ai lona uiga. Se'i fa'amalamalamaina i le fuaiupu lenei:-

i. **O le taofi, o Sione o se tama poto.** Ua malamalama lelei le uiga o lenei fuaiupu e fa'apea, o lo'o i ai le taofi e uiga iā Sione e fa'apea, o ia o se tama poto. E lē o se taofi o Sione lava ia, a e peita'i o le taofi o i latou o ē ua masani ma ia. A e pe 'afai o le a si'i nei le koma i tua mai o le 'upu "Sione," o le a lē gata ina sui ai le uiga o le fuaiupu, a o le a tatau ai fo'i ona fa'aopoopoina ma le "ia o," e fa'apea:

ii. **O le taofi o Sione, o ia o se tama poto.** Fa'auta! Ua 'avea le si'iga o le tulaga o le koma ma āla 'ua 'avea ai Sione ma tagata fa'afiapoto.

Manatu Fa'aopoopo: E lē taumate, na āla 'ona tusia sesē o le koma ona o le manatu sa iā i latou o ē na latou fa'aliliuina lenā mau mai le gagana Eleni, e fa'apea, pe a ōti le tagata amiotonu, ona alu a'e loa lava lea i le lagi e feiloa'i ai ma le Atua. O lea ua latou tu'uina ai le koma i le tulaga ua maua ai le uiga o le folafolaga a Iesu ua feagai lelei ma lō latou lava malamalama, a e sa lilo iā te i latou le fete'ena'iga po o le fenumia'iga o le a tupu mai ai.

b. O lo'o i ai le tasi fa'aliliuga o le Feagaiga Fou ua sa'o ai le tulaga o le koma, i le o lenei fo'i fa'aliliuga, o se fa'aliliuga lauiloa lava na faia e le ali'i a'oa'oina i le gagana Eleni, o J.B. Rotherham. O le a lomia pea 'upu fa'a-Peritania o lenei fa'aliliuga fa'atasi ma ō latou uiga fa'a-Samoa:

"Verily, to thee I say, this day, with Me shalt thou be in the Paradise." Luke 23:43, Rotherham's Translation of the New Testament.

"E moni, 'ou te fai atu iā te 'oe, i le aso nei, tā te fa'atasi ma 'oe i le Parataiso." (Fa'a-Samoa Luka 23:43).

c. Ona ua fai mai nisi, "Ua fia pule fua le Ekalesia Aso Fitu i le koma," o lea e fia si'itia ai ni tasi molimau se'i fa'amalamalamaina ai atili le taofi e pei ona fa'aalia atu nei:

O le ta'utinoga lenei a le ali'i a'oa'oina ma le lauiloa o E.W. Bullinger e uiga i lenei lava fuaiupu o lo'o tautalaga nei. Ua ta'uta'ua lenei ali'i 'ona o lona malamalama tele i le gagana Eleni, o le gagana fa'aānamua lea na mua'i tusia ai le Feagaiga Fou. Na tusia e lenei ali'i se tasi fa'amatalaga o le Tusi Pa'ia, i le sā lomia fo'i i le fale lomitusi o le Univesite o Okesefoti (Oxford University) i Egelani. O lana fa'amatalaga lenei e fa'asino tonu i le Luka 23:43, fai mai:

"O le āla e tasi e mafai ona fa'amalamalamaina ai lenei fuaiupu, o le fa'amasinoga lea o mănāvāga o i ai, i le o mănāvāga fo'i, o le galuega lava a tagata (ua fa'atusilimaina e le Fa'atonu); auā sa lē iloa lava ia mea o mănāvāga i le ulua'i tusiga fa'a-Eleni." - Companion Bible, Part V, Appendix 175.

IV. Na tusia le Feagaiga Fou i le vā o le T.A. 40 ma le T.A. 96, a e peita'i o le T.A. 1490 na fa'ato'ā iloa ai e tagata ona fa'aaogāina o le koma. Fai mai o le ali'i lomitusi poto Italia o *Manuti (Manutius)* na ia mua'i fa'aaogāina lenei fa'ailoga, o le koma, e fa'ailogaina a'i mănāvāga.

E mai le Agaga Pa'ia afioga a le Atua, a e peita'i le vaevaeina o le Tusi Pa'ia i matā'upu ma fuaiupu, e fa'apea fo'i ma le fa'aaogāina o mănāvāga, e i ai le koma, " **o le galuega lava lea a tagata,**" e pei 'ona molimau mai le ali'i poto o *E.W. Bullinger*.

Ua fa'amaonia fo'i e Misi Parate i lona fai mai, "*Sa solo atoa ānamua 'upu a le Tusi, sa leai se vā i 'upu, sa leai ni matā'upu po o se fuaiupu. Na se'i fai le togafiti, ia su'e gofie ai se upu ua si'i mai.*"—**O le Tusi ua Fa'amatalaina ai le Tusi Pa'ia**, (*L.M.S.*), itulau e 1.

O lea ia malilie ai finagalo, e lē o le fia pule fua i le koma, a e peita'i ona ua mautinoa lelei, ua 'avea se tulaga sesē o le koma ma āla 'ua fa'auiga 'eseina ai le folafolaga malamalama a Iesu i le faomea, ma ua matuā iloga fo'i 'ona fete'ena'i ai ma Lana fetalaiga iā Maria.

TAULOTO: II Timoteo 2:15.

O LE FA'ATA'OTO I LE MAU'OA MA LASALO

- I. Ua 'avea le tala i le mau'oa ma Lasalo ma sulufa'iga o nisi o ē ua latou fia maua se fa'amaoniga o le a'oa'oga i le fa'asalaina o ē amio leaga i le āfi mū pea, atoa fo'i ma le taofi i le alu a'e o le tagata amiotonu i le lagi pe a ōti o ia. (Ua tusia lenei tala i le **Luka 16:19-31**).
1. Na le'i āla ona saunia e Iesu o lenei fa'ata'oto ina ia fa'amalamalamaina ai le uiga o le tagata pe a ōti o ia, a e peita'i o Lana a'oa'iga lea mo le 'au Faresaio fa'afia amiotonu ma le matape'ape'a (F. 14,15).
 2. Na mua'i saunia e Iesu le fa'ata'oto i le 'au'auna amiolētonu (Luka 16:1-13), i le sa matuā lavevea ai le 'au Faresaio o na ua latou lagona, o lō latou lava lea uiga matape'ape'a ma ā latou faiga lē sa'o ua fa'aalia e Iesu. (Fa'aaogā ma le Mataio 23:14). Fai mai, "Ona latou tauēmu ai lea iā te ia" (F. 14). Ua latou tauēmu iā Iesu ona o Ia o lē mativa. Sa fa'atauva'a i le manatu o le 'au Faresaio ia tagata matitiva, a e sā mitamitavale i latou i le tele o lō latou 'oa, peisea'i o le a 'avea le tele o ā latou mea ma āla o le a tatalaina ai puipui o le lagi iā te i latou.
 3. O lea na āla ai o na toe saunia e Iesu ma lenei fo'i fa'ata'oto i le mau'oa ma Lasalo e tali atu ai i le 'au faresaio e tusa ma lō latou fa'afia-amiotonu i luma o tagata, a 'ua silafia e le Atua o latou loto 'ele'elea. O le a'oa'oga lea ina ia latou iloa ai, "O le mea e sili 'ona lelei i tagata, e 'inosia lea i luma o le Atua" (F. 15).
- II. Sa manatu le 'au Faresaio, o le a manuia na o i latou, a e lē sao atu i le lagi tagata matitiva ma ē fa'atauva'a. A e peita'i ua 'avea lenei fa'ata'oto ma āla na a'oa'oina ai i latou e Iesu 'ina ia latou lagona ai, e manuia tagata fa'atauva'a o ē fa'atuatua, a e malaia i latou talu ai lō latou manumanu i 'oloa ma lō latou fa'amaualuga.
1. E to'atele i latou o ē sa potopoto ane e fa'alogologo iā Iesu, sa taofi i le taofi sesē e uiga i le ōla pea o le agaga pe a ōti le tagata. O lenei fa'ata'oto ua lē gata ina fa'ailoa mai ai nisi uiga o le talitonuga sesē o nisi e to'atele i nā ōna pō, a e peita'i sa fa'aaogāina fo'i e Iesu e fai ma āla e molio'o ai i ō latou loto se fa'aaliga malamalama e uiga i lō latou lava pōuliuli ma lō latou tulaga maulalo fa'ale-agaga. O le mea lenei ua fa'aigoaina e tagata a'oa'oina, o le **"argumentum ad hominem,"** o lona uiga pe a fa'amalamalamaina, o le fa'aaogāina e sē tasi o le manatu po o le taofi o se isi e fa'amalamalamaina atu ai iā te ia lona lava sesē.
 2. Ia matau lelei, ua lē o ta'ua mai lava i lenei fa'ata'oto se agaga o sē tasi. E lē gata i lea, a 'ua manino ona fa'ailoa mai ai, e leai lava se toe avanoa mo le fa'aolaina o le tagata pe a mavae le ōti; auā, "Ua tumau le vanu telē i le tatou vā (o le oti lea); o le mea lea e lē ma-sao ai ē ua i inei ua fia ō atu iā te outou; e lē ma-sao mai fo'i o ē ua i ina iā te i matou nei" (Luka 16:26).
- III. Ua aliali mai lava i lenei fa'ata'oto le fa'atauva'aina e Iesu o nisi taofi sa pipi'i i ai tagata Iutaia. Ua lē tatalo le mau'oa i le Atua, a 'ua tatalo iā Aperamo: "Lo'u tamā e, Aperamo, ia ē alofa mai iā te a'u." Ua fa'asilia Aperamo e le mau'oa i lō le Atua e pei ona sa faia lava e le nu'u o Iutaia i nā ōna pō; auā o lā latou mitamitaga fai so'o lea, "O Aperamo, lō matou tamā" (Ioane 8:39), peisea'i o le a ōla ai fo'i ma i latou i le amiotonu a Aperamo. O lenei lā ua talosaga atu le mau'oa (o ia o le sui o le nu'u o Iutaia) iā Aperamo, a e peita'i ua nā lē maua se mea e tasi mai iā Aperamo. E o'o lava fo'i i se fautuāga a lenei tamā o Aperamo mo ōna uso o lo'o ōla mai pea i le lalolagi, ua leai lava. Ai se ā? Auā o lo'o moe Aperamo i le tu'ugamau ma lona lē iloa o se mea se'ia o'o i le aso o le toe tutū (Kenese 15:15; 25:8; Faila. 9:5, 6, 10). E fa'apenā fo'i ma

Maria ma le 'au pa'ia o lo'o fai aga'i i ai talosaga a nisi e to'atele. Ua 'avea lenei fa'ata'oto ma āla e fa'aioa mai ai le lē aogā o le fa'amoemoe i se fautuāga mai tagata.

1. O le tali na faia e Aperā'amo i le fa'ata'oto, fai mai, "O iā te i latou Mose ma le 'au perofeta (le Tusi Pa'ia), ia latou fa'alogo i ai" (F. 29). Ioe, e lē o 'upu tu'u a tagata, a e peita'i o afioga tusia a le Atua e maua ai le ta'ita'iga tonu e saogalemū ai i le ōlaga nei ma maua ai fo'i ma le ōlaga atalī pe a o'o i lenā aso tele sa fa'amoemoe i ai le faomea i le satauro, atoa uma le 'au pa'ia o lo'o momoe. Silasila i le fa'aaogāina e Iesu o taofi sesē o tagata e tu'ipalaina ai i latou i fa'aaliga o mea moni!
2. O lenei mea 'ua ta'ua "o le fatafata o Aperā'amo," e 'ave i ai tagata amiotonu e le 'au agelu pe a ōti i latou, ua lē mā-fa'amaonia lava lea i le Tusi Pa'ia, a e peita'i ua na o se 'uputu'u lava a tagata Iutaia, ua māfua 'ona o lo latou fa'asilia o lō latou "tamā o Aperā'amo." E i ai ona fa'amamafaina nei o pulekatorio (purgatory), peisea'i o se mea ua matuā iloga ona fai mai ai le Tusi Pa'ia, a e peita'i ua leai lava, a 'ua matuā gūgū lava le Afioga a le Atua i lea mea o pulekatorio.
3. O le tasi fo'i uiga (e tai foliga o se uiga fa'atauēmu), ua aliali mai i lenei fa'ata'oto, 'ona ua 'ese lava o na felāta'i ma tuā'oi lelei o le āfi e fa'avavau ma le nofoāga o le 'au pa'ia i le manuia. Ua mafai lava 'ona felogona'i ma fetautalatala'i ē ua i le malaia ma i latou o ē ua i le fatafata o Aperā'amo.
4. Ua leai se fesoasoani o lenei fa'ata'oto mo le a'oa'oga e uiga i le pulekatorio; auā o pulekatorio e fa'apea o lo'o fa'a'ato'atoaina ai le fa'amamāina o agaga se'ia o'o ina ua tataua ona fa'atagaina mo le ūlufale atu i le manuia. O lona uiga, e mai lenei ōlaga ona o'o atu ai i pulekatorio, e o'o atu ai i le manuia. A e peita'i lenei fa'ata'oto, ua manino ona fa'aioa mai ai, "E lē mā-sao fo'i o ē i inā (o pulekatorio pe 'afai o lea), iā te i matou nei (nofoāga o le 'au pa'ia). E ui fo'i i talosaga a le mau'oa iā Aperā'amo mo se fesoasoani po o se fautuāga, a 'ua siliga lava.

IV. Ua tatou iloa, o le fa'ata'oto le tala i le mau'oa ma Lasalo; auā e soso'o lelei ma isi fa'ata'oto a Iesu ua tusia mai i le Luka 15 ma le 16. O isi fa'ata'oto e tai uiga fa'atasi ma lenei:-

1. **Fa'ama. 9:8-15** O le fa'ata'oto a Iotama ua ta'ua mai ai la'au e peisea'i 'ua feōa'i ma fetautalatala'i. O le a'oa'oga mai lenei fa'ata'oto, inā 'aia ne'i 'avea Apimeleko ma tupu.
2. **Sapakuka 2:11** E 'alaga mai le mā'a, a e tali atu le la'au fa'alava.
3. **Iakopo 5:4** Ua fai le leo o le totogi ua taofia, ua 'alaga atu ai i luga i le lagi. Ua fai fo'i ma le leo o le toto o Apelu (Kene. 4:10).
4. **Fa'aal. 6:9, 10** O agaga (tagata) o ē na fasiotia 'ona o le afioga a le Atua, ua latou alalaga ma le leo tele, "Le Ali'i e, e te lē fa'amasino 'ea ma tau i lō matou toto se'ia āfea?" Pe 'ana fai o se mea moni a e lē na o se fa'amatalaga fa'afa'ata'oto (fa'afa'atusa), o le 'a fa'apefea ona lē iloa atu e nei agaga o nā fo'i agaga o ē sa latou fasiotia i latou o lo'o feoi mai ma fa'apuapugātiaina i le āfi e fa'avavau? Ona o le ā 'ea ua toe fesili ai, "Le Ali'i e, se'ia āfea?" meāmanū e na 'ona 'ia tetepa atu i le lā itū o le "vanu tele" o lo'o fa'apuapugātiaina mai ai ō latou fili fa'atasi ma le mau'oa i le "mumū o le āfi."

TAULOTO: Luka 16:31.

O AGAGA I LE FALE PUIPUI

I. O le tasi mau o lo'o fa'alē malamalama i ai nisi e to'atele, (o le **I Peteru 3:19** lea), fai mai, "Na Ia (Keriso) maliu atu ai, ma tala'i atu ai i agaga i le fale puipui." Ua fa'apogai i lenei mau le taofi e fa'apea: I le vā o Lona maliu ma Lona toe soifua mai, sa le'i mapu filemū ai Iesu i le tu'ugamau o le mau'oa o Iosefa, a e peita'i na maliu atu ai o Ia ma fai Lana tala'iga i "agaga i le fale puipui," fai mai, o parataiso lava lea.

1. O le tasi fo'i lenei o le mau a'oa'oga o lo'o tau fa'amaonia ai le uiga soifua pea o le agaga, atoa fo'i ma le talitonuga i se isi avanoa e toe maua i tala ātu o le ōti e talia ai le tala lelei e i latou o ē sa fa'atamala i lenei ōlaga.
2. O le mea 'ua fa'aigoaina o "parataiso" i le Tusi Pa'ia, e lē o se fale puipui o agaga o tagata fa'alologatā, a e peita'i o le afio'aga pa'ia lava lea o le Atua. Ua fa'amalamalamaina mai e Paulo, o parataiso, o le lagi tuatolu lea (II Kori. 12:2-4). A e molimau mai Ioane, **o parataiso e i ai le la'au o le ōla, le vaitafe manino o le ōla, atoa fo'i ma le nofoāli'i o le Atua (Fa'aal. 2:7; 22:1, 2).**
3. Ua toe molimau mai fo'i Ioane i le mea o lo'o afio ai le Atua, e fa'apea, "E lē sao atu lava i ai se mea leaga e tasi, po o sē nā te faia se mea 'inosia po o se pepelo; na o i latou lava ē 'ua tusia i le tusi o le ōla a le Tama'i Mamoe" (Fa'aal. 21:27). E fa'apefea lā o na nonofo fa'atasi o le 'au amio leaga ma le Atua?

II. Ua i ai nei i parataiso le la'au o le ōla sa i le fa'ato'āga i Etena. Na āla 'ona tulia 'ese o Atamu ma Eva mai le fa'ato'āga 'ona o le la'au o le ōla 'ina ne'i lā a'ai ai (Kene. 3:22-24). Pe fa'apefea lā o na 'avea o parataiso, le mea o i ai le la'au o le ōla, ma fale puipui e fa'apotopoto i ai le 'au fa'alologatā? E fa'apefea fo'i ona 'avea o parataiso ma afio'aga o le Atua pa'ia, a e toe ta'ua mai ai parataiso o se fale puipui?

1. **Ioane 20:17** O le fa'aaliga manino a Iesu iā Maria le Makatala i le taeao na Ia toe soifua mai ai, fai mai, "'Ou te le'i alu a'e lava i lo'u Tamā." O lona uiga, o le'i afio a'e Iesu i parataiso, auā o le mea lea o lo'o afio ai le Tamā. A e fai mai lenā taofi, na se'i i ai Iesu i parataiso (i le vā o Lona maliu ma Lona toe soifua mai), na Ia tala'i atu ai i agaga i le fale puipui.
2. **Fa'aal. 1:18** O le ta'utinoga a Iesu lava lā, fai mai, "Sa 'ou ōti." O lona uiga, sa tofā filemū i le tu'ugamau i le vaitaimi mai Lona maliu se'ia o'o i Lona toe soifua mai e pei lava o le a'oa'oga moni fa'ale-Tusi Pa'ia, a e lē fa'apea sa femaliua'i ai i le faiga o se tasi tala'iga.

III. O le fale puipui, o le agasala lea, a e lē o parataiso.

Isaia 42:7 Ua valo'ia mai le galuega o le a faia e le Mesia, na te "aumiina i fafo nai le fale puipui lē ua fusifusia, atoa ma ē ua nonofo i le pogisā, ia 'aumaia i latou nai le fale ua taofiina ai."

1. A e po o le ā se malamalama o Paulo i ia 'upu e pei 'ona tusia e le perofeta o Isaia? O le ā se fa'aaliga a le aposetolo i le uiga i lenei fale puipui o lo'o fusifusia ma taofiaina ai le fanau a tagata? Po 'ua fai mai 'ea Paulo, o parataiso lea?

Kala. 3:22 "Ua punitia e le Tusi tagata uma lava i le agasala, ina ia foa'iina mai i ē fa'atuatua le mea na folafolaina e maua i le fa'atuatua iā Keriso," (o le

lavea'iina lea mai le fale puipui o le agasala, e pei ona valo'ia mai e Isaia o le a faia e Keriso).

2. A e po o le ā 'ea lā le fa'amatalaga sa'o o le **I Peteru 3:19**? O le a se'i tatou faitau i ai e amata mai i le tau fa'ai'uga o le fuaiupu e 18:-

- a. **F. 18** "Na fasiotia o Ia (Keriso) i le tino, a 'ua fa'aōlaina mai i le Agaga (i le mana o le Agaga);"
- b. **F. 19** "Na Ia (Keriso) maliu atu ai (i le mana lava o le Agaga) ma tala'i atu ai (i lea lava mana o le Agaga) i agaga (tagata) i le fale puipui;"
- c. **F. 20** "O ē na lē fa'alogo ānamua, ina o fa'atalitali mai le onosa'i o le Atua anamua i ōna pō o Noa (a e lē o le taimi na i ai Keriso i le tu'ugamau)..."

Fa'auta! E lē o se fale puipui i parataiso e fa'asino i ai lenei mau, a e peita'i o le tupulaga a Noa, o ē sa matuā iloga lava ona fusifusia ma taofiina i le fale puipui o le agasala (Kene. 6:5). O le tasi fa'amatalaga iā Noa, fai mai, "O Noa, lē tala'i le amiotonu" (II Pete. 2:5). Na osofia lenei tagata o Noa e le Agaga o Keriso, ma sa tū atu ai o ia i luma o lenā tupulaga, o ia o le sui o Keriso. O le mana o le Agaga na 'avea ai Noa ma fofoga o Keriso i nā agaga (tagata), o ē na lē fa'alogo ānamua.

E lē o se tala'iga na faia ina ua oti lenā tupulaga, a e peita'i a o ōla mai pea ma ua mafai ona latou fa'alogi i le vala'au alofa a Keriso na āla atu iā Noa. E lē toe lagona pe iloa se mea pe a o'o ina ua ō ifo i le mea ta'aligoligoa (Sala. 88:11,12). E leai lava se fa'anenefu o i ai i le molimau a Peteru, na o na ua fa'a-uiga 'eseina talu ai ona o lo'o fa'aseseina pea le lalolagi i lenā ulua'i pepelo a Satani i o tatou ulua'i mātua, e fa'apea, "Lua te lē ōti lava."

- IV. O lo'o i ai ma le mau lenei ua fai ma fa'alavelave i nisi, (o le **I Pete. 4:6** lea), fai mai: "O le mea lea na folafola atu ai le tala lelei i ē ua ōti."

E lē o se tala'iga na faia 'ina ua ōti i latou, a e peita'i a o ōla mai pea. Na taunu'u mai le aposetolo o lō tatou nei vasa, o Ioane Viliamu, ma na tala'iina le tala lelei i tupulāga o Samoa o ē sa soifua i nā ōna pō. Ua mavae atu nei ia nā tupulaga uma, ma 'ua tataui ai nei iā te i latou lenā fa'amatalaga a Peteru, "Na folafola atu le tala lelei i ē ua ōti." Ua ōti nei, a e sā fa'alogologo i le leo malie fa'ale-tala lelei a o ōla ma soifua mai i latou. Mātau mai, e lē o fai mai Peteru, "O lo'o folafola atu," a e peita'i, "**Na folafola atu,**" (i tupulaga o ē sa soifua mai a 'ua ōti nei).

Kalatia 3:8 Na folafolaina anamua le tala lelei iā Aperā'amo, e pei ona fetalai mai Iesu, "Na iloa e Aperā'amo lo'u nei aso, ma na 'oli'oli ai" (Ioane 8:56). I ōna pō o Peteru sa leva lava ona maliliu ai o Aperā'amo ma nisi e to'atele o ē na latou maua le fa'aaliga iā Iesu ma Lona malō tumau, a o le'i o'o 'ina fanau mai o Ia i Petele'ema. O lea ua molimau mai ai Peteru, "Na folafola atu le tala lelei i ē ua ōti." E leai lava se faigatā o i ai.

- V. E fia fa'amalamalamaina ma le **I Kori. 15:29**, ua ta'ua mai ai le papatisoga e fai ma sui o ē ua ōti. E lē o se sauniga fa'ale-tala lelei sa masani ona faia e le 'au faigaluega a Keriso, auā ua lē o toe ta'ua mai lava i totonu o le Tusi Pa'ia. E lē gata fo'i i lea, a 'ua matuā lē feagai lava fo'i lea faiga ma le a'oa'oga manino mai le Afioga a le Atua ua fa'aali tino mai ai, e lē mafai 'ona 'avea o se tasi ma sui o se isi i le matā'upu o le fa'aolataga. (Faitau i le Sala. 49:7; Esek. 14:4). E lē fete'ena'i afioga ua a'oa'oina mai e le Agaga Pa'ia.

1. O lenei matā'upu e 15 (M. 15) o lana tusi muamua iā Korinito, ua mae'ae'a o na fa'amalamalamaina mai ai e Paulo o le matā'upu i le toe tutū mai o ē ua ōti; auā sa tele ona fa'asoesā mai o nisi i le 'au ekalesia sa i Korinito i lō latou saga finau mai pea, e leai se toe tutū o ē ua ōti. O le taofi lea sa tala'iina malosi e le 'au Satukaio, atoa fo'i ma nisi vasega o tagata Eleni (Mataio 22:23; Galuega 17:32).

2. E lē taumate ai lava sa mātauina e Paulo se tasi faiga a tagata Eleni, po’o nisi fo’i tagata ‘ese, na latou papatisoina ai ē o ōla e fai ma sui o ē ua ōti, auā sa tele ona fa’asoesā mai o nisi i le ‘au ekalesia sa i Korinito i lo latou finau mai pea, e leai se toe tutū o ē ua ōti. E i ai lā ona pu’eina mai e Paulo o lenā faiga fa’a-nu’u ‘ese, ma na fa’aaogāina ina ia malamalama atili ai lana fa’amatalaga i le fa’amaonia lelei o lenei matā’upu i le toe tutū mai o ē ua ōti. E lē ona sa talitonu Paulo i se papatisoga mo ē ua ōti, e leai lava. A e peita’i ‘ona ‘ua aliali mai i lenā faiga a tagata Eleni, o lō latou fo’i talitonu i le toe tutū mai o ē ua ōti; auā, e pei ‘ona finau mai Paulo, "Afai e moni, e lē toe tutū ē ua ōti, ona o le ā ‘ea ua papatisoina ai i latou (o tagata Eleni) ma sui o ē ua ōti?" (F. 29).
3. Pe ‘ana fai o se sauniga fa’ale-tala lelei lenei sa masani ai Paulo ma le ‘au faigaluega ona latou faia, po ‘ua lē tatau lā ona tusia e fa’apenei, **"Ona o le ā ‘ea ua papatisoina ai i tatou ma sui o ē ua ōti,"** a e lē o le “i latou”. O lea ua tatou mautinoa ai, o lenei fuaiupu o lo’o tautala ai le aposetolo aga’i i nisi tagata ‘ese, a e lē o le ‘au Kerisiano.
4. Sa fa’apea ona fa’amanatuina e lenei ‘au’auna finau poto o Paulo iā Eleni, o lā latou lava sauniga ua latou papatisoina ai nisi e fai ma sui o ē ua ōti talu ai lō latou fa’amoemoe i le toe ōla mai o ē ua ōti. O lo’o finau mai lā Paulo e fa’apea: “E lē aogā ona fa’afiti mai o tagata Eleni e fa’apea, ‘E leai se toe tutū; auā o lenā o lo’o i ai lā latou lava sauniga ua manino ona aliali mai ai o lo latou lava fo’i fa’amoemoe fa’apenā.”
5. Sa masani lenei aposetolo o Paulo ona ia fa’aaogāina i āna lauga ma tusi o mea sa o’otia ai lona mafaufau a o maimoa solo o ia i a’ai tetele sa ia asiasi i ai. Silasila i le Eperu 12:1; I Kori. 9:24, 26, ua fa’amanatuina ai e Paulo o taufetuliga po o tausiniōga a tagata Roma ma Eleni. (Ia fa’atusatusaina fo’i ma le Galuega 17:16 ma le 22, 23).

TAULOTO: Isaia 42:7.

O LE FA'ATAULAITU

- I. E lē mafai ona fiafia le Atua i le felafoa'iina ma le fe'avea'iina o Lana fanau i matagi o matā'upu sesē ma togafiti pepelo ua saunia e fa'asesē ai.

Efeso 4:13, 14 O 'tama nini'i' i latou o ē 'ua fa'apea ona fa'asesē gofieina. E lē o lea le finagalo o le Atua ia 'avea pea i tatou ia pei o tama nini'i, a 'ia tatou o'o atu "i le fua o le matua."

Manatu Fa'aopoopo: O le tasi matagi leaga o lo'o viligia ai pea Samoa, ma o lo'o felafoa'iina ai pea tagata o lenei atunu'u e pei o peau o le sami, o le fa'ataulaitu lea.

Ua lē aunoa lava Samoa ma ē ua ta'ua o faipelē, po o faivavega, po o foma'i o ē ua i ai vai fa'alaga'ese, ma vai fa'atafao, o vai aitu lava ia. Ua lē mafai lava lō tatou atunu'u 'ona uma ma lenei uiga, o le fefefe i aitu ma le fa'atuatua i le mau vai aitu e lē ma-faitaulia. Ua fa'apea ona maua pea i lō tatou atunu'u o lenei uiga, o le āmo fa'alē-gatasi o le malamalama ma le pōuliuli. (Faitau le II Kori. 6:14-16). O lo'o savalia nei lona lua selau o tausaga o le malamalama, a e peita'i o lo'o nofo pologa pea Samoa i nisi uiga fa'a-nu'upō.

- II. Ua a'oa'o mai le Tusi Pa'ia i le matuā 'inosia tele o lenei uiga i le silafaga a le Atua.

1. **Isaia 8:19** O le sa'ili atu i aitu vavalo ma taulaitu, e tusa lea o le fa'afiti i le Atua.
2. **II Tupu 1:1-4** Na 'avea lō latou fa'afesili atu i le taulaitu sā i Ekeroma ma āla na fulitua ai le tupu o A'asaia (Ahaziah) ma āna au'auna i le Atua o Isara'elu.
3. **Levitiko 19:31** O le ta'utinoga a Ieova, lō tatou Atua: "'Aua tou te sa'ili atu i aitu vavalo, po o taulaitu, e leaga ai 'outou."
4. **Levi. 20:6** O fili o le Atua i latou uma o ē fai togafiti fa'ataulaitu, e aofia ai faipelē ma fofō o ē latou te fa'aaogāina vai aitu. E ta'ua e nisi o le "vai fo'i," a e peita'i ua mautinoa lelei lava, o le vai aitu. E fa'apefea 'ona tatou sa'ili atu i fili o le Atua mo se manuia?
5. **Levi. 20:27** O i latou uma, o tane po o fafine, o ē sa latou faia lenei amio 'inosia i ōna pō o Isara'elu, sa fasiotia lava. O ōna pō nei ua taunu'u ai le 'upu a Solomona i le Faila. 8:11.
6. **II Tupu 17:17, 18** O le amio lenei na i'u ina fa'atāfeaina ai Isara'elu.
7. **Teut. 18:9-14** O le uiga lea ma le amio a ē fa'apaupau, a 'ua lē tataui i ē ua igoa o Kerisiano.
8. **I Nofo. 10:13, 14** O lea le agasala na āla ai 'ona te'ena o Saulo ma ōti ai o ia.

- III. O le mafua'aga o matā'upu uma ma talitonuga fa'ataulaitu, o le taofi sesē lea i le uiga soifua pea o le agaga. O le fa'avae lava lea e tasi ua maua mai ai le taofi e fa'apea: *E mafai ē ua ōti 'ona fa'afeso'ota'i pea ma ē o ōla.*

Ioane 8:44 O Satani, o le pepelo ia ma le tamā o pepelo.

Kenese 3:4 O le ulua'i pepelo lea a Satani na ia tautala ai i le fa'ato'āga i Etena, "Lua te lē ōti lava." O lenei o lo'o talitonu pea i ai le lalolagi ma ua latou manatu ai, e mafai i se lē malilie o ē ua ōti ona leaga ai o i latou o ē o ōla mai, po o so latou fiafia mai fo'i o le a mafai 'ona latou fesoasoani ma fa'amanuia mai ai.

1. E leai, leai lava se feso'ota'iga e toe mafaia i le vā o ē ua ōti ma ē o ōla.

- a. **Faila. 9:5, 6** E lē iloa e tagata ōti se mea e tasi. Ua uma lelei lō latou alofa, lō latou ita, ma lō latou matau'a.
- b. **Iopu 7:9, 10** E lē toe fo'i mai lē ua ōti i lona fale, e lē toe iloa o ia i le mea sa i ai o ia.
- 2. Tatou te lē o fa'afeagai ma aitu o tagata ōti (auā e leai ni mea fa'apenā), a e peita'i o Satani ma lana 'auao, o le 'au temoni ia, po o agelu leaga o ē na 'au iā Lusifelo i lana fouvalega.
 - a. **Efeso 6:12** Tatou te lē o tau ma ni aitu o tagata ōti, a e peita'i o ali'i sili, ma faipule, ma ali'i o le pōuliuli, atoa ma agaga leaga i mea o i le lagi (o Satani lea ma lana 'auao). Fai mai le fa'amatalaga a Misi Parate i lenei fuaiupu: " 'A o ali'i sili...' o itū'aiga 'ese'ese o temoni. 'Mea o i le lagi,' o le lagi lea i o tatou luga tonu."
 - b. **II Kori. 11:13-15** E mafai e Satani ona liua o ia e ia e fai ma agelu o le malamalama. E fa'apea fo'i ma āna 'au'auna (e i ai le 'au faipelē ma foma'i fa'ataulaitu), ona masani ona latou tau 'aveina o foliga o le malamalama.
 - c. **Mata. 4:1-11** Na si'i e Satani 'upu mai le Tusi Pa'ia e tofototo ai iā Iesu.
 - d. **Mata. 7:22-23** E ui i le ta'ua e taulaitu o le suafo o le Ali'i ma lō latou tautala mai i 'upu mai le Tusi Pa'ia, a 'ua silafia lava e Iesu lō latou uiga moni, "o tagata fai amio leaga."
 - e. **Mataio 7:20** Tou te iloa i latou i ō latou fua.

Manatu Faaopoopo: Talu ai o na sa masani lelei Satani ma lana 'au temoni ma le uiga o so'o se tagata a o ōla mai pea o ia, o lea ua mafai ai e i latou ona pu'eina o ōna foliga, lona leo, ma ōna uiga sa masani ai, ma ua fa'apea ona latou fa'asesēina ai o i latou o ē sa masani ai lea tagata i le olaga nei. O lea ua lapata'i mai ai Paulo i le āla e galue ai Satani, "i le mana uma, ma fa'ailoga, ma vavega pepelo, ma mea fa'asesē uma o le amio leaga" (II Tesa. 2:9, 10).

E i ai le toe fa'atūina mai o Samuelu e le taulaitu fafine sa i Enetoro. E lē o Samuelu moni na alu a'e, a e peita'i o le togafiti pepelo, po o le vavega fa'ataulaitu na faia e lenei fafine i le mana fa'a-Satani. (Faitau ma le fa'autauta i le tala e pei ona tusia i le I Samu. 28:1-9). E le'i va'ai tino Saulo i lenei Samuelu, a e peita'i o le fa'amatalaga a le taulaitu i foliga o lē na alu a'e, ma lona fa'alogu atu i le leo o lē na tautala mai, o lea na manatu ai Saulo, o Samuelu moni lea ua lā fa'afesaga'i (F. 13-15).

Talu ai ona ua matuā lafoa'iina Saulo e le Atua, o lea na ia lē maua ai se tali po o se fa'aaliga mai iā Ieova (F. 5, 6). Fa'auta mai, ua lē tali mai Ieova iā Saulo, a e pe fa'aapefa lā ona toe tali i ai Samuelu, lē sa 'avea ma perofeta fa'amaoni e usiusita'i i le finagalo o le Atua i mea uma?

Sa 'ino'ino tele Samuelu i lenei uiga o le fa'ataulaitu a o soifua mai o ia (I Samu. 15:23), a o lenei ua talatalanoa fealofani Samuelu ma lenei taulaitu fafine, o le fili o le Atua (Levi. 20:6). E lē gata i lea, a o le fai atu a lenei Samuelu na fa'ato'ā iloa ai e le fafine, o Saulo lea ua sau iā te ia (lē na ia fasiotia fafine taulaitu, F. 9), peisea'ī ua 'au Samuelu i lenei taulaitu ma lana galuega 'inosia.

Ua lē fesoasoani lenei tala i le taofi o lo'o ta'atele nei o fa'apea, pe a ōti le tagata amiotonu, ona alu a'e loa lava lea i le lagi; auā e le'i alu ifo Samuelu mai le lagi, a e fai mai le fa'amatalaga a le taulaitu: "Ua 'ou iloa atu o lo'o ō a'e nai le 'ele'ele" (F. 14, 3). Sa teuina le tino o Samuelu i Rama (F. 3), e latalata i Ieruselema, a o lenei ua toe fa'atūina mai i Enetoro e latalata i le sami o Kalilaia, e vāvā mamao ma Ieruselema i le itū i matū. Ua lē gata i nei fete'ena'iga, a e i ai fo'i ma nisi uiga lē fetau i ua aliali mai i le faiga a lenei taulaitu ma 'ua ao ai o na tatou mautinoa, e lē o se mea moni, a e peita'i o le galuega fa'asesē a le ti'āpolo.

IV. Sa tete'e malosi le 'au aposetolo i so'o se uiga fa'ataulaitu sa feagai ma i latou i lā latou tala'iga.

- 1. **Gal. 8:9-23** Sa leai lava se fiafia o Peteru iā Simona, le tagata fai togafiti fa'ataulaitu sa i le a'ai o Samaria. O tagata lava e pei o lenei fai vavega fa'ataulaitu e

masani ona lolofi atu i ai lō tatou atunu'u ma latou fa'apea, "o le tagata ua osofia e le Agaga Pa'ia, ua fa'ava'a mai iā te ia le alofa o le Atua."

2. Galu. 19:19

O le matuā manumalo 'ato'atoa o le agaga fa'ale-tala lelei, o le matuā iloga fo'i lea o na to'ilalo ma tineia o le agaga fa'ataulaitu e pei ona sa faia e Efeso.

3. Galu. 13:6-10

Na a'oa'i mamafa Paulo iā Elima, le makoi po o le taulaitu sa i le motu o Kuperu: "O 'oe nā ua tumu i le pepelo uma ma le ulavale uma, o le atali'i o le ti'āpolo, o lē 'ino'ino i le amiotonu uma lava."

V. O ōna aso e gata ai, o le a iloga ona sau ai i luma o lenei uiga, o togafiti ma vavega fa'ataulaitu e fa'asesē ai.

1. I Timo. 4:1

E ō 'ese nisi i le fa'atuatua i tausaga amulī, latou te fa'alogo i agaga e fa'asesē ma matā'upu i temoni.

2. Faaal. 16:13, 14

O agaga o temoni o le a latou galuea'iina ma saunia le lalolagi mo le taua o Amaketo.

3. Faaal. 13:13, 14

A o le'i o'o ina afio mai Keriso, o le a fa'asesēina ai le lalolagi i fa'aailoga tetele o le a faia i le mana fa'ataulaitu, se'ia o'o lava ina 'ia alu ifo le āfi mai le lagi i luma o tagata. (Fa'aaogā ma le F. e 2, vaega mulimuli).

4. Faaal. 21:8

O le i'uga o i latou uma o ē fa'ataulaitu, o le ōti fa'alua lea i le lepa āfi e mū i le āfi ma le teiō.

VI. E fia fa'amanatuina nisi vaega tāua o le lauga na faia e Misi Neueli (Rev. J.E. Well, L.M.S.), i le aso 4 o Mē, 1909, i le Fono tele i Malua:-

"O taofi ānamua sa fai i Samoa o lo'o ua pipi'i pea i ai nisi tagata e to'atele, e o'o i nisi ua i le Ekalesia, a 'ua pōuliuli pea o latou mafaufauga.... E lē na 'ona 'avea ia taofi fa'apōuliuli ma mea e fa'alavelaveina ai le tau sosolo atu o le malamalama i le poto fa'ale-atunu'u 'ese, a e matuā 'avea ma mea e fa'alēaogāina i le Tala Lelei iā Iesu ua tatou talitonu i ai."

Sa fa'amamafaina fo'i e Misi Neueli i lana lauga le taofi o Samoa e uiga i agaga o ē ua ōti, e fa'apea, "E toe fo'i mai ma 'fa'alavelave pea lava i le aiga ma ē sa latou masani i le olaga nei.' O le taofi lenei ua fa'aopoopo i ai le tasi taofi e matuā sesē fo'i ua fa'asino i le uiga o nisi gasegase faigatā ua tutupu i le fai'ai ua fa'avalea ai pe fa'avale malosi ai le tagata.... A o ia taofi 'ese'ese fefiloī, ma taofi i aitu ma atua fa'apaupau.... E malamalama lelei iā te 'outou la'u nei 'upu pe a fai 'ou te fai atu o 'upu uiga 'ese'ese ua fa'asino i Nifoloa ma Sauma'iafe ma vaila'au ese'ese e tataui ai i ē ua tui ai pe ūlutinoia ai...."

"O le taofi i aitu ma le ūlutinoia o tagata ua fai ma mea ua fa'alē-aogāina ai le Ali'i Fa'aola ma lana galuega. Afai ua mafaia e tagata amioleaga ua ōti ona fa'alavelave mai pea i galuega a Iesu, pe fa'apefea lana pule? A e peita'i ua uma ona tatou iloa mai le Tusi Pa'ia, ua matuā lē mafai lava ona toe fa'alavelave mai pe toe fesoasoani mai agaga o ē ua ōti. Sa vaoia lea taofi sesē ānamua, auā o le mea 'inosia e Ieova. Afai e taofi pea i ai, ua 'avea ai le Atua pa'ia ma Pepelo, ma ua fa'alē-aogāina le pule alofa a Iesu." – Si'i mai le "Sulu Samoa," Mē ma Iuni, 1909.

1. I Kori. 10:21, 22

Se'ia āfea o le a inu ai i le ipu a le Ali'i, atoa ma le ipu a temoni? Soia le fa'a'ono'ono i le Ali'i.

2. Mataio 11:28

O lo'o vala'au mai Iesu, ia tatou sulufa'i atu iā te Ia pe a maua i tatou i puapuagā.

"O i latou uma o ē ua lē fa'avae tonuina lō latou fa'atuatua i luga o le Afioga a le Atua, o le a fa'asesēina lava ma fa'ato'ilaloina." – O le Finauga Tele, itulau e 560.

TAULOTO: Isaia 8:19, 20.

O LE AGAGA PA'IA O LE ATUA

- I. O le Agaga Pa'ia**, o Ia lea e tolu a'i le Itū Atua, i le ua molimau mai le Tusi Pa'ia i Lana galuega tāua, e lē gata i ōna pō nei o le Feagaiga Fou, a e peita'i e mai le amataga lava o le lalolagi.

I Ioane 5:7	O le Tamā, ma le Lokou, atoa ma le Agaga Pa'ia (Ioane 1:1, 14)
Eperu 9:14	Ua fa'asuafaina, o le Agaga e fa'avavau.
Kenese 1:2	O le ulua'i ta'ua mai o le Agaga, o le tala lea i le foafoāga.
Kenese 6:3	Sa finau le Agaga o le Atua ma tupulaga o tagata a o lumana'i pea le lolo.
Esoto 31:2, 3	Sa fa'atumuina i le Agaga o le Atua lē na ia ta'ita'iina le galuega o le faiga o le fale fetāfa'i, o Pesaleli lea.
Fa'ama. 14:5, 6	Sa fa'amalosia ai Samasoni.
Isaia 63:11	Sa tu'uina atu e le Atua Lona Agaga Pa'ia iā Mose.
Salamo 139:7	O le molimau a Tavita, "Ou te alu 'ea i fea ai lou Agaga?"
Ne'emias 9:30	Sa i ai le Agaga i le 'au perofeta.

Manatu Fa'aopoopo: E to'atele ua i ai lenei manatu, sa fa'ato'ā amata ona galue o le Agaga Pa'ia ina ua liligiina ifo i le Aso Penetekoso. A e peita'i e leai, a e sa galue le Agaga i ōna pō fo'i o le Feagaiga Tuai, na o na 'ua sili atu nei ona fa'alauteleina o Lana galuega ina 'ua 'avea nei o Ia ma Sui o Keriso i le lalolagi.

1. I ōna pō a o femāliua'i Iesu i lenei lalolagi, na Ia folafolaina ai le 'auina mai o le Agaga Pa'ia e 'avea Mōna Sui pe a toe afio a'e o Ia i le lagi.
 - a. **Ioane 14:26** O le tasi lenei suafa o le Sui o Keriso, o le Fesoasoani.
 - b. **Ioane 16:26** Ua toe fa'asuafaina, o le Agaga e tupu mai ai le upu moni.
 - c. **Ioane 16:7** Na fa'ato'ā iloga ona afio mai o le Fesoasoani i Lona mana ato'atoa ina ua afio a'e Iesu.
 - d. **Luka 24:29** Sa apoapoa'iina le 'au so'o e Iesu ina ia latou fa'atalitali mo le afio mai o le Agaga.
2. Na foa'iina mai le Agaga Pa'ia i Lona ato'atoa i le Aso Penetekoso, i le o le a i ai pea o Ia i le lalolagi se'ia o'o i le toe afio mai o Keriso.
 - a. **Gal. 2:1-4** O le afio ifo o le Agaga i le Aso Penetekoso.
 - b. **Gal. 2:32, 33** Sa mautinoa lelei e Peteru, o le afio ifo o le Agaga Pa'ia, o le fa'ataunu'uina lava lea o le folafolāga a Iesu.
 - c. **Gal. 4:8, 31** Sa tumau pea le Agaga i le ekalesia ina 'ua mavae le Aso Penetekoso (Galuega 6:3-5).
 - d. **Ioane 14:18, 23** O le afio mai o le Agaga i ō tatou loto, o le afio mai lava lea i ai o Keriso (Roma 8:9-11).
 - e. **Mata. 28:18-20** Ua folafola e Iesu, o le a Ia mafuta ma i tatou (i Lona Agaga) i aso uma lava, e o'o lava i le gata'aga o le lalolagi.

- II. O nai nisi fa'amatalaga e uiga i le Agaga Pa'ia.**

1. **Roma 15:19** E fai le mana o le Agaga o le Atua.
2. **Roma 8:11** E mafai e le Agaga ona fa'atutū i ē ua ōti.
3. **I Kori. 2:14** E lē māfuta le Agaga ma lē ua i ai le loto fa'ale-tino.
4. **Kala. 5:16, 17** E fete'ena'i le Agaga ma tu'inanau o le tino.
5. **Gal. 7:61** O le agasala a ē e le 'i liua o latou loto, o le tete'e atu lea i le Agaga Pa'ia.

6. **Efeso 4:30** A o le agasala a ē ua ta'ua o le fanau a le Atua, o le fa'atigā lea i le Agaga Pa'ia.
7. **Gal. 6:3, 9** 'Aua le pepelo ma tofotofo i le Agaga Pa'ia.

"O le foa'iina mai o le Agaga Pa'ia i totonu iā te i tatou, o le foa'iina mai fo'i lea iā te i tatou o le soifuāga amiotonu o Keriso. O lē ua iā te ia le Agaga, o le a fa'alauteleina i totonu iā te ia le uiga ma le amio matagofie a Keriso." - O le Fa'anaunaga o Tupulaga," itulau e 805.

TAULOTO: Ioane 14:16, 17.

O GALUEGA A LE AGAGA MO LE TAGATA FA'ATUATUA

- I.** O le Agaga Pa'ia, o le mana lava lea o le Atua, i le pe 'afai tatou te taliaina i ō tatou loto, o le a liua ai i tatou.
1. **Ioane 16:8** E fa'ailoa mai e le Agaga Pa'ia le agasala, ma le amiotonu, ma le fa'amasinoga.
 2. **Ioane 3:5-8** E galuea'iina e le Agaga le fanaufouina o i tatou.
 3. **Gal. 7:51** Ne'i mao 'ona tete'e atu i le Agaga.
 4. **Kenese 6:3** E lē finau pea le Agaga ma tagata.
- II.** E galuea'iina e le Agaga se fesuia'iga i ō tatou uiga ma amio talu ai ona e afio o Ia i totonu iā te i tatou.
1. **Ioane 14:17** E afio mai le Fesoasoani ma tumau i totonu iā te i tatou.
 2. **I Kori. 6:19** O lea ua 'avea ai ō tatou tino ma malumalu o le Agaga Pa'ia.
 3. **II Kori. 3:18** E galue le Agaga ina ia liua i tatou ma ia fa'alauteleina pea foliga o Keriso iā te i tatou.
- III.** Ua 'avea le mana o le Agaga Pa'ia ma āla e afio fa'amaoni ai Keriso i ō tatou loto.
1. **Ioa. 16:14, 15** E vivi'i atu le Fesoasoani iā Keriso i Lona fa'amaonia o mea uma lava tau Keriso i ō tatou loto. "E maua e ia mai iā te a'u, ma fa'ailoa atu ai iā te 'outou."
 2. **Ioane 15:26** E molimau le Agaga iā Keriso i ō tatou loto.
 3. **Roma 8:9-11** O le afio mai o le Agaga i ō tatou loto, o le i ai fo'i lea o Keriso i totonu iā te i tatou.
 4. **Kolose 1:27** O le afio o Keriso i ō tatou loto i Lona Agaga, o lō tatou fa'amoemoe lea i le manuia.
- IV.** O le fesoasoani mai o le Agaga Pa'ia e mafai ona tatou ōla ai i le olāga Kerisiano manumalō.
1. **Ioane 16:13** O Ia o lō tatou Ta'ita'i.
 2. **Ioane 14:26** O Ia o lō tatou Faia'oga.
 3. **Roma 8:13** E fasiotia e le Agaga amioga a le tino.
 4. **Roma 8:26** E fautua le Agaga mo i tatou i a tatou talosāga.
- V.** E mai le Agaga Pa'ia le malosi tatou te 'au'auna atu ai i le Atua.
1. **Galuega 1:8** O le fa'atasi mai o le Agaga e mamana ai a tatou molimau mo Iesu.
 2. **I Kori. 2:4** Sa i ai le mana i le tala'iga a Paulo talu ai le Agaga Pa'ia sa pulunaunauina ai o ia.
 3. **Gal. 6:9, 10** Sa lē mafai se tasi ona tete'e atu i le poto mai le Agaga na tautala atu ai Setefano.

"Ua silafia lelei lava e le Atua le ulua'i a'apa atu o le loto iā te ia. E leai lava se tatalo e faia, e ui lava ina e faia ma le polepole vale, leai fo'i se loimata e maligi, e ui lava ina e lē

mava'aia; e leai fo'i se fa'anaunauga fa'amaoni mo le Atua, e ui lava ina e lē mava'aia; e leai fo'i se fa'anaunauga fa'amaoni mo le Atua, e ui lava ina vaivai, o le a lē tula'i atu i ai le Agaga o le Atua e fa'afetaia'i i ai. A o le'i faia le tatalo, po o le le'i fa'aalia fo'i o le naunau o le loto, e alu atu loa lava le alofa tunoa mai iā Keriso e fa'afetaia'i i le alofa tunoa o lo'o galue i le loto o le tagata."- O A'oa'oga Fa'a-fa'ata'oto a Iesu, itulau 206.

TAULOTO: Ioane 16:13.

O MEA ALOFA A LE AGAGA

I. I le taimi o Lona afio a'e i le lagi, na foa'iina atu ai e le Ali'i Fa'aola o le mea alofa tāua i Ōna tagata.

- 1. Efeso 4:8** Na afio a'e o Ia i luga ma Na foa'iina mea alofa i tagata.
- 2. Efeso 4:11** O nisi o mea alofa (faiva) ua foa'iina mai e Keriso i Lana Ekalesia.
- 3. I Kori. 12:1** Ua finagalo le Atua ia tatou malamalama lelei i le uiga ma le aogā o mea alofa ua foa'iina mai i le ekalesia. O le fa'amatalaga a *Misi Parate (Pratt)* i lenei fuai'upu, fai mai, "*O mea fa'ale-agaga, o mea alofa e foa'iina mai e le (Atua) Agaga Pa'ia, o faiva ese'ese e aogā i le ekalesia.*"
- 4. I Kori. 12:8-10** O ni tasi fo'i o mea alofa ua ta'uina mai.

II. O nei mea alofa uma, e galuea'iina e le mana o le Agaga Pa'ia e tusa ma le poto ua iā te Ia. E lē maua se tasi o nei mea alofa vaganā ona ua āla mai i le Agaga.

- 1. I Kori. 12:4** E matalasi mea alofa, a e galuea'iina e le Agaga e tasi.
- 2. I Kori. 12:7** E tofu le tagata Kerisiano ma se mea alofa ua foa'iina atu iā te ia e le Agaga.
- 3. I Kori. 12:8-11** E tufatufaina ma fa'asoaina e le Agaga o le Atua, ia ta'itasi ma lana mea alofa na te fa'aaogāina.
- 4. I Kori. 14:1** Ia naunau i mea alofa fa'ale-agaga, a e sili ina ia 'outou perofeta ane. "*E lē o le fai valo'aga, e seāseā lea, a o le folafola le afioga a le Atua.*"—(Parate).

III. I aso uma o le i ai o le ekalesia i le lalolagi, o le a tumau ai iā te ia mea alofa a le Agaga.

- 1. Efeso 4:12** E aogā e atina'e ai le tino o Keriso, se'ia o'o ina ua fa'a'ato'atoaina le 'au pa'ia.
- 2. Efeso 4:13** E aogā e fa'ao'oaina atu ai lē ua fa'atuatua "i le fua o lē ua matua, e tataua ma le tumu o Keriso."

IV. E ao ona 'ia ta'itasi ma fa'aeteete mo le fa'aaogāina tonu o le mea alofa ua iā te ia, ina ne'i ave'eseina mai iā te ia ma foa'iina atu i se tasi.

- I Kori. 12:29-31** E lē tutusa ā tatou mea alofa (po o ā tatou taleni).
Roma 12:6-8 Ia fa'aaogāina ma le fa'amaoni ni mea alofa ua iā te 'oe.
Mata. 25:14-30 O le fa'amaoni e toe fa'aopoopoina mai ai ma nisi mea ua iā te i tatou.
II Timo. 1:6 O le apoapoa'iga a Paulo iā Timoteo, "Ia toe fa'amumū le mea alofa mai le Atua, o lo'o iā te 'oe."

"O le fa'atasi atu o le Agaga i le 'au faigaluega a le Atua o le a maua ai le mana i lō latou tala'iina atu o le 'upu moni e lē mafai e le mamalu uma ma le vi'iga fa'a-lenei lalolagi ona foa'i atu iā te i latou." - O Galuega a le 'Au Aposetolo, itulau e 51.

TAULOTO: Efeso 4:8, 11.

O LE MEA ALOFA O LE AGAGA O VALO'AGA

I. I ōna pō o le Feagaiga Tuai, na 'avea ai le agaga o valo'aga ma āla na fa'afeso'ota'i ai le Atua ma le fanau a tagata.

1. Amosa 3:7 Na 'avea le 'au perofeta ma āla na fa'aalia ai le finagalo o le Atua i tagata (Hosea 12:10; Numera 12:6).

2. II Pete. 1:21 E le'i tautala fua mai se perofeta, a e sa osofia e le Agaga Pa'ia.

3. Hosea 12:13 O le perofeta (Mose. Teute. 34:10), na ta'ita'iina ma leoleoina ai Isara'elu.

4. II Tupu. 17:13 O perofeta na 'auina atu ai e le Atua ni fe'au o le lapata'iga i Lona nu'u.

Manatu Fa'aopoopo: E ui i molimau e tele o tusia mai i le Tusi Pa'ia ua āla mai i le 'au perofeta, a e peita'i sa le'i tofu le perofeta ma sana fa'aopoopoga i afioga tusia a le Atua. E i ai Elia ma Elisaia, o perofeta ta'uta'ua, a e sa lē tusia e i la'ua ni a lā tusi. E lē gata i lea, a e sa i ai nisi perofeta o ē na tusia a latou tusi, a e peita'i ua lē aofia na tusi i totonu o le Tusi Pa'ia. (Silasila i le Matā'upu e VII, vaega e 9, I Nofo. 29:29).

O le galuega a le perofeta, a lē na o le vavalu i mea o le a o'o mai, a e maise o le a'oa'i atu ma le a'oa'o atu i le fanau a le Atua ma le fa'amalamalama atu o le 'upu moni a le Atua (Galuega 15:32). O le tasi agasala na āla ai ona fa'atāfeaina o Isara'elu, o lō latou lē usiusita'i lea i lapata'iga ma a'oa'oga a le 'au perofeta (II Nofo. 36:14-17).

II. Ua lē gata i le Feagaiga Tuai ona ta'ua mai ai o le vasega mamalu o le 'au perofeta, a ua fa'apea fo'i ma le Feagaiga Fou ina 'ua toe afio a'e Keriso i le lagi.

1. Galu. 11:27, 28 Fai mai o perofeta, a 'ua lē ta'ua mai pe to'a fia. O Akapo lē tasi o i latou, na ia valo'ia le ōge tele sa taunu'u i ōna pō o le nofoā'iga a Kaisara Kalaotio (Claudius Caesar).

2. Galu. 13:1 Sa i ai perofeta i le ekalesia i Anetioka.

3. Galu. 15:32 O Iuta ma Sila, o peroteta i la'ua, sa lā fa'amafanafana ma fa'amalosia i le ekalesia.

4. Galu. 21:8-11 O afafine e to'afā o Filipino, o perofeta tama'ita'i i latou.

Manatu Fa'aopoopo: Sa lē gata i tane 'ona tofia e 'avea ma perofeta, a e sa vala'auina fo'i e le Atua ma nisi tama'ita'i amio atua mo lea tofi pa'ia. E i ai Miriama, le tuafafine o Mose (Esoto 15:20); Ana le afafine o Fanuelu, (Luka 2:36); Tepora (Fa'amasino 4:4); Ulata (II Tupu 22:14).

5. I Tesa. 5:20 O le lapata'iga fa'ale-Feagaiga Fou, "'Aua le ta'u fa'atauva'a i perofetaga."

III. Ina ua mavae atu ōna pō o le 'au aposetolo ma le ekalesia muamua, sa tauau ai lava ina valavala fa'aaliga a le 'au perofeta, se'ia o'o ina ua toetoe lava ina e leai. Ua lē 'ese le pogai ua āla ai ona fa'apenā i se isi vaitaimi i ōna pō o le fanauga a Isara'elu.

1. Fa'ata. 29:18 E i ai le feso'ota'iga tāua i le vā o le fa'amamaluina o le tulafono a le Atua ma le maua mai o fa'aaliga ma a'oa'oga mai le agaga o valo'aga. E lē maua lena ta'ita'iga tāua e ni tupulaga o ē ua latou fa'asagatau po 'ua latou fulitua i le tulafono pa'ia a Lē o lo'o afio mai i lugā i le lagi. Sa fa'apenā ōna pō o na tupu mai ai le tama o Samuelu (I Samuelu 3:1).

2. Auēga 2:9 Sa tagi auē Ieremia ona o amio a le nu'u ua latou fa'agaloina ai le tulafono pa'ia a le Atua ma 'ua lē maua ai e perofeta se fa'aaliga mai le Atua.

3. **Tanielu 7:25** Ina ua mavae atu le 'au aposetolo, na tupu mai ai se tasi pule ua ia fa'aliliuina le tulafono a le Atua ma 'ua mulimuli le lalolagi i lana fa'ata'ita'iga. O lea ua taofia ai e le Atua lenei mea alofa tāua o le agaga o valo'aga.

Manatu Fa'aopoopo: O le ta'ita'iga ma le a'oa'oga e maua mai le agaga o valo'aga e puipuiina ma fa'amaopoopoina ai le fe'au a le Atua, ma ta'ita'iina sa'o ai le tala'iga o le 'upu moni. A e a "leai se fa'aaliga, e fa'asalalauina le nu'u," ina 'ua tofu le tagata ma lona manatu ma lana faiga. Ua fa'apenei le fa'amalamalamaga a Misi Parate i lenei fasi fuaiupu: *"A leai se fa'aaliga. A leai se perofeta e feagai ma le Atua, ma fa'aali mai lona finagalo e fa'alauvavale le nu'u."* - *O le Tusi ua Fa'amatalaina ai le Tusi Pa'ia, itulau e 275.*

E lē gata ina o le a tausia le tulafono a le Atua e le Ekalesia mulimuli, a o le a iā i latou fo'i ma lenei mea alofa o le Agaga o Valo'aga.

- IV. Ua fa'aalia mai i le Tusi Pa'ia, o le ekalesia mulimuli i ōna aso e tuā'oi ma le toe afio mai o Iesu, o le a latou tausia le tulafono a le Atua ma o le a iā te i latou fo'i ma le mea alofa o le agaga o valo'aga.

1. **Faaal. 12:17** O fa'aailoga tetele nei e lua o le ekalesia mulimuli:
(1) O le tasi i poloā'iga a le Atua.
(2) O le taofi i le mau iā Iesu Keriso.
2. **Faaal. 19:10** O le mau iā Iesu, o le agaga lea o valo'aga. Fa'auta i le ō fa'atasi o le fa'amamaluina o le tulafono ma le agaga o valo'aga, e pei ona fa'amalamalamama i luga.
3. **I Kori. 1:4-7** Talu ai 'ona o le a fa'a'ato'atoaina le toe fuata'iga o le 'upu moni a le Atua i ōna aso e gata ai, o lea o le a lē mativa ai le ekalesia mulimuli (o ē o fa'atalitali i le Ali'i) i se mea alofa e tasi, e o'o lava fo'i i le molimau iā Keriso (O le agaga o valo'aga lea, Fa'aal. 19:10), o le a fa'amaonia lea iā te i latou.

- V. O le talitonuga o le Ekalesia Aso Fitu, na filifilia e le Atua le tama'ita'i o Misi Eleni Uaita (Mrs. Ellen G. White), e 'avea ma āna 'au'auna perofeta mo ōna aso e gata ai.

1. Ua saunia e Misi Uaita ni tusi tāua e tele. O nei tusi ua tumu i a'oa'oga ma āpoāpoa'iga e ta'ita'iina ai le fanau a le Atua i le āla fa'a-Kerisiano, ma le mautinoa lelei o le uiga tonu o Lona finagalo e pei ona fa'aalia mai i le Tusi Pa'ia.
2. **Ua lē 'avea ia tusi o se tasi Tusi Pa'ia fou, po o se fa'aopoopoga fo'i i le Tusi Pa'ia, e leai lava! A 'ua 'avea o se fesoasoani ua silisili lona aogā mo le fa'amalamalamaina atili o le Afioga a le Atua, a e maise lava o afioga e ta'ita'i tonuina ai le savaliga a le fanau a le Atua i nei aso faigatā ua tatou aulia mai.**
3. Ua taunuu lelei iā Misi Uaita fa'aailoga e le perofeta filifilia a le Atua, ma ua leai sana fa'aaliga po o sana a'oa'oga e tasi ua lē ō gatasi ma afioga tusia a le Atua. I lona soifuāga ma lana a'oa'oga uma, na ia tausisi ai pea i tapula'a aupito maua luga fa'a-Kerisiano.
4. Na maliu lenei 'au'auna aogā i le tausaga e 1914, a e o lo'o tautala mai pea o ia i a'oa'oga ma apoapoa'iga lelei o lo'o aofia i āna tusi e pei ona si'itia pea i ā tatou fa'amatalaga nei, e i ai (ua fa'a-Samoaina): "O La'asaga iā Keriso;" "O A'oa'oga Fa'a-Fa'ata'oto a Keriso;" "O le Fa'anaunauga o Tupulaga;" "O le Finauga Tele," ma isi lava e tele.

TAULOTO: Fa'aaliga 12:17.

O LE FA'ASINO TUSI

Matā'upu 1

1. E. G. White, *O La'asaga iā Keriso*, p. 39. (*Steps to Christ*.)
2. E. G. White, *O La'asaga iā Keriso*, p. 7, 8.

Matā'upu 2

1. D. L. Moody, *Sermons, Addresses, and Prayers*, p. 154.
2. Wilbur F. Crafts, *Must the Old Testament Go?* p. 39.
3. E. G. White, *O Fe'au mo le Ekalesia, Tusi VI*, p. 393. (*Testimonies for the Church, Vol. VI*.)
4. E. G. White, *O La'asaga iā Keriso*, p. 99.

Matā'upu 3

1. E. G. White, *O La'asaga iā Keriso*, p. 123.
2. A. H. Sayce, *Monumental Facts*, p. 23.
3. L. Campbell, *The Bible Under Fire*, pp. 105-106.

Matā'upu 4

1. E. G. White, *O le Finauga Tele, Upu Tomua*, p. 5. (*The Great Controversy*.)
2. *O le Tala i le Ekalesia* (Malua Press), p. 173.

Matā'upu 6

1. *The Temple Dictionary, Jerome's Version*.
2. Martin Luther, *Table Talk*, p. 228.
3. *The Holy Bible, Douay Version, Upu Tomua*.

Matā'upu 8

1. E. G. White, *O le Fa'anaunaga o Tupulaga*, p. 171. (*Desire of Ages*.)
2. E. G. White, *O La'asaga iā Keriso*, p. 100.
3. E. G. White, *O Molimau mo le Ekalesia, Tusi II*, p.189. (*Testimonies for the Church, Vol. II*.)

Matā'upu 9

1. E. G. White, *O le 'Au Faigaluega o le Tala Lelei*, p. 250. (*Gospel Workers*.)
2. E. G. White, *O A'oa'oga*, p. 125. (*Education*.)

Matā'upu 10

1. E. G. White, *O Fe'au o le Fa'amalōlōga*, p. 429. (*Ministry of Healing*.)
2. E. G. White, *O Galuega a le 'Au Aposetolo*, p. 52. (*Acts of the Apostles*.)

Matā'upu 11

1. E. G. White, *O Perofeta ma Tupu*, p. 49. (*Prophets and Kings*.)

Matā'upu 12

1. E. G. White, *O Perofeta ma Tupu*, p. 52.
2. C. H. Spurgeon, *The Perpetuity of the Law*, p. 5.
3. D. L. Moody, *Weighed and Wanting*, pp. 119 – 124.

Matā'upu 13

1. G. Pratt, *O le Fa'amatalaga o le Tusi a Paulo iā Roma* (Malua Press), p. 50.

Matā'upu 15

1. E. G. White, *O La'asaga iā Keriso*, p. 64.

Matā'upu 16

1. E. G. White, *O Pateriaka ma Perofeta*, p. 112. (*Patriarchs and Prophets*.)

Matā'upu 18

1. Dr. Guthrie, *On Sin*.
2. E. G. White, *O La'asaga iā Keriso*, p. 40.

Matā'upu 19

1. E. G. White, *O le Finauga Tele*, p. 530.
2. E. G. White, *O La'asaga iā Keriso*, pp. 104 - 105.

Matā'upu 21

1. E. G. White, *O Pateriaka ma Perofeta*, p. 45.
2. E. G. White, *O Fe'au o le Fa'amalōlōga*, p. 415.

Matā'upu 22

1. E. G. White, *O La'asaga iā Keriso*, p. 16.

Matā'upu 23

1. E. G. White, *O Molimau mo le Ekalesia, Tusi IX*, p. 21. (*Testimonies, Vol. IX*.)

Matā'upu 24

1. G. Pratt, *O le Tusi ua Fa'amatalaina ai le Tusi Pa'ia*, p. 549.

Matā'upu 25

1. E. G. White, *O La'asaga iā Keriso*, p. 21.
2. E. G. White, *O La'asaga iā Keriso*, p. 14.
3. E. G. White, *O La'asaga iā Keriso*, p. 68.
4. E. G. White, *O le Fa'anaunaga o Tupulaga*, pp. 805, 825.

Matā'upu 26

1. E. G. White, *O La'asaga iā Keriso*, p. 59.
2. E. G. White, *O A'oa'oga Fa'a-Fa'ata'oto a Keriso*, p. 152. (*Christ's Object Lessons*.)
3. E. G. White, *O La'asaga iā Keriso*, p. 24.

Matā'upu 27

1. E. G. White, *O La'asaga iā Keriso*, p. 56.
2. E. G. White, *O La'asaga iā Keriso*, p. 76.

Matā'upu 28

1. E. G. White, *O La'asaga iā Keriso*, p. 77.

Matā'upu 31

1. G. Pratt, *O le Tusi ua Fa'amatalaina ai le Tusi Pa'ia*, p. 29.

Matā'upu 32

1. E. G. White, *O le Fa'anaunauga o Tupulaga*, p. 24.

Matā'upu 33

1. E. G. White, *O le Fa'anaunauga o Tupulaga*, p. 24.

Matā'upu 34

1. E. G. White, *O le Fanaunauga o Tupulaga*, pp. 685 – 686.
2. E. G. White, *O le Fa'anaunauga o Tupulaga*, p. 752.
3. E. G. White, *O le Fa'anaunauga o Tupulaga*, p. 753.

Matā'upu 35

1. E. G. White, *O le Fa'anaunauga o Tupulaga*, p. 786.

Matā'upu 36

1. E. G. White, *O le Fa'anaunauga o Tupulaga*, p. 669.
2. E. G. White, *O le Fa'anaunauga o Tupulaga*, p. 830.
3. E. G. White, *O Fe'au o le Fa'amalōlōga*, p. 421.

Matā'upu 37

1. E. G. White, *O Pateriaka ma Perofeta*, p. 184.

Matā'upu 38

1. E. G. White, *O Pateriaka ma Perofeta*, p. 343.
2. E. G. White, *O le Finauga Tele*, p. 488.

Matā'upu 39

1. E. G. White, *O le Finauga Tele*, p. 489.

Matā'upu 40

1. E. G. White, *O le Finauga Tele*, p. 488.

Matā'upu 41

1. G. Pratt, *O le Tusi ua Fa'amatalaina ai le Tusi Pa'ia*, p. 388.

Matā'upu 42

1. E. G. White, *O le Finauga Tele*, pp. 486 – 487.
2. E. G. White, *O le Finauga Tele*, p. 480.

Matā'upu 45

1. *Manual of Christian Doctrine* (Roman Catholic), p. 438.
2. Rev. Joseph Faa diBruno, D.D., *Catholic Belief*, p. 101.
3. Cardinal Herbert Vaughan, *On the Holy Sacrifice of the Mass*, p. 42.
4. Charles A. Martin, *Catholic Religion, Papal Ed.*, p. 195.
5. *The Pilot* (Roman Catholic) (Boston), May 29, 1915.
6. Rev. J. W. Hills (Misi Elise, L.M.S.), *O Mataupu e Fa'avaeina ai le Lotu Porotesano* (Malua Press), p. 110.
7. Aifonaus M. DeLiguori, *The Glories of Mary*, p. 96.
8. Michael Muller, CSSR., *Charity for the Souls in Purgatory*, p.181.
9. Extracts from *Rerraris' Ecclesiastica Dictionary* (Roman Catholic), article on "The Pope."

10. *The Great Encyclical Letters of Pope Leo XIII*, p. 304.
11. Rev. J. Prendergast, S.J. (Roman Catholic), *Extracts from Sermon*, Syracuse Post-Standard (New York), March 14, 1912.
12. Rev. A. Nampion, S.J. (Roman Catholic), *Catholic Doctrine as Defined by the Council of Trent*, p. 62.
13. *The True Voice* (Roman Catholic) (Omaha, Neb.), April 18, 1913.
14. Rev. Peter Geiermann, CSSR., *The Convert's Catechism of Catholic Doctrine*, 2nd Edition, 1910, p. 50.

Matā'upu 47

1. E. G. White, *O Perofeta ma Tupu*, pp. 537, 717.
2. E. G. White, *O le Finauga Tele*, pp. 612, 621.
3. E. G. White, *O A'oa'oga Fa'a-Fa'ata'oto a Keriso*, p. 121.

Matā'upu 48

1. William Herbert Hobbs, *Earthquakes*, pp. 142 – 143.
2. J. Nourse, *The History and Philosophy of Earthquakes*, p. 334.
3. *Noah Webster's Dictionary*, 1869 Edition, on "Earthquakes."
4. *Stone's History of Veberly*, (Massachussettes, U.S.A.).
5. R. M. Devens, *Our First Century*, Chapter 4, "The Wonderful Dark Day – 1780," p. 95.
6. Milo Bostwick, *Quoted in "Facts for the Time,"* (New York, March 3, 1848), p. 67.
7. Agnes M. Clerke, *History of Astronomy in the 19th Century*, p. 328.
8. *American Journal of Science and Arts*, Vol. XXV.

Matā'upu 49

1. E. G. White, *O le Finauga Tele*, p. 593.

Matā'upu 50

1. G. Pratt (Misi Parate, L.M.S.), *O le Tusi ua Fa'amatalaina ai le Tusi Pa'ia*, p. 668.

Matā'upu 52

1. E. G. White, *O le Finauga Tele*, p. 671.

Matā'upu 53

1. E. G. White, *O Pateriaka ma Perofeta*, 201.
2. A. G. Daniels, *O Keriso la Tatou Amiotonu*, p. 123. (*Christ Our Righteousness*).
3. E. G. White, *Pateriaka ma Perofeta*, p. 203.

Matā'upu 54

1. E. G. White, *O le Finauga Tele*, p. 678.

Matā'upu 55

1. C. H. Spurgeon, *The Perpetuity of the Law*, p. 5.
2. Rev. G. Pratt, *O le Fa'amatalaga o le Tusi a Paulo iā Roma* (Malua Press), p. 50.
3. George Turner (Misi Tana), L.L.D., *O le Galuega a le Au'auna a Iesu, Lomiga 2* (Malua Press), pp. 16, 17.
4. Adam Clarke (Methodist), *On "Romans 7:13."*
5. C. H. Spurgeon, *The Perpetuity of the Law*, pp. 10, 11.
6. Rev. J. W. Sibre (Misi Saipele, L.M.S.), *O Lauga i le Afioga a le Atua* (Malua Press), p.111.

Matā'upu 56

1. *Greenfield's Greek Lexicon*.
2. G. Pratt, *O le Tusi ua Fa'amatalaina ai le Tusi Pa'ia*, p. 443.
3. *Noah Webster's Dictionary* on "Fulfill."
4. Rev. George Turner, *O Lauga i le Afioga a le Atua* (Malua Press), p.218.
5. *Works of Wesley, Sermon XXV* (7-Volume Edition), Vol I, pp. 225, 226.

Matā'upu 57

1. *Ta'utinoga na Faia i Savoi (Savoy Declaration)*, Mataupu XIX.
2. *Lauga a Ioane Ueselē (Sermons on Several Occasions)*, *Lauga XXV* (2-Volume Edition), Vol. I, pp.221, 222.
3. D. L. Moody (Assemblies), *Ua Fuatia a ua Māmāsagia (Weighed and Wanting)*, p. 14.
4. *The Thirty-Nine Articles, Article 8* (Anglican).
5. G. Pratt, *O le Tusi ua Fa'amatalaina ai le Tusi Pa'ia* (L.M.S.), p.559.

Matā'upu 59

1. E. G. White, *O Pateriaka ma Perofeta*, p. 431.

Matā'upu 60

1. Martin Luther, *Sermons on Genesis, Enlarged Edition (O Lauga i le Kenese)*, Vol. XXXIII, p. 67.

Matā'upu 61

1. *O Tū Fa'a-Iutaia ua Ta'ua i le Tusi Pa'ia* (L.M.S.), p. 100.
2. Augustus Neander, *Rose's Neander*, p. 186.

Matā'upu 62

1. *Noah Webster's Dictionary* on "Saturday," "Sunday."

Matā'upu 63

1. R. W. Dale, M.A. (Assembly of God), *The Ten Commandments*, pp. 106, 107.
2. Canon Eyton (Anglican), *The Ten Commandments*, pp. 62 – 65.
3. R. Watson (Methodist), *A Dictionary of the Bible* on "The Lives of the Wesleys."
4. A. Binney (Methodist), *Theological Compend*, pp. 180 – 181.
5. Cardinal Gibbons (Roman Catholic), *The Faith of Our Fathers*, p. 111.
6. *O le Ekalesia a Iesu Kilisitō* (Lomiga Katoliko), Moamoa, 1924.
7. *Ta'utinoga a Dr. Lyman Abbot*, Christian Union, Jan. 19, 1882.
8. E. G. White, *O le Finauga Tele*, p. 54.

Matā'upu 64

1. Albert Barnes (Presbyterian), *Commentary on "The Book of Daniel,"* pp. 313 – 314.
2. G. Pratt, *O le Tusi ua Fa'amatalaina ai le Tusi Pa'ia*, p. 670.
3. *Butler's Catechism* (Roman Catholic), p. 28.
4. Rev. Peter Geiermann, *Convert's Catechism of Catholic Doctrine*, pp. 48 – 49.
5. Rev. Stephen Keenan, *A Doctrinal Catechism*, p. 147.
6. Henry Tuberville, D.D., *An Abridgement of Christian Doctrine*, 1649.
7. Burns and Oates (Roman Catholic), *Library of Christian Doctrine: Why Don't You Keep Holy the Sabbath Day?* (London), pp. 3, 4.
8. E. G. White, *O Perofeta ma Tupu*, p. 178.

Matā'upu 66

1. G. Pratt, *O le Tusi ua Fa'amatalaina ai le Tusi Pa'ia*, pp. 663, 666.
2. H. F. Thomas (for Cardinal Gibbons, Roman Catholic), Quoted in *Bible Readings for the Home Circle*, pp. 449, 450.
3. Henry Tuberville, *An Abridgement of Christian Doctrine*, p. 58.
4. E. G. White, *O le Finauga Tele*, p. 594.

Matā'upu 67

1. E. G. White, *O le Finauga Tele*, p. 605.

Matā'upu 68

1. G. Pratt, *O le Tusi ua Fa'amatalaina ai le Tusi Pa'ia*, p. 72.
2. *O Nai Upu i le Lotu Pope* (L.M.S.), p. 109.

Matā'upu 70

1. E. G. White, *O le 'Au Faigaluega o le Tala Lelei*, p. 227.

Matā'upu 71

1. G. Pratt, *O le Tusi ua Fa'amatalaina ai le Tusi Pa'ia*, p. 524.
2. E. G. White, *O Molimau mo le Ekalesia, Tusi VI*, p. 91.

Matā'upu 72

1. E. G. White, *O le Fa'anaunauga mo Tupulaga*, p. 650.
2. Kitto, *Cyclopedia of Biblical Literature* on "The Washing of Feet."
3. *Waldensia Confession of Faith*, p. 12.
4. Prof. C. Schmidt, *History and Doctrine of the Sect of the Cathares or Albigeneses* (University of Strassburg), p. 26.

Matā'upu 74

1. Rev. Thomas Powell (Misi Paueli, L.M.S.), *Malua Press*, pp. 2, 3.
2. Rev. Thomas Powell, p. 230.
3. E. G. White, *O A'oa'oga*, p. 195.

Matā'upu 75

1. Uriah Smith, *Here and Hereafter*, p. 65.

Matā'upu 76

1. Definitions from Gesenius, Parkhurst, Greenfield, Robinson, Hebrew and Greek Lexicons.

Matā'upu 77

1. E. G. White, *O le Fa'anaunauga o Tupulaga*, p. 787.

Matā'upu 78

1. G. Pratt, *O le Tusi ua Fa'amatalaina ai le Tusi Pa'ia*, p. 671.

Matā'upu 80

1. E. G. White, *O La'asaga iā Keriso*, pp. 36, 37.

Matā'upu 81

1. J. B. Rotherham, *Rotherham's Translation of the New Testament* on "Luke 23:43."

2. E. W. Bullinger, *Companion Bible, Part V, Appendix* 175.
3. G. Pratt, *O le Tusi ua Fa'amatalaina ai le Tusi Pa'ia*, p. 1.

Matā'upu 84

1. Rev. J. E. Well (Misi Neueli, L.M.S.), *Lauga i le Fono i Malua*, Me 4, 1909.
2. *O Le Sulu Samoa* (L.M.S.), Me/Iuni 1909.
3. E. G. White, *O le Finauga Tele*, p. 560.

Matā'upu 85

1. E. G. White, *O le Fa'anaunaga o Tupulaga*, p. 805.

Matā'upu 86

1. E. G. White, *A'oa'oga Fa'a-Fa'ata'oto a Keriso*, p. 206.

Matā'upu 87

1. E. G. White, *O Galuega a le 'Au Aposetolo*, p. 51.

Matā'upu 88

1. G. Pratt, *O le Tusi ua Fa'amatalaina ai le Tusi Pa'ia*, p. 275.